

# TNÚHU NÍ CHÍDÓ TNÙNÍ TÉ MÀTEÚ

*Nchaa cue téé ní xíndecu ndéé sanaha cǔtnàhá  
vátá quíxí-gǎ Xítóhó Jesucristú*

*(Lc. 3:23-38)*

<sup>1</sup> Te ñaní tnáhá Xítóhó Jesucristú ní cuu ndíi Dàvíí ndíhi ndíi Àbrahám, cue téé ní xíndecu ndéé sanaha vīhi-gá ñuyíú-a. Te duha ndùu cuendá dava-gá cue téé ní cuu ñaní tnáhá-gǎ ní xíndecu ndéé sanaha.

<sup>2</sup> Ndíi Àbrahám ní xóo ñ<sup>n</sup> déhe ndíi, te ndíi-á<sup>n</sup> ñí xínani ndíi Isàác. Te déhe ndíi Isàác-á<sup>n</sup> ñí cuu ndíi Jàcób, te déhe ndíi Jàcób-á<sup>n</sup> ñí cuu ndíi Jùdá, te ñíu-ni ndíi Jàcób-á<sup>n</sup> ñí cuu tātá dava-gá cue ñaní ndíi Jùdá-á<sup>n</sup>.

<sup>3</sup> Te déhe ndíi Jùdá-á<sup>n</sup> ndíhi ñadìhí ndíi, ndíi Tàmár ní cuu ndíi Fàrés ndíhi ndíi Zàrá. Te déhe ndíi Fàrés-á<sup>n</sup> ñí cuu ndíi Èsróm, te déhe ndíi Èsróm-á<sup>n</sup> ñí cuu ndíi Àrám.

<sup>4</sup> Te déhe ndíi Àrám-á<sup>n</sup> ñí cuu ndíi Aminàdáb, te déhe ndíi Aminàdáb-á<sup>n</sup> ñí cuu ndíi Nàsón, te déhe ndíi Nàsón-á<sup>n</sup> ñí cuu ndíi Sàlmón.

<sup>5</sup> Te ñadìhí ndíi Sàlmón-á<sup>n</sup> ñí xínani-a<sup>n</sup> Ràháb, te ní xóo ñ<sup>n</sup> déhe-yu ní xínani-dě Bòóz. Te ñadìhí ndíi Bòóz-á<sup>n</sup> ñí xínani-a<sup>n</sup> Rüt, te ní xóo ñ<sup>n</sup> déhe-yu ní xínani-dě Òbéd, te déhe ndíi Òbéd-á<sup>n</sup> ñí cuu ndíi Isàí.

<sup>6</sup> Te déhe ndíi Isàí-á<sup>n</sup> ñí cuu ndíi Dàvíí téé ní xíndaha ñàha xii cue ñáyiú isràél. Te déhe ndíi Dàvíí-á<sup>n</sup> ndíhi ñadìhí ndíi ní cuu ndíi Salòmón.

Te díhna-gá ndíi Ùriás ní cándeca ndíi ñadìhí-án te dātnùnì ní naquehe<sup>n</sup> ñaha ndíi Dàvíí-án.

7 Te déhe ndíi Salòmón ní cuu ndíi Ròboám, te déhe ndíi Ròboám-án nǐ cuu ndíi Àbiás, te déhe ndíi Àbiás-án nǐ cuu ndíi Àsá.

8 Te déhe ndíi Àsá-án nǐ cuu ndíi Josàfát, te déhe ndíi Josàfát-án nǐ cuu ndíi Jòráám, te déhe ndíi Jòráám-án nǐ cuu ndíi Ùziás.

9 Te déhe ndíi Ùziás-án nǐ cuu ndíi Jòtám, te déhe ndíi Jòtám-án nǐ cuu ndíi Àcáz, te déhe ndíi Àcáz-án nǐ cuu ndíi Ezèquiás.

10 Te déhe ndíi Ezèquiás-án nǐ cuu ndíi Manàsés, te déhe ndíi Manàsés-án nǐ cuu ndíi Àmón, te déhe ndíi Àmón-án nǐ cuu ndíi Jòsiás.

11 Te déhe ndíi Jòsiás-án nǐ cuu ndíi Jecòniás. Te ñu-ñu ndíi Jòsiás-án nǐ cuu tātá nchaa dava-gá cue ñani ndíi Jecòniás-án. Te dàvá-án nǐ quide yica cuè téé ñuú Babiloniá ndécá-güedě ñáyiú isràél cuáhán ñuú-güedé cuendá yàcá<sup>n</sup> cundecú-yu.

12 Te sātá nǐ yáha duca<sup>n</sup> nǐ cuu, te ndíi Jecòniás ní xóo ñ<sup>n</sup> déhe ndíi ndíi ñadìhí ndíi, te téé-án nǐ xínani-dě Salàtiél. Te déhe ndíi Salàtiél-án nǐ cuu ndíi Zorobàbél.

13 Te déhe ndíi Zorobàbél-án nǐ cuu ndíi Àbiúd, te déhe ndíi Àbiúd-án nǐ cuu ndíi Eliàquím, te déhe ndíi Eliàquím-án nǐ cuu ndíi Àzór.

14 Te déhe ndíi Àzór-án nǐ cuu ndíi Sàdóc, te déhe ndíi Sàdóc-án nǐ cuu ndíi Àquím, te déhe ndíi Àquím-án nǐ cuu ndíi Èliúd.

15 Te déhe ndíi Èliúd-án nǐ cuu ndíi Eleàzár, te déhe ndíi Eleàzár-án nǐ cuu ndíi Màtán, te déhe ndíi

Màtán-á<sup>n</sup> nǐ cuu ndíi Jàcób.

16 Te déhe ndíi Jàcób-á<sup>n</sup> nǐ cuu ndíi Chèé téé ní cuu y<sup>ii</sup> tá Màriá xíchí nǐ cuu nǎná Jèsús Yaá ní tendaha Dǔtú Ndiǒxí ní quixi ñuyíú-a.

17 Te sa ní cuu úxúú tnàhá cue téé cùu ñaní tnáhá ndíi Àbrahám ndécú dàvá-á<sup>n</sup>, te dǎtnùní ní cacu ndíi Dàvíí ñu-ni ñaní tnáhá ndíi. Te núú tnàhá méé ndíi Àbrahám ndíi ndíi Dàvíí ní cuu úxícúmí tnàhá-güedé. Te duca<sup>n</sup> te sa ní xínu úxícúmí-gǎ tucu-güedé ní cacu, te dǎtnùní ní tñi ñaha cuè téé ñúú Babiloniá xii ñáyíu isràél ndécá ñàha-güedé xii-yu cuáhá<sup>n</sup> ñúú-güedé cuèndá yàcá<sup>n</sup> cundecú-yu. Te sáta nǐ yáha sá dúcá<sup>n</sup> nǐ cuu, te ní cacu úxúú tucu cue téé ní cuu ñaní tnáhá ndíi Àbrahám ndíi ndíi Dàvíí, te dǎtnùní ní cacu Xítóhó Jesucristú ñuyíú-a. Te núú tnàhá méé-gǎ ní cuu úxícúmí tnàhá-güedé.

*Ní cacu Jèsús  
(Lc. 2:1-7)*

18 Te duha ní cuu cútnàhá ní cacu Xítóhó Jesucristú, chi dàvá-á<sup>n</sup> nǐ xíndecu ñ<sup>n</sup> xíchí cuéché nǐ xínani Màriá. Te xíchí-ǎ<sup>n</sup> sa ní cundáá tnúhu sá tnándaha-xi ndíi ñ<sup>n</sup> téé nàni Cheé. Te cùmání-gǎ tnándaha-xi ndíi téé-á<sup>n</sup> te Espíritú Yǎ Ndiǒxí ní quide ní ngúhu<sup>n</sup> déhe-xi.

19 Te té Chèé téé cùní candeca ñaha xii xíchí-ǎ<sup>n</sup> nǐ cutnùní iní-dé sá ñúhú dǎhe-xi. Te cùu-dé ñ<sup>n</sup> téé quide ndáá, núu xíá<sup>n</sup> duu<sup>n</sup> duu<sup>n</sup> ní sani iní-dé sá vǎ tnándaha-gá-dé ndíi-xi, te dícó-ni sá ñà túú ní cǎhá<sup>n</sup>-dé chi ní cuíní-dé sá vǎ cǎhá<sup>n</sup> cuèhé cǎhá<sup>n</sup> duha ñáyíu cuèndá-xi.

20 Te sáta dúcá<sup>n</sup> nǐ sani iní-dé te ní ngáva-dé ní xídí-dé, te núú sàní-dé ní sáhá<sup>n</sup> ñ<sup>n</sup> espíritú xínú cuèchi núú Yă Ndiõxí ní xáha<sup>n</sup>-xi xii-dé:

—Yòhó té Chèé téé cùu ñaní tnáhá ndǐ Dàvií, yúhú càchí tnúhu-í xii-n sǎ ñà túú nǎ caní iní-n, tnándaha nahi-ni-n ndǐhi tá Màriá cuèi ñùhu déhe-xi, chi mee Espíritú Yă Ndiõxí ní quide-xi duca<sup>n</sup> nǐ ngúhu<sup>n</sup> déhe-xi.

21 Te na càcu déhe-xi-á<sup>n</sup> te danàni-n-dé Jèsús. Te duca<sup>n</sup> cùnani-dé, chi téé-á<sup>n</sup> cada-dé cuendá sá vǎ cùndècu-gá cue ñaní tnáhá-dě ñáyiu isràél ichi cuèhé ichi duha —duha ní xáha<sup>n</sup> espíritú-á<sup>n</sup> xii té Chèé-á<sup>n</sup> núú sàní-dé.

22 Te duca<sup>n</sup> nǐ cuu chi ní quee ndáá-xi nàcuáa ní xáha<sup>n</sup> Yă Ndiõxí xii ñ<sup>n</sup> téé ní cáhá<sup>n</sup> tnúhu-gá ndéé sanaha. Te téé-á<sup>n</sup> nǐ chídó tnùní-dé núú tütú-gá nàcuáa ní xáha<sup>n</sup>-gǎ xii-dé, te duha ní xáha<sup>n</sup>-gǎ:

23 Cundecu ñ<sup>n</sup> xíchí cuéché ndèé cuèé-gá.

Te òré ndécú íi-xi vátá ñhí-gá yǐ-xi te ngúhu<sup>n</sup> déhe-xi.

Te òré ná cǎcú dǎhe-xi te danàni ñahá-yu Emànuél. Duha ní xáha<sup>n</sup>-gǎ xii téé-á<sup>n</sup> nǐ chídó tnùní-dé núú tütú-gá. Te tnúhu Emànuél-á<sup>n</sup> quéé-xí: Yá Ndiõxí ndécú ndǐhi-o. Núú xǎ<sup>n</sup> duca<sup>n</sup> nǐ cuu vitna.

24 Te òré ní ndiquíú ìní té Chèé-á<sup>n</sup> te ní quide-dé nàcuáa ní xáha<sup>n</sup> espíritú-á<sup>n</sup> xii-dé chi ní tnándaha-dé ndǐhi tá Màriá.

25 Dico ndǐ díí<sup>n</sup> nǐ xíndécú-yu ndéé ní sáá nduu nǐ cacu déhe-xi. Te òré ní cacu déhe-xi-á<sup>n</sup> te ní dánání ñaha-dé Jèsús.

## 2

*Cue téé cuángoto ñaha xii Jesús*

<sup>1</sup> Te Jèsús ní cacu-gá ì<sup>n</sup> ñuú nání Bèlén, te ñuú-á<sup>n</sup> yíndèhu-xi distritú Jùdeá. Te dàvá-á<sup>n</sup> cúnùu té Hèrodés yíndàha-dé ñáyíu. Te ñuú Jerusàlén ní quexìo cue tée véxi ndàa xio nacuáa quène nchíanchii, cue tée túha dàcuaha cuendá nchaa sá ndéé andíu.

<sup>2</sup> Te ndùcu tnúhu-güedé núú ñáyíu ñuú-á<sup>n</sup>, te xáha<sup>n</sup>-güedě:

—¿Vá cündèe iní-ndó càchí tnúhu-ndo ndéé ndécú tée quíndaha ñàha xii ñáyíu isràél-ǎ<sup>n</sup>? Chi ní xiní-ndí ní quene chódíní-dě ndàa xio nacuáa quène nchíanchii, núu xíǎ<sup>n</sup> véxi-ndí chi cuíní-ndí quiní-ndí-dé te chiñuhu-ndí-dé —càchí-güedé xáha<sup>n</sup>-güedě xii-yu.

<sup>3</sup> Te òré ní níhí tée cúnúu nani Herodés tnúhu sá ndécú tnúhu cue tée-á<sup>n</sup> ndéé ndécú tée quíndaha ñàha xii ñáyíu isràél, te ñá túú tnàhí ní cùu váha iní-dé, te ñíu-ni duca<sup>n</sup> ñà túú ní cùu váha iní tnàhá nchaa ñáyíu ñuú-á<sup>n</sup>.

<sup>4</sup> Te ní cana-dé cue tée cùu dútú cúnùu, ndihí cue tée dàcuaha ñaha xii ñáyíu nchaa tnúhu ní chídó tnùní ndí Moisés, te ní xícá<sup>n</sup> tnúhú-dě núú-güedě nùu xìní-güedé ndéé cacu Crístú tée tendaha Yá Ndiǒxí quixi ñuyíú-a.

<sup>5</sup> Te ní xáha<sup>n</sup>-güedě xii-dé:

—Ì<sup>n</sup> ñuú yíndèhu distritú Jùdeá cacu-dé, te ñuú-á<sup>n</sup> nání-xí Bèlén, chi quee ndáá-xi nàcuáa ní xáha<sup>n</sup> Yá Ndiǒxí xii ì<sup>n</sup> tée ní xóo cáhá<sup>n</sup> tnúhu-gá ndéé sanaha. Te duha ndùu tnúhu ní chídó tnùní-dé núú tütú-gá:

<sup>6</sup> Ñuú Bèlén cúú-xí ì<sup>n</sup> ñuú lìhli yíndèhu distritú Jùdeá, te ío-gá cúnùu-xi dacúxí dàva-gá ñuú

cùnùu yìndehu distritú-án,  
 chi diu ñuú-án quee ìí<sup>n</sup> téé ío cùnùu.  
 Te téé cunuu-án quìndaha-dě ñáyiú cùu cuendá-í  
 ñáyiú isràél.

Duha ní xáha<sup>n</sup>-gǎ xii téé ní xóo cáhá<sup>n</sup> tnúhu-gá, te  
 duca<sup>n</sup> ñí chídó tnùn-í-dé núú tütú-gá —càchí-güedé  
 xǎha<sup>n</sup>-güedě xii té Hèrodés.

<sup>7</sup> Te sátá dúcá<sup>n</sup> te té Hèrodés dayuhu ñí cana-dé  
 cue téé ndùcu tnúhu núu ndéé ní cacu téé  
 quìndaha ñàha xii ñáyiú isràél, te ní xícá<sup>n</sup> tnúhú-dě  
 núú-güedě ná nduu cùu-xi nduu díhna nuu ñí  
 xiní-güedé chódíní.

<sup>8</sup> Te sátá dúcá<sup>n</sup> te ní xáha<sup>n</sup>-dě xii-güedé:

—Chí cuáhá<sup>n</sup> ñuú Bèlén te nducu tnúhu váha-ndo  
 nùu ndéé ní cacu téé duca<sup>n</sup> quìndaha ñàha xii ñáyiú  
 isràél. Te òré ná nàníhí-ndó-dě te quixi-ndo càchí  
 tnúhu-ndo cuendá quíhí<sup>n</sup>-í tnàhá-í chiñuhu-í-dé —  
 càchí-dé xǎha<sup>n</sup>-dě xii-güedé.

<sup>9</sup> Te sátá dúcá<sup>n</sup> ñí xáha<sup>n</sup> tǎ Hèrodés-án te ní  
 xica-güedé cuáhá<sup>n</sup>-güedé. Te chódíní ñí xiní-güedé  
 ní quene ndàa xio nacuáa quène nchíanchii-án  
 yòdo nuu-di núú-güedě cuáhá<sup>n</sup>. Te ní ngüíñí  
 chódíní-ǎ<sup>n</sup>, te núú ñí ngüíñí-di-án yíndǎá núú  
 ndécú Jèsús.

<sup>10</sup> Te òré ní xiní cue téé-án ñí ngüíñí chódíní-ǎ<sup>n</sup>  
 nùu yíndǎá ndécú-gǎ, te ní cudíí víhí ìní-güedé.

<sup>11</sup> Te duca<sup>n</sup> te ní quexìo-güedé ndéé núú cáa  
 vèhe ndecu Jesús. Te òré cuánguihu-güedé xítí  
 vehe te ní xiní-güedé Jèsús ndécú-gǎ ndihí nǎná-gǎ  
 Màriá. Te ní ngüíñí xítí-güedě, te ní ngüíta-güedé  
 ní cachí-güedé sá ío càhnu cuu Jesús. Te dǎtnùn-í  
 ní nacaá<sup>n</sup>-güedé cǎjá xínehe-güedé, te ní tava-güedé

díhú<sup>n</sup> cuáá<sup>n</sup>, ndihí dúsa sá ïo váha sàhá<sup>n</sup> tnámí nàni insiensú, ndihí yúcu sã nání mìrrá ní taxi ndecu-güedé núú Jèsús cuendá cuu-xi ï<sup>n</sup> táhú sã cúú-xí-gã.

<sup>12</sup> Te Yá Ndiöxí ní cáhá<sup>n</sup>-gá núú sàní-güedé, te xãha<sup>n</sup>-gã xii-güedé sá vã náyãha-gá-güedé cáhá<sup>n</sup> ndihí-güedé té Hèrodés. Núu xiã<sup>n</sup> cue téé-á<sup>n</sup> cuãnuhú-güedé ïngá ichi, te ñã túú-gã ní nàyãha-güedé núú ndécú tẽ Hèrodés.

### *Cuáhá<sup>n</sup>-yu ndihí Jèsús nàció<sup>n</sup> Ègiptú*

<sup>13</sup> Te sátá ñí yáha cuãnuhú cue téé ní sãngoto ñaha xìi Jèsús, te ní quexìo ï<sup>n</sup> espíritú xínú cuèchi núú Yã Ndiöxí núú sàní té Chèé, te xãha<sup>n</sup>-xi xìi-dé:

—Véxi-í càchí tnúhu-í xii-n sã ndàcáo-n, te ndee-n ñúú-a ndihí Jèsús, ndihí nãná-gã cunu-ndo quíhí<sup>n</sup>-ndó nàció<sup>n</sup> Ègiptú, chi té Hèrodés tendaha-dé cue téé quixi nanducu ñaha xii Jèsús cuendá cahni ñaha-güedě. Te yàcá<sup>n</sup> cundecu-ndo nděé cachí tnúhu-í xii-n ndùu ndixi-ndo —cachí espíritú-á<sup>n</sup> xãha<sup>n</sup>-xi xìi té Chèé núú sàní-dé.

<sup>14</sup> Te té Chèé-á<sup>n</sup> ñí ndacáo-dé, te niú ní xica-dé ndihí tá Màriá ndécã-yu Jèsús cuáhá<sup>n</sup> nàció<sup>n</sup> Ègiptú.

<sup>15</sup> Te nàció<sup>n</sup> Ègiptú-á<sup>n</sup> ndécũ-yu ní xíhí té Hèrodés. Te duca<sup>n</sup> ñí cuu chi ní quee ndáá-xi nàcuáa ní cachí ï<sup>n</sup> téé ní xóo cáhá<sup>n</sup> tnúhu Yá Ndiöxí ndéé sanaha ñí quide-dé núú-gã ní cáhá<sup>n</sup>-dé yuhu-gá, te duha ní xáha<sup>n</sup>-gã ní cáhá<sup>n</sup>-dé: “Nàció<sup>n</sup> Ègiptú ndécú Dêhe-í ní cùu, te ní xáha<sup>n</sup>-ï xii-dé sá ndéé-dě ñúú-á<sup>n</sup> vã cündècu-gá-dé”, duha ní xáha<sup>n</sup>-gã xii téé ní cáhá<sup>n</sup> tnúhu-gá ní quide-dé núú-gã.

### *Té Hèrodés ní táúchíú<sup>n</sup>-dě cahni-güedé cue landú*

16 Te cue téé ní sángoto ñaha xii Jesús ní dándàhú-güedé té Hèrodés, chi ñá túú ní nàyáha-güedé cúñaha-güedě sá ñi naníhí-güedě Jèsús. Te sátá ñi cutnùní iní té Hèrodés sá ñi dándàhú ñáhá-güedě xii-dé te ní cudéé<sup>n</sup> víhí-dě, te ní tendaha-dě cue téé cuáhá<sup>n</sup> ñuú Bèlén, ndihí nchaa dava-gá ñuú cáá yàtni xiá<sup>n</sup> cuendá cahni-güedé mee-ñi cuè landú téé. Te ndéé cue landú íhí ñi cacu, ndihí ndéé cue landú sa ní nútnahá úú cuíá-xi nchaa-güexi cahni-güedé ní xáha<sup>n</sup>-dě. Te duca<sup>n</sup> ñi quide-dé chi ní quide cuendá-dé nàcuáa ndùu tnúhu ní xáha<sup>n</sup> cuè téé ní sángoto ñaha xii Jesús nduu ñi xini-güedé chódíní, núu xiá<sup>n</sup> duca<sup>n</sup> ñi táúchíú<sup>n</sup>-dě ní quide cue téé-á<sup>n</sup>.

17 Te duca<sup>n</sup> ñi cuu chi ní quee ndáá-xi nàcuáa ní cachí ndíi Jeremiás téé ní xóo cáhá<sup>n</sup> tnúhu Yá Ndiöxí ndéé sanaha, te duha ní cachí ndíi:

18 Ní tecú ndàhí víhí ñäyiu ñuú Ràmá sá ndìhú iní-yu,  
te ñäyiu xĩndáhyú-á<sup>n</sup> cúŷ-yu ññaní tnáhá tã Ràquél, te ndàhyú-yu cuendá sá ñi xíhí déhe-yu.

Te ñäyiu-á<sup>n</sup> ñà túú ní cuíní-yu dàñá-yu sá ndìhú iní-yu cuendá sá ñi xíhí déhe-yu.

Duha ní cachí ndíi Jeremiás.

19 Te sátá ñi xíhí té Hèrodés te ní sáhá<sup>n</sup> tucu espíritú xínú cuèchi núú Yá Ndiöxí núú sàní té Chèé òré ndécú-dě nàció<sup>n</sup> Ègiptú, te ní xáha<sup>n</sup>-xi xii-dé:

20 —Véxi tucu-í càchí tnúhu-í xii-n sã ndácõ-o-n, te núhú-n ndihí Jesús ndihí nãná-gã ñuú cue ññaní tnáhá-n ñäyiu isràél cundecu-ndo, chi sa ní xíhí cue téé cuíní cahni ñaha xii Jesús ní cùu —cachí espíritú-á<sup>n</sup> xáha<sup>n</sup>-xi xii té Chèé núú sàní-dé.



21 Te té Chèé-á<sup>n</sup> ñí ndacóo-dé, te ní ndee-dé ndihi Jèsús ndihi náná-gǎ cuánuhú-yu ñuú cue ñáyiú is-ràél ñáyiú cùu ñaní tnáhǎ-yu.

22 Te té Chèé ní níhí-dě tnúhu sá tǎ Arquelaú ní nucúnutnǎi-dé núú tǎtá-dě té Hèrodés distritú Jùdeá yíndàha-dé ñáyiú. Te ní yùhú té Chèé-á<sup>n</sup>, te ñá túú ní cuení-dé quíhí<sup>n</sup>-dé cundecu-dé distritú-á<sup>n</sup>. Te Yá Ndiǒxí ní cáhá<sup>n</sup>-gǎ núú sàní-dé, te ní xáha<sup>n</sup>-gǎ xii-dé sá quíhí<sup>n</sup>-dé distritú Galileá, núú xíǎ<sup>n</sup> yàcá<sup>n</sup> cuáhá<sup>n</sup>-yu.

23 Te òré ní quexió-yu distritú Galileá, te ní sáhá<sup>n</sup>-yu ì<sup>n</sup> ñuú nání Nàzarét ní xíndecú-yu. Te duca<sup>n</sup> ñí cuu chi ní quee ndáá-xi nàcuáa ní cachí cue téé ní xóo cáhá<sup>n</sup> tnúhu Yá Ndiǒxí ndéé sanaha sá Jèsús cuu-gǎ téé ñuú Nazàrét.

### 3

*Té Juáá téé dàcuandute ñaha xii ñáyiú càhá<sup>n</sup>-dé tnúhu Yá Ndiǒxí xití yucu*

*(Mr. 1:1-8; Lc. 3:1-9, 15-17; Jn. 1:19-28)*

1 Te ní xica nduu sá dúcá<sup>n</sup> ñí cuu, te téé nàni Juáá téé dacuandute ñaha xii ñáyiú ní quexio-dé yucu distritú Jùdeá càhá<sup>n</sup>-dé tnúhu Yá Ndiǒxí núú ñáyiú xití yucu-á<sup>n</sup>.

2 Te xáha<sup>n</sup>-dě xii-yu:

—Chí dándixi túu iní sá ñà túú quide váha-ndo ndècu-ndo, te dañà-ndo nchàa ichi cuehé ichi duha, chi sa ní cuyatni nduu ndíhu ndaha ñàha Yá Ndiǒxí xii-ndo —càhí-dé xáha<sup>n</sup>-dě xii-yu.

3 Te diu cuèndá té Juáá-á<sup>n</sup> ñí chídó tnùní ndíi Chàíá téé ní xóo cáhá<sup>n</sup> tnúhu Yá Ndiǒxí ndéé

sanaha, te duha ndùu tnúhu ní chídó tnùní ndíi cuendá-dé:

Tècú càhá<sup>n</sup> níhi ì<sup>n</sup> tée yìhi xití yucu, te càchí-dé:

“Chí dǎńǎ nchàa ichi cuehé ichi duha ndècu-ndo, te tñi-ndo ìchi váha,

Te duca<sup>n</sup> càda-ndo cuendá cundecu túha-ndo chi véxi Yaá ío cùnūu”, duha quesaha tée-á<sup>n</sup>.

Duha ndùu tnúhu ní chídó tnùní ndíi Chàíá-á<sup>n</sup> cuendá té Juàá.

<sup>4</sup> Te té Juàá-á<sup>n</sup> ñí xóo cuihnu-dé dóó idi càméyu, te ì<sup>n</sup> ñi<sup>n</sup> ní cuu pǎñú xití-dé, te ní xóo caxi-dé tíca làngóstá ndi<sup>hi</sup> ndudí ñúñú cuéchi.

<sup>5</sup> Te ñáyiu ñúú Jerusálén, ndi<sup>hi</sup> ñáyiu nchaa ñúú yíndèhu distritú Júdeá, ndi<sup>hi</sup> ñáyiu nchaa ñúú cáá yàtni yúte Jòrdán ní sáhá<sup>n</sup>-yu ní xíndedóho-yu nàcuáa ní cáhá<sup>n</sup> té Juàá.

<sup>6</sup> Te ní ngúíta-yu ní náhmá-yu nchaa cuéchi-yu núú Yǎ Ndiǒxí. Te òré duca<sup>n</sup> ñí náhmá-yu te ní dácúándute ñaha té Juàá xií-yu yúte Jòrdán.

<sup>7</sup> Te vǎi cue tée cùu fariséú ndi<sup>hi</sup> cue tée cùu saducéú cuáhá<sup>n</sup>-güedé núú ndécú tē Juàá cuíní-güedé dacuàndute ñaha-dé xii-güedé. Te òré ní quexìo-güedé núú ndécú-dě, te ní xáha<sup>n</sup>-dě xii-güedé:

—¡Nchaa nchòhó cúú-ndó dàtná ì<sup>n</sup> cóó dēé<sup>n</sup> chi ío cuihna ìní-ndó! ¿Te nása ní cuu núu tnàhá nchòhó ndúcú-ndó nàcuáa cada-ndo càcu nihnu-ndo núu tnùndòho cahnu vihi ta cuyatni ñaha xii-ndo véxi-i?

<sup>8</sup> Te chí cádá vǎha vitna cundecu-ndo cuendá duca<sup>n</sup> cùtnuní sá ñí dǎńǎ-ndó nchàa ichi cuehé ichi duha ndècu-ndo.

<sup>9</sup> Te vá càchí-ndó sǎ ío càhnu cuu-ndo cuendá sá cúú-ndó ñàní tnàhá ndíi Abrahám. Chi cuèi ndéé

yúú te ndacu Yá Ndiöxí ndada-gá ñáyiú te cuú-yu ñaní tnáhá ndíi Àbrahám.

<sup>10</sup> Te caá chi ndècu túha-xi sá quèhndé-xi nchaa yutnu sá dúcá<sup>n</sup> ñà túú càváha sávídí-xi-á<sup>n</sup>, chi nchaa yutnu-á<sup>n</sup> tènhdé-xi te cuánee-xi núú ñùhú càyú-xi. Te duha sãtnáhá-xi ndoho nchaa ñáyiú ñá túú quide váha-á<sup>n</sup> chi nchaa ñáyiú ñá túú quide váha cùú-yu dàtná nchaa yutnu sá ñà túú càváha sávídí-xi.

<sup>11</sup> Te na càchí tnúhu ndáá-í xii-ndo sã yùhú dácuàndute-í mee-ni ñáyiú ní dáñá nchaa ichi cuehé ichi duha. Dico nchícú<sup>n</sup> tucu ingá téé véxi, te téé-á<sup>n</sup> taxi-dé Espíritú Yá Ndiöxí cun-decu ndihí-ndo. Te cùu-xi datná ì<sup>n</sup> ñuhú, chi ndada ndoo ndada nine-xi iní-ndó. Te téé-á<sup>n</sup> ío-gá cúnùu-dé dàcúúxí yùhú, chi yùhú cùú-í ì<sup>n</sup> téé duu<sup>n</sup> duu<sup>n</sup> ñá túú tàú cuita nehe ni chàú-dé dico quide-í chiu<sup>n</sup>-dé.

<sup>12</sup> Te téé-á<sup>n</sup> sa véxi túha-dé sá cádá dè<sup>n</sup> ñaha-dé xii-o dàtná quidé ñáyiú ndàda ndoo triú, chi ñáyiú-á<sup>n</sup> sa nèhe túha-ná-yu yaxí<sup>n</sup>-yu òré náñani cuendá ndada ndó-yu. Te òré ndádá ndòó-yu triú-á<sup>n</sup> te dàquee dí<sup>n</sup>-yu mihi-xi, te tàxúha-yu mee-nã triú-á<sup>n</sup> te sãhmí-yu mihi-xi-á<sup>n</sup>. Te dàtná quidè-yu mihi triú-á<sup>n</sup> duca<sup>n</sup> sãtnahá-xi cada ñaha téé-á<sup>n</sup> xii nchaa ñáyiú ñá túú quide váha, chi daquihí<sup>n</sup> ñáhá-dè xií-yu núú ñùhú núú càyú, te ñuhú-á<sup>n</sup> ñà túú tnáhí ndàhvá –càchí-dé xãha<sup>n</sup>-dè xii-güedé.

*Sàndute Jesús*

*(Mr. 1:9-11; Lc. 3:21-22)*

13 Te Jèsús ní quee-gá distrítú Galileá cuáhá<sup>n</sup>-gá yúte Jòrdán núú ndécú tẽ Juàá cuèndá dacuàndute ñaha-dé xii-gá.

14 Te òré ní quexìo Jesús núú ndécú tẽ Juàá, te ñá cuìní-dé dacuàndute ñaha-dé xii-gá ní cùu, te ní xáha<sup>n</sup>-dẽ xii-gá:

—Yúhú tàú-í sá dácuàndute ñaha-n xii-í, te ñá díú dà yúhú dacuàndute ñaha-í xii-n —càchí-dé xáha<sup>n</sup>-dẽ xii-gá.

15 Te Jèsús ní xáha<sup>n</sup>-gã xii-dé:

—Quehe<sup>n</sup> dañá, chi dacuítí xìni ñuhu-xi duca<sup>n</sup> cada-o nacuáa cundáá-ó núú Yã Ndiõxí —càchí-gá xáha<sup>n</sup>-gã xii-dé.

Te té Juàá-á<sup>n</sup> ñí sáhá<sup>n</sup> uu<sup>n</sup>-dé tnúhu ní xáha<sup>n</sup> Jèsús xii-dé.

16 Te ní dácuàndute-dé Jèsús. Te òré ní nene-gá xítí ndute te ní xiní-gá nchí andiù, te ní quee Espíritú Yã Ndiõxí véxi cuu<sup>n</sup>-xi ngúndecu ndihi ñaha-xi xii-gá, te dàtná cáá ì<sup>n</sup> lómá cáá Espíritú-á<sup>n</sup> véxi cuu<sup>n</sup>-xi.

17 Te òré-á<sup>n</sup> ñí tecú ní cáhá<sup>n</sup> Yã Ndiõxí ndéé andiù, te xáha<sup>n</sup>-gã xii Jèsús:

—Yòhó cúú-n Dẽhe-í tée ío cùu iní-í te ío cùdí iní ñáhà-í xii-n —càchí-gá xáha<sup>n</sup>-gã xii Jèsús.

## 4

*Sácuíhná quidé yíca-xi cada Jesús sá ñà túú tàú-gá cada-gá ní cùu*

*(Mr. 1:12-13; Lc. 4:1-13)*

1 Te Espíritú Yã Ndiõxí ndécá-xí Jèsús cuáhá<sup>n</sup> ì<sup>n</sup> xítí yucu cuèndá yàcá<sup>n</sup> cundecu tnaa-gá, te yàcá<sup>n</sup>

quexìo sácuíhná coto ndeé ñáhá-xí xii-gá te núu ndisa sá vǎ cáda-gǎ ì<sup>n</sup> sá ñà túú tàù-gá cada-gá.

<sup>2</sup> Te Jèsús ñá ní xèxi-gá údico nduu údico niú, te duca<sup>n</sup> te dǎtnùní ní xícá<sup>n</sup> iní-gá caxi-gá.

<sup>3</sup> Te sátá dúcá<sup>n</sup> te ní quexìo sácuíhná quidé yìca-xi cada Jesús ì<sup>n</sup> sá ñà túú tàù-gá cada-gá, te xǎha<sup>n</sup>-xi xii-gá:

—Te núu ndisa sá cúú-n Dèhe Yá Ndiǒxí te cúñaha xii yúú-a na nduu-xi paá —càchí-xi xǎha<sup>n</sup>-xi xii-gá.

<sup>4</sup> Te Jèsús ní xáha<sup>n</sup>-gǎ xii-xi:

—Núú tütú Yǎ Ndiǒxí càchí-xi: “Ñá díú mèe-ni paá candeca-xi iní ñáyiú ñuyíú, chì tnàhá nchaa tnúhu càhá<sup>n</sup> Yǎ Ndiǒxí candeca-xi iní-yu”, duha càchí-xi núú tütú-gá —càchí-gá xǎha<sup>n</sup>-gǎ xii-xi.

<sup>5</sup> Te dǎtnùní sácuíhná-ǎ<sup>n</sup> ndécá ñàha-xi xii-gá cuáhá<sup>n</sup> ñuu Jerusàlén, te yàcá<sup>n</sup> ní xáha<sup>n</sup>-xi xii-gá cuásaá-gá díquí véñǔhu càhnu sá ïo cùnuu núú ñǎyiú isràél,

<sup>6</sup> te dǎtnùní ní xáha<sup>n</sup> tucu-xi xii-gá:

—Te núu ndisa cùu-n Déhe Yá Ndiǒxí te cuandèe ndava núú ñúhú cuendá quee ndáá-xi nàcuáa càhá<sup>n</sup>-xi núú tütú-gá núú càchí-xi: “Yá Ndiǒxí tendaha-gǎ cue espíritú xínú cuèchi núú-gǎ quixi-xi cuendá coto ñaha-xi xii-n, te núú ndáhá-xí càundodo-n cuendá sá vǎ dǎncuèhé yúú sǎhá<sup>n</sup>”, duha càchí-xi núú tütú-gá —càchí sácuíhná-ǎ<sup>n</sup> xǎha<sup>n</sup>-xi xii Jesús.

<sup>7</sup> Te Jèsús ní xáha<sup>n</sup>-gǎ xii-xi:

—Te càchí tucu-xi núú tütú Yǎ Ndiǒxí: “Vá cání iní-n còto ndeé-n Dütú Ndiǒxí Yaá cúú Ndiǒxí-n cuendá-ni sá cuini-n sǎ dácácu nihnu ñaha-gǎ xii-n ì<sup>n</sup> sá sání iní-n càda-n”, duha càchí-xi núú tütú-gá —càchí-gá xǎha<sup>n</sup>-gǎ xii-xi.

8 Te sácuíhná ndécá tùcu-xi Jesús cuáhá<sup>n</sup> ñ<sup>n</sup> núú tìndúú dùcú<sup>n</sup>, te uu<sup>n</sup>ni ní dánèhé núú ñáhá-xí xì-gá nchaandi túhú nàció<sup>n</sup> cáá ñùyíú, ndìhi nchaa sá vǎha ò<sup>n</sup> ñ<sup>n</sup> ñ<sup>n</sup> nàció<sup>n</sup>-á<sup>n</sup>.

9 Te ní xáha<sup>n</sup>-xi xì-gá:

—Te núú yòhó ngüíñí xítí-n nùù-í chiñuhu ñaha-n xì-í ñá, te taxi cuendá-í nchaa sá ñí dánèhé ñáhà-í-a cuu cuendá-n —càchí-xi xáha<sup>n</sup>-xi xì-gá.

10 Te Jèsús ní xáha<sup>n</sup>-gǎ xii-xi:

—Xocuíñí yòhó sácuíhná núú ndécù-í-a, chi vá cúú càda-í nàcuáa càchí-n, chi núú tütú Yá Ndiöxí càchí-xi: “Chiñuhu-ndo Dütú Ndiöxí Yaá cúú Ndiöxí-ndó, te ñi-ñi-gá cada-ndo nchaa nacuáa càhá<sup>n</sup>-gá”, duha càchí-xi núú tütú-gá —càchí-gá xáha<sup>n</sup>-gǎ xii-xi.

11 Te dǎtnùní sácuíhná ñí dáñá-xí Jèsús ní xica-xi cuáhá<sup>n</sup>-xi. Te sátá dúcá<sup>n</sup> te ní quexìo cue espíritú xínú cuèchi núú Yá Ndiöxí ní xinu cuechi-xi núú Jèsús.

*Distritú Galileá ní chisaha Jèsús chiù<sup>n</sup> ní táhú Tǎtá-gǎ Dütú Ndiöxí cada-gá  
(Mr. 1:14-15; Lc. 4:14-15)*

12 Te òré ní níhí Jèsús tnúhu sá ñí ngava té Juàá téé dàcuandute ñaha xii ñáyiú vecaá, te ní xica-gá cuáhá<sup>n</sup>-gá distritú Galileá.

13 Te ñí ñá túú ní xíndecu-gá ñuú Nazàrét, chi ní yáha-gá cuáhá<sup>n</sup>-gá ndéé ñuú Capèrnaúm yàcá<sup>n</sup> ní xíndecu-gá, te ñuú-á<sup>n</sup> cáá yàtni yuhu lagúná, te yatni xía<sup>n</sup> cáá ñùhu nani Zabulón, ndìhi ñuhu nani Neftalí.

14 Te duca<sup>n</sup> ñí cuu chi ní quee ndáá-xi nàcuáa ní chídó tnùní ndíí Chàíá téé ní xóo cáhá<sup>n</sup> tnúhu Yá Ndiöxí ndéé sanaha núú tütú-gá núú càchí-xi:

15 Ñuhu nàni Zabulón, ndìhi ñuhu nàni Neftalí,  
 ñuhu-án yíndèhu-xi distritú Galileá,  
 te xía<sup>n</sup> xíndecu cue ñáyiú ñá túú cùu ñáyiú isràél,  
 te càa-xi yatni yuhu lagúná te ndàa ìngá xio yúte  
 Jòrdán cúú-xí.

16 Te cue ñáyiú-án ndécŭ-yu ì<sup>n</sup> núú néé chi  
 ndécú-yu ichi cuèhé ichi duha,  
 te sáá nduu te cada iní-ndó sã ñáyiú-án queé-yu  
 núú ditó chi vá cùndècu-gá-yu ichi cuèhé  
 ichi duha.

Te diu-ni ñáyiú-án cúŭ-yu ñáyiú ta xíta nihnu duu<sup>n</sup>  
 cuáhá<sup>n</sup>,

dico sáá nduu te vá cuíta nihnu-gá-yu.

Duha ní chídó tnùní ndíi núú tütú-gá.

17 Te dàvá-án ñi ngúíta Jèsús ní dánèhé-gá ñáyiú,  
 te ní xáha<sup>n</sup>-gã xií-yu:

—Chí dándixi túu iní sá ñà túú quide váha-ndo  
 ndècu-ndo te dañà-ndo nchàa ichi cuèhé ichi duha,  
 chi sa ní cuyatni nduu ndìhu ndaha ñàha Yá Ndióxi  
 xii-ndo —càchí-gá xãha<sup>n</sup>-gã xií-yu.

*Jèsús càhá<sup>n</sup>-gá cúmí tnàhá cue téé tnè chácá*

*(Mr. 1:16-20; Lc. 5:1-11)*

18 Te Jèsús ñúhú-gá ichi cuáhá<sup>n</sup>-gá tá yãha-gá  
 yuhu làgúná Galileá, te ní xiní-gá úú tnàhá  
 cue téé xídáquèe-güedé ñunu-güedé xití ndute  
 tnè-güedé chácá, chi quiti tnàhí-án cúú chiú<sup>n</sup>-güedé  
 tnè-güedé-di. Te ì<sup>n</sup>-dé nání-dě Xímú, àdi Pelú chi  
 úú diu-dé, te ñaní-dé cúú ìngá téé ndìhi-dé te téé-án  
 nání-dě Ndríxi.

19 Te Jèsús ní xáha<sup>n</sup>-gã xii-güedé:

—Chí dáñá chiú<sup>n</sup> quide-ndo-án te quixi-ndo  
 chìtnahá ñáhá-ndó xì-í, te taxi-í ìngá núú chiú<sup>n</sup>

cada-ndo chi quíhí<sup>n</sup>-ndó dàcahá<sup>n</sup>-ndó ñǎyiu cuendá tuha ñàhá-yu xii-í —càchí-gá xǎha<sup>n</sup>-gǎ xii-güedé.

<sup>20</sup> Te òré-ni-á<sup>n</sup> ñí dáñá cuè téé-á<sup>n</sup> ñunu-güedé, te ní tuha-güedé Jèsús.

<sup>21</sup> Te ní xica tucu Jèsús cuáhá<sup>n</sup>-gá luha-gá, te ní xiní tucu-gá úú-gá tnàhá cue téé tñì chácá. Te ì<sup>n</sup> téé-á<sup>n</sup> nání-dě Jàcobó, te ñaní-dé cúú ìngá téé ndihí-dé te téé-á<sup>n</sup> nání-dě Juáá, te ndi ndùú-güedé cúú-güedé déhe té Zebèdeú. Te xǐxínucóo-güedé ndihí tǎtá-güedé xití bàrcú xǐnatícu-güedé ñunu-güedé, te Jèsús ní cana ñaha-gǎ xii-güedé.

<sup>22</sup> Te òré-ni-á<sup>n</sup> ñí dándöo-güedé bàrcú-güedé, ndihí tǎtá-güedé, te ní tuha ñaha-güedé xii-gá.

*Jèsús dánèhé-gá cuèhé vǐhí ñǎyiu*

*(Lc. 6:17-19)*

<sup>23</sup> Te Jèsús tá xica ndodo-gá nihí distritú Galileá cuáhá<sup>n</sup> tá dānehé-gá ñáyiu tnúhu váha tnúhu sá sánú ìchi ñaha xií-yu nàcuáa ndíhu ndaha ñàha Yá Ndiöxí xií-yu. Te ndi tnahá ì<sup>n</sup> ì<sup>n</sup> ñuú sàá-gá te duca<sup>n</sup> cuānguǐhu-gá xití veñúhu dānehé-gá ñáyiu tnúhu-á<sup>n</sup>. Te ndi díí<sup>n</sup> ndi díí<sup>n</sup> núú cuèhé tnàhá ì<sup>n</sup> ì<sup>n</sup> ñáyiu dico nchaa-ní-yu ta quide tǎtna-gá cuáhá<sup>n</sup>.

<sup>24</sup> Te ndéé nchaa ñáyiu yǐndehu distritú Sìriá ní níhǐ-yu tnúhu nchaa nàcuáa quide Jesús. Te ní queé-yu ñuú-yu te ndécá-yu nchaa ñáyiu tnàhá ndi díí<sup>n</sup> núú cuèhé cuáhá<sup>n</sup> núú ndécú Jèsús. Te cuèi ñáyiu xǐyǐhí, ndihí ñáyiu ñá túú-gǎ cándá nihnu, ndihí ñáyiu yǐhí ñaha espíritú cúndihí yucu ñávǎha ndécá-yu cuáhá<sup>n</sup> núú-gǎ, te ncháá-yu ní quide tǎtna ñaha-gǎ xií-yu.



25 Te ío vai ñáyiú ní chinchícú<sup>n</sup> ñáhá xì Jesús, chi ní chinchícú<sup>n</sup> ñáhá ñăyiú distritú Galileá, ndihí ñáyiú nchaa ñuú xĩndáa Dècápolis, ndihí ñáyiú ñuú Jerusálén, ndihí cue ñáyiú nchaa ñuú yíndèhu distritú Jùdeá, ndihí ñáyiú xĩndecu yatni yúte Jòrdán ndàa xio quene nchícanhii.

## 5

*Jèsús núcõo-gá #<sup>n</sup> núú tìndúú dánèhé-gá ñáyiú*

1 Te sátá ñí xiní Jèsús sá cuéhé víhí ñăyiú nchícú<sup>n</sup> ñáhá xì-gá, te ní xica-gá cuásaá-gá #<sup>n</sup> núú tìndúú te xía<sup>n</sup> ñí ngóo-gá, te cue téé xica cuu ndihí-gá ní nadúcú<sup>n</sup> ndèé ñáhá-güedě xii-gá.

2 Te ní ngüíta-gá dánèhé ñáhá-gă xii-güedé ndihí cue ñáyiú-á<sup>n</sup>, te xâha<sup>n</sup>-gă:

*Cuèndá ñáyiú ío váha táhú-xi  
(Lc. 6:20-23)*

3 –Váha táhú nchaa ñáyiú cùtnuní iní-xi sá ío-gá cúmăñi-yu cudíu-yu núú Yă Ndiõxí, chi ñáyiú-á<sup>n</sup> nduu táhũ-yu ndíhu ndaha ñàha-gá xií-yu.

4 Váha táhú nchaa ñáyiú ndàhyú sá ndíhú iní-yu, chi Yă Ndiõxí cuáñaha-gă tnúhu ndee ìní cundecu ndihí-yu.

5 Váha táhú nchaa ñáyiú ndàhú iní-xi, chi ñáyiú-á<sup>n</sup> nduu táhũ-yu cundecú-yu #<sup>n</sup> xichi núú cuáñaha Yă Ndiõxí xií-yu.

6 Váha táhú nchaa ñáyiú ío cuení cada nchaa nàcuáa càhá<sup>n</sup> Yă Ndiõxí, chi ñáyiú-á<sup>n</sup> ío nduu vétú iní-yu.

7 'Váha táhú nchaa ñáyiú cùndahú iní tnàha ñáyiú-xi, chi ñáyiú-á<sup>n</sup> ðiu-ni duca<sup>n</sup> càda ñaha Yá Ndiõxí xíi-yu cundàhú iní ñáhá-gă.

8 'Váha táhú nchaa ñáyiú ní nduu ndoo ní nduu nine iní-xi, chi cue ñáyiú-á<sup>n</sup> nduu táhũ-yu cundecú-yu ndihí Yá Ndiõxí.

9 'Váha táhú nchaa ñáyiú càhá<sup>n</sup> dóho tnàha ñáyiú-xi nàcuáa cundecu ndihí váha tnàhá-yu, chi cùtnuní sá ñáyiú-á<sup>n</sup> cuú-yu déhe Yá Ndiõxí.

10 'Váha táhú nchaa ñáyiú ío ndòho ndecu ñuyíú-a sá cuèndá sá quídě-yu nàcuáa càhá<sup>n</sup> Yă Ndiõxí, chi ñáyiú-á<sup>n</sup> nduu táhũ-yu ndíhu ndaha ñàha-gá xíi-yu.

11 'Te cùu-ndo ñáyiú ío váha táhú-xi te núu na cùcuèhé ñáhá ñăyiú, àdi cada úhú ñáhă-yu xii-ndo, àdi dacao díquí ñáhă-yu nándi cuéchi neñúú xii-ndo sã cuèndá-í.

12 Te òré duca<sup>n</sup> na càda ñahá-yu xii-ndo te cudíí víhí-ní iní-ndó cundecu-ndo, chi ío váha càa sá ndécú àndiu nduu táhú-ndó cundecu ndihí-ndo nduu na saá-ndó yàcá<sup>n</sup> cundecu-ndo, chi ðiu-ni duca<sup>n</sup> ñi xóo cada ñaha cuè ñaní tnáhă-yu xii cue téé ní xóo cáhá<sup>n</sup> tnúhu Yá Ndiõxí ní xíndecu ndéé sanaha.

*Cuèndá ñíí ndihí cuèndá ñuhú  
(Mr. 9:50; Lc. 14:34-35)*

13 'Te nchòhó cada iní-ndó sã cúú-ndó dàtná ñíí cuèndá ñuyíú-a. Te ñíí chi nándihí-xi dico núu na ndúu víxi<sup>n</sup>-xi, te ñá túú-gă nándihí-xi chi dăngoyo-ná-ó, te yăha ñáyiú xënihnú-yu. Te duca<sup>n</sup> sãtnahá-xi cùu nchòhó chi cùu-ndo datná ñíí vâha

te núu na càda váha-ndo, te núu vá cáda vǎha-ndo te quee tíhú-ndó.

14 Te nchòhó cada iní-ndó sǎ cúú-ndó dàtná ì<sup>n</sup> sǎ dáyèhé ndécú ñùyíú-a, chi sànu ichi-ndo ñáyíu ichi váha. Te nchòhó xìní-ndó sǎ ñũ ì<sup>n</sup> ñúú cáá ì<sup>n</sup> núú tìndúú te vá cúú càchí-ó sǎ nguivǎha-xi.

15 Te ñá túú xìní-ó ì<sup>n</sup> ñáyíu teñuhú-yu ì<sup>n</sup> l'intérná te chiváha-yu xití ì<sup>n</sup> càjá, chi tàxi ndecú-yu núú ññu cuendá cutnùní núú nchàa ñáyíu ndècu vehe.

16 Te duca<sup>n</sup> càda nchohó cada váha-ndo dàtná quidé ì<sup>n</sup> ñuhú dayèhe-xi núú ñáyíu, te duca<sup>n</sup> quíní ñáyíu nàcuáa quide-ndo ndecu-ndo, te tnàhá-yu cachí-yu sǎ ìo càhnu cuu Dútú Ndiòxí Yaá cúú Tátá-ndó ndècu andíu chi quíní-yu sǎ quidé vǎha-ndo ndècu-ndo.

### *Cuendá tnúhu ní chídó tnùní ndíi Moisés*

17 Te vá cání iní-ndó sǎ yùhú véxi-í xocàni-í tnúhu ní chídó tnùní ndíi Moisés, te ní vǎ cání iní-ndó sǎ vèxi-í xocàni-í tnúhu ní chídó tnùní cue téé ní xóo cáhá<sup>n</sup> tnúhu Yá Ndiòxí ndéé sanaha, chi yùhú véxi-í sǎ cáda-í nàcuáa càhá<sup>n</sup> nchaa tnúhu-á<sup>n</sup>.

18 Te na càchí tnúhu ndáá-í xii-ndo sǎ tnúhu ní chídó tnùní ndíi Moisés ío ndáá càhá<sup>n</sup>-xi, chi dacuítí cùu nchaa nacuáa càhá<sup>n</sup>-xi. Te yáchí-gá naa andíu ndíhi ñuyíú dàcúúxí sǎ quèe cáva ì<sup>n</sup> tnúhu-á<sup>n</sup>.

19 Núu xǎá<sup>n</sup> nchaa ñáyíu na càchí sǎ dává tnúhu ní chídó tnùní ndíi Moisés ñá túú xìní ññu-xi chi ñá túú cùnñu-xi, te ñáyíu-á<sup>n</sup> ññu-ni duca<sup>n</sup> dànehé-yu nchaa dava-gá tnàha ñáyíu-yu, te sǎ dúcá<sup>n</sup> quidé-yu te vá cùnñu vihí-yu núú ndécú Yá Ndiòxí táxí tnùní-gá, chi cuú-yu dàtná ì<sup>n</sup> ñáyíu

nchìcú<sup>n</sup> cuì-nă. Dico nchaa ñáyiú nchìcú<sup>n</sup> ni-hnu quide nchaa nacuáa càhá<sup>n</sup> nchaa tnúhu-á<sup>n</sup>, te ñiú-ni duca<sup>n</sup> dānehé-yu nchaa dava-gá tnàha ñáyiú-yu, te ñáyiú-á<sup>n</sup> ïo cunúú-yu núú ndécú Yă Ndiöxí táxí tnùní-gá.

<sup>20</sup> Te na càchí tnúhu-í xii-ndo sǎ ïo xìni ñuhu-xi cada-ndo nchaa nacuáa càhá<sup>n</sup> Yă Ndiöxí, te vá cáda-ndó dàtná xǐquide cue tée dānehé ñáhá xii ñáyiú nchaa tnúhu ní chídó tnùní ndíi Moisés, ndíhi dàtná xǐquide cue tée cùu fariséú, chi núu na càda-ndo datná xǐquide cue tée-á<sup>n</sup> ñá, te vá ndúú tǎhú-ndó ndíhu ndaha ñàha Yá Ndiöxí xii-ndo.

*Jèsús càhá<sup>n</sup>-gá cuendá ñáyiú cùdéé<sup>n</sup>*  
(Lc. 12:57-59)

<sup>21</sup> Te nchòhó sa xìní-ndó sǎ ncháá ñáyiú ní cuu ñaní tnáhá-ndó ñí xindecu ndéé sanaha ñí ñíhí-yu tnúhu sá vǎ cúú càhní-yu tnàha ñáyiú-yu, chi núu duca<sup>n</sup> na càda-yu te nacháhu-yu cuéchi-yu.

<sup>22</sup> Dico vitna na càchí tnúhu-í xii-ndo sǎ nǔú ndédani càa-ndo na cudéé<sup>n</sup>-ndó nǔú tnàha ñáyiú-ndo, te nacháhu-ndo sǎ dúcá<sup>n</sup> quide-ndo, àdi núu na cǔcuèhé-ndǒ-yu te núú chítú nǔú tàcá cundáá cuéchi-ndo te núu duca<sup>n</sup> na càda-ndo, àdi núu nà cúu-ndo tnàha ñáyiú-ndo ñí<sup>n</sup> tnúhu véé vǐhi, te cucuéchi vǐhi xii-ndo chi quíhí<sup>n</sup>-ndó nǔú ùhú núú ndàhú.

<sup>23</sup> Te xǎ<sup>n</sup> nǔú nchòhó òré ndécú ndíhi-ndo ñí<sup>n</sup> sá cuìní-ndó cuǎha-ndo Yă Ndiöxí nduu táhú-gǎ, te òré cuáhá<sup>n</sup>-ndó cuǎñaha-ndo xii-gá, te òré ní quexìo-ndo núú dúcá<sup>n</sup> cuǎñaha-ndo xii-gá sá ndúú tǎhú-gǎ, te ní ndacu iní-ndó sǎ ndécú ñáyiú ñá túú cùu vǎha iní ñáhá xii-ndo cuendá ñí<sup>n</sup> sá ñí cumání nǔú tnáhá-ndó.

24 Te dàndóo-ndo sã dúcá<sup>n</sup> nèhe-ndo cuáhá<sup>n</sup> nduu táhú Yã Ndiõxí, te díhna-gá quíhí<sup>n</sup>-ndó nàcahá<sup>n</sup> cáhnú ìní tnáhá-ndó ndìhi ñáyiú ñá túú cùu váha ìní ñáhá xii-ndo-á<sup>n</sup>, te dàtnùní duca<sup>n</sup> te quíhí<sup>n</sup>-ndó cuãha-ndo Yã Ndiõxí sá ndúú táhú-gã.

25 Te núu ìó ì<sup>n</sup>-ndo ní sáhá<sup>n</sup> ñáyiú núú tõe cùchiu<sup>n</sup> ní sacá<sup>n</sup> cuéchi-yu cuèndá-ndó cuèndá ì<sup>n</sup> sá ñí quide-ndo, te òré ní naníhí tnáhá-ndó ndìhí-yu cuáhá<sup>n</sup>-ndó núú tõe cùchiu<sup>n</sup>-á<sup>n</sup>, te nacáhá<sup>n</sup> cáhnú ìní tnáhá-ndó ndìhí-yu cuèndá sá vã cuãha cuèndá ñáhá-gã-yu xii-ndo núú tõe cùchiu<sup>n</sup>, chi núu duca<sup>n</sup> na càdá-yu te tõe cùchiu<sup>n</sup>-á<sup>n</sup> cuãha cuèndá ñáhá-dě xii-ndo núú cuè tõe cùu poleciá, te cue tõe-á<sup>n</sup> chihi ñaha-güedě vecaá xii-ndo.

26 Te na càchí tnúhu ndáá-í xii-ndo sã vã cãcu-ndo te núu na ngáva-ndo vecaá ndéé nacháhu-ndo nchàa sá tàú-ndó.

*Cuèndá cue ñáyiú ñá túú quide váha*

27 Te nchòhó sa xíní-ndó nàcuáa ndùu tnúhu ní cáhá<sup>n</sup> cue tõe ní xíndecu ndéé sanaha, te duha ní cachí-güedé: “Nchaa cue tõe vá cúú cãhá<sup>n</sup> ndìhi-güedé ñadìhí te núu ñá díú ñadìhí-güedé cúú-yu, te ñu-ni duca<sup>n</sup> tùcu nchaa cue ñáyiú ñíhí vá cúú cãhá<sup>n</sup> ndìhí-yu tõe te núu ñá díú yíi-yu cùu-güedé”, duha ní cachí-güedé.

28 Dico yúhú càchí tnúhu-í xii-ndo sã nděda-ni càa cue tõe na cùndehe ì<sup>n</sup> ñadìhí te núu na càni ìní-güedé cundecu díí ìní-güedé ndìhí-yu te cada ìní-ndó sã dàtná sá sà ní cáhá<sup>n</sup> ndìhi ñaha-güedě xii-yu sá dúcá<sup>n</sup> ñí sani ìní-güedé.

29 Te núu ì<sup>n</sup> xio tinùu-ndo quide-xi quide-ndo nándi sá cuèhé sá dúhá te tava-ndo, chi váha-gá

sá ná cuíta te ñá díú ñìhíí ní ndúú yìquì cuñú-ndó quìhí<sup>n</sup>-xi núú ùhú núú ndàhú.

<sup>30</sup> Te núú ì<sup>n</sup> xio ndaha-ndo quide-xi quide-ndo nándì sá cuèhé sá dúhá te quehdé-ndó, chi váha-gá sá ná cuíta ì<sup>n</sup> xio ndaha-ndo te ñá díú sã ñìhíí ní ndúú yìquì cuñú-ndó quìhí<sup>n</sup>-xi núú ùhú núú ndàhú.

*Jèsús càhá<sup>n</sup>-gá cuèndá cue ñáyiu dàña tnaha  
(Mt. 19:9; Mr. 10:11-12; Lc. 16:18)*

<sup>31</sup> Te nchòhó sa nàha tucu-ndo nacuaá ní cáhá<sup>n</sup> tucu cue téé ní xíndecu ndéé sanaha, te duha ní cachí-güedé: “Te núú ì<sup>n</sup> téé na dàña tnaha-dé ndìhì ñadìhí-dé, te xìni ñuhu-xi cadúha-dé ì<sup>n</sup> tutú cuañaha-dě núú càhá<sup>n</sup>-xi sá ñí dáñá ñàha-dé”, duha ní cachí-güedé.

<sup>32</sup> Dico yúhú càchí tnúhu-í xii-ndo sã cúú dàña ì<sup>n</sup> téé ñadìhí-dé, te núú cùtnuní ndáá iní-dé sá càhá<sup>n</sup> ndìhì-a<sup>n</sup> ingá téé. Dico núú ñá túú dùca<sup>n</sup> quide-a<sup>n</sup> te ñá túú ndùu váha-xi dañá ñàha-dé. Te núú ñá túú dùca<sup>n</sup> quide ñadìhí-dé, te cada iní-ó sã méé-dě ní sanu ichi ñaha-dě xii-a<sup>n</sup> cáhá<sup>n</sup> ndìhì-a<sup>n</sup> ingá téé te núú na dàña ñaha-dé. Te téé na nàquehe<sup>n</sup> ñaha xii ñaha ní dáñá ñàha yì-xi-á<sup>n</sup>, te diu-ni ñá túú ní quide váha-dé sá dúcá<sup>n</sup> ñí naquehe<sup>n</sup>-dé ñaha-á<sup>n</sup>.

*Ñáyiu càcunehe ñaha xii Yá Ndiõxí cuèndá cutnùnì  
inì tnàha ñáyíu-yu sá ndàá cadá-yu ì<sup>n</sup> sá sánì iní-yu  
cadá-yu*

<sup>33</sup> Te sa nàha tucu-ndo nacuaá ní cáhá<sup>n</sup> tucu cue téé ní xíndecu ndéé sanaha, chi cue téé-á<sup>n</sup> ñí cachí-güedé: “Te núú càcunehe-ndo Yá Ndiõxí núú tnàha ñáyiu-ndo nàcuáa cutnùnì iní-yu sá ndàá

cada-ndo ì<sup>n</sup> sá sání iní-ndó càda-ndo, te cada-ndo”, duha ní cáhá<sup>n</sup> dóho tnàha-güedé.

<sup>34</sup> Dico yúhú cächí tnúhu-í xii-ndo sã ñà túú nã cacunehe-ndo sã ndàá cada-ndo ì<sup>n</sup> sá sání iní-ndó càda-ndo. Te ni vã cácu nèhe-ndo andiu chi yacá<sup>n</sup> cúú-xí núú núcõo Yá Ndiõxí táxí tnùní-gá.

<sup>35</sup> Te ni vã cácu nèhe-ndo ñuyíú-a, chi tnàhá ñuyíú-a ndècu-gá, te ni vã cácu nèhe-ndo ñuú Jerusàlén chi ñuú-á<sup>n</sup> cúú cuendá-gá, te ñuú-gá cúú-gã Yaá ío cùnuu.

<sup>36</sup> Te ni vã cácu nèhe-ndo díquí-ndó chi nàha-ndo sá nì ì<sup>n</sup> idi díquí-ndó ñã ndácú-ndó ndàda cuixí<sup>n</sup>-ndó àdi ndada tnuu-ndo.

<sup>37</sup> Te váha-gá sá núu ì<sup>n</sup> sá sání iní-ndó càda-ndo, te cachí-ni-ndo: “Cuu cada-ndí, àdi vá cúú càda-ndí”, cachí-ni-ndo. Chi nchaa dava-gá sá chídó-ndó càhá<sup>n</sup>-ndó òré duca<sup>n</sup> sàni iní-ndó càda-ndo ì<sup>n</sup> sá cádá-ndó cùu-xi sá dácàhu iní ñáhá yùcu ñávãha.

*Cuendá ñáyiú nàchinaa sá quidé ñàha tnaha ñáyiú-xi*

*(Lc. 6:29-30)*

<sup>38</sup> Te sa nàha tucu-ndo nacúáa ní cáhá<sup>n</sup> tucu cue téé ní xíndecu ndéé sanaha, chi cue téé-á<sup>n</sup> nã cachí-güedé: “Ñáyiú na càda ñàha tnaha ñáyiú-xi ì<sup>n</sup> sá ñà túú vãha, te nanchòcáva-yu nachinaá-yu sá nã quide ñàha tnàha ñáyiú-yu”, duha ní cachí-güedé.

<sup>39</sup> Dico yúhú cächí tnúhu-í xii-ndo sã ñà túú nã cada-ndo nchàa cue ñáyiú cuihna iní-xi te núu quide ñahá-yu ì<sup>n</sup> sá ñà túú vãha xii-ndo. Te núu ní

canìhá-yu ì<sup>n</sup> xito te cuìní tucú-yu canìhá-yu ìngá xito te dañá-ndo na cànihá-yu.

40 Àdi ní sacá<sup>n</sup> cuéchi-yu núú cuè téè cùchiu<sup>n</sup> cuendá-ndó, te cuìní-yu quendeé-yu dúhnú-ndó te dañá-ndo na cànehé-yu quíhí<sup>n</sup>, te tnàhá-ni dóó ndíxí ndòdo-ndo dañá-ndo na canehé-yu quíhí<sup>n</sup>.

41 Te núú quìde yicá-yu caca-ndo dàtná úú kilómetrú cuido-ndo ndàchiú<sup>n</sup>-yu ña, te chido-ndo úú-gá tucu kilómetrú cuido-ndo ndàchiú<sup>n</sup>-yu.

42 Te núú ió ì<sup>n</sup> sá xìcá<sup>n</sup>-yu núú-ndó te cuáñaha-ndo, àdi ió ì<sup>n</sup> sá sánùú-yu núú-ndó te cuáñaha nùu-ndo.

*Cuu iní-ó nchàa ñáyiu cùu úhú iní ñáhá xii-ó  
(Lc. 6:27-28, 32-36)*

43 "Te sa nàha tucu-ndo nacuáa ní cachí tucu cue téè ní xíndecu ndéé sanaha, chi cue téè-á<sup>n</sup> ñí cachí-güedé: "Cuu iní-ndó cuè ñáyiu ndècu ndihí váha-ndo, te cuu úhú iní-ndó cuè ñáyiu cùu úhú iní ñáhá xii-ndo", duha ní cachí-güedé.

44 Dico yúhú càchí tnúhu-í xii-ndo sã cúú ìní-ndó cuè ñáyiu cùu úhú iní ñáhá xii-ndo, te cáhá<sup>n</sup> váha-ndo cuendá cue ñáyiu càhá<sup>n</sup> úhú ñáhá xii-ndo, te cada-ndo sã vãha sá cúú-xí cuè ñáyiu cùu úhú iní ñáhá xii-ndo, te cáhá<sup>n</sup> ndihí-ndo Yã Ndiöxí cuendá cue ñáyiu xicuehé ñáhá xii-ndo, ndihí cuendá cue ñáyiu quide úhú ñáhá xii-ndo.

45 Te núu na càda-ndo nchaa nacuáa càhá<sup>n</sup>-í-a, te duca<sup>n</sup> te cutnùní sá cúú-ndó dèhe Tãtã-ndó Dütú Ndiöxí Yaá ndécú àndiu. Te diu-gá cúú-gã Yaá quidé quène nchíanchii, te diu-ni-gá cúú-gã Yaá dácùu<sup>n</sup> dáú ñuyíú-a, te duca<sup>n</sup> quide-gá cuendá



cuu-xi sá vǎha sá cúú-xí cuè ñáiyu quide váha, ndihi sá cúú-xí cuè ñáiyu ñá túú quide váha.

<sup>46</sup> Te núu nchòhó ná cúú ìní-ndó mèe-ni ñáiyu na cùu ìní ñáhá xii-ndo, te vá càchí-ndó sǎ Yǎ Ndiǒxí taxi-gá sá ndúú tǎhú-ndó sǎ dúcá<sup>n</sup> quide-ndo, chi cuèi cue tée cuihna ìní-xi quide cobrá ñáhá xii cue ñáiyu cuendá impuèstú duca<sup>n</sup> xǐquide-güedé.

<sup>47</sup> Te núu mee-ni ñáiyu ndècu ndihi váha-ndo ïo váha cáhá<sup>n</sup> ndihi-ndǒ-yu, te vá càchí-ndó sǎ ïo váha quide-ndo sá dúcá<sup>n</sup> quide-ndo, chi cuèi ndéé nchaa ñáiyu ñá túú xini dana cuendá Yǎ Ndiǒxí duca<sup>n</sup> xǐquidé-yu.

<sup>48</sup> Te duha ndùu tnúhu càhá<sup>n</sup>-í cuendá sá nchòhó cada ndáá-ndó cùndecu-ndo datná quidé ndáá méé Tǎtá-ndó Dǔtú Ndiǒxí Yaá ndécú àndiü —duha ní dánèhé ñáhá Jèsús xii cue tée xica cuu ndihi-gá ndihi nchaa ñáiyu.

## 6

### *Jèsús dánèhé-gá ñáiyu nàcuáa cadá-yu sá vǎha*

<sup>1</sup> Te Jèsús ndécú-ní-gǎ dánèhé-gá cue tée xica cuu ndihi-gá ndihi nchaa ñáiyu, te xáha<sup>n</sup>-gǎ:

—Te òré quidé-ndó sǎ vǎha te vá cadá-ndó nǔú ñáiyu cuendá-ni sá cuìní-ndó cǎhá<sup>n</sup> váha-yu cuendá-ndó, chi núu núú ñáiyu duca<sup>n</sup> na càda-ndo te Dútú Ndiǒxí Yaá cúú Tǎtá-ndó vǎ táxí-gǎ sá ndúú tǎhú-ndó.

<sup>2</sup> Te xiǎ<sup>n</sup> nǔu nchòhó òré chindèe-ndo ñáiyu ndàhú, te vá cǔñaha-ndo xii cue ñáiyu sá chindèe-ndo cue ñáiyu ndàhú-á<sup>n</sup> dàtná xǐquide cue ñáiyu dándahú méé-xí sǎ quidé ndáá te ñá ndáá sá quidé ndáá-yu, chi ñáiyu-á<sup>n</sup> duca<sup>n</sup> xǐquidé-yu òré sàhá<sup>n</sup>-yu veñúhu, chi dàtecú tnúhu-yu nchaa ñáiyu

òré duca<sup>n</sup> chindeé-yu ñáyiu ndàhú. Te ñi-ni duca<sup>n</sup> quidé-yu xăhă<sup>n</sup>-yu xii cue ñáyiu sá chindèé-yu cue ñáyiu ndàhú-á<sup>n</sup> nchaa núú xícá cùú-yu, te duca<sup>n</sup> xíquidé-yu cuendá cuiní-yu cáhá<sup>n</sup> váha ñáyiu cuendá-yu. Te yúhú na cächí tnúhu ndáá-í xii-ndo sã ñà túú nă nduu táhú ñáyiu-á<sup>n</sup> núú Yă Ndiöxí sá dúcá<sup>n</sup> quidé-yu chi mee-ni núú tnàha ñáyíú-yu cùdiú-yu.

<sup>3</sup> Te nchòhó òré chindèe-ndo ñáyiu ndàhú, te cuëi ñáyiu ío-gá váha ndècu ndihí-ndo dico vá cũñaha-ndo sã dúcá<sup>n</sup> chindee-ndo cue ñáyiu ndàhú-á<sup>n</sup>, te ni cuè dava-gá ñáyiu vá cũñaha-ndo.

<sup>4</sup> Chi váha-gá sá ìní méé-ní-ndó ná cùhu<sup>n</sup> sá dúcá<sup>n</sup> chindee-ndo cue ñáyiu ndàhú-á<sup>n</sup>. Te núú duca<sup>n</sup> na càda-ndo ña, te Dútú Ndiöxí Yaá cúú Tătá-ndó tàxi-gá sá ndúú tãhú-ndó chi ñi-ni mee-gã ndéhé-gã nàcuáa quide-ndo ndecu-ndo.

*Jèsús dánèhé-gá ñáyiu nàcuáa cáhá<sup>n</sup> ndihí-yu Yá Ndiöxí  
(Lc. 11:2-4)*

<sup>5</sup> Te nchòhó òré càhá<sup>n</sup> ndihí-ndo Yă Ndiöxí, te vá cádá-ndó dàtná xíquide cue ñáyiu dándahú méé-xí cächí sá quidé ndáá te ñá ndáá sá quidé ndáá-yu, chi ñáyiu-á<sup>n</sup> tnàhá ìní-yu cunutnii-yu càhá<sup>n</sup> ndihí-yu Yá Ndiöxí òré yihí-yu veñúhu. Te ñi-ni duca<sup>n</sup> xíquidé-yu nchaa núú xícá cùú-yu, te duca<sup>n</sup> quidé-yu cuendá sá cuiní-yu quini ñáyiu nàcuáa xíquidé-yu. Te na cächí tnúhu ndáá-í xii-ndo sã ñà túú nă nduu táhú ñáyiu-á<sup>n</sup> núú Yă Ndiöxí sá dúcá<sup>n</sup> quidé-yu chi mee-ni núú tnàha ñáyíú-yu cùdiú-yu.

6 Te nchòhó òré cuìní-ndó cǎhá<sup>n</sup> ndìhi-ndo Yǎ Ndiǒxí, te ndíhu ndedí nihnu-ndo xìtí vehe-ndo, chi òu-gá cúú Tǎtá-ndó te ndècu ndìhi ñaha-gá xii-ndo, te òu-ni mee-gǎ ndéhé ñaha-gá xii-ndo nàcuáa quide-ndo, te núu duca<sup>n</sup> na càda-ndo te taxi-gá sá ndúú tǎhú-ndó.

7 Te òré cǎhá<sup>n</sup> ndìhi-ndo Yǎ Ndiǒxí te vá sùúní cuendá-ni dacáa-ndó tnùhu cǎhá<sup>n</sup> ndìhi-ndo-gǎ dàtná xǐquide cue ñáyiú ñá túú xìní tnùhu-gá, chi ñáyiú-á<sup>n</sup> sání iní-yu sá tédòho ñaha vihi-gá Yǎ Ndiǒxí xii-yu sá dúcá<sup>n</sup> sùúní dàcaá-yu tnùhu cǎhá<sup>n</sup> ndìhi ñàhá-yu xii-gá dico ñàhá.

8 Dico nchòhó, vá cáda-ndó dàtná xǐquide cue ñáyiú-á<sup>n</sup>, chi mee Tǎtá-ndó Dútú Ndiǒxí sa nàha-gá ná cúú nchàa sá xìní ñùhu-ndo cuéi òré vátá càcá<sup>n</sup>-gá-ndó nùú-gǎ.

9 Te duha cǎhá<sup>n</sup>-ndó òré cǎhá<sup>n</sup> ndìhi-ndo Yǎ Ndiǒxí:

Yòhó Tǎtá-ndí Dútú Ndiǒxí Yaá ndécú àndiú,  
nchaa ñáyiú na cǎhá<sup>n</sup>-yu sá cúú-n Yàá ío yiñùhu.

10 Te xìcá<sup>n</sup> tǎhú-ndí núú-n sǎ ná sàà nduu ndíhu ndàhá-n-yu.

Te cada-n dàtná cǎchí iní-n ñùyíú-a dàtná quidé-n àndiú.

11 Te xìcá<sup>n</sup> tǎhú-ndí núú-n sǎ táxí-n sǎ cóhó-ndí sá cǎxí-ndí ì<sup>n</sup> nduu ì<sup>n</sup> nduu.

12 Te cada cǎhnu iní-n nchàa yícá cuèchi-ndí, chi tnàhá nchúhú quidé cǎhnu iní-ndí nchaa sá quidé ñaha tnaha ñáyiú-ndí.

13 Te vá dáñá-n dàcahá<sup>n</sup> ñàhá yùcu ñávǎha xii-ndí cada-ndí sá ñà túú vǎha, chi coto ñaha-n xii-ndí cuendá sá vǎ dúcá<sup>n</sup> càda ñaha-xi.

Te diu-n cùu-n Yaá ío cùnnuu nchaa nduu nchaa quíú, te ío càhnu cuu-n, te diu-ni-n quìndaha ñaha-n xii-ndí ni caa ni quíhí<sup>n</sup>. Te duca<sup>n</sup> na cùnduu.

Duha dānehé ñáhà-í xii-ndo cāhá<sup>n</sup> ndihí-ndo Yă Ndiôxí.

<sup>14</sup> Te núu nchòhó quidé càhnu iní-ndó nchàa sá quidé ñàha tnaha ñáyiu-ndo, te duca<sup>n</sup> te Tătá-ndó Dütú Ndiôxí Yaá ndécú àndiu cada cahnu iní-gá nchaa sá ñà túú vāha quide-ndo tucu.

<sup>15</sup> Dico núu nchòhó vá cādā càhnu iní-ndó nchàa sá quidé ñàha tnaha ñáyiu-ndo ña, te ni Dütú Ndiôxí Yaá cúú Tătá-ndó vā cādā càhnu iní-gá nchaa sá quidé-ndó tucu.

*Cuendá ñáyiu ñá túú tnàhí ná xéxí āma càhá<sup>n</sup> ndihí-yu Yă Ndiôxí*

<sup>16</sup> Te nchòhó, nduu ñà túú tnàhí ná xéxí-ndó càhá<sup>n</sup> ndihí-ndo Yă Ndiôxí, te vá cùndiyí-ndó dàtná xīquide nchaa ñáyiu dāndahú mée-xí cāchí sá quidé ndāá te ñá ndāá sá quidé ndāá-yu, chí ñáyiu-á<sup>n</sup> duca<sup>n</sup> xīquidé-yu cuendá sá cuiní-yu cutnùní iní ñáyiu sá ñà túú tnàhí ná xéxí-yu càhá<sup>n</sup> ndihí-yu Yă Ndiôxí. Te yúhú cāchí tnúhu-í xii-ndo sã sà dúcá<sup>n</sup> quidé-yu te ñá túú nă chindee ñàha-xi xii-yu cuendá níhí-yu #<sup>n</sup> sá ndúú tǎhǔ-yu núú Yă Ndiôxí.

<sup>17</sup> Dico nchòhó, nduu dùca<sup>n</sup> quide-ndo ñá túú tnàhí ná xéxí-ndó càhá<sup>n</sup> ndihí-ndo Yă Ndiôxí, te váha váha naquete-ndo nǔú-ndó, te váha váha chíhi-ndo cǔcá

<sup>18</sup> cuendá sá vā cùtnùní iní ñáyiu sá ñà túú nă xéxí-ndó nduu duca<sup>n</sup> cahá<sup>n</sup> ndihí-ndo Yă Ndiôxí. Te Dütú Ndiôxí Yaá cúú Tătá-ndó ndècu ndihí-ndo diu-ni mee-gă ndéhé-gă nàcuáa

quìde-ndo ndecu-ndo, te òiu-gá taxi-gá sá ndúú tǎhú-ndó.

*Cuèndá nchaa sá vǎha nduu tǎhú-ó*  
(Lc. 12:33-34)

<sup>19</sup> Te vá cání ìní-ndó cùu-ndo ñáyiu cuica nǎndí sá cúndècu ndìhi-ndo ñuyíú-a chí vá cúdí-xi, chí dava quee tíquidi, te dava caxi cudi ñùhu, àdi quíhu ñadúhú vehe-ndo te duhu-güedě.

<sup>20</sup> Te váha-gá chí ndúcú nàcuáa cada-ndo cuèndá duca<sup>n</sup> ngündecu sá ndúú tǎhú-ndó àndiu, te xǎ<sup>n</sup> cudí-xi cundecu ndìhi-ndo ñi caa ñi quíhí<sup>n</sup>, chí yàcá<sup>n</sup> vá quée-gǎ tíquidi, te ñi vǎ cáxí-gǎ cudi ñùhu, te ñi vǎ quíní-gá-ndó ñadúhú duhu-güedě ndachiu<sup>n</sup>-ndo.

<sup>21</sup> Te núu cùu-ndo ñáyiu cuica ndècu ñuyíú-a, te òiu-ñi nchaa sá ndécú ndìhi-ndo ñuyíú-a ñùhu ìní-ndó. Àdi cuu-ndo ñáyiu quìde nacúáa ngündecu sá ndúú tǎhú-ndó àndiu, te òiu-ñi sá ndúú tǎhú-ndó ndècu andiu-á<sup>n</sup> ñúhú ìní-ndó.

*Núú-ó cùu-xi datná #<sup>n</sup> ñuhú*  
(Lc. 11:34-36)

<sup>22</sup> Te cada ìní-ndó sǎ núú-ndó cùu-xi datná #<sup>n</sup> ñuhú. Te núu núú-ndó caváha te cùtnuní ìní-ndó ñá cúú sǎ ndécú núú-ndó.

<sup>23</sup> Dico núu cùhú núú-ndó ñà túú cùtnuní cun-dehe-ndo ña, te ñà túú cùtnuní ìní-ndó ñá cúú sǎ ndécú núú-ndó. Te sá dúcá<sup>n</sup> cùhú núú-ndó te cada ìní-ndó sǎ ndécú-ndó dàtná #<sup>n</sup> núú néé. Te duha ndùu tnúhu càhá<sup>n</sup>-í chí núu sàni váha ìní-ndó cuèndá Yǎ Ndiǒxí ñá, te cùu vii cuu váha ìní-ndó ndècu-ndo. Á<sup>n</sup> te núu ñá túú sàni váha ìní-ndó cuèndá-gá ñá, te ñá túú tnàhí cùu váha ìní-ndó ndècu-ndo. Te sá dúcá<sup>n</sup> ñà túú sàni váha ìní-ndó

cuèndá-gá te cada iní-ndó sã ndécú-ndó dàtná ì<sup>n</sup> núú nées.

*Vá ndácú ì<sup>n</sup> téé cunu cuechi-dě núú ǔú pàtróó<sup>n</sup>  
(Lc. 16:13)*

<sup>24</sup> Te ni ì<sup>n</sup> téé xìnu cuechi vá ndácú-dě cunu cuechi-dě núú ǔú pàtróó<sup>n</sup>, chí téé-á<sup>n</sup> cuu váha iní-dé núú ì<sup>n</sup> pàtróó<sup>n</sup>-dě te tñí-dé nchaa tnúhu càhá<sup>n</sup> pàtróó<sup>n</sup> téé cùu váha iní-dé núú-xi-á<sup>n</sup>. Te núú ìngá tucu pàtróó<sup>n</sup>-dě vá cúú vãha iní-dé, te ni vã tñí-dě tnúhu càhá<sup>n</sup> ìngá téé-á<sup>n</sup>. Te duca<sup>n</sup> sãtnahá-xi cùu nchohó chí vá ndácú-ndó cùnu cuechi-ndo núú Yã Ndiõxí te cuhu<sup>n</sup> iní-ndó nchàa sá ìó ñuyíú-a.

*Yá Ndiõxí xító-gã nchaa ñáyíu cùu déhe-gá  
(Lc. 12:22-31)*

<sup>25</sup> Te na càchí tnúhu-í xii-ndo sã vã ìo cani iní-ndó ñúu nása níhí-ndó sã cóhó sã cáxí-ndó, te ni vã ìo cani iní-ndó ñúu nása níhí-ndó dǒó cuihnu-ndo, chí cùnuu-gá méé-ndó dàcúúxí sã nchító-ndó, te duca<sup>n</sup> cùnuu-gá yíqui cùñú-ndó dàcúúxí dǒó sácuihnu-ndo.

<sup>26</sup> Te chí cádá cuèndá sá ncháá quítì ndava ñá túú tnàhí ná xítú-güedi, te ni ñà túú ndèé cuáhá<sup>n</sup>-güedi nàtahu-güedi, te ni ñà túú ñã nátàxúha-güedi, te ni ñà túú ndèé cáá yàcá-güedi, chí mee Tãtá-ó Dütú Ndiõxí Yaá ndécú àndíu xito ñaha-gá xii-güedi nihí-güedi sá xéxí-güedi. Te núu cue quítì-á<sup>n</sup> duca<sup>n</sup> xító ñaha-gá xii-güedi, ÿte uu<sup>n</sup>-gá xító ñaha-gá xii nchòhó, chí nchòhó ío-gá cùnùu-ndo dacúúxí cuè quítì-á<sup>n</sup>!

<sup>27</sup> Te cuèi nándi sá sání vìhi iní-ndó ndècu-ndo, dico ñá ndácú-ndó càda-ndo nacúáa cuehnu-ndo cuèdìcò ì<sup>n</sup> yíqui-gã.

28 Te vá ïo cani iní-ndó nũu nása níhí-ndó dõõ cuihnu-ndo. Te chí cádá cuendá nàcuáa sàhnu nchaa itá ïó yucu, chí nchaa itá-á<sup>n</sup> ñà túú quide chiu<sup>n</sup>-xi, te ni ñà túú quèhe<sup>n</sup>-xi idi.

29 Te na càchí tnúhu-í xii-ndo sã ndĩ Salòmón cuèi ïó vii ní xĩnduu dóó nĩ xóo cuihnu ndĩ, dico ñá túú nũtnahá-xi nàcuáa càa nchaa itá, chí ïo-gá vii càa nchaa itá.

30 Te nchaa itá ïó yucu tnaa-ni cùdí-xi, te yìchí-xi te sàhmi ñáyiu. Te cuèi duca<sup>n</sup> dico mee Yã Ndiõxí quidé-gã ïó vii sàcũnduu-xi. Te núu nchaa itá-á<sup>n</sup> duca<sup>n</sup> quide-gá xító-gã sácũnduu vii-xi, te xiã<sup>n</sup> cùtnùní sá ïo-gá coto ñaha-gã xii-ndo, dicó-ni sá ñà túú sàndáá váha iní-ndó-gã.

31 Te xiã<sup>n</sup> nũu ñá túú xìní ñuhu vihi-xi cani iní-ndó nũu nása níhí-ndó sã cóhó sã cáxí-ndó, àdi nása níhí-ndó dõõ cuihnu-ndo.

32 Chí nchaa ñáyiu ñá túú xìní nàcuáa càhá<sup>n</sup> tnúhu Yá Ndiõxí mee-ni nchàa xiã<sup>n</sup> ñúhú iní-yu. Dico nchòhó chí mee Tãtá-ndó Dũtú Ndiõxí sa nàha-gá ná cúú sã xíní ñùhu-ndo.

33 Te xiã<sup>n</sup> nũu ïó xìní ñuhu-xi sá cúhú<sup>n</sup> iní-ndó sã Yã Ndiõxí yĩndàha ñaha-gá xii-ndo, te duca<sup>n</sup> càda-ndo nchaa nacuáa cuìní-gá, te duca<sup>n</sup> te taxi-gá nchaa sá xíní ñùhu-ndo.

34 Núu xiã<sup>n</sup> vá ïo cani iní-ndó nãsa cundecu-ndo ndũu tneé, chí cani iní-ndó nàcuáa cada-ndo cundecu-ndo vitna, chí nduu tnèé-á<sup>n</sup> te òré-ñã te cutnùní nũu nása cada-ndo cundecu-ndo. Chí nchòhó sa nàha-ndo sá ïo tĩtní núú sã quidé-xí ñ<sup>n</sup> nduu ñ<sup>n</sup> nduu —duha ní dánèhé ñáhá Jèsús xii cue téé xìca cuu ndĩhi-gá ndĩhi nchaa ñáyiu.

*Vá càhá<sup>n</sup> cuèhé-ó cuèndá tnàha ñáyiu-o  
(Lc. 6:37-38, 41-42)*

<sup>1</sup> Te Jèsús nděcuu-ni-gá dánèhé-gá cue téé xica cuu ndìhi-gá ndìhi nchaa ñáyiu, te xăha<sup>n</sup>-gă:

—Vá càhá<sup>n</sup> cuèhé-ndó cuèndá tnàha ñáyiu-ndo, te duca<sup>n</sup> te Yá Ndiõxí ñá túú nă tnúhu cúñaha-gă xii-ndo.

<sup>2</sup> Chi núu na càhá<sup>n</sup> cuèhé-ndó cuèndá tnàha ñáyiu-ndo, te Yá Ndiõxí íó ì<sup>n</sup> sá cádá ñàha-gă xii-ndo. Te núu nchòhó ná càhá<sup>n</sup> cuèhé víhí-ndó cuèndá tnàha ñáyiu-ndo te Yá Ndiõxí ío-gă dandòho ñaha-gă xii-ndo.

<sup>3</sup> ¿Te ná cuèndá ndéhé-ndó ì<sup>n</sup> sá ñà túú văha quide tnaha ñáyiu-ndo te mee-ndo vîhi-gá quidé-ndó-í? Te sá dúcá<sup>n</sup> quide-ndo te cada iní-ndó să ndéhé-ndó dàtná ì<sup>n</sup> mihi líhli ñùhu núú tnàha ñáyiu-ndo te mee-ndo ñùhu ì<sup>n</sup> mihi cahnu-gă núú-ndó te ñá túú quide cuendá-ndó.

<sup>4</sup> Te núu na năcanu ichi-ndo tnaha ñáyiu-ndo cuèndá sá ñà túú quide váha-yu ndécú-yu, te mee-ndo vîhi-gá quidé-ndó ñá, te cada iní-ndó să xăha<sup>n</sup>-ndo xii tnaha ñáyiu-ndo să nátava-ndo mihi líhli ñùhu núú-yu sá dúcá<sup>n</sup> quide-ndo, te mihi cahnu ñuhu núú méé-ndó ñà túú quide cuendá-ndó.

<sup>5</sup> Te sá dúcá<sup>n</sup> quide-ndo te ío dândahú-ndó mée-ndo sá quidé ndăá-ndó te ñá ndăá sá quidé ndăá-ndó, te xìni ñuhu-xi díhna-gă dañha-ndo nchaa sá ñà túú văha quide-ndo, te dàtnùní duca<sup>n</sup> te cuu nacanu ichi-ndo tnàha ñáyiu-ndo cuèndá nchaa sá ñà túú văha quidé-yu.

<sup>6</sup> Te nchaa ñáyiu ío sàá iní-xi, te vá cádá yica-ndó-yu cundedóho-yu tnúhu Yá Ndiõxí, chi núu na càda yica-ndó-yu te ngóo-yu cuu úhú iní



ñáhă-yu xii-ndo. Te ñáyiu-á<sup>n</sup> cúŷ-yu dàtná iná chi quiti-á<sup>n</sup> nŷu na cuãñaha-o ì<sup>n</sup> sá cuãñaha-o, te núu ñá túú cùtnuní iní-di ná cúú xǎ<sup>n</sup> te tñi ñaha-di xii-o. Te cùu tucú-yu dàtná cùchí chi quiti-á<sup>n</sup> nŷu na chùcu-o núú-di yúú vǎha sá ŷo vii càa nani pérlá, te dìcò-ni cùnu sáhá-di chi ñá túú cùtnuní iní-di sá cúú-xí yúú vǎha.

*Cácá<sup>n</sup>-ó nŷú Yǎ Ndiǒxí nŷu ná cuìní-ó  
(Lc. 11:9-13; 6:31)*

<sup>7</sup> Te na càchí tnúhu-í xii-ndo sǎ cǎcá<sup>n</sup>-ndó nŷú Yǎ Ndiǒxí te núu ná cuìní-ndó te taxi-gá, te vá dáñá ndèé-ndó cǎcá<sup>n</sup>-ndó nŷú-gǎ nŷu ná cuìní-ndó te duca<sup>n</sup> te nìhí-ndó. Te cada iní-ndó sǎ nǐ quexio-ndo vehe ì<sup>n</sup> tnaha ñáyiu-ndo te ní cáhá<sup>n</sup>-ndó, te ñáyiu-á<sup>n</sup> nǐ tedóho ñáhă-yu xii-ndo te ní nacaá<sup>n</sup>-yu yuyèhe. Te duca<sup>n</sup> càda iní-ndó chi Yǎ Ndiǒxí tedóho ñaha-gǎ xii-ndo, te taxi-gá sá ná cǎcá<sup>n</sup>-ndó nŷú-gǎ.

<sup>8</sup> Chi nchaa ñáyiu duca<sup>n</sup> xǐquide, te Yǎ Ndiǒxí tédóho ñaha-gǎ xii-yu te nìhí-yu sá cuìní-yu. Te ñi-ni duca<sup>n</sup> tùcu nchaa ñáyiu na cǎcá<sup>n</sup> núú-gǎ ì<sup>n</sup> sá cuìní-yu, chi sǎñaha-gǎ sá xìcá<sup>n</sup>-yu núú-gǎ. Te ñi-ni duca<sup>n</sup> tùcu nchaa ñáyiu ñá túú dàña ndeé xìcá<sup>n</sup> núú Yǎ Ndiǒxí sá cuìní-yu chi nìhí-yu.

<sup>9</sup> Te nchòhó cue tée cùu tátá, ñá túú cùndee iní-ndó cuãñaha-ndo xii cue déhe-ndo ì<sup>n</sup> yúú caxi-güexi òré xìcá<sup>n</sup>-güexi ì<sup>n</sup> pǎá núú-ndó cǎxi-güexi.

<sup>10</sup> Te nǐ ñá túú cùndee iní-ndó cuãñaha-ndo ì<sup>n</sup> cóó caxi-güexi òré xìcá<sup>n</sup>-güexi ì<sup>n</sup> chácá núú-ndó cǎxi-güexi.

<sup>11</sup> Te nchòhó cuèi ndèé dau-na sǎá iní-ndó dico sǎha-ndo cuè déhe-ndo sǎ vǎha xèxi-güexi òré ná

cúú sǎ xìcá<sup>n</sup>-güexi núú-ndó cǎxi-güexi. Te núu nchòhó duca<sup>n</sup> quìde-ndo, ìte uu<sup>n</sup>-gá duca<sup>n</sup> quìde Tátá-ndó Dütú Ndiöxí Yaá ndécú àndi, chi taxi-gá sá vǎha sá cúú-xí-ndó te núu na cǎcá<sup>n</sup>-ndó nǔú-gǎ!

12 'Te nchaa sá vǎha cuìní-ndó cǎda tnaaha ñáyiu-ndo, te cada-ndo tnàhá-ndó ndìhí-yu, chi duca<sup>n</sup> sànu ichi ñaha tnúhu ní chídó tnùní ndíi Moisés, te diu-ni duca<sup>n</sup> sànu ichi ñaha tucu nchaa tnúhu ní chídó tnùní cue téé ní xóo cǎhá<sup>n</sup> tnúhu Yá Ndiöxí ndéé sanaha.

*Yuyèhe cuiñi*

*(Lc. 13:24)*

13-14 'Te xìni ñuhu-xi nducu-ndo nacuáa cada-ndo tnè-ndo ichi Yá Ndiöxí. Te ichi-gá-á<sup>n</sup> cúú-xí dàtná ì<sup>n</sup> ichi cuiñi, àdi datná ì<sup>n</sup> yuyèhe cuiñi. Te duha cǎhá<sup>n</sup>-í chi ío úhú xínu iní-ndó tnè-ndo ichi Yá Ndiöxí, te sacú-ni nchòhó cue ñáyiu ndècu ñuyíú-a tnè-ndo ìchi-gá. Te nchaa ñáyiu ndècu ichi cuehé ichi duha ta xíta nihnú-yu cuáhá<sup>n</sup>. Te ichi ndécú-yu-á<sup>n</sup> cada iní-ndó sǎ cúú-xí ì<sup>n</sup> ichi cahnu ichi quehé<sup>n</sup>, àdi ì<sup>n</sup> yuyèhe quehé<sup>n</sup>. Te duha cǎhá<sup>n</sup>-í chi ío vǎi ñáyiu ndécú-yu ichi-á<sup>n</sup>.

*Ndi ðí<sup>n</sup> nǔú yutnu xìní-ó nǎ yutnu cùu-xi cuendá sá sǎvidí-xi*

*(Lc. 6:43-44)*

15 'Te cǎchí tnúhu-í xii-ndo sǎ ío quihi iní-ndó cùndecu-ndo cuendá sá vǎ dándàhú ñàhá cue téé cǎchí sá cǎhá<sup>n</sup> tnúhu Yá Ndiöxí te ñá ndáá sá cǎhá<sup>n</sup>-güedé tnúhu-gá. Chi cue téé-á<sup>n</sup> sànuu sá quídé-güedé dàtná quídé mbéé quiiti ío váha iní-xi, ðico ñá ndáá chi ñá túú ñuhu váha iní-güedé, chi quíde-güedé dàtná quídé quiiti déé<sup>n</sup> quiiti nàni yíhí.

16 Te òré quexìo-güedé núú ndécú-ndó te cada cuendá-ndó nàcuáa quìde-güedé cuendá duca<sup>n</sup> cùtnuní iní-ndó nã ñáyiú cùu-güedé. Te nchòhó xìní-ndó sã ñà túú cùu<sup>n</sup> ndéhé yoho yàha stilé tnu ìñu, te ni ñà túú xìní-ndó cùu<sup>n</sup> ngúxí ì<sup>n</sup> tnu ìñu.

17-18 Te xìní tucu-ndo sã ncháá yùtnu váha cùu<sup>n</sup> sávidí váha, te nchaa yutnu váha-á<sup>n</sup> ñà túú cùu<sup>n</sup> sávidí sá ñà túú vãha. Te nchaa yutnu sá ñà túú vãha ñà túú cùu<sup>n</sup> sávidí váha, chi mee-ni sávidí sá ñà túú vãha cùu<sup>n</sup>.

19 Te nchaa yutnu sá ñà túú cùu<sup>n</sup> sávidí váha xèhndé-güedé, te cuánguee-xi núú ñùhú càyú-xi. Te duca<sup>n</sup> sãtnahá-xi yáha nchaa cue téé dándahú ñáhá càchí sá càhá<sup>n</sup> tnúhu Yá Ndiöxí te ñá ndàá sá càhá<sup>n</sup>-güedé tnúhu-gá, chi quíhí<sup>n</sup>-güedé núú ñùhú núú càyú.

20 Te nchòhó cutnùní iní-ndó nã ñáyiú cùu cue téé-á<sup>n</sup> cuendá nchaa sá quidé-güedé.

*Ñá ncháá ñáyiú ngúndecú-yu núú ndécú Yã Ndiöxí táxí tnùní-gá*

*(Lc. 13:25-27)*

21 Te na càchí tnúhu-í xii-ndo sã ìo vài ñáyiú cachí-yu sá yùhú cùu-í Xítóhó-yu, dico ñá ncháá-yu nduu táhũ-yu cundecú-yu núú ndécú Tãtà-í Dútú Ndiöxí táxí tnùní-gá, chi mee-ni nchàa ñáyiú na càda nchaa nacuáa càhá<sup>n</sup>-gá ñáyiú-á<sup>n</sup> nduu táhũ-yu cundecú-yu núú ndécú-gã táxí tnùní-gá.

22 Te na sàá nduu càda ndáá Yã Ndiöxí cuéchi nchaa ñáyiú, te vài-yu cúñahá-yu xii-í: “Yòhó Xítóhó Jesucristú nchúhú cúú-ndí ñáyiú ní càhá<sup>n</sup> tnúhu-n nàcuáa ní cachí-n, te ñu-ni-n ñí cuncenehe-ndí te ní sándáá iní ñáhá nchàa espíritú

cúndìhi yucu ñávãha xii-ndí ní quee-xi yiqui cùñú ñáyiu, te ðiu-ni yòhó ní chindee ñaha-n xii-ndí ní ndacu-ndí ní quide-ndí títí ní núú sã vã yõo tnàhí ndàcu cada”, duha cúñàhá-yu xii-í dàvá-á<sup>n</sup>.

23 Dico yúhú cúñaha-í xii-yu: “Ñá túú tnàhí xìní ñáhà-í xii nchòhó nõu ndée ñáyiu cùu-ndo, te chí xócuñí nchaa nchòhó ñáyiu quide nchaa sá cuèhé sá dúhá nõú ndécù-í-a”, duha cúñaha-í xii-yu.

*Í<sup>n</sup> vehe ndècu cimientú-xi ndihi ì<sup>n</sup> vehe ñá túú cìmientú-xi*  
(Mr. 1:22; Lc. 6:47-49)

24 Te nchaa ñáyiu sàcúndedóho tnúhu càhá<sup>n</sup>-í te núu na tñí-yu, te ñáyiu-á<sup>n</sup> cúú-yu dàtná ì<sup>n</sup> téé ío váha cùtnuní iní-xi. Chí téé-á<sup>n</sup> ní dácáá-dě ì<sup>n</sup> vehe, dico díhna-gá ní xete-dé ndée ní tnahá-dé yúú cáxí<sup>n</sup> te dătnùní ní tava-dé cimientú-xi.

25 Te òré ní cuu<sup>n</sup> dáú te ní ndee ndute ñuhu, te ní dándáá-xí ndée núú cáá vèhe-á<sup>n</sup>, dico ñá túú ní ndàcu-xi cuido-xi. Te ní quene tucu táchí ñíhi dico ñá túú ní ndàcu-xi cuido-xi vehe-á<sup>n</sup>, te duca<sup>n</sup> chí téé ní dácáá vèhe-á<sup>n</sup> ní tava-dé cimientú-xi núú yúú cáxí<sup>n</sup>. Duha sãtnahá-xi cùu nchaa ñáyiu tñí tnúhu càhá<sup>n</sup>-í.

26 Dico nchaa ñáyiu sàcúndedóho tnúhu càhá<sup>n</sup>-í te ñá túú cuiní-yu tñí-yu, ñáyiu-á<sup>n</sup> cúú-yu dàtná ì<sup>n</sup> téé ñá túú tnàhí cùtnuní iní-xi. Chí téé-á<sup>n</sup> ní dácáá-dě ì<sup>n</sup> vehe núú yúú mēe-ni ñuhu cúchí.

27 Te òré ní cuu<sup>n</sup> dáú te ní ndee ndute ñuhu, te ní dándáá-xí ndée núú cáá vèhe-á<sup>n</sup>, te ní quene táchí ñíhi te íí-ni ní xido-xi vehe-á<sup>n</sup> cuendá sá nõú ñuhu cúchí ní sáá. Duha sãtnahá-xi cùu nchaa ñáyiu sàcúndedóho tnúhu càhá<sup>n</sup>-í te ñá túú cuiní-yu

tní-yu —duha ní dánèhé ñáhá Jèsús xii cue téé xìca cuu ndìhi-gá ndìhi nchaa ñáyi.

<sup>28</sup> Te òré ní ndìhi Jèsús sá dúcá<sup>n</sup> ñí cáhá<sup>n</sup>-gá, te nchaa ñáyi ní xíndedóho nchaa tnúhu ní cáhá<sup>n</sup>-gá ío ní cuñúhu-yu nàcuáa ní dánèhé ñáhá-gă xii-yu.

<sup>29</sup> Chi ní cáhá<sup>n</sup>-gá dàtná càhá<sup>n</sup> cue téé cùnūu, te cùnūu ndisa-gá, te ñá túú ní càhá<sup>n</sup>-gá dàtná càhá<sup>n</sup> nchaa cue téé dàcuaha ñaha xii ñáyi nchaa tnúhu ní chídó tnùnì ndí Moisés.

## 8

*Jèsús quidé tătna-gá ñí tée tnàhá cuéhé sã dátèhyú nihnu-xi yiqui cùñú-ó*

*(Mr. 1:40-45; Lc. 5:12-16)*

<sup>1</sup> Te Jèsús ní xica-gá cuánuu-gá dñi tndúú nñú dúcá<sup>n</sup> ñí xíndecu-gá ní dánèhé-gá ñáyi-á<sup>n</sup>, te cuéhé víhí ñáyi nchicú<sup>n</sup> ñáhá xii-gá cuánuu.

<sup>2</sup> Te ní quexìo ñí tée tnàhá cuéhé sã dátèhyú nihnu-xi yiqui cùñú-ó nñú Jèsús, te ní ngüñí xítí-dě núú-gă, te xăha<sup>n</sup>-dě xii-gá:

—Mèstrú, véxi-í càhá<sup>n</sup> ndàhú-í núu-n nñu vá cùndèe iní-n càda tătna ñaha-n xii-í, chi cùnūnì iní-í sá ndácú-n —càchí-dé xăha<sup>n</sup>-dě xii-gá.

<sup>3</sup> Te Jèsús ní dácàá-gá ndaha-gá ní tendaha ñaha-gá xii-dé, te xăha<sup>n</sup>-gă:

—Cuu cada tătna ñaha-í xii-n, te vitna ndúha-n —càchí-gá xăha<sup>n</sup>-gă xii-dé.

Te òré-ñi-á<sup>n</sup> ñí xócuiñí cuéhé tnàhá-dé.

<sup>4</sup> Te Jèsús ní xáha<sup>n</sup> tùcu-gá xii-dé:

—Te vitna cuanùhú te vá yõo ñí cùñaha-n sã yùhú ní quide tătna ñaha-í xii-n, núú dñtú-ni cuàhá<sup>n</sup> cuendá sá ná quìní ñáhá-dě xii-n sã ñí ndúha-n, te cuañaha-n sã ndúú tãhú Yă Ndiõxí dàtná ní cachí

ndíi Moisés. Te duca<sup>n</sup> càda-n cuendá cutnùnì iní ñáyiú sá ñí ndúha-n —càchí-gá xǎha<sup>n</sup>-gǎ xii téé ní quíde tátna-gá-á<sup>n</sup>.

*Jèsús quíde tátna-gá ì<sup>n</sup> téé xìnu cuechi núú ì<sup>n</sup> téé cùu capitá<sup>n</sup>*

*(Lc. 7:1-10)*

<sup>5</sup> Te Jèsús ní xica-gá cuáhá<sup>n</sup>-gá ñuú Capèrnaúm. Te òré cuánguihu-gá ñuú-á<sup>n</sup> te ní quexìo ì<sup>n</sup> téé cùu capitá<sup>n</sup> càhá<sup>n</sup> ndàhú-dé núú-gǎ,

<sup>6</sup> te xǎha<sup>n</sup>-dě xii-gá:

—Mèstrú, véxi-í càhá<sup>n</sup> ndàhú-í núú-n nùu vá cùndèe iní-n càda tátna-n ì<sup>n</sup> téé xìnu cuechi núú-í, chí cùhú-dé te càhú víhí tnàhá-dé, te ío ndòho-dé te ni ñǎ cùndèe-gá-dé candá nihnu-dé —càchí-dé xǎha<sup>n</sup>-dě xii-gá.

<sup>7</sup> Te Jèsús ní xáha<sup>n</sup>-gǎ xii-dé:

—Te na quíhí<sup>n</sup>-ó càda tátna-í-dé —càchí-gá xǎha<sup>n</sup>-gǎ xii-dé.

<sup>8</sup> Te téé cùu capitá<sup>n</sup>-á<sup>n</sup> ñí xáha<sup>n</sup>-dě xii-gá:

—Mèstrú, ñá túú tàú-í sá quǐhu-n ndèe xití vehe-í, chí cùu-í ì<sup>n</sup> téé cùtexínu sá cúú-xí-n, te cáhá<sup>n</sup>-ní sá ndúha téé xìnu cuechi núú-í te ndúha-dé.

<sup>9</sup> Chí yúhú ndècu cue téé tàxi tnuní ñáhá xii-í, te duca<sup>n</sup> yúhú tucu ndècu cue sandadú táxi tnùnì-í. Te òré xǎha<sup>n</sup>-í xii ì<sup>n</sup>-dé quíhí<sup>n</sup>-dé ì<sup>n</sup> chùu<sup>n</sup> te cuáhá<sup>n</sup>-dé, te òré xǎha<sup>n</sup>-í xii ìngá-dé quixi-dé te véxi-dé, te òré xǎha<sup>n</sup>-í xii ì<sup>n</sup> téé xìnu cuechi núú-í cada-dé ì<sup>n</sup> chùu<sup>n</sup> te quíde-dé. Núu xíá<sup>n</sup> yòhó cáhá<sup>n</sup>-ní sá ndúha téé xìnu cuechi núú-í te ndúha-dé —càchí-dé xǎha<sup>n</sup>-dě xii Jèsús.

10 Te Jèsús ío ní cuñúhu-gá sá dúcá<sup>n</sup> ñĩ cáhá<sup>n</sup> tée cùu capitá<sup>n</sup>-á<sup>n</sup>, te ní xáha<sup>n</sup>-gã xii nchaa ñáyiu nchìcú<sup>n</sup> ñáhá xii-gá:

—Na càchí tnúhu ndáá-í xii-ndo sã vătă quíní-gá-í ni ì<sup>n</sup> ñáyiu isràél, ñáyiu súúní ïo váha sàndáá iní ñáhá xii Yá Ndiõxí dàtná sàndáá iní ñáhá tèe-a xii-gá.

11 Te na càchí tnúhu ndáá tucu-í xii-ndo sã ïo cuéhé ñáyiu quixi ndàa xio nacuáa quène nchícanhii, te ñu-ni duca<sup>n</sup> ïo cuéhé tucú-yu quixi ndàa xio nacuáa quée tucu nchícanhii. Te nchaa ñáyiu-á<sup>n</sup> naníhí tnáhã-yu ndihí té Àbrahám, ndihí té Isàác, ndihí té Jàcób núú ndécú Yá Ndiõxí táxí tnùní-gá te yàcá<sup>n</sup> cundecu ndihí ñáhá-yu xii-güedé.

12 Te nchaa ñáyiu tàú nduu táhú cundecu núú ndécú Yá Ndiõxí táxí tnùní-gá ní cùu, ñáyiu-á<sup>n</sup> quee tíhũ-yu, chi quíhí<sup>n</sup>-yu ì<sup>n</sup> xichi núú néé nũú ïo ndohó-yu cundecú-yu, te yàcá<sup>n</sup> ío ndáhí-yu, te ñicó rúhñú-nã cuu núhu-yu sá sàtú iní-yu cuèndá sá ndóhõ-yu —càchí-gá xãha<sup>n</sup>-gã xii-yu.

13 Te Jèsús ní xáha<sup>n</sup> tùcu-gá xii tée cùu capitá<sup>n</sup>-á<sup>n</sup>:

—Yòhó tée ndècu ndihí tée cùhú cuanùhú vehe-n vitna chi ndúha-dé chi ní sàndáá iní-n Yá Ndiõxí —càchí-gá xãha<sup>n</sup>-gã xii-dé.

Te ñu-ni òré duca<sup>n</sup> ñĩ xáha<sup>n</sup> Jèsús xii tée cùu capitá<sup>n</sup>-á<sup>n</sup> ñĩ ndúha tée xìnu cuechi núú-dě.

*Jèsús quidé tãtna-gá nãná ñadìhí té Pèlú*

*(Mr. 1:29-31; Lc. 4:38-39)*

14 Te Jèsús ní xica-gá cuáhá<sup>n</sup>-gá vehe té Pèlú, te òré ní quexìo-gá vehe-dé te ní xiní-gá cáá nãná ñadìhí-dé cùhú-a<sup>n</sup> ñùhu vihi-a<sup>n</sup> cahni.

15 Te Jèsús ní tñi-gá ndaha ñaha cùhú-án, te òré-ni-án ñi nchíco-a<sup>n</sup> cahni te ní ndacóo-a<sup>n</sup> ní xinu cuechi-a<sup>n</sup> núú-güedě ndihi-gá.

*Jèsús quidé tātna-gá vại ñáyiú cùhú*  
(Mr. 1:32-34; Lc. 4:40-41)

16 Te òré ní dáhu nchícanhii te ní quexìo ñáyiú núú ndécú Jèsús, te ndécá-yu vại ñáyiú yìhi ñaha espíritú cùndìhi yucu ñávǎha ní sáá núú-gǎ te ndéca tucú-yu vại ñáyiú tnàhá dava-gá núú cuèhé. Te ì<sup>n</sup>-ni tnúhu ní cáhá<sup>n</sup> Jèsús ní tenàá-gá nchaa espíritú cùndìhi yucu ñávǎha yìhi ñaha xii nchaa ñáyiú-án, te ní quee-xi yìquì cùñú-yu cuáhá<sup>n</sup>-xi. Te tnàhá nchaa dava-gá ñáyiú cùhú-án ñi quide tātna-gá.

17 Te duca<sup>n</sup> ñi cuu chi ní quee ndáá-xi nàcuáa ní cáhá<sup>n</sup> ndíi Chàíá téé ní xóo cáhá<sup>n</sup> tnúhu Yá Ndiòxí ndéé sanaha, te duha ní cachí ndíi: “Mee-gǎ cada tātna ñaha-gǎ xii-o, chi ñu-gá xocàni-gá nchaa sá quidé ùh yìquì cùñú-ó”, duha ní cachí ndíi.

*Ñáyiú cuìní tuha ñaha xii Jesús*  
(Lc. 9:57-62)

18 Te òré ní xiní Jèsús sá ìo cuéhé ñáyiú xǐxúcu núú ndécú-gǎ, te ní xáha<sup>n</sup>-gǎ xii cue téé xìca cuu ndihi-gá sá quèe-gá ndihi-güedé bàrcú cuendá téhndé-gá ndihi-güedé ndàa ingá xio yuhu làgúná.

19 Te mei òré-án ñi quexìo ì<sup>n</sup> téé dàcuaha ñaha xii cue ñáyiú nchaa tnúhu ní chídó tnùnì ndíi Moisés, te xáha<sup>n</sup>-dě xii-gá:

—Mèstrú, cuìní-í canchicú<sup>n</sup> ñáhà-í xii-n nděni ní cuu na quìhí<sup>n</sup>-n —càchí-dé xáha<sup>n</sup>-dě xii-gá.

20 Te Jèsús ní xáha<sup>n</sup>-gǎ xii-dé:



—Nchaa ñúcuui chi ndècu yaú cúú vèhe-güedi saquíhi-güedi, te nchaa cue quiti ndàva caa tacá-güedi diquí yutnu. Dico yúhú Tée cùu ñaní tnáhá-ndó nchàa-ndo chi ñá túú ndéé cáá vèhe-í ñuyíú-a ndetatú-í —càchí-gá xǎha<sup>n</sup>-gǎ xii-dé.

<sup>21</sup> Te ì<sup>n</sup> tée ní chitnahá ñáhá xii Jesús ní xáha<sup>n</sup>-dě xii-gá:

—Jèsús, daña na nùhú-í cundetú-í cuú tǎtà-í te chindúxi-í-dé dǎtnùní quixi-í chitnahá ñáhá dùca<sup>n</sup>-ná-í xii-n —càchí-dé xǎha<sup>n</sup>-dě xii-gá.

<sup>22</sup> Te Jèsús ní xáha<sup>n</sup>-gǎ xii-dé:

—Daña ñǎyiu ñá túú sàndáá iní ñáhá xii-í ná chindúxi tnàha meé-yu, chi ñǎyiu-á<sup>n</sup> cúũ-yu dàtná ñǎyiu ní xíhí cuéi ndècu-ní-yu núú ñuyíú-a, te yòhó canchicú<sup>n</sup> ñáhá-ní xii-í —càchí-gá xǎha<sup>n</sup>-gǎ xii-dé.

*Jèsús ngání-gǎ táchí ndihi ndute làgúná*

*(Mr. 4:35-41; Lc. 8:22-25)*

<sup>23</sup> Te sátá dúcá<sup>n</sup> te Jèsús cuánguee-gá bàrcú ndihi cue tée xica cuu ndihi-gá, te ní xica bàrcú-á<sup>n</sup> cuǎhá<sup>n</sup>-xi.

<sup>24</sup> Te ñini ñùhu barcú-á<sup>n</sup> ichi cuáhá<sup>n</sup>-xi núú ndute ní xidí Jèsús, te ní ngüita-xi níhi vìhi quene táchí, te ta nàdachitú-xi ndute xití bàrcú cuáhá<sup>n</sup>.

<sup>25</sup> Te cue tée xica cuu ndihi-gá cuáhá<sup>n</sup>-güedé núú cáá-gǎ xidí-gá, te xǎha<sup>n</sup>-güedě xii-gá:

—¡Mèstrú, ndiquíú ìní chi dǎcácu ñaha-n xii-o chi quée naa-o cuíní-xi! —càchí-güedé xǎha<sup>n</sup>-güedě xii-gá.

<sup>26</sup> Te Jèsús ní xáha<sup>n</sup>-gǎ xii-güedé:

—¿Ná cuendá ndéé duca<sup>n</sup> ìo yùhú-ndó? ¿Náa ñá túú sàndáá iní ñáhá ndisa-ndo xii-í-ǎ<sup>n</sup>? —càchí-gá xǎha<sup>n</sup>-gǎ xii-güedé.

Te Jèsús ní ndacóo-gá te ní tenàá-gá táchí-ǎ<sup>n</sup> ndìhì ndute-á<sup>n</sup>, te ní ngüíñí táchí-ǎ<sup>n</sup> te ní nucúndecu nahi-nǎ ndute làgúná-á<sup>n</sup>.

27 Te nchaa cue téé ñùhu xítí bàrcú-á<sup>n</sup> ñí cuñúhu-güedé sá dúcá<sup>n</sup> ñí quide-gá ní xiní-güedé, te ní xítñàha-güedé:

—¿Te ná téé cùu téé-a núu duha ní cáhá<sup>n</sup>-ni-dé te ní ngüíñí táchí te ní nucúndecu nahi-ni ndùte làgúná-a-i? —càchí-güedé xítñàha-güedé.

*Cue téé ñuú Gàdará cue téé yìhì ñàha espíritú cùndìhì yucu ñávǎha*

*(Mr. 5:1-20; Lc. 8:26-39)*

28 Te òré ní quèxio Jèsús ndàa ìngá xio yuhu làgúná yucu cue téé ñuú Gàdará, te úú tñàhá cue téé quide vehe núu yíndǔxi ndíyì ní quee-güedé cuáhá<sup>n</sup>-güedé núu ndécú Jèsús, te ndì nduú-güedé yìhì ñàha espíritú cùndìhì yucu ñávǎha xii-güedé, te ío màñá-güedé chí vá yõ tñàhí dàña-güedé yáha yatni núu ndécú-güedé.

29 Te cue espíritú yìhì ñàha xii-güedé-á<sup>n</sup> ñí quide-xi níhì ní cáhá<sup>n</sup>-güedé, te xǎha<sup>n</sup>-güedé xii-gá:

—¿Ná cuèndá véxi-ò Jèsús Déhe Dútú Ndióxi chidácá ñáhá-n xii-ndí? ¿Á<sup>n</sup> sàma véxi-n dándoho ñàha-n xii-ndí? Te vátá sàá-gá nduu dùca<sup>n</sup> cada-n —cachí-güedé xǎha<sup>n</sup>-güedé xii-gá.

30 Te yatni xía<sup>n</sup> xìxica cuu vài cuchí xìxexi-güedé.

31 Te cue espíritú cùndìhì yucu ñávǎha yìhì ñàha xii cue téé-á<sup>n</sup> ñí cáhá<sup>n</sup> ndàhú-xi núu Jèsús, te xǎha<sup>n</sup>-xi:

—Te núu vá dáñá-gǎ-n quìhì-ndí yìquì cùnú cue téé-a, te càhá<sup>n</sup> ndàhú-ndí núu-n sǎ dàña-n na

quíhí<sup>n</sup>-ndí quíhu-ndí yiqui cùñú nchaa cùchí-ǎ<sup>n</sup> —  
càchí cue espíritú-á<sup>n</sup> xǎha<sup>n</sup>-xi xì-gá.

<sup>32</sup> Te Jèsús ní xáha<sup>n</sup>-gǎ xii cue espíritú cùndìhì  
yucu ñávǎha-á<sup>n</sup>:

—Chí táquèe yiqui cuñú cue tée-á<sup>n</sup> te quíhí<sup>n</sup>-ndó  
núu ndèé ichi quíhí<sup>n</sup>-ndó —càchí-gá xǎha<sup>n</sup>-gǎ xii  
nchaa espíritú-á<sup>n</sup>.

Te cue espíritú cùndìhì yucu ñávǎha-á<sup>n</sup> nǐ quee-xi  
yiqui cùñú cue tée-á<sup>n</sup>, te cuáhá<sup>n</sup>-xi cuánguìhu-xi  
nchaa cùchí-á<sup>n</sup>. Te cue quiti-á<sup>n</sup> nǐ xinu-güedi duha  
ní quee-güedi ndàa núú dèhvá yuhu làgúná-á<sup>n</sup>, te  
ní ngaunihnu-güedi xití ndute, te ní ndìhì-güedi ní  
cáhá.

<sup>33</sup> Te cue tée xìto ñaha xii nchaa cuchí-á<sup>n</sup> nǐ  
yùhú-güedé te ní xinu-güedé, te ní sáhá<sup>n</sup>-güedé ní  
cani-güedé cuèndú núú cuè ñáyiú ndècu xití ñuú  
nchaa nàcuáa ní cuu cuèndá cue tée ní xihì ñaha  
nchàa espíritú cùndìhì yucu ñávǎha-á<sup>n</sup>.

<sup>34</sup> Te nchaa ñáyiú ñuú-á<sup>n</sup> nǐ quee-yu cuáhá<sup>n</sup>-yu  
núú ndécú Jèsús. Te òré ní quexìo-yu núú ndécú-gǎ  
te ní cáhá<sup>n</sup> ndàhú-yu núú-gǎ sá ná quèe-gá yucu  
ñuú-yu núhú-gá.

## 9

*Jèsús quidé tǎtna-gá ì<sup>n</sup> tée cùhú ñá cúú-gǎ candá  
nihnu*

*(Mr. 2:1-12; Lc. 5:17-26)*

<sup>1</sup> Te sátá dúcá<sup>n</sup> nǐ cuu te Jèsús cuándee-gá bàrcú  
cuáhá<sup>n</sup>-gá ní natehdé-gá ndàa ingá xio yuhu  
làgúná. Te xía<sup>n</sup> nǐ ndexìo-gá ñuú núú quidé ñuú-gá.

<sup>2</sup> Te xía<sup>n</sup> ndécú-gǎ ní quexìo cue tée nchìdo-güedé  
ì<sup>n</sup> tée cùhú ñá cúú-gǎ candá nihnu ñùhu-dé xìto,

te Jèsús ní cutnùní iní-gá sá sàndáá ndisa iní ñhá-güedé xii-gá nũu ní xáha<sup>n</sup>-gã xii té cùhú-á<sup>n</sup>:

—Yòhó té cùhú vá ndìhú-gá iní-n, chi sa ní quide càhnu iní-í nchaa cuéchi-n —càchí-gá xãha<sup>n</sup>-gã xii-dé.

<sup>3</sup> Te sá dúcá<sup>n</sup> ñí cáhá<sup>n</sup>-gá nũu xíã<sup>n</sup> cue té dâcuaha ñaha xii ñáyiú nchaa tnúhu ní chídó tnùní ndí Moisés ní sani iní-güedé: “Tée-a càhá<sup>n</sup> cuèhé-dé cuèndá Yá Ndiõxí”, duha ní sani iní-güedé.

<sup>4</sup> Te Jèsús ní cutnùní iní-gá nâcuáa sàni iní-güedé nũu ní xáha<sup>n</sup>-gã xii-güedé:

—¿Ná cuèndá duca<sup>n</sup> sàni cuehé sání dùha iní-ndó?

<sup>5</sup> Te sá dúhá ñí xáha<sup>n</sup>-í xii té cùhú-a sá ñí quide càhnu iní-í nchaa yíca cuèchi-dé, te xíã<sup>n</sup> nchòhó ñá túú cùtnùní iní-ndó nũu ndáá càhá<sup>n</sup>-í àdi ñá ndáá. Dico nũu cúu-í-dé sá ndácõo-dé te caca-dé, te cutnùní ndáá iní-ndó nũu ndáá càhá<sup>n</sup>-í àdi ñá ndáá, chi cundehe nũú-ndó nâcuáa cada-í.

<sup>6</sup> Te vitna na càda-í nâcuáa cutnùní iní-ndó nchàa-ndo sá yũhú Tée cùu ñaní tnáhá-ndó nchàa-ndo ndecu ndìhi-í tnúhu ndee ìní ñuyíú-a sá cádá càhnu iní-í nchaa cuéchi ñáyiú —càchí-gá xãha<sup>n</sup>-gã xii-güedé.

Te sá tá dúcá<sup>n</sup> te ní xáha<sup>n</sup>-gã xii té cùhú-á<sup>n</sup>:

—Ndacóo, te ndocani-n xító ñũhu-n véxi-á<sup>n</sup> te núhú-n vehe-n —cachí-gá xãha<sup>n</sup>-gã xii-dé.

<sup>7</sup> Te òré-ni-á<sup>n</sup> ñí ndúha té cùhú-á<sup>n</sup> te ní ndacóo-dé te ní ndocani-dé xító ñũhu-dé ní quexìo-á<sup>n</sup> te ní xica-dé cuánuhú-dé vehe-dé.

<sup>8</sup> Te nchaa ñáyiú xĩndecu-á<sup>n</sup> ïo ní cuñúhu-yu sá dúcá<sup>n</sup> ñí quide Jèsús ní xiní-yu, te ní cachí-yu sá ïo càhnu cuu Yá Ndiõxí cuèndá sá ñí sãñaha-gã xii Jèsús tnúhu ndee ìní cada-gá nchaa sá vã yõ tnàhí ndàcu cada.

*Jèsús càhá<sup>n</sup>-gá ì<sup>n</sup> téé nàni Mateú chitnahá ñáhá-dě xii-gá*

*(Mr. 2:13-17; Lc. 5:27-32)*

<sup>9</sup> Te Jèsús ní nucúhu<sup>n</sup> tucu-gá ichi cuáhá<sup>n</sup>-gá, te ichi ñùhu-gá ní xiní-gá núcõo ì<sup>n</sup> téé nàni Mateú quidé còbrá-dé ñáyiu chi cobràdór impuèstú cúú-dě, te ní xáha<sup>n</sup>-gă xii-dé:

—Màteú, néhé chitnahá ñáhá-n xii-í —càchí-gá xăha<sup>n</sup>-gă xii-dé.

Te té Màteú-á<sup>n</sup> ñi ndacuíñí-dé ní chitnahá ñáhá-dě xii-gá.

<sup>10</sup> Te ì<sup>n</sup> xito ndècu Jèsús ì<sup>n</sup> vehe, te yìhi-gá mèsá ndìhi cue téé xìca cuu ndìhi-gá xéxí ndìhi ñaha-gá xii-güedé. Te tnàhá cue téé cuihna ìní-xi quide cobrá ñáhá xii ñáyiu cuendá impuèstú yíhi ndìhi-gá mèsá, te tnàhá tucu dava-gá cue téé ndècu ichi cuehé ichi duha yìhi ndìhi-gá mèsá.

<sup>11</sup> Te sá ñi xiní cue téé cùu fariséu xéxí Jèsús ndìhi nchaa cue téé-á<sup>n</sup>, te ní xícá<sup>n</sup> tnúhú-güedě núú cue téé xìca cuu ndìhi-gá, te xăha<sup>n</sup>-güedě:

—¿Ná cuendá duca<sup>n</sup> quide téé cùu mestrú-ndó xèxi-dé ndìhi cue téé cuihna ìní-xi quide cobrá ñáhá xii ñáyiu cuendá impuèstú, ndìhi nchaa dava-gá cue téé ndècu ichi cuehé ichi duha-i? —càchí-güedé xăha<sup>n</sup>-güedě.

<sup>12-13</sup> Te Jèsús ní tecú dóho-gá nàcuáa ndùu tnúhu ní xáha<sup>n</sup>-güedě xii cue téé xìca cuu ndìhi-gá, núú ní xáha<sup>n</sup>-gă xii-güedé:

—Nchaa ñáyiu ñá túú cùhú chi ñá túú xini ñuhú-yu ñátátná, dico nchaa ñáyiu cùhú chi xini ñuhú-yu ñátátná. Te yúhú véxi-í cáhá<sup>n</sup>-í ñáyiu cùtnuní ìní-xi sá ndécú cuèchi-xi cuendá dàñá-yu

nchaa sá cuèhé sá dúhá quidé-yu, te ñá túú vëxi-í cáhá<sup>n</sup>-í ñáyiú cáchí sá ñà túú ndècu cuéchi-xi. Te chí cádá cuèndá váha nàcuáa càhá<sup>n</sup> Yă Ndiöxí núú tùtú-gá núú cáchí-xi: “Yúhú cuìní-í sá cúndàhú iní-ndó cuè tnaaha ñáyiú-ndo, te ñá díú mèe-ni sá cáhni-ndó quítì nduu táhù-í”, duha cáchí-gá núú tùtú-gá —cáchí Jèsús xăha<sup>n</sup>-gă xii-güedé.

*Cue téé ndècu tnúhu núú Jèsús cuèndá ñáyiú ñá túú tnàhí ná xéxí áma càhá<sup>n</sup> ndihí-yu Yă Ndiöxí*

*(Mr. 2:18-22; Lc. 5:33-39)*

<sup>14</sup> Te cue téé xica cuu ndihí té Juáá téé dàcuandute ñaha xii ñáyiú ní sáhá<sup>n</sup>-güedé núú ndécú Jèsús, te xicá<sup>n</sup> tnúhú-güedé núú-gă, te xăha<sup>n</sup>-güedé:

—Cuìní-ndí cáchí tnúhu-n nă cuèndá nchúhú, ndihí cue téé cùu fariséú ñá túú tnàhí ná xéxí-ndí áma càhá<sup>n</sup> ndihí-ndí Yă Ndiöxí, te cue téé xica cuu ndihí-n ñá túú dùca<sup>n</sup> quide-güedé —cáchí-güedé xăha<sup>n</sup>-güedé xii-gá.

<sup>15</sup> Te Jèsús ní xáha<sup>n</sup>-gă xii-güedé:

—Nchòhó xìní-ndó să vă cúú cũñaha-o xii ñáyiú ñùhu vico tnândaha sá vă cúú caxí-yu ñini ndècu ndihí ñaha téé tnândaha xií-yu, dico sáá nduu vă cúndècu ndihí ñaha-gá téé tnândaha-á<sup>n</sup> xií-yu, te dàvá-á<sup>n</sup> te cahni iní-yu vá caxí-yu cuèndá sá ndihú iní-yu.

<sup>16</sup> Te ni vă yôo dândée luha dóó sáá ì<sup>n</sup> dóó sa ní cuu tùhú víhí, chí dóó sáá-ă<sup>n</sup> nàndiyi-xi te uu<sup>n</sup>-gá ndata-xi dđó să ñi cuu tùhú-á<sup>n</sup>.

<sup>17</sup> Te ni vă yôo chíhi ndidí sáá xítí ì<sup>n</sup> lamba sa ní cuu tùhú víhí, chí núu yoo duca<sup>n</sup> na càda te ndava lamba sa ní cuu tùhú-á<sup>n</sup> chí ío ñihi yócó ndidí-á<sup>n</sup>, te cuíta-ni ndidí-á<sup>n</sup> te cuíta-ni lamba-á<sup>n</sup> te

núu duca<sup>n</sup> na càdá-yu, núu xíá<sup>n</sup> xíní ññu-xi quée ndidí sáá-ǎ<sup>n</sup> xítí ñ<sup>n</sup> lamba saa cuendá duca<sup>n</sup> ñà túú nǎ cuu cováha-xi —càchí-gá xǎha<sup>n</sup>-gǎ xii-güedé.

*Cuendá déhe yoco té Jàirú ndihi cuendá ñ<sup>n</sup> ñaha ní tnándeé dóó Jèsús*

*(Mr. 5:21-43; Lc. 8:40-56)*

18 Te càhá<sup>n</sup> dúcá<sup>n</sup>-ní Jèsús ní quexìo ñ<sup>n</sup> téé cùnuu núú ndécú-gǎ, ñ<sup>n</sup> téé tàxi tnuní veñúhu, te ní ngüíñí xítí-dě núú-gǎ càhá<sup>n</sup> ndàhú-dé, te xǎha<sup>n</sup>-dě xii-gá:

—Véxi-í càhá<sup>n</sup> ndàhú-í núú-n nǔu vá cündèe iní-n quíhí<sup>n</sup>-ó vèhe-í dandòto-n déhe yoco-í chi ní xíhí-xi tnávíí, te yúhú cútnùní iní-í sá nǔu quíhí<sup>n</sup>-n tëndaha-n yiqui cuñú-xi te ndoto-xi —càchí-dé xǎha<sup>n</sup>-dě xii-gá.

19 Te Jèsús ní xica-gá cuáhá<sup>n</sup>-gá ndihi-dé ndihi cue téé xíca cuu ndihi-gá.

20 Te ichi ññu-gá cuáhá<sup>n</sup>-gá ní sáhá<sup>n</sup> ñ<sup>n</sup> ñadìhí ní tnándeé-a<sup>n</sup> yuhu dóó-gǎ ndàa sátá-gǎ, te ñaha-á<sup>n</sup> sa ní cuu úxúú cuíá sǎ cùhú-a<sup>n</sup> ngòyo ñaha níñí xii-a<sup>n</sup>.

21 Te duca<sup>n</sup> ñí quide-a<sup>n</sup> chi ní sani iní-a<sup>n</sup> sá nǔu ndacu-a<sup>n</sup> tnándeé-a<sup>n</sup> cuèdicó luha yuhu dóó Jèsús te ndúha-a<sup>n</sup> ní sani iní-a<sup>n</sup>.

22 Te Jèsús ní nchócótó-gǎ ndàa sátá-gǎ te ní xíní-gá ñadìhí-á<sup>n</sup>, te ní xǎha<sup>n</sup>-gǎ:

—Yòhó ñaha cùhú, vá ndìhú-gá iní-n vitna chi sa ní ndúha-n, chi ní sándáá iní ñáhá-n xii-í —càchí-gá xǎha<sup>n</sup>-gǎ xii-a<sup>n</sup>.

Te òré-ni-á<sup>n</sup> ñí ndúha ñaha cùhú-ǎ<sup>n</sup>.

23 Te òré ní quexìo Jesús vehe téé cùnuu taxi tnuní veñúhu-á<sup>n</sup>, te ní xíní-gá xǐndáhí víhí ñǎyiu, te xǐndecu müsicú.

24 Te ní xǎha<sup>n</sup>-gǎ xií-yu:

—Chí táquèe xítí vehe-a, chí xíchí-a ñá túú ní xíhí-xi chí òcò xídí-xi —càchí-gá xǎha<sup>n</sup>-gǎ xií-yu.

Te ní sácú ndeé ñáhǎ-yu xii-gá sá dúcá<sup>n</sup> ñí cáhá<sup>n</sup>-gá, chí sá cúú-xí mèé-yu te ní xíhí ndisa xíchí-ǎ<sup>n</sup>.

<sup>25</sup> Te ñáyiú-á<sup>n</sup> ñí queé-yu te cuánguihu Jèsús núú cándòdo xíchí ñí xíhí-á<sup>n</sup>, te ní tñi-gá ndaha-xi te òré-ni-á<sup>n</sup> ñí ndacóo-xi.

<sup>26</sup> Te nchaa ñúú cáá yàtni xía<sup>n</sup> ñí níhí ñáyiú tñúhu nàcuáa ní quide Jèsús.

*Jèsús quidé tǎtna-gá núú ǔú tñàhá cue téé cuàá*

<sup>27</sup> Te sátá dúcá<sup>n</sup> ñí cuu te ní xica Jèsús cuánuhú-gá, te ichi ñùhu-gá ní chinchícú<sup>n</sup> ñáhá ǔú tñàhá cue téé cuàá xii-gá, te níhi càhá<sup>n</sup>-güedé, te xǎha<sup>n</sup>-güedě xii-gá:

—Yòhó Jèsús, téé cùu ñaní tñàhá ndíi Dàvíí, cundàhú iní ñáhá xii-ndí —càchí-güedé xǎha<sup>n</sup>-güedě xii-gá.

<sup>28</sup> Te òré ní nasáá Jèsús núú quidé vèhe-gá, te cue téé cuàá-á<sup>n</sup> ñí quexìo-güedé ndeé núú-gǎ, te ní xícá<sup>n</sup> tñúhú-gǎ núú-güedé, te xǎha<sup>n</sup>-gǎ:

—¿Sàndáá iní-ndó sǎ yùhú ndacu-í cada tátna-í núú-ndó-ǎ<sup>n</sup>? —càchí-gá xǎha<sup>n</sup>-gǎ xii-güedé.

Te ní xáha<sup>n</sup>-güedě xii-gá:

—Sàndáá iní-ndí sá díú yòhó Jèsús ndacu-n cada tátna-n núú-ndí —càchí-güedé xǎha<sup>n</sup>-güedě xii-gá.

<sup>29</sup> Te Jèsús ní dácáá-gá ndaha-gá ní tendaha-gǎ núú-güedé, te ní xáha<sup>n</sup>-gǎ xii-güedé:

—Te vitna, ndúha núú-ndó chí ní sàndáá iní-ndó sǎ díú yùhú ndacu-í cada tátna-í núú-ndó —càchí-gá xǎha<sup>n</sup>-gǎ xii-güedé.



30 Te òré-ni-á<sup>n</sup> ñí ndúha núú-güedě, te Jèsús ní cáhá<sup>n</sup> víhí-gă dóho-güedé cuendá sá vă cãhá<sup>n</sup>-güedé nàcuáa ní cuu ní ndúha núú-güedě.

31 Te cue téé-á<sup>n</sup> òré ní ndee-güedé núú ndécú Jèsús, te ní ngüíta-ni-güedé ní cani-güedé cuendú núú ñăyiu nàcuáa ní quide ñaha-gă xii-güedé. Te nchaa dăva-gă ñúú cáá yàtni xíá<sup>n</sup> ñí sáhá<sup>n</sup>-güedé ní cani-güedé cuendú núú ñăyiu nàcuáa ní quide ñaha Jèsús xii-güedé.

*Jèsús quidé tătna-gá ì<sup>n</sup> téé ñìhí*

32 Te íchí ñí ndee cue téé ní ndúha núú-xi-á<sup>n</sup> núú ndécú Jèsús, te ní quexio ì<sup>n</sup> úú ñăyiu ndécá-yu ì<sup>n</sup> téé ñìhí yíhí ñàha espíritú cúndìhí yucu ñávăha.

33 Te Jèsús ní queñuhu-gá espíritú cúndìhí yucu ñávăha yìhí ñaha xii téé-á<sup>n</sup>, te òré-ni-á<sup>n</sup> ñí cuu ní nacáhá<sup>n</sup>-dé. Te nchaa ñăyiu xĩndecu-á<sup>n</sup> ìo ní cuñúhu-yu, te ní xítñàhá-yu:

—Ñá túú tnàhí xìní-ó ì<sup>n</sup> téé duha cada ñúú nchoo cuè ñăyiu isràél ní cùu —cachí-yu xítñàhá-yu.

34 Te cue téé cùu fariséú ní ngüíta-güedé xítñàha-güedé:

—Tée-a chi sácúíhná chĩndèe ñaha-xi xii-dé quèñùhu-dé nchaa espíritú yíhí ñàha xii ñăyiu te d̄iu-ni sácúíhná-ă<sup>n</sup> táxí tnùnì-xi nchaa espíritú-á<sup>n</sup> —càchí-güedé xítñàha-güedé.

*Jèsús cúndàhú iní-gá ñăyiu*

35 Te Jèsús cuáhá<sup>n</sup>-gá nchaa ñúú náhnú ndìhí nchaa ñúú lĩhli, te ndì tnahá ì<sup>n</sup> ì<sup>n</sup> ñúú sàá-gá te duca<sup>n</sup> cuànguìhu-gá ì<sup>n</sup> ì<sup>n</sup> veñúhu càa nchaa ñúú-á<sup>n</sup> dánèhé-gá ñăyiu tnúhu váha, tnúhu sá sánú ìchi ñaha xií-yu nàcuáa ndíhu ndaha ñàha Yá Ndiöxí xií-yu.

Te duca<sup>n</sup>-ni ta quède tátna-gá nchaa ñáyiú cùhú cuáhá<sup>n</sup> cuèi ndi díí<sup>n</sup> ndi díí<sup>n</sup> núú cuéhé tnàhá-yu ìí<sup>n</sup>-yu.

<sup>36</sup> Te sá ñi xini Jèsús sá ìo vài ñáyiú nchìcú<sup>n</sup> ñáhá xii-gá, te ní cundàhú iní ñáhá-gă xií-yu chi ìo ndihú iní-yu, te vá yôo nèhe cuendá ñáhá xii-yu, te cùú-yu dàtná cue mbéé cue quiti ñá túú tòli-xi.

<sup>37</sup> Te Jèsús ní xáha<sup>n</sup>-gă xii cue téé xica cuu ndihí-gá:

—Nchòhó xini-ndó sã òré ná sàá nduu cùu nchaa sá xítú ñáyiú te ìo vài cuu. Te na càchí tnúhu ndáá-í xii-ndo sã dàtná ìo vài sá xítú ñáyiú cùu, duca<sup>n</sup> ìo vài ñáyiú cùmání cundedóho tnúhu-í, te ìo sacú ñáyiú dàcuaha ñaha xií-yu.

<sup>38</sup> Núú xiá<sup>n</sup> xini ñuhu-xi cáca<sup>n</sup>-ndó núú Yã Ndiöxí Yaá cúú Xitohó-ndó ndihí-yu cuendá sá ná dàcahá<sup>n</sup>-gá iní-yu cáhá<sup>n</sup>-yu tnúhu-gá núú nchàa dava-gá tnàha ñáyiú-yu cùmání cundedóho tnúhu-gá —càchí-gá xãha<sup>n</sup>-gă xii-güedé.

## 10

*Jèsús sãñaha-gă tnúhu ndee iní xii ndi ùxúú cue téé xica cuu ndihí-gá*

*(Mr. 3:13-19; Lc. 6:12-16)*

<sup>1</sup> Te Jèsús ní cana-gá ndi ùxúú cue téé xica cuu ndihí-gá, te ní sãñaha-gă xii-güedé tnúhu ndee iní cundecu ndihí-güedé cuendá queñuhu-güedé nchaa espíritú cündihí yucu ñávãha yihí ñaha xii ñáyiú, ndihí cuendá sá cádá tátna-güedé nchaa dava-gá ñáyiú cùhú cuèi nándi núú cuéhé tnàhá-yu.

<sup>2</sup> Te duha xínani ndi ùxúú cue téé-á<sup>n</sup>: téé cùnuyu-gá nání-dě Xímú, àdi Pelú chi úú diù-dé, te ñaní-dé cúú

tě Ndrǐxí, te tnàhá tée-á<sup>n</sup> cúú-dě tée xìca cuu ndihi Jesús, ndihi té Jàcobó ndihi ñaní té Jàcobó-á<sup>n</sup> tée nàni Juaá, te ndi ndùú cue tée-á<sup>n</sup> cúú-güedě déhe té Zebèdeú.

<sup>3</sup> Te tnàhá té Lìpé xíca cùu ndihi-gá, ndihi té Bartolómé, ndihi té Mǎxí, ndihi té Màteú tée cùu cobradór impuèstú ní cùu, ndihi té Jàcobó déhe té Àlfeú, ndihi té Lèbeú tée dānani-güedé Tàdeú,

<sup>4</sup> ndihi té Xímú tée ní cundihi cue tée canànistá, ndihi té Jùdás Iscàrioté tée ní sáá nduu ñí sáha cuèndá ñáhá xii Jesús núú cuè tée cùu úhú iní ñáhá xii-gá.

*Jèsús téndàha-gá ndi ùxúú cue tée xìca cuu ndihi-gá quíhí<sup>n</sup>-güedé cáhá<sup>n</sup>-güedé tnúhu-gá núú ñáyiú*

*(Mr. 6:7-13; Lc. 9:1-6)*

<sup>5-6</sup> Te Jèsús ní xáha<sup>n</sup>-gǎ xii ndi ùxúú cue tée xìca cuu ndihi-gá sá quíhí<sup>n</sup>-güedé cáhá<sup>n</sup>-güedé tnúhu-gá núú ñáyiú, te cùmání-gǎ caca-güedé quíhí<sup>n</sup>-güedé, te ní xáha<sup>n</sup>-gǎ xii-güedé:

—Na càchí tnúhu-í xii-ndo sǎ méé-ní ñúú núú xǐndecu cue ñáyiú isràél quíhí<sup>n</sup>-ndó cáhá<sup>n</sup>-ndó tnúhu-í, te vá quíhí<sup>n</sup>-ndó ñí ñúú ñúú yíndèhu distritú Sàmariá, te ñí vǎ quíhí<sup>n</sup>-ndó dàva-gá ñúú núú xǐndecu ñáyiú ñá túú cùu ñáyiú isràél. Te cue ñáyiú isràél-á<sup>n</sup> cúú-yu dàtná cue mbéé cue quiti ní xíta chi ta xíta nihnú-yu cuáhá<sup>n</sup>.

<sup>7</sup> Te cúñaha-ndo xii-yu sá sà ní cuyatni nduu ndíhu ndaha ñàha Yá Ndiǒxí xii-yu.

<sup>8</sup> Te cada tátna-ndo nchàa ñáyiú cùhú cuèi ñáyiú tnàhá cuéhé sǎ dátèhyú nihnu-xi yiqui cùñú-yu, te queñuhu-ndo nchàa espíritú cùndihi yucu ñávàha

yìhi ñaha xii ñáyi, te dandòto-ndo cue ñáyi sa ní xíhí, te vá càcá<sup>n</sup>-ndó yǎhu-ndo núú ñáyi òré cada-ndo nchàa chiu<sup>n</sup>-á<sup>n</sup>, chi sa nàha-ndo sá dicó duca<sup>n</sup> ñí taxi-í tnúhu ndee ìní ndécú ndìhi-ndo.

9 Te vá cànèhe-ndo díhú<sup>n</sup> cuu ichi-ndo,

10 te ni vǎ cànèhe-ndo ñunu cuhu<sup>n</sup> ndachiu<sup>n</sup>-ndo, te ni vǎ cànèhe-ndo ìngá ichi dóó-ndó nàdáma-ndo, te ni vǎ cànèhe-ndo úú-gá chàú-ndó chi ñiu-ni chàú yíhí-ndó-ǎ<sup>n</sup> xǎ<sup>n</sup>-ni quíhi-ndo, te ni vǎ cànèhe-ndo tatnu, te duca<sup>n</sup> càda-ndo chi nchòhó sa nàha-ndo sá ncháá ñáyi quède chiu<sup>n</sup> te ñiu-ni cuendá chiú<sup>n</sup> quidé-yu ñìhí-yu sá xéxǐ-yu.

11 Te ndi tnahá ñuú ná quèxio-ndo te nducu-ndo ñáyi cùtnuní ìní-ndó sǎ cúú-yu ñáyi váha, te vehe ñáyi-á<sup>n</sup> cundecu-ndo ndéé sáá nduu ndèe-ndo ñuú-á<sup>n</sup>.

12 Te òré quexio-ndo vehé-yu te cúñaha-ndo xíi-yu: “Yá Ndiòxí chíndèe chitúu ñaha-gǎ xii-ndo ndècu-ndo”, duha cúñaha-ndo xíi-yu.

13 Te núu ní cǎhá<sup>n</sup> váha ndìhi ñàhá-yu xii-ndo, te cuu-xi sá vǎha sá cúú-xí-yu cuendá tnúhu ní xáha<sup>n</sup>-ndo-ǎ<sup>n</sup>, dico núu ñá túú ní càhá<sup>n</sup> váha ndìhi ñàhá-yu xii-ndo, te cúñaha-ndo xíi-yu sá vǎ cúú-xí sǎ vǎha xíi-yu tnúhu ní xáha<sup>n</sup>-ndo-ǎ<sup>n</sup>.

14 Te núu ní sáá-ndó ì<sup>n</sup> ñuú àdi ì<sup>n</sup> vehe, te núu ñá túú ní cǎhá<sup>n</sup> ndìhi ñaha vǎha-yu xii-ndo te ni ñà túú ní cuìní-yu cundedóho-yu tnúhu càhá<sup>n</sup>-ndó te ndee-ndo ñuú-á<sup>n</sup> àdi vehe-á<sup>n</sup>, te naquidi-ndo tǐcá chúhmá ñí tníi sáhá-ndó cuendá ná cùtnuní ìní-yu sá ñà túú quède váha-yu.

15 Te na càchí tnúhu ndáá-í xii-ndo sǎ sáá nduu te ío-gá dandòho ñaha Yá Ndiòxí xii ñáyi duca<sup>n</sup> na

càda ñaha xii-ndo-á<sup>n</sup> dàcúúxí ñǎyiu ní xíndecu ñuú Sòdomá ndìhi ñuú Gòmorrá.

*Ndoho tnahá-ó cùndecu-o ichi Xítóhó Jesucristú*

16 'Te cada iní-ndó sǎ cúú-ndó dàtná cue mběé cue quiti cuáhá<sup>n</sup> núú íó yíhí. Te duca<sup>n</sup> sǎtnahá-xi cùu-ndo chi yúhú tendaha ñaha-ǎ xii-ndo quǎhí<sup>n</sup>-ndó núú xíndecu cue ñáyiu cuihna iní-xi, te ío váha cuáha-ndo cuendá nàcuáa cada-ndo dàtná quidé cǒó, dico cunduu váha iní-ndó ñà túú ñà cada-ndo dàtná quidé lǒmá.

17 Te quíhi iní-ndó chi cue ñáyiu na cùu úhú iní ñáhá xii-ndo, te cuáha cuendá ñáhǎ-yu xii-ndo núú cuè téé cùchiu<sup>n</sup>, te caniha-güedě xii-ndo xítí veñúhu-güedé.

18 Te dava tucu ñáyiu cuu úhú iní ñáhá xii-ndo candeca ñahá-yu xii-ndo quǎhí<sup>n</sup> núú cuè téé cùnuu yíndaha nació<sup>n</sup>, àdi núú dǎva-gá cue téé cùnuu sá cuendá-í. Te nchòhó níhí-ndó nàcuáa cada-ndo cǎhá<sup>n</sup> váha-ndo cuendá-í núú-güedě ndìhi núú cuè ñáyiu ñá túú cùu ñáyiu isràél.

19-20 Dico òré cuáha cuendá ñáhǎ-yu xii-ndo núú nchàa cue téé-á<sup>n</sup>, te vá cání iní-ndó núú nása cunduu tnúhu cǎhá<sup>n</sup>-ndó núú-güedě, chi òré-ñǎ te níhí-ndó tnúhu cǎhá<sup>n</sup>-ndó. Te ñá díú mèe-ndo cahu iní-ndó tnúhu cǎhá<sup>n</sup>-ndó, chi mee Espíritú Yǎ Ndiǒxí Yaá cúú Tǎtá-ndó dàcahú iní ñáhá-xí xii-ndo nacuaa cunduu tnúhu cǎhá<sup>n</sup>-ndó.

21 'Te dava cue téé cuáha cuendá-güedé ñaní-güedé núú cuè téé cùchiu<sup>n</sup> cuendá cahni ñaha-güedě, te dava cue téé cùu tǎtá ñu-ni duca<sup>n</sup> càda-güedé déhe-güedé, te ñu-ni duca<sup>n</sup> càda ñaha dava cue ñáyiu cùu déhe xii tǎtǎ-yu ndìhi ñǎñǎ-yu,

chi cuáha cuèndá ñáhă-yu núu cuè téé cùchiu<sup>n</sup> cuendá cahni ñaha-güedě xii-yu.

22 Te nchòhó chi nchaa ñáyiú nguíta-yu cuu úhú iní ñáhă-yu xii-ndo sá cuèndá-í. Te núu na càda ndee-ni iní-ndó cànchicú<sup>n</sup> nihnu-ni-ndo ìchi-í cuèi nándi sá ná càda ñahá-yu xii-ndo ndèé ná sáá nduu vă cùndècu-gá-ndó ñùyíú-a ña, te nduu táhú-ndó cùndecu-ndo ni caa ni quíhí<sup>n</sup> ndihí Yá Ndióxi.

23 Te núu ì<sup>n</sup> ñuú cuìní-güedé tñi ñaha-güedě xii-ndo càda úhú ñahá-güedě sá cuèndá-í, te cunu-ndo nùú-güedě quíhí<sup>n</sup>-ndó ìngá ñuú. Te na cächí tñuhu ndáá-í xii-ndo sá cùmání-gă quíhí<sup>n</sup>-ndó nchàa dava-gá ñuú núu xĩndecu ñáyiú isràél cáhá<sup>n</sup>-ndó tñuhu-í, te sa quixi tucu yúhú, Téé cùu ñaní tnáhá-ndó nchàa-ndo ñuyíú-a.

24-25 "Te nchòhó xìní-ndó sá nì ì<sup>n</sup> téé dàcuaha ñá túú cùnuu-dé dàcúúxí mèstrú-dé, te núu mèstrú téé-á<sup>n</sup> nándi yăha-dé ndécú-dě te tàú-dé nduu vétú iní-dé te núu tnáhá-dé yăha-dé dàtná yăha mèstrú-dé-á<sup>n</sup>. Te ñiú-ni duca<sup>n</sup> sãtnahá tucu-xi cùu ì<sup>n</sup> téé xĩnu cuechi, chi ñá túú cùnuu-dé dàcúúxí pàtróó<sup>n</sup>-dě, te nchaa sá yăha pàtróó<sup>n</sup>-dě-á<sup>n</sup> te tàú-dé nduu vétú iní-dé te núu tnáhá-dé yăha-dé dàtná yăha pàtróó<sup>n</sup>-dě-á<sup>n</sup>. Te núu yúhú Yáá táxí tñuní ñahá xii-ndo cachí-yu sá cùú-í sácúíhná, te uu<sup>n</sup>-gá duca<sup>n</sup> cũñahá-yu xii nchòhó cue téé cùndihí-í.

*Vá yùhú-ó cuèndá nchaa sá cádá ñàha ñáyiú xii-o (Lc. 12:2-7)*

26 "Te nchòhó vá yùhú-ndó nùú ñáyiú. Chi nchaa tñuhu sá cúú yùhu ni cuu vá cúú yùhu-gá, chi nchaa dacuíí sá quée túu-xi núú ñáyiú.

27 Te nchaa tnúhu sá cächí tnúhu-í xii-ndo núú mée núú ñ<sup>n</sup>-ó, cùu-xi tnúhu sá ndúú yùhu ni cuu datúu-ndo núú cuè ñáyiu cuèi núú chítú núú tàcá.

28 Te xini ñuhu-xi sá vǎ yùhú-ndó cuè ñáyiu cuèi na càhni ñahá-yu xii-ndo, chi d̄i-u-ni yiqui cùñú-ndó ndacú-yu cahní-yu, dico ñá túú nǎgá ndacú-yu cada ñàhá-yu xii-ndo. Te tàú-ndó sǎ Yǎ Ndiõxí yùhú-ndó chi Yaá-á<sup>n</sup> ndacu-gá danàa-gá yiqui cùñú-ndó, te ndacu-gá daquihí<sup>n</sup> ñáhá-gǎ xii-ndo núú ùhú núú ndàhú.

29 Te nchòhó xini-ndó sǎ ndèé úú tnàhá tǐlaá cùyǎhu-d̄i núú ñ<sup>n</sup>-ní dǐhú<sup>n</sup>, te ni ñ<sup>n</sup>-d̄i ñá túú xihí cùtexínu-d̄i chi ndéé núu mee Yǎ Ndiõxí Yaá cúú Tǎtà-ndó ná cächí-gá te xihí-d̄i.

30 Dico nchòhó chi ío-gá néhé cuèndá ñáhá Yǎ Ndiõxí xii-ndo chi ndéé idi díquí-ndó yìndehu.

31 Núu xiǎ<sup>n</sup> cächí-í sá vǎ yùhú-ndó chi cùnuu-gá-ndó dàcúxí tǐlaá cuèi vǎi vihi-güedi.

*Nchaa ñáyiu dàtúu núú tnàha ñáyiu-xi sá ndécú ndihí-yu Xítóhó Jesucristú*

*(Lc. 12:8-9)*

32 Te na cächí tnúhu-í xii-ndo sǎ ncháá ñáyiu na dàtúu núú tnàha ñáyiu-xi sá ndécú ndihí ñahá-yu xii-í, te duca<sup>n</sup> te tnàhá yùhú dàtúu-í núú Tǎtà-í Dútú Ndiõxí Yaá ndécú ànd̄iu sá ndécú ndihí-í-yu.

33 Dico nchaa ñáyiu na cùñaha xii tnaha ñáyiu-xi sá ñà túú ndècu ndihí ñahá-yu xii-í, te d̄i-u-ni duca<sup>n</sup> càda yùhú tucu chi cùñaha-í xii Tǎtà-í Dútú Ndiõxí Yaá ndécú ànd̄iu sá ñà túú ndècu ndihí-í-yu.

*Ñá túú cùu ñ<sup>n</sup>nuu ñáyiu*

*(Lc. 12:51-53; 14:26-27)*

34 "Te na càchí tnúhu-í xii-ndo sã vã cání iní-ndó sã yùhú véxi-í ñuyú-a te cuu ì<sup>n</sup>nuu-gã ñáyiú cundecú-yu, chi da ngüita-yu vá cúú ì<sup>n</sup>nuu-gá-yu cundecú-yu, te duca<sup>n</sup> chi nchaa ñáyiú vá quindáá iní ñáhá xì-í ñáyiú-á<sup>n</sup> ngõo-yu cuu úhú iní-yu nchaa ñáyiú quindáá iní ñáhá xì-í.

35 Te dava cue téé xĩndecu tãtã-xi te ngóo-güedé cuu úhú iní-güedé tãtã-güedé, te ðiu-ni duca<sup>n</sup> càda cue ñáyiú ðihí xĩndecu nãná-xi, chi ngóo-yu cuu úhú iní-yu nãná-yu, te ðiu-ni duca<sup>n</sup> càda tucu cue ñáyiú cùu sãnu, chi ngóo-yu cuu úhú iní-yu nãná yí-yu.

36 Te ndi mèe-yu vehé-yu ngóo-yu vá cúú ì<sup>n</sup>nuu-gá-yu cundecú-yu.

37 "Te na càchí tnúhu tucu-í xii-ndo sã ncháá ñáyiú ío-gá ná cùu iní tãtã-xi àdi náná-xi dàcúúxí yùhú, te ñáyiú-á<sup>n</sup> ñà túú tàú-yu cundecu ndihí ñáhá-yu xii-í, te nchaa ñáyiú ío-gá ná cùu iní déhe ducu<sup>n</sup>-xi, àdi déhe yoco-xi dàcúúxí yùhú, te ðiu-ni duca<sup>n</sup> ñà túú tàú-yu cundecu ndihí ñáhá-yu xii-í.

38 Te nchaa ñáyiú vá cãncí<sup>n</sup> nihnu ñaha xì-í cuendá sá yùhú-yu ndohó-yu dàtná ndoho-í ñáyiú-á<sup>n</sup> ñà túú tàú-yu cundecu ndihí ñáhá-yu xii-í.

39 Te cue ñáyiú na yùhú cuú sá cuendá-í te ñáyiú-á<sup>n</sup> cuíta nihnú-yu, dico nchaa ñáyiú vá yùhú cuú sá cuendá-í, te ñáyiú-á<sup>n</sup> nduu táhũ-yu cundecú-yu ni caa ni quíhí<sup>n</sup> ndihí Yá Ndiõxí.

*Cuendá sá ndúú tãhú-ó  
(Mr. 9:41)*

40 "Te nchaa ñáyiú na quèhe<sup>n</sup> cuendá ñáhá xì-ndo te cada iní-yu sá tnàhá yùhú ní quehe<sup>n</sup> cuendá-yu. Te nchaa ñáyiú na quèhe<sup>n</sup> cuendá ñáhá



xii-í, te cada iní-yu sá tnàhá Tătà-í Dútú Ndiǒxí Yaá ní tendaha ñàha xii-í véxi-í ñuyíú-a ní quehe<sup>n</sup> cuendá-yu.

<sup>41</sup> Te nchaa ñáyiu na quèhe<sup>n</sup> cuendá ì<sup>n</sup> téé càhá<sup>n</sup> tnúhu Yá Ndiǒxí cuendá sá quidé-dě chiu<sup>n</sup>-gá, te dàtná-ni càa táhú cuǎñaha-gǎ nduu táhú tǎe duca<sup>n</sup> càhá<sup>n</sup> tnúhu-gá-á<sup>n</sup>, ñiu-ni duca<sup>n</sup> cùnduu táhú cuǎñaha-gǎ nduu táhú ñáyiu duca<sup>n</sup> na quèhe<sup>n</sup> cuendá ñáhá xii-dé. Te nchaa ñáyiu na quèhe<sup>n</sup> cuendá ì<sup>n</sup> téé quide váha cuendá sá dúcá<sup>n</sup> quide váha-dé, te dàtná-ni càa táhú nduu táhú tǎe-á<sup>n</sup> ñiu-ni duca<sup>n</sup> cùnduu táhú nduu táhú ñáyiu na quèhe<sup>n</sup> cuendá ñáhá xii-dé.

<sup>42</sup> Te nchaa ñáyiu na cuǎñaha ì<sup>n</sup> yaxi<sup>n</sup> ndute coho ì<sup>n</sup> ñáyiu cùu cuendá-í cuendá sá ñí tuha ñàhá-yu xii-í cuèi ñá túú cùnuu vihi-yu, te ñáyiu duca<sup>n</sup> na cuǎñaha ndute-á<sup>n</sup> ñíhí-yu sá ndúú tǎhǔ-yu núú Yá Ndiǒxí —càchí Jèsús xǎha<sup>n</sup>-gǎ xii-güedé.

## 11

*Jèsús càhá<sup>n</sup> ndihí-gá cue téé xica cuu ndihí té Juàá (Lc. 7:18-35)*

<sup>1</sup> Te sátá ñí yáha duca<sup>n</sup> ñí xáha<sup>n</sup> Jèsús xii ndi ùxúú cue téé xica cuu ndihí-gá, te ní xica-gá cuáhá<sup>n</sup>-gá nchaa ñuú cáa yàtni xía<sup>n</sup> dánèhé-gá ñáyiu tnúhu-gá.

<sup>2</sup> Te té Juàá yìhi-dé vecaá te ní níhí-dě tnúhu nchaa nàcuáa quide Xítóhó Jesucristú. Te sátá dúcá<sup>n</sup> te ní tendaha-dě ì<sup>n</sup> úú cue téé xica cuu ndihí-dé cuáhá<sup>n</sup>-güedé núú ndécú Jèsús.

<sup>3</sup> Te òré ní quexìo-güedé núú ndécú-gǎ, te xicá<sup>n</sup> tnúhú-güedé núú-gǎ nàcuáa ní xáha<sup>n</sup> tǎe Juàá xii-güedé, te xǎha<sup>n</sup>-güedé xii-gá:

—Véxi-ndí xìcá<sup>n</sup> tnúhú-ndí núú-n nùu sá díú-n cùu-n Cristú Yaa ní tendaha Yă Ndiõxí véxi ñuyú-a, àdi sá cùndètu nahi-ni-ndí mei Yàá-á<sup>n</sup> —càchí-güedé xăha<sup>n</sup>-güedë xii-gá.

<sup>4</sup> Te Jèsús ní xáha<sup>n</sup>-gă xii-güedé:

—Chí cuánùhú te cani-ndo cuendú núú tĕ Juáa nchaa sá ñĩ xini-ndó quide-í, ndihĩ nchaa nàcuáa ndùu tnúhu ní cáhá<sup>n</sup>-í ní xíndedóho-ndo.

<sup>5</sup> Te cúñaha-ndo xii-dé sá quidé tătna-í núú cuè ñáyiu cuáa, te quide tătna-í cue ñáyiu yacua, ndihĩ cue ñáyiu tnàhá cuéhé să dátèhyú nihnu-xi yiqui cùñú-yu, ndihĩ cue ñáyiu doho, nchaa ñáyiu-á<sup>n</sup> quidé tătna-í, te ndũha-yu, te ndéé tnàhá cue ñáyiu sa ní xihĩ dándòto-í cúñaha-ndo. Te cúñaha tùcu-ndo xii-dé sá nděcuu-í dánèhé-í nchaa ñáyiu ndàhú, tnúhu sá sánú ìchi ñaha xií-yu nàcuáa naníhĩ tàhú-yu.

<sup>6</sup> Te cúñaha tùcu-ndo xii-dé sá ìo váha táhú nchaa ñáyiu ñá túú quide sáa iní-xi nchaa tnúhu càhá<sup>n</sup>-í, duha cúñaha-ndo xii-dé —càchí-gá xăha<sup>n</sup>-gă xii-güedé.

<sup>7</sup> Te sáta ñĩ yáha-güedé cuánuhú-güedé te ní ngúíta Jèsús ní cáhá<sup>n</sup>-gá núú ñáyiu cuendá té Juáa, te xăha<sup>n</sup>-gă xií-yu:

—Nchòhó ní sáhá<sup>n</sup> ndéhé-ndó ì<sup>n</sup> tée ndècu xití yucu, te tée-á<sup>n</sup> ñà túú sàni ì<sup>n</sup> sani úú iní-dé, chí ñá túú quide-dé dàtná quidé nchàa ité náhnú cuáhá<sup>n</sup>-xi duha cuáhá<sup>n</sup>-xi dácá<sup>n</sup> òré quéné tächí.

<sup>8</sup> Te ni ñà túú ní sáhá<sup>n</sup> ndéhé-ndó ì<sup>n</sup> tée nihnu dóo văha dóo vii càa. Te nchòhó xini-ndó să ncháá ñáyiu nihnu dóo văha dóo vii càa xíndecú-yu vehe cue tée cùnuu yíndaha ñáyiu.

9 Dico nchòhó chi ní sándéhé-ndó ìí<sup>n</sup> téé càhá<sup>n</sup> tnúhu Yá Ndiöxí, te ndáá sá díú ìí<sup>n</sup> téé càhá<sup>n</sup> tnúhu-gá cúú-dě, te cùnuu-gá-dé dácúúxí dàva-gá cue téé càhá<sup>n</sup> tnúhu-gá.

10 Te ðiu cuèndá té Juàá-á<sup>n</sup> càhá<sup>n</sup>-xi núú tütú Yá Ndiöxí nàcuáa ní xáha<sup>n</sup>-gă xii Crìstú, te duha ní xáha<sup>n</sup>-gă:

Tendaha-ĩ ìí<sup>n</sup> téé cáhá<sup>n</sup>-dé tnúhu-í codonùu-dé núú-n,

cuèndá dätúha-dé ñáyiu cuèndá quíndáá iní-yu tnúhu-n.

Duha ní xáha<sup>n</sup>-gă, te duca<sup>n</sup> ñí ngódó tnùní núú tütú-gá.

11 Te na càchí tnúhu ndáá-í xii-ndo sã ñí ìí<sup>n</sup> cue téé ñuyíú-a ñá túú cùnuu-güedé dàtná cúnùu té Juàá téé dácuanđute ñaha xii ñáyiu. Te nchaa ñáyiu sa ta ndíhu ndaha ñàha Yá Ndiöxí vitna cuáhá<sup>n</sup> cúnùu-gá-ni tucú-yu dácúúxí tẽ Juàá cuẽi cùú-yu ñáyiu ñá túú cùnuu dácúúxí dàva-gá ñáyiu yìndaha-gá.

12 Te ndéé cútnàhá ní ngüíta té Juàá téé dácuanđute ñaha xii ñáyiu càhá<sup>n</sup>-dé tnúhu Yá Ndiöxí ñuyíú-a, ndéé dāvá-á<sup>n</sup> ñí ngüíta ñáyiu cuiní-yu sá ndíhu ndaha ñàha Yá Ndiöxí xii-yu te ndùcu ndéé-yu quidé-yu nàcuáa ndíhu ndaha ñàha-gá xii-yu.

13 Te nchaa cue téé ní xóo cáhá<sup>n</sup> tnúhu Yá Ndiöxí ndéé sanaha ñí cáhá<sup>n</sup>-güedé sá díú-gă ndíhu ndaha-gă cue ñáyiu, te ðiu-ni duca<sup>n</sup> ñí cáhá<sup>n</sup> tucu ndíi Moisés ní ngódó tnùní núú tütú ndíi. Te ðiu-ni duca<sup>n</sup> cùnuu nchaa tnúhu-á<sup>n</sup> càhá<sup>n</sup>-xi nàcuáa ndíhu

ndaha Yă Ndiöxí ñáyi ndéé ní sáá nduu ñí ngüíta té Juáá càhá<sup>n</sup>-dé tnúhu-gá ñuyíú-a.

14 Te na càchí tnúhu-í xii-ndo sǎ cǎdá cuendá-ndó, chí núú tütú Yă Ndiöxí càchí-xi sá ndíxí tē Èliás, te ñiu núú tē Èliás-á<sup>n</sup> ñí quide té Juáá.

15 Te nchaa nchòhó ñáyi ndèdóho nchaa tnúhu càhá<sup>n</sup>-í-a te ío váha chí cuǎha cuendá.

16 "Te na càchí tnúhu tucu-í xii-ndo nàcuáa sǎtnhá-xi cùu ñáyi ndècu vitna. Chí ñáyi-á<sup>n</sup> cúŷ-yu dàtná cue landú sácõ núú yǎhu dàdiqui-güexi te níhi càhá<sup>n</sup>-güexi, te xǐtnàha-güexi ndi mee landú-güexi:

17 "Ní tíú-ndí yaá ndihi vǐlu te ñá túú ní cuíní-ndó càta-ndo. Te ío yica ìní ní xita yuhu-ndí te ñá túú ní ndǎhyú-ndó", càchí-güexi xǐtnàha-güexi. Te duca<sup>n</sup> sǎtnhá-xi cùu ñáyi ndècu vitna,

18 chí té Juáá ío ndàhú ní xóo caxi-dé, te ni ñà túú ní xõ coho-dé ndudí ndéhé yoho yàha stilé sá sà ní nduu-xi ndidí, te sá dúcá<sup>n</sup> ñí xóo cada-dé te ní cachí-yu sá ñí xíndecu ndihi-dé espíritú cündihi yucu ñávǎha.

19 Te sátá ñí quexìo yúhú Tée cùu ñaní tnáhá-ndó nchàa-ndo, te xèxi-í xìhi-í quidè-í, te càchí-yu sá yǎhú cùu-í ñ<sup>n</sup> tée xèxi vihi te xìhi vihi, te càchí tucu-yu sá cùu-í tée xìca cuu ndihi cue tée cuihna ìní-xi quide cobrá ñáhá xii-yu cuendá impuèstú ndihi nchaa dava-gá cue tée ndècu ichi cuehé ichi duha, duha càchí-yu. Te ñáyi ní tnahá tnúhu ndihi Yá Ndiöxí, ñáyi-á<sup>n</sup> quidè-yu sá vǎha nàcuáa cutnùní sá méé-gǎ ío ndècu ndihi-gá sá xìní tnùní-gá —càchí-gá xǎha<sup>n</sup>-gǎ xií-yu.

*Cuendá ñáyi dava ñuú ñá túú sàndáá ìní tnúhu*

*Xítóhó Jesucrìstú*  
(Lc. 10:13-15)

20 Te Jèsús ní ngüíta-gá càhá<sup>n</sup>-gá dóho nchaa ñáyiú ñuú núú ïo-gá vâi núú sã vã yõo tnàhí ndàcu cada ní quide-gá, chi nchaa ñáyiú ñuú-á<sup>n</sup> ñà túú cuíní-yu ndixi túú iní-yu sá ñà túú quide váha-yu ndècú-yu, te xãha<sup>n</sup>-gã xií-yu:

21 —¡Ndàhú nchòhó cue ñáyiú ñuú Coràzín! ¡Te ndàhú nchòhó cue ñáyiú ñuú Bètsaidá! Chi núú dìcò ñuú Tìrú ndìhi ñuú Sìdón ní quide-í nchaa sá vã yõo tnàhí ndàcu cada datná ní quide-í ñuú-ndó-á ñí xiní-ndó ñá, te sá ndéé ama-gá cuihnú-yu dóo ndàhú te cunu cóo-yu núú yàà cuèndá sá ndíxí cuèchi iní-yu sá ñà túú quide váha-yu ni cùu.

22 Dico sáá nduu te ío-gá dandòho ñaha Yá Ndiõxí xii-ndo dàcúxí ñáyiú ñuú Tìrú ndìhi ñáyiú ñuú Sìdón.

23 Te nchòhó cue ñáyiú ñuú Capèrnaúm ío quide cahnu-ndo mee-ndo, te quide iní-ndó sã sà cuándaa-ná-ndó àndiú, dico ñáhá chi núú ùhú núú ndàhú nduu táhú-ndó cùndecu-ndo. Te núú dìcò ñuú Sòdomá ní quide-í nchaa sá vã yõo tnàhí ndàcu cada datná ní quide-í ñuú-ndó ñí xiní-ndó ñá, te ñáyiú-á<sup>n</sup> vã náã-yu chi cundecu-ní-yu ndéé vitna ni cùu.

24 Te na càchí tnúhu-í xii-ndo sã sàà nduu te ío-gá dandòho ñaha Yá Ndiõxí xii-ndo dàcúxí ñáyiú ñuú Sòdomá —càchí-gá xãha<sup>n</sup>-gã xii nchaa ñáyiú ñuú-á<sup>n</sup>.

*Jèsús cuíní-gá sá túhá ñàha ñáyiú xii-gá*  
(Lc. 10:21-22)

25 Te sátá xǎ<sup>n</sup> te Jèsús ní ngüíta-gá càhá<sup>n</sup> ndìhi-gá Tátá-gã Dútú Ndiõxí, te xãha<sup>n</sup>-gã:

—Yòhó Tàtá-í Dútú Ndiǒxí, ío chĩñuhu ñaha-í xii-n chi ñiu-n tàxi tnuní-n àndiũ ndĩhi ñuyíú-a, te dānehé-n cuè ñáyiũ nchaa tnúhu váha, te ñiu-ni ñáyiũ-á<sup>n</sup> cúũ-yu ñáyiũ ñá túú cùnuní iní-xi nchaa tnúhu càhá<sup>n</sup> cue tée cāchí sá ïo túha, te nchaa tnúhu váha-á<sup>n</sup> ñà túú ñàtúu-n nũú ñáyiũ cāchí sá ïo túha te ío váha sàá díquí-xi.

<sup>26</sup> Chi duca<sup>n</sup> cuiní-n cunduũ —cachí-gá xǎha<sup>n</sup>-gǎ xii Tàtá-gǎ.

<sup>27</sup> Te xǎha<sup>n</sup>-gǎ xii nchaa ñáyiũ xĩndecu-á<sup>n</sup>:

—Mee Tàtá-í Dútú Ndiǒxí ní cachí-gá sá cúnũu-í núú nchāandi túhú sá ïó. Te vá yǒo ñ<sup>n</sup>-gá xini nācuāa sàni iní yúhú Déhe Dútú Ndiǒxí, chi ñ<sup>n</sup>dĩi díí-ni mee-gǎ xini-gá nācuāa sàni iní-í, te mee-ĩ xini-í nācuāa sàni iní méé-gǎ. Te nchaa ñáyiũ cāchí iní-í sá quini-yu nācuāa sàni iní Tàtá-í Dútú Ndiǒxí te xĩtnũhu-í-yu, te vá yǒo ñ<sup>n</sup>-gá xini chi ñiu-ni ñáyiũ duca<sup>n</sup> xĩtnũhu-í-á<sup>n</sup> xini-yu.

<sup>28</sup> Te nchaa nchòhó ñáyiũ ñá túú ndècu váha, ñáyiũ ñá túú ñihí nācuāa cada cundecu váha iní-xi quixi-ndo túha ñaha-ndo xii-í nācuāa duca<sup>n</sup> cundecu váha iní-ndó.

<sup>29</sup> Te cuu vii cuu váha iní-ndó tñi-ndo nchaa tnúhu càhá<sup>n</sup>-í, te ío dacuàha-ndo, te duca<sup>n</sup> càda-ndo chi yúhú ío càhnu iní-í, te ío ndāhú iní-í. Te núu duca<sup>n</sup> na càda-ndo te ío váha cuu iní-ndó cundecu-ndo.

<sup>30</sup> Te tñi-ndo nchāa tnúhu càhá<sup>n</sup>-í chi ñá túú cùu-xi ñ<sup>n</sup> sá vèe, chi cada iní-ndó sǎ cúú-xi ñàtná ñ<sup>n</sup> chiu<sup>n</sup> ñamá —cāchí-gá xǎha<sup>n</sup>-gǎ xii-yu.

## 12

*Cue tée xica cuu ndĩhi Jesús sàhnú-güedé yoco trüü*

*nduu ndetatú ñáyi**(Mr. 2:23-28; Lc. 6:1-5)*

<sup>1</sup> Te ñ<sup>n</sup> nduu cùu-xi nduu ndetatú ñáyi ñùhu Jesús ichi ndihì cue téé xìca cuu ndihì-gá, te ta yǎha-gá ndihì-güedé ñ<sup>n</sup> xichi núú cáá triú te xìxíhì-güedé docó nùu xíǎ<sup>n</sup> ní ngüíta-güedé sàhnú-güedé yoco triú-á<sup>n</sup>, te ndihì ndaha-güedé quí<sup>n</sup>-güedé quéé triú-á<sup>n</sup> tá xèxi-güedé cuáhá<sup>n</sup>.

<sup>2</sup> Te cue téé cùu fariséú ní xiní-güedé nàcuáa quide cue téé xìca cuu ndihì Jesús, núú ní xáha<sup>n</sup>-güedé xii-gá:

—¿Ná cuendá duca<sup>n</sup> quide cue téé xìca cuu ndihì-n sàhnú-güedé yoco triú, te vitna cùu-xi nduu ndetatú-i? Te ñá túú tàú-güedé duca<sup>n</sup> càda-güedé —càchì-güedé xáha<sup>n</sup>-güedé xii-gá.

<sup>3</sup> Te Jèsús ní xáha<sup>n</sup>-gǎ xii-güedé:

—¿Náa ñá túú dàcuaha-ndo núú tùtú Yǎ Ndiǒxí núú càhá<sup>n</sup>-xi nàcuáa ní quide ndíi Dàvíí cútnàhá ní xíhì ndíi docó ndihì cue téé ní xica cuu ndihì ndíi-ǎ<sup>n</sup>?

<sup>4</sup> Chi ndíi-á<sup>n</sup> ñǎ quíhu ndíi vehe Yá Ndiǒxí ní quehe<sup>n</sup> ndíi pàá ní cuu íí ndécú-ǎ<sup>n</sup> ñǎ xexi ndíi ndihì cue téé ní xica cuu ndihì ndíi, te ñá túú tàú ndíi sá dúcá<sup>n</sup> càda ndíi ndihì cue téé-á<sup>n</sup> ní cùu, chi mee-ni cuè dútú tàú-güedé caxi-güedé pàá-á<sup>n</sup> ní cùu.

<sup>5</sup> ¿Te náa ñá túú xiní-ndó nàcuáa càhá<sup>n</sup>-xi núú tùtú ndíi Moisés sá ncháá cuè dútú vǎ ndétatú-güedé nduu cùu-xi nduu ndetatú-ǎ<sup>n</sup>? Te ñá díú ñ<sup>n</sup> cuéchi cùu-xi sá dúcá<sup>n</sup> ñà túú ndetatú-güedé nduu cùu-xi nduu ndetatú.

<sup>6</sup> Te na càchì tnúhu-í xii-ndo sǎ yǎhú cùu-í téé ío-gá cúnùu ndecu ndihì-ndo dacúxí vèñúhu sá ío cùnuu.

<sup>7</sup> Dico nchòhó chi ñá tècú tnùní-ndó nàcuáa càhá<sup>n</sup> Yá Ndiõxí núú tütú-gá núú càchí-xi: “Yúhú cuìní-í sá cùndàhú iní-ndó cuè tnahá ñáyiú-ndo te ñá díú mèe-ni sá cáhni-ndó quìti nduu táhù-í”, duha càchí-gá núú tütú-gá. Te núú dìcò nchòhó tècú tnùní-ndó ñá, te vá càhá<sup>n</sup> cuèhé-ndó cuendá nchaa ñáyiú ñá túú ndècu cuéchi-xi.

<sup>8</sup> Te yúhú Tée cùu ñaní tnáhá-ndó nchàa-ndo, tnáhá-í ndécú ndìhi-í tnúhu ndee iní sá cùu-í nchaa ñáyiú nàcuáa cadá-yu nduu ndetatú-ó-á —càchí-gá xáha<sup>n</sup>-gã xii-güedé.

*Ì<sup>n</sup> tée ní yíchí ì<sup>n</sup> xio ndaha-xi*

*(Mr. 3:1-6; Lc. 6:6-11)*

<sup>9</sup> Te Jèsús ní xica-gá cuáhá<sup>n</sup>-gá, te cuánguihu-gá xití ì<sup>n</sup> veñúhu.

<sup>10</sup> Te xía<sup>n</sup> ndécú ì<sup>n</sup> tée ní yíchí ì<sup>n</sup> xio ndaha-dé. Te dava cue tée xĩndecu-á<sup>n</sup> ndúcú-güedě nàcuáa cada-güedé cacá<sup>n</sup> cuéchi-güedé cuendá-gá núú cuè tée cùnuu, te ní xícá<sup>n</sup> tnúhú-güedě núú-gã, te xáha<sup>n</sup>-güedě:

—Cachí tnúhu xii-ndí nũu cuu cada tátna-o ì<sup>n</sup> tée cùhú nduu cùu-xi nduu ndetatú-ó ã<sup>n</sup> ñáhá —càchí-güedé xáha<sup>n</sup>-güedé xii-gã.

<sup>11</sup> Te Jèsús ní xáha<sup>n</sup>-gã xii-güedé:

—Te nchòhó òré ná ngàunihnu ì<sup>n</sup> mbéé-ndó ì<sup>n</sup> déhvá cùnú te nàtava-ndo-di cuéi cùu-xi nduu ndetatú-ó.

<sup>12</sup> Te ì<sup>n</sup> ñáyiú ío-gá cùnùu-yu dàcúúxí ì<sup>n</sup> mbéé, núú xíã<sup>n</sup> tàú-ó sã cadá-ó sã vãha sá cúu-xí-yu cuéi cùu-xi nduu ndetatú-ó —càchí-gá xáha<sup>n</sup>-gã xii-güedé.



13 Te dătnùní ní xáha<sup>n</sup>-gă xii tée cùhú ndaha-xi-á<sup>n</sup>:

—Ndacani ndaha-n —càchí-gá xăha<sup>n</sup>-gă xii-dé.

Te tée-á<sup>n</sup> nǐ ndacani-dé ndaha-dé, te òré-ni ní ndúha ní nduu-xi dătná cáá ìngá xio ndaha-dé.

14 Te cue tée cùu fariséú ní ndee-güedé xití veñúhu, te ní ngüíta-güedé ndátnùhu-güedé nùu nása cada-güedé cahni-güedé Jèsús.

*Nàcuáa sa ndèé tnuní cuendá Jèsús*

15 Te sátá nǐ cutnùní iní Jèsús nàcuáa cuìní-güedé cada ñaha-güedě xii-gá te ní xica-gá cuáhá<sup>n</sup>-gá, te ío vài ñáyiu nchìcú<sup>n</sup> ñáhá xii-gá cuáhá<sup>n</sup>, te tnáhá cue ñáyiu cùhú nchìcú<sup>n</sup> ñáhá xii-gá cuáhá<sup>n</sup>, te ní quide tátna-gá cue ñáyiu-á<sup>n</sup>.

16 Te ní xáha<sup>n</sup>-gă xii-yu sá vă càhá<sup>n</sup>-yu yoo cùu-gá.

17 Te duca<sup>n</sup> nǐ cuu chi ní quee ndáá-xi nàcuáa ní xáha<sup>n</sup> Yă Ndiõxí xii ndíi Chàíá tée ní xóo cáhá<sup>n</sup> tnúhu-gá ndéé sanaha nǐ chídó tnùní ndíi núú tütú-gá, te duha ndùu tnúhu ní xáha<sup>n</sup>-gă:

18 Téee-a cùu-dé téee ní sani iní-í sá cúnú cuèchi-dé núù-í,

te ío cùu iní-í-dé, te cùdíí ìní-í-dé.

Te yúhú cuáñaha-í Espiritú-í cundecu ndihí-dé,

te diu-dé cúñaha-dě xii nchaa ñáyiu ñuyúú sǎ yúhú ío ndáá quidè-í.

19 Te vǎ dácàá-dé tnúhu cáhá<sup>n</sup>-dé ndihí ñáyiu, te ni vǎ cáná sàa-dé òré cáhá<sup>n</sup>-dé,

te ni vǎ yóo níhí tnúhu nása cáhá<sup>n</sup>-dé cuhu<sup>n</sup>-dé ichi.

20 Te ni ñà túú nǎ cada-dé cue ñáyiu cùu datná ì<sup>n</sup> tnu ndóó sá cuìní-xi tnáhnú, te diu-ni ñáyiu-á<sup>n</sup> cúú tucú-yu dătná ì<sup>n</sup> mèchá càndíl sá ío quène ñúhmá te cuìní-xi ndahvá.

Te duca<sup>n</sup> sãtnahá-xi cùu ñáyiu-á<sup>n</sup> chi ñá túú ñihí  
ndéě-yu cundecú-yu sá cúu-xì-í, te mee-ni  
sã vãha cada ñaha-dě xii-yu,  
te ñiu-ni duca<sup>n</sup> càda-dé ndéé sáá nduu cùtnuní iní  
nchaa ñáyiu sá ïo ndáá quidé-dě.

<sup>21</sup> Te nchaa ñáyiu ñihí ñuyúú ïo cundee cùu cahnu  
iní ñáhã-yu xii-dé.

Duha ní xáha<sup>n</sup>-gã xii ndí Chàíá ní chídó tnùní ndí  
núú tütú-gá.

*Càchí-güedé sá ndécú ndìhi Jesús espíritú cündìhi  
yucu ñávãha*

*(Mr. 3:20-30; Lc. 11:14-23; 12:10)*

<sup>22</sup> Te ní quexìo ì<sup>n</sup> úú cue téé núú ndécú Jèsús,  
te ndèca-güedé ì<sup>n</sup> téé ñihí te cuàá-dé, te yìhi ñaha  
espíritú cündìhi yucu ñávãha xii-dé, te Jèsús ní  
queñuhu-gá espíritú cündìhi yucu ñávãha yìhi ñaha  
xii-dé, te òré-ni-á<sup>n</sup> ñi cuu ní nacáhá<sup>n</sup>-dé te ní ndúha  
núú-dě.

<sup>23</sup> Te nchaa ñáyiu xĩndecu-á<sup>n</sup> ïo ní cuñúhu-yu sá  
dúcá<sup>n</sup> ñi quide-gá, te ní xítnàhá-yu:

—Váa téé-a cùu-dé ñaní tnáhá ndí Dàvíí téé  
tendaha Yã Ndiõxí quixi ñuyúú-a —càchí-yu  
xítnàhá-yu.

<sup>24</sup> Te cue téé cùu fariséú ní tecú dóho-güedé  
nàcuáa ndùu tnúhu xítnàhá-yu, núu xíá<sup>n</sup> ní  
xítnàha-güedé:

—Tée-a ndèñuhu-dé nchaa espíritú cündìhi  
sáculhá yìhí ñaha xii ñáyiu, chi ñiu-ni sáculhá-ã<sup>n</sup>  
chíndèè ñaha-xi xii-dé te ñiu-ni-xi tàxi tnuní-xi  
nchaa espíritú-á<sup>n</sup> —duha ní xítnàha-güedé.

<sup>25</sup> Te Jèsús ní cutnùní iní-gá nàcuáa ndùu tnúhu  
ní xítnàha-güedé, núu ní xáha<sup>n</sup>-gã xii-güedé:

—Te nchòhó xìní-ndó sǎ nõu ì<sup>n</sup> tée yìndaha ì<sup>n</sup> nació<sup>n</sup> vá cúú ì<sup>n</sup>nuu-dé ndìhì cue tée cùndìhì-dé, te vá cùdǐ-dé cunu-u-dě. Te ðiu-ni duca<sup>n</sup> sǎtnahá tucu-xi cùu tucu cue tée cùchiu<sup>n</sup> ì<sup>n</sup> ñuú, chi núu vá cúú ì<sup>n</sup>nuu-güedé cundecu-güedé, te vá cùdǐ-güedé cundecu-güedé taxi tnùnì-güedé. Te ðiu-ni duca<sup>n</sup> sǎtnahá tucu-xi cùu cue ñáyiu xǐndecu ì<sup>n</sup>-ni vèhe, chi núu vá cúú ì<sup>n</sup>nuú-yu cundecú-yu te vá cùdǐ-yu cundecu càhnú-yu.

<sup>26</sup> Te núu sácúíhná duca<sup>n</sup> quède-xi queñuhu-xi cue espíritú cùndìhì-xi yìhì ñaha xii ñáyiu ña, te ñá túú cùu ì<sup>n</sup>nuu-xi ndecu-xi te núu duca<sup>n</sup>, te vá cùdǐ sácúíhná-ǎ<sup>n</sup> cundecu-xi taxi tnùnì-xi te núu duca<sup>n</sup> quède-xi.

<sup>27</sup> Te duha càhá<sup>n</sup>-í chi nchòhó càchí-ndó sǎ chíndèe ñaha sácúíhná xii-í queñuhu-í nchaa espíritú cùndìhì-xi yìhì ñaha xii ñáyiu. Te núu yúhú quídé cuendá-ndó sǎ sácúíhná chíndèe ñaha-xi xii-í, te xìnì ñuhu-xi cada cuendá-ndó yòo chindee ñaha xii cue tée xica cuu ndìhì-ndo queñuhu-güedé nchaa espíritú cùndìhì yucu ñávǎha yìhì ñaha xii ñáyiu. Te mee-güedě càchí-güedé sá nchòhó ñá túú càhá<sup>n</sup> ndáá-ndó sǎ dúcá<sup>n</sup> càhá<sup>n</sup>-ndó.

<sup>28</sup> Dico yúhú chi Espíritú Yǎ Ndiöxí chíndèe ñaha-xi xii-í queñuhu-í nchaa espíritú cùndìhì sácúíhná yìhì ñaha xii ñáyiu, te sá dúcá<sup>n</sup> chindee ñaha Espíritú-gá xii-í, xǐ<sup>n</sup> cùtnùnì sá sà ní sáá nduu cuìnì-gá ndìhu ndaha ñaha-gá xii-ndo.

<sup>29</sup> Te nchòhó xìní-ndó sǎ cuè ñadúhú chi vá ndácú-güedě cuendá-ni quíhu-güedé duhu-güedě vehe ì<sup>n</sup> tée ío ndee, chi díhna-gá xìnì ñuhu-xi tnì-güedé tée-á<sup>n</sup> dacùtu ñaha-güedé xii-dé dǎtnùnì

duca<sup>n</sup> te ndacu-güedé duhu-güedě nchaa sá ndécú ndìhi-dé.

30 "Te nchaa ñáyiú ñá túú cùndìhi ñaha xii-í, te cùu úhú iní ñáhă-yu. Te nchaa ñáyiú ñá túú chìndee ñaha xii-í, te dàquee tíhŭ-yu chù<sup>n</sup> quide-í.

31 "Te na càchí tnúhu-í xii-ndo să ncháá ñăyiú quide nchaa sá cuèhé sá dúhá cuu cada càhnu iní ñáhá Yă Ndiöxí xií-yu, te dŭ-ni duca<sup>n</sup> cùu cada cahnu iní-gá nchaa tnúhu cuèhé tnúhu duha càhá<sup>n</sup>-yu. Dico cue ñáyiú na càhá<sup>n</sup> úhú cuendá Espiritú-gá, te ñáyiú-á<sup>n</sup> vă cádá càhnu iní ñáhá tnáhí-gá xií-yu.

32 Te nchaa ñáyiú na càhá<sup>n</sup> úhú cuendá yúhú Tée cùu ñaní tnáhă-yu ncháá-yu, te cuu cada càhnu iní ñáhá Yă Ndiöxí xií-yu. Dico cue ñáyiú na càhá<sup>n</sup> úhú cuendá Espiritú-gá te vá cádá càhnu iní ñáhá tnáhí-gá xií-yu cuèi vitna ndècu vívŭ-yu, te cuèi na cùú-yu.

*Ndì dŭ<sup>n</sup> nŭú yutnu xìní-ó nă yutnu cùu-xi cuendá sá săvidí-xi  
(Lc. 6:43-45)*

33 "Te nchòhó xìní-ndó să ndì dŭ<sup>n</sup> nŭú yutnu xìní-ó nă yutnu cùu-xi cuendá sá săvidí-xi, te xìní-ó să ncháá yutnu váha cùu<sup>n</sup> mee-ni sávidí váha, dico nchaa yutnu sá ñá túú váha te cùu<sup>n</sup> mee-ni sávidí sá ñá túú váha. Te duha càhá<sup>n</sup>-í cuendá cada cuendá váha-ndo năcuáa ndùu chiu<sup>n</sup> quide-ndo ì<sup>n</sup> ì<sup>n</sup>-ndo cuendá duca<sup>n</sup> cùtnuní ná ñáyiú cùu-ndo.

34 Dico nchòhó cúú-ndó dàtná ì<sup>n</sup> cóo dĕĕ<sup>n</sup> chi ío cuihna ìní-ndó, te vá cání ìní-ndó să ndácú-ndó cãhá<sup>n</sup>-ndó ì<sup>n</sup> tnúhu váha, chi ío cuihna ìní-ndó. Te

nchòhó xìní-ndó sǎ ncháá ñǎyiu càhá<sup>n</sup>-yu nání véxi iní-yu.

<sup>35</sup> Te nchaa ñǎyiu váha iní-xi càhá<sup>n</sup>-yu tnúhu váha, chi ðiu-ni tnúhu váha-á<sup>n</sup> ñúhú iní-yu. Te nchaa ñǎyiu cuihna iní-xi càhá<sup>n</sup>-yu tnúhu cuèhé tnúhu duha, chi ðiu-ni tnúhu cuèhé tnúhu duha-á<sup>n</sup> ñúhú iní-yu.

<sup>36</sup> Te na càchí tnúhu-í xii-ndo sǎ ná sàá nduu càda ndáá Yǎ Ndiǒxí cuéchi nchaa nchòhó ñǎyiu ndècu ñuyíú-a, te nchaa tnúhu cuèhé tnúhu duha càhá<sup>n</sup>-ndó cǎhá<sup>n</sup>-gá sá ñà túú ní quide váha-ndo sǎ dúcá<sup>n</sup> ñí cǎhá<sup>n</sup>-ndó tnúhu-á<sup>n</sup>.

<sup>37</sup> Te nàcuáa ndùu tnúhu ní cǎhá<sup>n</sup>-ndó ñ<sup>n</sup> ñ<sup>n</sup>-ndo, te duca<sup>n</sup> cǎhá<sup>n</sup> Yǎ Ndiǒxí te núu ndècu cuéchi-ndo àðì ñá túú ndècu cuéchi-ndo. Te núu ñá túú cuéchi-ndo te cácu-ndo, dico núu ndècu cuéchi-ndo te vá cácu-ndo —càchí-gá xǎha<sup>n</sup>-gá xii cue téé cùu fariséú-á<sup>n</sup>.

*Cue téé cuìní sá cádá Jèsús ñ<sup>n</sup> sá vǎ yǒo tnàhí ndàcu cada*

*(Mr. 8:12; Lc. 11:29-32)*

<sup>38</sup> Te cue téé cùu fariséú, ndihì cue téé dàcuaha ñaha xii ñǎyiu nchaa tnúhu ní chídó tnùní ndíi Moisés xǎha<sup>n</sup>-güedě xii Jèsús:

—Mèstrú, cuìní-ndí cada-n ñ<sup>n</sup> sá vǎ yǒo tnàhí ndàcu cada cuendá duca<sup>n</sup> cùtnuní iní-ndí sá Yǎ Ndiǒxí chíndèe ñaha-gá xii-n —càchí-güedé xǎha<sup>n</sup>-güedě xii-gá.

<sup>39</sup> Te Jèsús ní xǎha<sup>n</sup>-gǎ xii-güedé:

—Ñáyiu ndècu ichi cuehé ichi duha ñá túú cuìní-yu tní<sup>n</sup>-yu tnúhu càhá<sup>n</sup> Yǎ Ndiǒxí, te ñáyiu-á<sup>n</sup> cuìní-yu cada-í ñ<sup>n</sup> sá vǎ yǒo tnàhí ndàcu cada nacuéa cutnùní iní-yu núu ndáá sá Yǎ Ndiǒxí

chíndèe ñaha-gá xii-í. Dico yúhú chi ñá túú nǎgá cada-í quini-yu, chi sa ñihí-yu tnúhu nàcuáa ní yáha ndíi Jònás tée ní xóo cáhá<sup>n</sup> tnúhu Yá Ndiõxí ndéé sanaha, te ñiu-ni duca<sup>n</sup> yáha yúhú tucu.

<sup>40</sup> Chi ndíi Jònás-á<sup>n</sup> ñí xúhu<sup>n</sup> ndíi úní nduu úní niú xití ñ<sup>n</sup> chácá cáhnú vèhi nani ballená. Te ñiu-ni duca<sup>n</sup> yáha yúhú Téé cùu ñaní tnàhá-ndó nchàa-ndo, chi úní nduu úní niú cuhu<sup>n</sup>-í xití ñuhu.

<sup>41</sup> Te na sàá nduu càda ndáá Yá Ndiõxí cuéchi nchaa ñáyiú ndècu ñuyíú-a, te dàvá-á<sup>n</sup> cachí nchaa ñáyiú ñuú Nñivé sá ñà túú ní quide ndáá nchaa ñáyiú ndècu vitna, te duca<sup>n</sup> cáhá<sup>n</sup>-yu chi mèé-yu ní dáñǎ-yu ichi cuèhé ichi duha cútnàhá ní sáhá<sup>n</sup> ndíi Jònás ñuú-yu ní cáhá<sup>n</sup> ndíi tnúhu Yá Ndiõxí núú-yu. Dico vitna iha ndècu ndíhi ñaha-ndo xii yúhú, te ñiu-í ío-gá cúnùu-í dàcúúxí ndíi Jònás.

<sup>42</sup> Te nduu càda ndáá Yá Ndiõxí cuéchi nchaa ñáyiú, te dàvá-á<sup>n</sup> quini-ndó ñ<sup>n</sup> ñadihí ñaha ní xíndaha ñ<sup>n</sup> nació<sup>n</sup> cáá ndàa xio datni núú quéné nchǐcanchii, te ñaha-á<sup>n</sup> ío xica ñí xíndecu-a<sup>n</sup> te ní sáhá<sup>n</sup>-a<sup>n</sup> ní xíndedóho-a<sup>n</sup> nchaa tnúhu ní cáhá<sup>n</sup> ndíi Salòmón, chi ndíi-á<sup>n</sup> ío ní sáá sá xini tnùní ndíi. Te tnàhá ñaha-á<sup>n</sup> cáhá<sup>n</sup>-a<sup>n</sup> sá ñà túú ní quide ndáá nchaa ñáyiú ndècu vitna. Dico vitna iha ndècu ndíhi ñaha-ndo xii yúhú, te ñiu-í ío-gá cúnùu-í dàcúúxí ndíi Salòmón.

*Espíritú cúndíhi yucu ñávǎha sá nánchòcáva xito cùu uú*

*(Lc. 11:24-26)*

<sup>43</sup> Te órè ná quée ñàha ñ<sup>n</sup> espíritú cúndíhi yucu ñávǎha xii ñ<sup>n</sup> ñáyiú, te cuáhá<sup>n</sup>-xi ndùcu-xi ñ<sup>n</sup> xichi núú cúndècu-xi te ñá ñihí-xi te ní sani iní-xi:

44 “Váha-gá núhú tucu-í núú ñí xíndecu-í”, duha ní sani iní-xi. Te cuánuhú-xi, te òré ní nasáá-xi, te ní xiní-xi sá cáá ìní ñáyiú-á<sup>n</sup> dàtná cáá-nă ĩ<sup>n</sup> vehe ní natíhú ní nduu víí-ná te vá yõo-gá ndécú.

45 Te sátá dúcá<sup>n</sup> te ní xica-xi cuáhá<sup>n</sup>-xi cuándúcú-xí ùsá tnàhá espíritú cúndìhi-xi sá nèhé víhí-gă xĩquide. Te òré ní níhí-xi cue espíritú-á<sup>n</sup> te ndèca ñaha-xi cuáhá<sup>n</sup> cuendá ngúndecu ndìhi-xi ñáyiú-á<sup>n</sup>. Te ñáyiú-á<sup>n</sup> uu<sup>n</sup>-gá nándi yáha-yu dàcúúxí ndèé díhna. Te ðiú-ni duca<sup>n</sup> sãtnahá-xi yáha nchaa ñáyiú cuihna ìní-xi ndècu ñuyíú-a vitna –càchí-gá xăha<sup>n</sup>-gă xii-güedé.

*Cue ñaní Jèsús ndìhi năná-gă  
(Mr. 3:31-35; Lc. 8:19-21)*

46 Te càhá<sup>n</sup> dúcá<sup>n</sup>-ní Jèsús ní quexìo náná-gă ndìhi cue ñaní-gá cuìní-yu cáhá<sup>n</sup> ndìhi ñàhá-yu xii-gá, te ní ngúnu tníi-yu ndàa quehé vehe núú ndécú-gă.

47 Te ĩ<sup>n</sup> cue ñáyiú xĩndecu-á<sup>n</sup> ñí xáhă<sup>n</sup>-yu xii-gá:

—Ní quexìo náná-n ndìhi cue ñaní-n xĩnutnii-yu quehé, te cuìní-yu cáhá<sup>n</sup> ndìhi ñàhá-yu xii-n —càchí ñáyiú-á<sup>n</sup> xăhă<sup>n</sup>-yu xii-gá.

48 Te ní xáha<sup>n</sup>-gă xii ñáyiú duca<sup>n</sup> xăha<sup>n</sup> xì-gá-á<sup>n</sup>:

—Te cachí tnúhu yóndi-gá ñáyiú cùu datná nănà-í ndìhi dàtná cue ñaní-í —càchí-gá xăha<sup>n</sup>-gă xii ñáyiú-á<sup>n</sup>.

49 Te ní dánèhé ñáhá-gă nchaa cue téé xica cuu ndìhi-gá, te ní xáha<sup>n</sup>-gă xii ñáyiú-á<sup>n</sup>:

—Cue téé-a cùu-güedé dàtná nănà-í, ndìhi dàtná cue ñaní-í.

50 Te nchaa ñáyiú na càda nchaa nacuáa càhá<sup>n</sup> Tătà-í Dútú Ndiõxí Yaá ndécú àndiú, te ñáyiú-á<sup>n</sup> cúú-yu dàtná nănà-í, ndìhi dàtná cue ñaní-í, ndìhi

dàtná cue cúha-í —càchí-gá xǎha<sup>n</sup>-gǎ xii ñáyiú duca<sup>n</sup>  
ní dáyǎha tnúhu núú-gǎ-á<sup>n</sup>.

## 13

*Nàcuáa quìde téé cuángacá<sup>n</sup> triú*  
*(Mr. 4:1-9; Lc. 8:4-8)*

<sup>1</sup> Te dǎu-ni nduu-ǎ<sup>n</sup> ní quee Jèsús vehe núú  
ndécú-gǎ, te ní xica-gá cuáhǎ<sup>n</sup>-gá ní ngóo-gá yuhu  
làgúná.

<sup>2</sup> Te ío cuéhé ñáyiú ní tacá núú ndécú-gǎ. Te sá  
dúcá<sup>n</sup> ìo cuéhé ñáyiú núú ní quée-gá xití ì<sup>n</sup> bàrcú  
nútnǎ xití ndute làgúná-á<sup>n</sup>, te núú xǎ<sup>n</sup> ní ngóo-gá,  
te nchaa ñáyiú-á<sup>n</sup> xǐxúcu-yu yuhu làgúná-á<sup>n</sup>.

<sup>3</sup> Te Jèsús ní ngúíta-gá ní caní-gá títí cuendú  
núú-yu nàcuáa tecú tnúní-yu nchaa nàcuáa ndùu  
tnúhu-gá, te xǎha<sup>n</sup>-gǎ xii-yu:

—ì<sup>n</sup> téé cuángacá<sup>n</sup>-dé triú,

<sup>4</sup> te òré ní ngúíta-dé dǎngoyo-dé triú-á<sup>n</sup>, te dava  
ní quene ndava ní ngava ndéé ichi, te ní xiní cue  
tílaá te ní nadatàcá-güedi.

<sup>5</sup> Te dava ní ngava ñuhu yadi núú yíhí vìhi yúú,  
te ndǎhi-ni ní xínu-xi chi ñá túú cǎvìhi ñuhu.

<sup>6</sup> Dico òré ní nayehé te ñá túú ní cùndee iní-xi chi  
ní yíhí-xi, chi ñá túú ní ñhí quǎhí<sup>n</sup> cùnú yóho-xi.

<sup>7</sup> Te dava ní ngava núú yúcú ndǎquí<sup>n</sup> tnu ìñu, te  
ì<sup>n</sup>nuu-ni ní xínu-xi ndǎhi tnu ìñu. Te tñu ìñu-á<sup>n</sup> ní  
sahnu-xi te ní dǎnáá-xi nchàa triú sá ní xínu-á<sup>n</sup>.

<sup>8</sup> Dico dava-gá triú ní ngava núú ndécú ñuhu  
coco<sup>n</sup> te xǎ<sup>n</sup> ío váha ní cuu, chi núú ì<sup>n</sup>-ní triú-á<sup>n</sup>  
te dava yoco-xi ní nguíhi ócó úxí triú-xi, te dava



yoco-xi ní nguíhi únídico trùú-xi, te dava yoco-xi ní nguíhi ì<sup>n</sup> ciendú trùú-xi.

<sup>9</sup> Te vitna nchaa nchòhó ñáyiú ní xíndedóho tnúhu ní cáhá<sup>n</sup>-í-a, te ío váha chí cuăha cuendá — cächí-gá xăha<sup>n</sup>-gă xií-yu.

*Cue tée xica cuu ndihi Jesús ndúcu tnúhu-güedé núú-gă ná cuendá cání-gă cuendú núú ñáyiú*

*(Mr. 4:10-12; Lc. 8:9-10)*

<sup>10</sup> Te cue tée xica cuu ndihi Jesús ní sáhá<sup>n</sup>-güedé ndéé núú-gă, te xăha<sup>n</sup>-güedě xii-gá:

—Ndúcu tnúhu-ndí núú-n nŭú ná cuendá duca<sup>n</sup> mēe-ni cuendú cání-n nŭú ñáyiú —cächí-güedé xăha<sup>n</sup>-güedě xii-gá.

<sup>11</sup> Te ní xáha<sup>n</sup>-gă xii-güedé:

—Nchòhó chi sa cächí tnúhu Yá Ndiöxí xii-ndo ì<sup>n</sup> sá vătă quíní-gá-ndó, chi cächí tnúhu-gá nàcuáa quide-gá ndíhu ndaha-gă ñáyiú, dico dava-gá ñáyiú chi ñá túú nă xăha<sup>n</sup>-gă xií-yu.

<sup>12</sup> Te nchaa ñáyiú sa tècú tnùní te uu<sup>n</sup>-gá cuita tecú tnùní-yu quíhí<sup>n</sup>, te nchaa ñáyiú ñá túú tècú tnùní te uu<sup>n</sup>-gá vá tècú tnùní-yu.

<sup>13</sup> Te xíă<sup>n</sup> nŭú duha càni-í mee-ni cuendú núŭ-yu, chi cuěi na quíní-yu nchaa nàcuáa cuu dico ni vă cútnùní iní-yu ná cuendá duca<sup>n</sup> cùu, te cuěi na cùndedóho-yu dico ni vă tècú tnùní-yu.

<sup>14</sup> Te dŭu cuendá ñáyiú-á<sup>n</sup> nŭú xáha<sup>n</sup> Yă Ndiöxí xii ndí Chaiá tée ní xóo cáhá<sup>n</sup> tnúhu-gá ndéé sanaha nŭú chídó tnùní ndí núú tütú-gá núú cächí-xi:

Nchaa nchòhó cùndedóho-ndo tnúhu càhá<sup>n</sup>-í, dico ni vă tècú tnùní-ndó,

te cuèi na quìní-ndó nchàa nacuáa cada-xi, dico  
ni vǎ cùtnùnì iní-ndó nǎ cuèndá duca<sup>n</sup>  
quìde-xi.

15 Te duca<sup>n</sup> chi cùu-ndo ñáyiú ío sàá iní-xi,  
te cùu-ndo ñáyiú ñá túú tècú tnùnì tnúhu càhá<sup>n</sup>-í,  
te cùu tucu-ndo datná cue ñáyiú cuàá chi ñá túú  
cuìnì-ndó càda cuendá-ndó tnúhu-í,  
te ni ñà túú cuìnì-ndó cùndedóho-ndo,  
te ni ñà túú cuìnì-ndó tècú tnùnì-ndó,  
te ni ñà túú cuìnì-ndó nàtuha ñaha-ndo xii-í cuèndá  
cada càhnu iní-í nchaa yíca cuèchi-ndo  
nàcuáa ío váha cuu iní-ndó cùndecu-ndo.  
Duha ní xáha<sup>n</sup> Yǎ Ndiǒxí xii ndíi Chàíá ní chídó  
tnùnì ndíi núú tütú-gá.

16 'Dico nchòhó chi ío váha táhú-ndó chi cùtnunì  
iní-ndó nchàa nacuáa quìde-í, te cùtnunì tucu  
iní-ndó nchàa nacuáa ndúu tnúhu càhá<sup>n</sup>-í.

17 Te na càchí tnúhu ndáá-í xii-ndo sǎ ío vǎi  
cue téé ní xóo cáhá<sup>n</sup> tnúhu Yá Ndiǒxí ndéé sanaha  
ndíhi nchaa dava-gá ñáyiú váha iní-xi ní cuìnì-yu  
cundèhé-yu nchaa sá ndéhé-ndó vitna quide-í dico  
ñá túú ní xìnì-yu, te ní cuìnì tucú-yu cundedóho-yu  
nchaa tnúhu ndédóho-ndo vitna cáhá<sup>n</sup>-í te ñá túú ní  
xíndedóho-yu.

*Jèsús càhá<sup>n</sup>-gá nàcuáa quèe-xi cuendá téé  
cuángacá<sup>n</sup> triú*

*(Mr. 4:13-20; Lc. 8:11-15)*

18 Te vitna cundedóho váha-ndo na càchí tnúhu-í  
xii-ndo nàcuáa quèe-xi cuendú téé cuángacá<sup>n</sup> triú  
ní cani-í núú-ndó.

19 Te triú sá ñǎ quene ndava ní ngava ndéé ichi,  
xíǎ<sup>n</sup> cúú-xí dàtná ñáyiú ní xíndedóho tnúhu sá càhá<sup>n</sup>  
nàcuáa ndíhu ndaha ñàha Yá Ndiǒxí xíi-yu, dico  
ñá túú ní cuìnì-yu tní-yu, chi sácuíhná cuǎhá<sup>n</sup>-xi

nàdatuhú-xi iní-yu cuèndá sá vǎ cánc'hìcú<sup>n</sup> ni-hnú-yu nàcuáa càhá<sup>n</sup> tnúhu-á<sup>n</sup>.

20 Te triú sá nǐ ngava ñuhu yadi nǔú yíhí vǐhi yúú-ǎ<sup>n</sup>, xiǎ<sup>n</sup> cúú-xí dàtná ñáyiú ní xíndedóho tnúhu Yá Ndiǒxí te dǐí ìní ní tní-yu tnúhu-gá,

21 dico òré ná ngǔíta ñáyiú cúcuèhé ñáhǎ-yu xií-yu àdi nándi-gá sá yǎha-yu sá cuèndá tnúhu-gá, te ñá cúndèe iní-yu chi dàñá-yu tnúhu-gá cuèndá sá ñà túú ñíhí ndéè-yu.

22 Te triú sá nǐ ngava núú yúcu ndǐquí<sup>n</sup> tnu ìñu-á<sup>n</sup>, xiǎ<sup>n</sup> cúú-xí dàtná ñáyiú ní tecú dóho-xi tnúhu Yá Ndiǒxí dico cuèé cuèé ní nacuanaá-yu tnúhu-gá, chi cuèndá mee-ni sǎ ìó ñuyíú-a ñùhu iní-yu, ndíhi cuèndá sá ìo sàni iní-yu cuu cuicá-yu, te mee-ni nchàa xiǎ<sup>n</sup> ñúhú ìní-yu te ñá túú ñùhu iní-yu tnúhu sá nǐ xíndedóho-yu-á<sup>n</sup> nàcuáa cada váha-yu cundecú-yu.

23 Dico triú sá nǐ ngava núú ndécú ñùhu coco<sup>n</sup>-á<sup>n</sup>, xiǎ<sup>n</sup> cúú-xí dàtná ñáyiú ní xíndedóho tnúhu Yá Ndiǒxí te quidé-yu nàcuáa càhá<sup>n</sup> tnúhu-gá. Te cada iní-ndó sǎ ñáyiú-á<sup>n</sup> cúú-yu dàtná triú sá nǐ nguíhi yoco-xi ócó úxí triú-xi, ndíhi triú sá nǐ nguíhi yoco-xi únídico triú-xi, ndíhi triú sá nǐ nguíhi yoco-xi ñ<sup>n</sup> ciéndú triú-xi. Duca<sup>n</sup> sǎtnahá-xi cùú-yu chi ìo váha quidé-yu —càchí-gá xǎha<sup>n</sup>-gǎ xii-güedé.

*Cuèndá nchaa cúhú sǎ ñà túú vǎha xǐnu xití triú*

24 Te Jèsús ní caní-gá ñ<sup>n</sup> cuéndú núú ñáyiú nàcuáa tecú tnùní-yu tnúhu-gá, te xǎha<sup>n</sup>-gǎ xií-yu:

—Te vitna na càni-í ñ<sup>n</sup> cuéndú núú-ndó nàcuáa tecú tnùní-ndó nàcuáa cada-xi òré ndíhu ndaha

ñaha Yá Ndiöxí xii ñáyiu. Ɔ<sup>n</sup> tée ío váha triú ní sacá<sup>n</sup>-dé núú ñúhú-dě.

25 Dico xítí níú ní sáhá<sup>n</sup> Ɔ<sup>n</sup> tée cùu úhú iní ñáhá xii-dé, te ní dǎngoyo-dé ndíquí<sup>n</sup> yúcu sǎ ñà túú vǎha núú ñí sacá<sup>n</sup>-dé triú-á<sup>n</sup>.

26 Te òré vitna váha váha ní ngúíta-xi quène yoco nchaa triú-á<sup>n</sup>, te ní xínu coyo nchaa yúcu sǎ ñà túú vǎha-á<sup>n</sup>.

27 Te cue tée xínu cuechi núú tǔe ní sacá<sup>n</sup> triú-á<sup>n</sup> ñí xítñúhu ñaha-güedě xii-dé sá dúcá<sup>n</sup> ñí xínu cùhú sǎ ñà túú vǎha-á<sup>n</sup> núú triú-dé, te xǎha<sup>n</sup>-güedě: “Pàtróó<sup>n</sup>, ɔnása ní cuu núú ní xínu cùhú sǎ ñà túú vǎha núú triú-n, te ío váha càa triú ní sacá<sup>n</sup>-n ní cùu?”, cachí-güedé xǎha<sup>n</sup>-güedě.

28 Te tée cùu patróó<sup>n</sup>-güedě-á<sup>n</sup> ñí xáha<sup>n</sup>-dě xii-güedé: “Ɔ<sup>n</sup> tée cùu úhú iní ñáhá nàhi xii-í duca<sup>n</sup> ñí quide-dé ní sáhá<sup>n</sup>-dé ní dǎngoyo-dé ndíquí<sup>n</sup> cùhú sǎ ñà túú vǎha-á<sup>n</sup> núú triú-í núu duca<sup>n</sup> ñí xínu coyo-xi”, cachí-dé xǎha<sup>n</sup>-dě xii-güedé. Te cue tée xínu cuechi núú-dě ní xáha<sup>n</sup>-güedě xii-dé: “Te núú cuíni-n te quíhí<sup>n</sup>-ndí tnuhu-ndí nchaa cùhú sǎ ñà túú vǎha ní xínu núú triú-n”, cachí-güedé xǎha<sup>n</sup>-güedě xii-dé.

29 Te tée cùu xítóhó triú-á<sup>n</sup> ñí xáha<sup>n</sup>-dě xii cue tée xínu cuechi núú-dě-á<sup>n</sup>: “Ñáhá, vá quíhí<sup>n</sup>-ndó tnuhu-ndo, chi òré tnuhu-ndo te tnhá-ni triú quene chi càa vihi cùhú-ǎ<sup>n</sup>.”

30 Váha-gá chí dáñá ná cuíhnu nahi ndée ná cùu triú, te dǎtnúni nducu-í cue tée quíhí<sup>n</sup>-güedé tnuhu-güedé nchaa cùhú sǎ ñà túú vǎha-á<sup>n</sup>, te dacùtu nuhní-güedé te cahmi-güedé, te dǎtnúni nàquehdé-güedé triú nacani-güedé te nataxúha-güedé xítí yacá-í”, cachí-dé xǎha<sup>n</sup>-dě

xii-güedé —duha ní cani Jèsús cuèndú núú-yu.

*Cuèndá ndíquí<sup>n</sup> yutnu nàni mostázá  
(Mr. 4:30-32; Lc. 13:18-19)*

<sup>31</sup> Te Jèsús ní cani tucu-gá ingá cuèndú núú ñăyiu nàcuáa tecú tnùní-yu tnúhu-gá, te xăha<sup>n</sup>-gă xií-yu:

—Na càní-í ì<sup>n</sup> cuèndú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndiòxí xii ñáyiu. Ì<sup>n</sup> téé ní quehe<sup>n</sup>-dé ndíquí<sup>n</sup> yutnu nàni mostázá te nèhe-dé cuáhá<sup>n</sup> ní sacá<sup>n</sup>-dé núú ñúhú-dě.

<sup>32</sup> Te ndíquí<sup>n</sup> yutnu-á<sup>n</sup> ïo chàhu, dico òré ná xĩnu-xi te sàhnu-gá-xi dàcúúxí nchàa cùhú, te cue quiti ndàva núú tàchí cádùha-güedi tacá-güedi núú dìté-xi —càchí-gá xăha<sup>n</sup>-gă xií-yu.

*Nàcuáa quide levadurá  
(Lc. 13:20-21)*

<sup>33</sup> Te Jèsús ní xăha<sup>n</sup> tùcu-gá xii ñáyiu:

—Te na càchí tnúhu tucu-í xii-ndo nàcuáa cada-xi òré ndíhu ndaha ñàha Yá Ndiòxí xii ñáyiu. Ì<sup>n</sup> ñadìhí ní chihi-a<sup>n</sup> levadurá úní arròbá yuchi triú, te levadurá-á<sup>n</sup> ñi quide-xi ní ndaa nihí yusa<sup>n</sup>-á<sup>n</sup> —càchí-gá xăha<sup>n</sup>-gă xií-yu.

*Mee-ni cuèndú ní cani Jèsús núú ñăyiu  
(Mr. 4:33-34)*

<sup>34</sup> Te mee-ni cuèndú ní cani Jèsús núú ñăyiu ndi tnahá òré ní dánèhé ñáhá-gă xií-yu tnúhu-gá.

<sup>35</sup> Te duca<sup>n</sup> ñi quide-gá chi ní quee ndáá-xi nàcuáa ní chídó tnùní ì<sup>n</sup> téé ní xóo cáhá<sup>n</sup> tnúhu Yá Ndiòxí ndéé sanaha núú tütú-gá núú càchí-xi:

Mee-ni cuèndú cani-í núú ñăyiu òré danèhé-í-yu tnúhu-í cuèndá tecú tnùní-yu,

te nchaa tnúhu sá vǎtá yǒo-gá cundedóho  
danèhè-í-yu, te nchaa tnúhu-á<sup>n</sup> ndúú  
yùhu-xi ndéé cútnàhá ní ngáva ñuyíú.  
Duha ní chídó tnùní téé-á<sup>n</sup> núú tütú-gá.

*Jèsús càhá<sup>n</sup>-gá nàcuáa quèe-xi cuendá cùhú sǎ ñà  
túú vǎha càa xití triúú*

<sup>36</sup> Te Jèsús ní dándácá-gǎ ñáyiú te cuánuhú-gá  
vehe, te cue téé xica cuu ndihí-gá ní xáha<sup>n</sup>-güedé  
xii-gá:

—Cachí tnúhu xii-ndí nása quèe-xi cuendá  
cùhú sǎ ñà túú vǎha càa xití triúú —càchí-güedé  
xǎha<sup>n</sup>-güedé xii-gá.

<sup>37</sup> Te Jèsús ní xáha<sup>n</sup>-gǎ xii-güedé:

—Tée càchí-í ní sacá<sup>n</sup> triúú cǎvǎha-á<sup>n</sup> cúú yùhú Tée  
cùu ñaní tnáhá-ndó nchàa-ndo.

<sup>38</sup> Te nchaa núú ñí sacá<sup>n</sup> téé-á<sup>n</sup> triúú cúú-xí ñùyíú.  
Te tatá váha-á<sup>n</sup> cúú-xí cuè ñáyiú yìndaha ñaha Yá  
Ndiǒxí. Te nchaa cùhú sǎ ñà túú vǎha-á<sup>n</sup> cúú-xí  
ñǎyiú yìndaha ñaha sácúíhná.

<sup>39</sup> Te téé ní dǎngoyo ndíquí<sup>n</sup> cùhú sǎ ñà túú  
vǎha núú triúú-á<sup>n</sup> cúú-dé mee sácúíhná. Te nduu  
nàtehndé-ñǎ triúú-á<sup>n</sup> cúú-xí nduu ndihí nihnu-ná  
nchaa sá íó ñuyíú-a. Te nchaa ñáyiú nàquehndé  
triúú-á<sup>n</sup> cúú-yu mee-ni cuè espíritú xínú cuèchi núú  
Yá Ndiǒxí.

<sup>40</sup> Te dàtná cada cue téé quíhí<sup>n</sup> tnuhu nchaa  
cùhú sǎ ñà túú vǎha-á<sup>n</sup> dacùtu nuhní-güedé te  
cahmi-güedé, duca<sup>n</sup> sǎtnahá-xi yáha nchaa ñáyiú  
cùndihí yucu ñávǎha na sàá nduu.

<sup>41</sup> Te yùhú Tée cùu ñaní tnáhá-ndó nchàa-ndo  
tendaha-í nchaa espíritú xínú cuèchi núú-í  
quíhí<sup>n</sup>-xi nadatàcá-xi nchaa ñáyiú sànu ichi cue

tnaha ñáyi-u-xi ichi cuèhé ichi duha, ndihì nchaa dava-gá ñáyi-u ñá túú quide váha, te nchaa ñáyi-u-á<sup>n</sup> xĩndecú-yu nchaa núú ndécú cuè ñáyi-u yĩndaha-í.

42 Te cue espíritú-á<sup>n</sup> daquihí<sup>n</sup>-xi cue ñáyi-u-á<sup>n</sup> núú ñùhú núú càyú, te yàcá<sup>n</sup> ío ndáhyú-yu te dicó rúhñú-nă cuu núhu-yu sá sàtú iní-yu sá ndóhō-yu.

43 Te nchaa ñáyi-u quide nchaa nacuáa cuení Tătă-yu Dútú Ndiöxí, ñáyi-u-á<sup>n</sup> ío cunúú-yu cundecú-yu núú ndécú-gă táxí tnùnı-gá, chí cuú-yu dătná nchıcanhıı dayèhé-yu cundecú-yu núú ndécú-gă. Te nchaa nchòhó ñáyi-u ndèdóho nchaa tnúhu càhá<sup>n</sup>-ı-a, te ío váha chí cuăha cuendá —càhı-gá xăha<sup>n</sup>-gă xii-güedé.

#### *Cuendá ì<sup>n</sup> sá ïo ndèyáhu*

44 Te Jèsús xăha<sup>n</sup> tucu-gá xii-güedé:

—Na càni tucu-ı ingá cuendú núú-ndó năcuáa tecú tnùnı-ndó năcuáa cada-xi òré ndıhu ndaha ñàha Yá Ndiöxı xii ñáyi-u. İ<sup>n</sup> tée ní nanıhı-dě ì<sup>n</sup> sá ïo ndèyáhu yĩndúxi ì<sup>n</sup> xıchı, te ní nachındúxi tucu-dé dıu-nı núú nı nanıhı-dě-á<sup>n</sup>, te ío ní cudıı inı-dé sá dúcá<sup>n</sup> nı nanıhı-dě xıá<sup>n</sup>. Te ní xıca-dé cuánuhú-dé te ní nadıco-dě nchaa sá ndécú ndihı-dé, te ní nacuaa<sup>n</sup>-dé ñuhu núú dúcá<sup>n</sup> nı nanıhı-dě xıá<sup>n</sup>.

#### *Cuendá ì<sup>n</sup> sá ïo ndèyáhu nàni pérlá*

45 Te na càni tucu-ı ingá cuendú núú-ndó năcuáa tecú tnùnı-ndó năcuáa cada-xi òré ndıhu ndaha ñàha Yá Ndiöxı xii ñáyi-u. İ<sup>n</sup> tée quide ndáhu ndúcú-dě sá nánı pérlá sá ïo ndèyáhu.

46 Te ní nanıhı-dě ñáyi-u ndècu ndihı ì<sup>n</sup> pérlá sá ïo-gá ndèyáhu, te ní xıca-dé cuánuhú-dé te ní

nadico-dě nchaa sá ndécú ndìhi-dé, te ní sáhá<sup>n</sup>-dé ní saa<sup>n</sup>-dé pèrlá sá ïo-gá ndèyáhu-á<sup>n</sup>.

*Cuèndá ñunu tñi-güedé chácá*

47 Te na càni tucu-í ingá cuèndú núú-ndó nàcuáa tecú tñuní-ndó nàcuáa cada-xi òré ndíhu ndaha ñàha Yá Ndiõxí xii ñáyiu. Cue tée tñi chácá ñí dáquëe-güedé ñunu-güedé xití ndute làmár tñi-güedě chácá, te dàcá nuu dàcá nihnu chácá cuãnguee-güedi xití ñunu-á<sup>n</sup>.

48 Te òré ní cutnùní iní-güedé sá ñí chítú ñunu-güedé, te ní natava-güedé ní nene yuhu làmár, te ní ngüíta-güedé nácäxi-güedé nchaa chácá-á<sup>n</sup>. Te nchaa chácá vâha dàquëe-güedé-di xití tídihi, te nchaa chácá nèhé dãngoyo-güedé-di.

49 Te dàtná ní quide cue tée-á<sup>n</sup> duca<sup>n</sup> càda cue espíritú xínú cuèchi núú Yá Ndiõxí ná sàá nduu vâ cündècu-gá nchaa sá ió ñuyíú-a, chi cue espíritú-á<sup>n</sup> daquëe di<sup>n</sup>-xi nchaa ñáyiu ní quide vâha tnuú nchaa ñáyiu ñá túú ní quide váha.

50 Te nchaa ñáyiu ñá túú ní quide váha-á<sup>n</sup> daquìhí<sup>n</sup> ñáhá-xí xì-yu núú ññhú núú càyú, te yàcá<sup>n</sup> ió ndáhyú-yu, te dìcò rúhñú-nã cuu núhu-yu sá sàtú iní-yu cuèndá sá ndóhõ-yu –càchí-gá xãha<sup>n</sup>-gã xii cue tée xica cuu ndìhi-gá.

*Cuèndá cue tée ndècu ndìhi sá ñí quee túu dìhna ndìhi sá ñí quee túu saa*

51 Te Jèsús ní xícá<sup>n</sup> tñuhú-gã núú-güedě, te xãha<sup>n</sup>-gã xii-güedé:

—¿Ní tecú tñuní-ndó nàcuáa ndùu nchaa tñuhu ní cáhá<sup>n</sup>-í-á<sup>n</sup>? —càchí-gá xãha<sup>n</sup>-gã xii-güedé.

Te ní xáha<sup>n</sup>-güedě xii-gá:



—Ní tecú tnùní-ndí —càchí-güedé xǎha<sup>n</sup>-güedě xii-gá.

52 Te ní xáha<sup>n</sup> tùcu Jesús xii-güedé:

—Te núu ì<sup>n</sup> téé dàcuaha ñaha xii ñáyiú nchaa tnúhu ní chídó tnùní ndí Moisés ná cùtnuní iní-dé nàcuáa quide Yá Ndiǒxí ndíhu ndaha-gǎ ñáyiú, te téé-á<sup>n</sup> cúú-dě dàtná ì<sup>n</sup> téé cùu xítóhó vehe. Te téé cùu xítóhó vehe-á<sup>n</sup> ñí queñuhu-dé nchaa sá ñí quee túu díhna ndècu ndíhí-dé, ndíhí nchaa sá ñí quee túu saa. Te duca<sup>n</sup> sǎtnahá-xí cùu téé-á<sup>n</sup> te núu na cùtnuní iní-dé nàcuáa quide Yá Ndiǒxí ndíhu ndaha-gǎ ñáyiú —càchí-gá xǎha<sup>n</sup>-gǎ xii-güedé.

*Jèsús ndécú-gǎ ñuú núú ñí sahu-gá*

*(Mr. 6:1-6; Lc. 4:16-30)*

53 Te sátá ñí yáha duca<sup>n</sup> ñí cani Jèsús cuèndú núú-güedě, te ní xica-gá cuánuhú-gá.

54 Te ní ndexio-gá ñuú núú cúú ñùú-gá, te cuánguihu-gá xití veñúhu càa ñuú-á<sup>n</sup> te ní ngúíta-gá dánèhé-gá ñáyiú. Te nchaa ñáyiú ndèdóho nchaa tnúhu cáhá<sup>n</sup>-gá xícuñúhu-yu, te xítnàhá-yu:

—¿Nása ní cuu núu ío váha cùtnuní iní téé-a nàcuáa cunduu tnúhu cáhá<sup>n</sup>-dé, te quide-dé nchaa sá vǎ yǒo tnàhí ndàcu cada-i?

55 Te dicó déhe téé cùu carpinterú ndíhí tá Màriá cúú-dě, te ñaní-dé cúú tǎ Jácobó, ndíhí té Chèé, ndíhí té Xímú, ndíhí té Jüdás.

56 Te cue cúha-dé ndécú ndíhí ñahá-yu xii-o ñùú-a. ¿Te nása ní quide-dé núu ndéé dàcá<sup>n</sup> ío váha cùtnuní iní-dé nàcuáa cunduu tnúhu cáhá<sup>n</sup>-dé-i? —càchí-yu xítnàhá-yu.

57 Te ñá túú ní cuíní-yu cáhá<sup>n</sup> ndíhí váha-yu Jèsús, dico mee-gǎ ní xáha<sup>n</sup>-gǎ xii-yu:

—Te núu ñ<sup>n</sup> tée càhá<sup>n</sup> tnúhu Yá Ndiõxí ná nàsáá-dé ñúú-dé, te nchaa ñáyiú ñúú-dé-á<sup>n</sup> ndihí nchaa ñáyiú cùu ndimee-dé ñá túú nèhé-yu sá yíñùhu núú-dé, dico cue ñáyiú nchaa dava-gá ñúú chi nèhé-yu sá yíñùhu núú-dé —càchí-gá xáha<sup>n</sup>-gá xií-yu.

<sup>58</sup> Te ñá túú ní quide Jesús titní núú sã vã yõo tnàhí ndàcu cada ñúú-á<sup>n</sup>, chi ñá túú ní cuiní-yu quindáá iní ñáhã-yu xii-gá.

## 14

*Nàcuáa ní cuu ní xíhí té Juàá tée dàcuandute ñaha xii ñáyiú*

*(Mr. 6:14-29; Lc. 9:7-9)*

<sup>1</sup> Te diu-ni dàvá-á<sup>n</sup> ñí níhí tẽ Hèrodés tnúhu nchaa nàcuáa quide Jesús, te té Hèrodés-á<sup>n</sup> cúú-dě tée tàxi tnuní distritú Galileá.

<sup>2</sup> Te ní xáha<sup>n</sup>-dě xii nchaa cue tée ndècu ndihí-dé: —Tée dii cuèndú-xi ñihí-ó-á<sup>n</sup> cùu-dé té Juàá tée dàcuandute ñaha xii ñáyiú, tée ní xíhí ní cùu te ní ndoto-dé nõu dàcá<sup>n</sup> ndácú-dě quidé-dě nchaa sá vã yõo tnàhí ndàcu cada —cachí-dě xáha<sup>n</sup>-dě xii-güedé.

<sup>3</sup> Te duca<sup>n</sup> ñí cáhá<sup>n</sup> té Hèrodés chi mee-dě ní táuchíú<sup>n</sup>-dě ní tñi ñaha-güedě xii té Juàá, te ní dácútú ñaha-güedé xii-dé, te ní chihí ñaha-güedě vecaá. Te duca<sup>n</sup> ñí quide té Hèrodés-á<sup>n</sup> sã cuèndá ñaha nani Herodiás, ñaha ní cándeca ñaní-dé té Lìpé, te ní naquehe<sup>n</sup> ñaha-dě xii-a<sup>n</sup> ndèca ñaha-dé.

<sup>4</sup> Te té Juàá ní xáha<sup>n</sup>-dě xii té Hèrodés:

—Ñá túú ní quide váha-n dùha ní naquehe<sup>n</sup>-n ñaha ní cándeca ñaní-n —duha ní xáha<sup>n</sup> tẽ Juàá xii té Hèrodés.

<sup>5</sup> Te sá dúcá<sup>n</sup> ñí xáha<sup>n</sup> tẽ Juàá-á<sup>n</sup> xii té Hèrodés, te ní cuiní té Hèrodés-á<sup>n</sup> cahni-dé té Juàá-á<sup>n</sup>, dico ñá túú ní cùyi-dé chi ní yùhú-dé núú cuè ñáyiu, chi nchaá-yu ní cutnùní iní-yu sá tẽ Juàá cúú-dé ì<sup>n</sup> tée càhá<sup>n</sup> tnúhu Yá Ndiõxí.

<sup>6</sup> Te ì<sup>n</sup> nduu ní quide té Hèrodés vico vehe-dé ní quide càhnu-dé nduu ñí cacu-dé. Te ndècu ì<sup>n</sup> déhe yoco ñàha nani Herodiás-á<sup>n</sup>, te xíchí-ǎ<sup>n</sup> ñí quíhu-xi xití vehe núú cúú vico-á<sup>n</sup> ñí xita saha-xi. Te nùcòo té Hèrodés ndihí cue tée ní càhá<sup>n</sup>-dé ndéhé-güedé, te ío ní cudíí iní-dé nàcuáa ní xita xíchí-ǎ<sup>n</sup>.

<sup>7</sup> Te té Hèrodés-á<sup>n</sup> ñí cacunehe-dé ndéé Yá Ndiõxí nàcuáa cutnùní iní xíchí-ǎ<sup>n</sup> sǎ ndàá cuañaha-dé ñúu ná cúú sǎ ná càcá<sup>n</sup>-xi núú-dé.

<sup>8</sup> Te xíchí-ǎ<sup>n</sup> ñí dácáhu iní ñáhá ñáná-xi xii-xi ná cúú sǎ càcá<sup>n</sup>-xi núú tẽ Hèrodés, núu xlá<sup>n</sup> ní xáha<sup>n</sup>-xi xii-dé:

—Cuiní-í quehdé-n díquí tẽ Juàá tée dàcuandute ñaha xii ñáyiu te taxi-n, dico na cùhu<sup>n</sup> ì<sup>n</sup> xití cóhó taxi-n —càhí-xi xáha<sup>n</sup>-xi xii-dé.

<sup>9</sup> Te sá dúcá<sup>n</sup> ñí xáha<sup>n</sup>-xi, te ní cundiyí té Hèrodés, dico ñá túú ní ñhí-dé nása cada-dé, chi ndèdóho ñáyiu òré ní cacunehe-dé Yá Ndiõxí sá ndàá cuañaha-dé ì<sup>n</sup> sá ná càcá<sup>n</sup>-xi núú-dé. Te ní quide-dé nàcuáa ní xáha<sup>n</sup>-xi.

<sup>10</sup> Chi ní táuchíú<sup>n</sup>-dè ní sáhá<sup>n</sup> cue tée ní xehndé-güedé díquí tẽ Juàá òré yíhí-dé vecaá.

<sup>11</sup> Te ní chihi-güedé díquí-dé ì<sup>n</sup> xití cóhó te nèhe-güedé cuánuhú ní sáñaha-güedé xii xíchí-ǎ<sup>n</sup>, te xíchí-ǎ<sup>n</sup> ñí nacuañaha-xi xii náná-xi.

<sup>12</sup> Te cue tée xica cuu ndihí té Juàá-á<sup>n</sup> ñí sáhá<sup>n</sup>-güedé ní naquehe<sup>n</sup>-güedé yíquí cùñú-dé ní chindúxi-güedé, te dàtnùní ní sáhá<sup>n</sup>-güedé ní xáha<sup>n</sup>-güedé xii Jèsús nàcuáa ní cuu.

*Jèsús dácàxi-gá úhú<sup>n</sup> mĩ cue tée te d̃h̃<sup>n</sup> ñáyiu d̃h̃<sup>i</sup> nd̃h̃<sup>i</sup> landú*

*(Mr. 6:30-44; Lc. 9:10-17; Jn. 6:1-14)*

<sup>13</sup> Te Jèsús ní níhí-gǎ tnúhu nàcuáa ní cuu ní xíhí té Juàá. Te sátá xǎ<sup>n</sup> te cuánguee-gá ì<sup>n</sup> bàrcú cuáhá<sup>n</sup>-gá ì<sup>n</sup> xichi núú ñà túú ñáyiu ndècu, dico nchaa ñáyiu xĩndecu nchaa ñúú cáá yàtni xía<sup>n</sup> ñí níhí-yu tnúhu sá cuáhá<sup>n</sup>-gá, te ní queé-yu ñúú-yu xica sahá-yu cuáhá<sup>n</sup> núú quidè-yu cuendá quexìo Jesús.

<sup>14</sup> Te òré ní quexìo Jesús núú cuáhá<sup>n</sup>-gá, te ní quene-gá bàrcú, te ní xiní-gá cuéhé víhí ñáyiu xixúcu-yu xía<sup>n</sup>, te ní cundàhú iní ñáhá-gǎ xii-yu, te ní quide tátna-gá nchaa ñáyiu cùhú ndihí-yu.

<sup>15</sup> Te sátá ñí cuaa te ní sáhá<sup>n</sup> cue tée xica cuu ndihí Jesús núú-gǎ, te xǎha<sup>n</sup>-güedè xii-gá:

—Sa ní cuu dandàca-n nchaa ñáyiu-a chi sa ní cuaa, te na quihí<sup>n</sup>-yu nchaa ñúú cáá yàtni iha cuaá<sup>n</sup>-yu sá cáxí-yu, chi núú ndécú-ó iha ñá túú tnàhí ná ló —càchí-güedè xǎha<sup>n</sup>-güedè xii-gá.

<sup>16</sup> Te Jèsús ní xáha<sup>n</sup>-gǎ xii-güedè:

—Ñáhá, vá dándàca-í-yu, váha-gá mee-ndo chĩ cuǎñaha sǎ ná càxí-yu —càchí-gá xǎha<sup>n</sup>-gǎ xii-güedè.

<sup>17</sup> Te ní xáha<sup>n</sup>-güedè xii-gá:

—Ñá túú nǎgá ndécú ndihí-ndí, chi úhú<sup>n</sup> duha-ná pàa ndihí úú-nǎ chácá ndécú ndihí-ndí —càchi-güedè xǎha<sup>n</sup>-güedè xii-gá.

<sup>18</sup> Te Jèsús ní xáha<sup>n</sup>-gǎ xii-güedè:

—Chí cánèhe paá-á<sup>n</sup> ndihí chácá-ǎ<sup>n</sup> táquìxi iha —cachí-gá xǎha<sup>n</sup>-gǎ xii-güedè.

19 Te Jèsús ní xáha<sup>n</sup>-gǎ xii nchaa ñáyiú sá ná ngõo-yu nchaá-yu núú ité cuíi càa xíá<sup>n</sup>, te ní quehe<sup>n</sup>-gá ndi ùhú<sup>n</sup> pàá-á<sup>n</sup> ndihi ndi ndúú chácá-ǎ<sup>n</sup> te ní ndacoto-gá andiú, te ní ndacá<sup>n</sup> táhú-gǎ núú Yǎ Ndiõxí, te dǎtnùní ní táhú cuèchi-gá pàá-á<sup>n</sup> te ní sáñaha-gǎ xii cue téé xìca cuu ndihi-gá ní dácǎhñu-güedé cue ñáyiú ní xexí-yu.

20 Te nchaá-yu ní xexí-yu ní ndahá xití-yu. Te sátá ñí túhú cóhõ-yu te ní nadatàcá-güedé nchaa sá ñí quendóo, te ní chítú ùxúú tnáhá tídihi mee-ni sǎ ñí quendóo.

21 Te nchaa ñáyiú ní xexi-á<sup>n</sup> ñí xínu úhú<sup>n</sup> mǐl mee-ni cuè téé chi mee-ni cuè téé-á<sup>n</sup> ñí quíúndehu, te dìh<sup>n</sup> cue ñáyiú dìhí ndihi cue landú.

*Jèsús xíca-gǎ núú ndute  
(Mr. 6:45-52; Jn. 6:16-21)*

22 Te òré-ni-á<sup>n</sup> ñí xáha<sup>n</sup> Jèsús xii cue téé xìca cuu ndihi-gá sá quèe-güedé bàrcú téhndé-güedé ndàa ìngá xio yuhu làgúná, te mee-gǎ quendóo-gá cada ndee ìní tnáhá-gǎ ndihi cue ñáyiú.

23 Te sátá ñí yáha ní quide ndee ìní tnáhá-gǎ ndihi cue ñáyiú, te medii-gá ní xica-gá cuásaá-gá ìñ tìndúú cáá yàtni xíá<sup>n</sup> cuendá cáhá<sup>n</sup> ndihi-gá Yǎ Ndiõxí, te diu-ni medii-gá ndécú xíá<sup>n</sup> ñí cundiquí<sup>n</sup>.

24 Te bàrcú sá ñúhú cuè téé xìca cuu ndihi-gá-á<sup>n</sup> sa cuáhá<sup>n</sup>-xi ndéé cuádava xití làgúná-á<sup>n</sup>, te níhi vìhi quene táchí ndàa ichi cuáhá<sup>n</sup>-xi, te dácandau ndeé-xi ndute nchaa dìñi-xi.

25 Te tàcúhndá váhi-gá tá xìca Jesús núú ndute cuáhá<sup>n</sup> tá cùyatni-gá bàrcú-á<sup>n</sup>.

26 Te cue tée xìca cuu ndihì-gá ní xiní ñáhá-güedě xii-gá tá xìca-gá núú ndute cuáhá<sup>n</sup>, te ní yùhú-güedé te níhi ní cáhá<sup>n</sup>-güedé te xìtnàha-güedé:

—jì<sup>n</sup> àlmá! —càchí-güedé xìtnàha-güedé.

27 Te Jèsús ní cáhá<sup>n</sup>-gá, te xǎha<sup>n</sup>-gǎ xii-güedé:

—Ñíí cunduu-ndo vǎ yùhú-ndó, chi yùhú cúu-í —càchí-gá xǎha<sup>n</sup>-gǎ xii-güedé.

28 Te té Pèlú ní xáha<sup>n</sup>-dě xii-gá:

—Mèstrú, te núu ðiu-n te tauchìu<sup>n</sup> sá tnàhá-í ná càca-í núú ndute quixi tnahá ñáhà-í xii-n —càchí-dé xǎha<sup>n</sup>-dě xii-gǎ.

29 Te Jèsús ní xáha<sup>n</sup>-gǎ xii-dé:

—Taquixi —cachí-gá xǎha<sup>n</sup>-gǎ xii-dé.

Te té Pèlú ní nuu-dé núú bàrcú, te ní ngüíta-dé tá xìca-dé núú ndute cuáhá<sup>n</sup> cuátnahá ñáhá-dě xii-gá.

30 Te ní cutnùní iní-dé sá ïo níhi xìco táchí, te ní ngüíta-dé yùhú-dé. Te òré-ni-á<sup>n</sup> tá quëe naa-dé xití ndute cuáhá<sup>n</sup> ní cùu, te níhi ní cáhá<sup>n</sup>-dé xǎha<sup>n</sup>-dě xii Jèsús:

—jìMèstrú, vá dáñá-n quëe naa-í xití ndute! —càchí-dé xǎha<sup>n</sup>-dě xii-gá.

31 Te òré-ni-á<sup>n</sup> nǐ tniì Jèsús ndaha-dé, te ní xáha<sup>n</sup>-gǎ xii-dé:

—¿Ná cuëndá ñá túú sàndáá ndisa iní ñáhá-n xii-í sàni ì<sup>n</sup> sani úú iní-n-i? —càchí-gá xǎha<sup>n</sup>-gǎ xii-dé.

32 Te òré cuánguee Jèsús ndihì té Pèlú xití bàrcú, te òré-ni-á<sup>n</sup> nǐ ngüíñí táchí.

33 Te cue tée ñùhu xití bàrcú-á<sup>n</sup> nǐ ngüíñí xití-güedě núú-gǎ, te xǎha<sup>n</sup>-güedě xii-gá:

—Sá ndàá sá cuítí sǎ díú yòhó cúu-n Dèhe Dútú Ndiöxí —càchí-güedé xǎha<sup>n</sup>-güedě xii-gá.

*Jèsús quidé tătna-gá ñáyiú cùhú ì<sup>n</sup> xichi núú nání Gènesarét*

*(Mr: 6:53-56)*

<sup>34</sup> Te ní quexìo Jèsús ndihì cue tée xìca cuu ndihì-gá ndāa ingá xio yuhu làgúná, te núú ñǎ quexìo-gá ndihì-güedé-á<sup>n</sup> nání-xí Gènesarét.

<sup>35</sup> Te nchaa ñáyiú xǐndecu xíá<sup>n</sup> ñǎ cutnùnì iní-yu sá díú-gǎ ní quexìo, te ní dátècú tnúhu-yu nchaa dava-gá ñáyiú xǐndecu yatni xíá<sup>n</sup> sǎ ñǎ quexìo-gá. Te ndècá-yu nchaa ñáyiú cùhú ndécú ndìhì-yu cuáhá<sup>n</sup> núú ndécú Jèsús.

<sup>36</sup> Te nchaa ñáyiú cùhú-á<sup>n</sup> ñǎ ngüíta-yu càhá<sup>n</sup> ndàhú-yu núú Jèsús sá ná dàña-gá tnándeé-yu cuèdicó luha yuhu dǒó-gǎ cuèndá ndúha-yu, te cue ñáyiú cùhú, ñáyiú ní tnándeé yuhu dǒó-gǎ ní ndúha-yu.

## 15

*Cuèndá nchaa sá quidé-xí ngǔndecu cuèchi ñáyiú*

*(Mr: 7:1-23)*

<sup>1</sup> Te sátá dúcá<sup>n</sup> te ì<sup>n</sup> ũú cue tée cùu fariséú ní quee-güedé ñúú Jerusàlén, ndihì cue tée dàcuaha ñaha xii ñáyiú nchaa tnúhu ní chídó tnùnì ndíi Moisés ní quexìo-güedé núú ndécú Jèsús, te xǎha<sup>n</sup>-güedě xii-gá:

<sup>2</sup> —¿Ná cuèndá cue tée xìca cuu ndihì-n ñá túú nàquete-güedé ndaha-güedé òré caxi-güedé nàcuáa ní cachí cue ñanì tnáhá-ó ñǎ xǐndecu ndéé sanaha-i? —càchì-güedé xǎha<sup>n</sup>-güedé xii-gá.

<sup>3</sup> Te Jèsús ní xáha<sup>n</sup>-gǎ xii-güedé:

—Te nchòhó tucu, ¿ná cuèndá ñá túú quède-ndo nacuáa ní cachí Yǎ Ndiǒxí cada-ndo, núú da nàcuáa ta quède cue tée ñuyíú-a quède-ndo-i?

4 Te Yá Ndiöxí cächí-gá núú tütú-gá: “Canehe-ndo sã yíñùhu núú tătă-ndó ndìhi núú nãná-ndó”, cächí-gá. Te cächí tucu-gá ingá xichi núú tütú-gá: “Nchaa ñáyiú na cãhá<sup>n</sup> úhú tătă-xi àdi náná-xi te cahni ñaha-güedě xií-yu”, duha cächí-gá núú tütú-gá.

5 Dico nchòhó cächí-ndó sã cuè ñáyiú chi cuu cúñahá-yu xii tătă-yu àdi nánã-yu: “Vá cúú chindee ñaha-ndí xii-n, chi sá táxí-ndí xii-n ni cùu, xíã<sup>n</sup> ní nduu cuendá Yã Ndiöxí”, cuu duha cúñaha ñáyiú xii tătă-yu àdi nánã-yu cächí-ndó.

6 Te cächí-ndó sã cuè ñáyiú duca<sup>n</sup> na cũñaha xii tătă-xi àdi náná-xi te ñã túú-gã tàú-yu chindèé-yu ni tătă-yu ni nãñã-yu. Te duca<sup>n</sup> quìde-ndo chi ní dáquéé tĩhú-ndó nàcuáa ní cachí Yã Ndiöxí cada-ndo, te mee-ni nàcuáa ta quìde cue téé ñuyíú-a véxi nchìcú<sup>n</sup> nihnu-ndo quìde-ndo.

7 ¡Te nchòhó cúú-ndó ñáyiú ío dándahú méé-xí, chi cächí-ndó sã quidé ndãá-ndó te ñã ndàá sá quidé ndãá-ndó! Te ní quee ndãá-xi nàcuáa ní chídó tnùnì ndí Chàíá téé ní xóo cáhá<sup>n</sup> tnúhu Yá Ndiöxí ndéé sanaha núú tütú-gá núú cãhá<sup>n</sup>-xi nàcuáa ní cáhá<sup>n</sup>-gá cuendá-ndó, te duha ní cachí-gá:

8 Ñáyiú-a cächí-yu sá ïo cãhnu cuu-í dico dìcò-ni yuhu cãhá<sup>n</sup>-yu,

chi duu<sup>n</sup> duu<sup>n</sup> ñã túú ñùhu iní ñáhã-yu xii-í.

9 Te àú<sup>n</sup> ñã cuu chĩñuhu ñahá-yu xii-í chi ñã túú vèdana ndèé nándĩhi-xi,

chi cue ñáyiú-a dàcuahá-yu cue tnàha ñáyiú-yu nàcuáa cundecú-yu, dico mee-ni tnũhu sá ñĩ cahu iní cue ñáyiú ñuyíú-a cãhá<sup>n</sup>-yu.



Duha ní chídó tnùní ndíi Chàíá núú tütú Yă Ndiôxí nàcuáa ní cáhá<sup>n</sup>-gá cuendá-ndó —càchí-gá xăha<sup>n</sup>-gă xii-güedé.

<sup>10</sup> Te ní xáha<sup>n</sup>-gă xii cue ñáyiú:

—Chí táquixi ndehe iha, te cundedóho váha-ndo tnũhu na càhá<sup>n</sup>-í, te ío váha cuáha-ndo cuendá.

<sup>11</sup> Nchaa sá xéxí-ndó chi ñá túú nă quidé-xí ìní-ndó, dico nchaa sá cuèhé sá dúhá sàni ìní-ndó càhá<sup>n</sup>-ndó nchàa xiă<sup>n</sup> quidé-xí ndècu cuéchi-ndo —càchí-gá xăha<sup>n</sup>-gă xií-yu.

<sup>12</sup> Te cue téé xica cuu ndihí-gá ní sáhá<sup>n</sup>-güedé ndéé núú-gă, te xăha<sup>n</sup>-güedě xii-gá:

—Véxi-ndí càchí tnúhu-ndí xii-n să cuè téé cùu fariséú ñá túú cùu váha ìní-güedé cuendá tnúhu ní cáhá<sup>n</sup>-n —càchí-güedé xăha<sup>n</sup>-güedě xii-gá.

<sup>13</sup> Te ní xáha<sup>n</sup>-gă xii-güedé:

—Nchaa ñáyiú ñá túú cùu cuendá Tătà-í Dútú Ndiôxí cuíta nihnú-yu, chi ñáyiú-á<sup>n</sup> cúŷ-yu dàtná nchaa cúhú să ñá túú nàndíhi te tnúhu ñáyiú.

<sup>14</sup> Te vá cádá cuendá-ndó nàcuáa càhá<sup>n</sup> cue téé-á<sup>n</sup>, chi cùu-güedé dàtná cue ñáyiú cuàá sácuíta nehe tnàha. Te nchòhó xìní-ndó să nũu #<sup>n</sup> ñáyiú cuàá ná cuítá nèhe tucú-yu ìngá ñáyiú cuàá, te ndi ndùú-yu quée-yu déhvá —càchí-gá xăha<sup>n</sup>-gă xii-güedé.

<sup>15</sup> Te té Pèlú ní xáha<sup>n</sup>-dě xii-gá:

—Cachí tnúhu xii-ndí nàcuáa quèe-xi tnúhu ní cáhá<sup>n</sup>-n-ă<sup>n</sup> —càchí-dé xăha<sup>n</sup>-dě xii-gá.

<sup>16</sup> Te Jèsús ní xáha<sup>n</sup>-gă:

—¿Náa tnàhá nchòhó ñá túú ní tècú tnùní-ndó nàcuáa ndùu tnúhu ní cáhá<sup>n</sup>-í núú ñáyiú-ă<sup>n</sup> ñă?

<sup>17</sup> Nchaa sá xéxí-yu cuánguee-xi xití-yu, te dàtnùní náyăha ñaha-xi xíí-yu.

18 Dico nchaa tnúhu cuèhé tnúhu duha càhá<sup>n</sup>-yu xíǎ<sup>n</sup> véxi quene-xi iní-yu, te diu nchaa xíǎ<sup>n</sup> quidé-xí ndècu cuéchi-yu.

19 Te iní-yu-á<sup>n</sup> cácu ñihnu nchaa sá cuèhé sá dúhá, chi sàni cuehé sání dùha iní-yu, te sàhní-yu tnàha ñáyíu-yu, te cue téé càhá<sup>n</sup> ndihí-güedé ñáyíu dìhí te ñá díú ñàdihí-güedé cúŭ-yu. Te diu-ni duca<sup>n</sup> quide cue ñáyíu dìhí càhá<sup>n</sup> ndihí-yu cue téé te ñá díú yíi-yu cùu-güedé, te cuèi téé te cuèi ñadìhí mee-ni ìchi díí ìní cúdíí ìní-yu cundecú-yu, te dùhu ndachiu<sup>n</sup> tnahá-yu, te dàcuandehndé-yu, te càhá<sup>n</sup> cuèhé-yu cuendá tnàha ñáyíu-yu.

20 Te nchaa xíǎ<sup>n</sup> quidé-xí ndècu cuéchi-yu, dico ñá díú sǎ ñà túú ndàhá-yu dàtná ní cachí cue téé ndéé sanaha, chi xíǎ<sup>n</sup> ñá túú quide-xi cuendá ngúndecu cuéchi-yu —càchí-gá xǎha<sup>n</sup>-gǎ xii-güedé.

*Í<sup>n</sup> ñadìhí ñaha cùu ñaní tnáhá ñáyíu canàneá ní sándáá iní-a<sup>n</sup> Jèsús*

*(Mr. 7:24-30)*

21 Te Jèsús ní xica-gá cuáhá<sup>n</sup>-gá ní sáa-gá yucu cue téé ñuú Tìrú, ndihí yucu cue téé ñuú Sìdón.

22 Te í<sup>n</sup> ñadìhí ñaha cùu ñaní tnáhá ñáyíu canàneá ndécú yàtni-a<sup>n</sup> xíá<sup>n</sup>, te níhi ta càhá<sup>n</sup>-a<sup>n</sup> ní quexìo núú ndécú Jèsús, te xǎha<sup>n</sup>-a<sup>n</sup> xii-gá:

—¡Mèstrú, ñaní tnáhá ndíi Dàvíi, cundàhú iní ñáhá xii-í cada tátna-n dèhe yoco-í! Chi yíhi ñaha espíritú cündihí yucu ñávǎha xii-xi te ío dándoho ñaha-xi —cachí-a<sup>n</sup> xǎha<sup>n</sup> xii-gá.

23 Dico Jèsús ñá túú tnàhí ni cǎhá<sup>n</sup>-gá, te cue téé xica cuu ndihí-gá ní sáhá<sup>n</sup>-güedé núú-gǎ, te xǎha<sup>n</sup>-güedé xii-gá:

—Cúñaha xii ñaha-án ná nùhú-a<sup>n</sup>, chi ío níhi càhá<sup>n</sup>-a<sup>n</sup> nchìcú<sup>n</sup> ñáhá-án xii-o —cachí-güedé xăha<sup>n</sup>-güedě xii-gá.

24 Te Jèsús ní xáha<sup>n</sup>-gă xii-güedé:

—Yá Ndiǒxí ní tendaha ñàha-gá xii-í véxi-í mee-ni ñúú núú xǐndecu cue ñáyiu isràél, chi ñáyiu-án cúŷ-yu dàtná cue mbéé cue quiti ní xíta, chi ta xíta nihnú-yu cuáhá<sup>n</sup> —càchí-gá xăha<sup>n</sup>-gă xii-güedé.

25 Te ñadìhí-án ñí sáhá<sup>n</sup>-a<sup>n</sup> ndéé núú Jèsús ní ngüíñí xítí-án, te xăha<sup>n</sup>-a<sup>n</sup> xii-gá:

—¡Mèstrú, chindee ñàha xii-í! —càchí-a<sup>n</sup> xăha<sup>n</sup>-a<sup>n</sup> xii-gá.

26 Te Jèsús ní xáha<sup>n</sup>-gă xii-a<sup>n</sup>:

—Vá cúú chindee-í cue ñáyiu ñá túú cùu ñáyiu isràél, chi ñ<sup>n</sup>-ni cùu-xi núu na quèhe<sup>n</sup>-o paá cúú cuendá cue landú te cuáha-o ìná caxi-di —càchí-gá xăha<sup>n</sup>-gă xii-a<sup>n</sup>.

27 Dico ñaha-án ñí xáha<sup>n</sup>-a<sup>n</sup> xii-gá:

—Ndáá càhá<sup>n</sup>-n, dico cue iná chi nàdatacá-güedi sá ngóyó yùhu cóhó xǐtohó-güedi —càchí-a<sup>n</sup> xăha<sup>n</sup>-a<sup>n</sup> xii-gá.

28 Te Jèsús ní xáha<sup>n</sup>-gă xii-a<sup>n</sup>:

—¡Yòhó ñaha cùhú déhe-xi, ío váha sàndáá iní ñáhá-n xii-í! Te na càda-í nàcuáa cuìni-n —càchí-gá xăha<sup>n</sup>-gă xii-a<sup>n</sup>.

Te òré-ni-án ñí ndúha déhe-a<sup>n</sup>.

### *Jèsús quidé tătna-gá vài ñáyiu cùhú*

29 Te sátá dúcá<sup>n</sup> ñí cuu te Jèsús ní xica-gá cuáhá<sup>n</sup>-gá ní yáha-gá yuhu làgúná distrítú Galileá, te cuásaá-gá ñ<sup>n</sup> tìndúú te xía<sup>n</sup> ñí ngóo-gá.

30 Te xía<sup>n</sup> núcõo-gá ní quexìo cuéhé víhí ñáyiu, te ndècá-yu ñáyiu yacua, ndihì ñáyiu ní yíchí ì<sup>n</sup> xio ndaha-xi, ndihì ñáyiu cuàá, ndihì ñáyiu ñìhí, te vài dava-gá cue ñáyiu cùhú tnàhá dava-gá núú cuéhé ndécã-yu ní quexìo núú ndécú-gã. Te ní taxi ndecu ñàhá-yu núú Jèsús te ní quide tátna ñaha-gã xií-yu te ní ndúha-yu.

31 Te nchaa ñáyiu xĩndecu-á<sup>n</sup> ïo ní cuñúhu-yu sá dúcá<sup>n</sup> ñí xini-yu ní cuu ní nacáhá<sup>n</sup> nchaa ñáyiu ñìhí, ndihì cuèndá sá ñí ndúha nchaa cue ñáyiu yacua, ndihì cuèndá sá ñí ndúha cue ñáyiu ní yíchí ì<sup>n</sup> xio ndaha-xi, ndihì cuèndá sá ñí ndúha núú cuè ñáyiu cuàá. Te nchaá-yu ní cachí-yu sá ïo càhnu cuu Yá Ndiõxí Yaá cúú Ndiõxí cue ñáyiu isràél.

*Jèsús dácàxi-gá cúmí mìl cue téé te ðì<sup>n</sup> ñáyiu ðìhí ndihì landú*  
(Mr. 8:1-10)

32 Te Jèsús ní cana-gá cue téé xìca cuu ndihì-gá, te ní xáha<sup>n</sup>-gã xii-güedé:

—Yúhú cùndàhú iní-í nchaa ñáyiu-a, chi sa ní cuu úní nduu ndècu ndihì ñàhá-yu xii-o ìha, te ñá túú tnàhí-gá sá caxí-yu, te ñá túú cuìní-í naten-daha-ï-yu núhú tnámã-yu vehé-yu, chi ná ndèé cuáhá<sup>n</sup> cuneé-yu docó ichi —càchí-gá xãha<sup>n</sup>-gã xii-güedé.

33 Te ní xáha<sup>n</sup>-güedë xii-gá:

—¿Te ndèé níhí-ó sã cuãñaha-o càxi nchaa ñáyiu-a, te ïo cuéhë-yu te ñá túú ñá ïó ìha chi cùu-xi xití yucu-ì? —càchí-güedé xãha<sup>n</sup>-güedë xii-gá.

34 Te Jèsús ní xícá<sup>n</sup> tnúhú-gã núú-güedë, te xãha<sup>n</sup>-gã:

—¿Ná daha-gá pàá ndécú ndìhi-ndo-i? —cachí-gá xǎha<sup>n</sup>-gǎ xii-güedé.

Te ní xáha<sup>n</sup>-güedě xii-gá:

—Ndècu ndìhi-ndí úsá-gá tnàhá pàá ndìhi ì<sup>n</sup> ùú-gá chácá —càchí-güedé xǎha<sup>n</sup>-güedě xii-gá.

<sup>35</sup> Te Jèsús ní xáha<sup>n</sup>-gǎ xii nchaa ñáyiú sá ná ngõo-yu nchaá-yu, te ní ngõo-yu.

<sup>36</sup> Te ní quehe<sup>n</sup>-gá ndì ùsá pàá-á<sup>n</sup> ndì ì<sup>n</sup> ùú-gá chácá-á<sup>n</sup>, te ní ndacá<sup>n</sup> táhú-gǎ núú Yǎ Ndiòxí, te dǎtnùní ní táhú cuèchi-gá pàá-á<sup>n</sup> ndìhi chácá-á<sup>n</sup> te ní sáñaha-gǎ xii cue téé xìca cuu ndìhi-gá ní dácǎhñu-güedé nchaa ñáyiú-á<sup>n</sup>.

<sup>37</sup> Te nchaá-yu ní xexí-yu ní ndahá xití-yu. Te sátá nǐ túhú cóhõ-yu te ní nadatàcá-güedé nchaa sá nǐ quendóo, te ní chítú ùsá tnàhá tídihi mee-ni sǎ nǐ quendóo-á<sup>n</sup>.

<sup>38</sup> Te núú ncháá ñáyiú ní xexi te ní xínu cúmí mǐl mee-ni cuè téé chi òu-ni cue téé-á<sup>n</sup> nǐ quiúndehu, te ò<sup>n</sup> cue ñáyiú ò<sup>n</sup> ndìhi cue landú.

<sup>39</sup> Te sátá dúcá<sup>n</sup> te Jèsús ní dándácá ñàha-gá xií-yu, te cuánguee-gá bàrcú cuáhá<sup>n</sup>-gá yucu cue téé ñúú Màgdalá.

## 16

*Cue téé cùu fariséú ndìhi cue téé cùu saducéú xǎha<sup>n</sup>-güedě xii Jèsús cada-gá ì<sup>n</sup> sá vǎ yõo tnàhí ndàcu cada*

*(Mr. 8:11-13; Lc. 12:54-56)*

<sup>1</sup> Te cue téé cùu fariséú ndìhi cue téé cùu saducéú ní sáá-güedé núú ndécú Jèsús xító ndéé ñáhá-güedě xii-gá, te xǎha<sup>n</sup>-güedě sá ná cádá-gǎ ì<sup>n</sup> sá vǎ yõo tnàhí ndàcu cada cundehe-güedé nàcuáa

cutnùní iní-güedé nõu ndáá sá Yă Ndiõxí ní ten-  
daha ñàha-gá xii-gá véxi-gá ñuyíú-a.

<sup>2</sup> Te Jèsús ní xáha<sup>n</sup>-gă xii-güedé:

—Nchòhó chi òré tá cuàa cuáhá<sup>n</sup> te ndàcoto-ndo andiù, te cächí-ndó: “Ío váha cada-xi tneé chi càa vící tícuèhé andiù”, duha cächí-ndó.

<sup>3</sup> Te òré dátneé ndácòto tucu-ndo andiù, te cächí-ndó: “Vá cádá vǎha-xi nduu vitna chi tícuèhé andiù, te càa vící”, duha cächí-ndó. ¡Dico nchòhó cúú-ndó ñǎyiu ío dándahú méé-xí sǎ quidé ndáá te ñá ndáá sǎ quidé ndáá-ndó! Te cùtnuní iní-ndó nàcuáa quíde-xi andiù, dico ñá túú cùtnuní iní-ndó nàcuáa quèe-xi nchaa sǎ quidé Yă Ndiõxí vitna.

<sup>4</sup> Dico nchaa nchòhó ñǎyiu ndècu ñuyíú vitna ío cuihna ìní-ndó, te ñá túú cuìní-ndó càda ndáá-ndó nõú Yă Ndiõxí, te cuìní-ndó càda-í ñ<sup>n</sup> sǎ vǎ yõ tnhí ndàcu cada dico ñá túú nǎgá cada-í, chi diù-ni nàcuáa ní quíde Yá Ndiõxí ndí Jónás diù-ni duca<sup>n</sup> càda tucu-gá vitna —cächí-gá xǎha<sup>n</sup>-gă xii-güedé.

Te duca<sup>n</sup> te ní xica-gá cuáhá<sup>n</sup>-gá ndihí cue téé xìca cuu ndihí-gá.

*Cuèndá cue téé cùu fariséú ndihí cuèndá cue téé cùu saducéú*

*(Mr. 8:14-21)*

<sup>5</sup> Te òré ní quexìo ndihí ñàha-gá xii-güedé ndàa ingá xio yuhu làgúná, te ní ndacu iní-güedé sǎ ñí cunaa-güedé canehè-güedé pàà quíhí<sup>n</sup> caxi-güedé.

<sup>6</sup> Te Jèsús ní cáhá<sup>n</sup>-gá dóho-güedé, te xǎha<sup>n</sup>-gă xii-güedé:

—Na cächí tnúhu-í xii-ndo sǎ ïo quihí iní-ndó cùndecu-ndo, te vá cádá cuèndá tnhí-ndo lèvadurá cue téé cùu fariséú ndihí cue téé cùu saducéú —cächí-gá xǎha<sup>n</sup>-gă xii-güedé.

7 Te ní ngüíta-güedé xǐtnàha-güedé:

—Cuèndá sá ñà túú ní cǎnehe-o pàá quixi xǐǎ<sup>n</sup> duha càhá<sup>n</sup>-gá —càchí-güedé xǐtnàha-güedé.

8 Te Jèsús ní cutnùní iní-gá nàcuáa ndùu tnúhu xǐtnàha-güedé, núu ní xáha<sup>n</sup>-gǎ xii-güedé:

—Nchòhó chi ñá túú sàndáá iní ñáhá vǎha-ndo xì-í nǔu xǐǎ<sup>n</sup> da sá ñà túú ní cǎnehe-ndo pàá quixi càhá<sup>n</sup>-ndó.

9 ¿Te náa ñá ndácú ìní-ndó sǎ nǔú ùhú<sup>n</sup>-ni pàá, te ní taxi-í ní dácǎhñu-ndo ñǎ xexi úhú<sup>n</sup> mǐl cue téé, chi ñu-ni cue téé-á<sup>n</sup> ñǎ quíúndehu, te sátá ñǎ túhú cóhó-güedé te ní chítú tìtní tídihi mee-ni sǎ ñǎ quendóo-ǎ<sup>n</sup>? Te ñá tècú tnùnì-ndó nàcuáa quèe-xi nacuáa ní quide-í.

10 ¿Te náa ñá ndácú tucu iní-ndó sǎ nǔú ùsá-ni pàá te ní taxi-í ní dácǎhñu tucu-ndo ñǎ xexi cúmí mǐl cue téé, chi ñu-ni cue téé-á<sup>n</sup> ñǎ quíúndehu, te sátá ñǎ túhú cóhó-güedé te ní nadatàcá-ndó nchàa sá ñǎ quendóo, te ní chítú tìtní tídihi mee-ni sǎ ñǎ quendóo-ǎ<sup>n</sup>?

11 Dico nchòhó chi ñá túú ní quide cuendá-ndó nàcuáa ndùu tnúhu càhá<sup>n</sup>-í òré ní cachí-í sá vǎ quéhé<sup>n</sup> cuendá-ndó levadurá cue téé cùu fariséú ndìhi cue téé cùu saducéú, chi ñá díú cuendá pàá ní cǎhá<sup>n</sup>-í —càchí-gá xǎha<sup>n</sup>-gǎ xii-güedé.

12 Te sátá dúcá<sup>n</sup> ñǎ xáha<sup>n</sup> Jèsús xii cue téé xìca cuu ndìhi-gá, te ní tecú tnùnì-güedé sá xǎha<sup>n</sup>-gǎ xii-güedé sá vǎ tníí-güedé tnúhu càhá<sup>n</sup> cue téé cùu fariséú ndìhi cue téé cùu saducéú, te ñá díú cuendá levadurá sá quíhu yuchi cuǎha pàá ní cǎhá<sup>n</sup>-gá.

*Té Pèlú xǎha<sup>n</sup>-dǎ xii Jèsús sá díú-gǎ cúú-gǎ Crìstú  
(Mr. 8:27-30; Lc. 9:18-21)*

13 Te Jèsús ní quexìo-gá yucu cue tée ñuú Cèsareá Fìlipú, te ní xícá<sup>n</sup> tnúhú-gǎ núú cuè tée xìca cuu ndìhi-gá, te xǎha<sup>n</sup>-gǎ xii-güedé:

—¿Yoo cùu yúhú Tée cùu ñaní tnáhá-ndó nchàa-ndo cachí cue ñáyiu-va? —càchí-gá xǎha<sup>n</sup>-gǎ xii-güedé.

14 Te ní xáha<sup>n</sup>-güedě xii-gá:

—Davá-yu càchí-yu sá cúú-n ndïi Juáá tée ní xóo dacuàndute ñaha xii ñáyiu, te davá-yu càchí-yu sá cúú-n tǎ Èliás, te davá-yu càchí-yu sá cúú-n ndïi Jeremiás tée ní xóo cáhá<sup>n</sup> tnúhu Yá Ndiöxí ndéé sanaha, àdi cuu-n ingá tée ní xóo cáhá<sup>n</sup> tnúhu-gá ndéé sanaha, duha càchí-yu —càchí-güedé xǎha<sup>n</sup>-güedě xii-gá.

15 Te Jèsús ní xícá<sup>n</sup> tnúhú tùcu-gá núú-güedé, te xǎha<sup>n</sup>-gǎ xii-güedé:

—Te nchòhó, ¿yoo sàni iní-ndó cùu-í-i? —càchí-gá xǎha<sup>n</sup>-gǎ xii-güedé.

16 Te té Xímú, àdi Pelú chi úú dïu-dé, ní xáha<sup>n</sup>-dě xii-gá:

—Yòhó cúú-n Crìstú Yaá ní tendaha Yǎ Ndiöxí véxi ñuyíú-a, te dïu Yá Ndiöxí cúú-gǎ Yaá ndécú nchàa nduu nchaa quíú, te yòhó cúú-n Dèhe-gá —càchí-dé xǎha<sup>n</sup>-dě xii-gá.

17 Te Jèsús ní xáha<sup>n</sup>-gǎ xii-dé:

—Yòhó té Xímú déhe té Jònás, ío váha táhú-n chi mee Tǎtà-í Dútú Ndiöxí ní dácáhu ìní ñáhá-gǎ xii-n nàcuáa cunduu tnúhu cáhá<sup>n</sup>-n, te ñá díú ñ<sup>n</sup> ñáyiu ñuyíú-a duca<sup>n</sup> ni dâcahu iní ñáhǎ-yu xii-n tnúhu-á<sup>n</sup>.

18 Te yúhú xǎha<sup>n</sup>-ǐ Pèlú xii-n, te tnúhu-á<sup>n</sup> quée-xí yúú, chi quèe ndáá-xi nàcuáa nàni-n, chi cuu-n ñ<sup>n</sup> tée vá cání ñ<sup>n</sup> caní úú iní-xi canu ichi-n cuè ñáyiu



nàcuáa cundecu ndihì ñàhá-yu xii-í. Te nchaa ñáyiú cùu cuendá-í vá ndácú yùcu ñávãha dacuíta nihnu ñaha-xi xii-yu.

19 Te yúhú taxi-í tnúhu ndee ìní cundecu ndihì-n cuendá cunuu-n nùú cuè ñáyiú yìndaha ñaha Yá Ndiöxí, te nchaa sá ná càhá<sup>n</sup>-n sã cúú-xí sã vãha, te ñiu-ni duca<sup>n</sup> càhá<sup>n</sup> Yã Ndiöxí, te nchaa sá ná càhá<sup>n</sup>-n sã ñà túú cùu-xi sã vãha, te ñiu-ni duca<sup>n</sup> càhá<sup>n</sup> tucu-gá, chi quide-n nacuáa cuini-gá — càchí-gá xãha<sup>n</sup>-gã xii-dé.

20 Te sátá dúcá<sup>n</sup> te ní xáha<sup>n</sup> Jèsús xii cue téé xìca cuu ndihì-gá sá vã yõo cúñaha-güedë sá díú-gã cúú-gã Cristú Yaa ní tendaha Yã Ndiöxí véxi ñuyíú-a.

*Jèsús càhá<sup>n</sup>-gá sá cáhni ñàha-güedé xii-gá  
(Mr. 8:31-9:1; Lc. 9:22-27)*

21 Te ndéé dává-á<sup>n</sup> ní ngüíta Jèsús xãha<sup>n</sup>-gã xii cue téé xìca cuu ndihì-gá:

—Dacuití sã quihí<sup>n</sup>-í ñuú Jerusálén, te yacá<sup>n</sup> cue téé cùu sacuéhé nùú ñáyiú isràél, ndihì cue dútú cúnùu, ndihì cue téé dàcuaha ñaha xii ñáyiú nchaa tnúhu ní chídó tnùnì ndíi Moisés, nchaa cue téé-á<sup>n</sup> ïo dandòho ñaha-güedé xii-í, te cahni ñaha-güedë, dico nduu únì sá cúú-í te ndoto-í — càchí-gá xáha<sup>n</sup>-gã xii-güedé.

22 Te té Pèlú ní cana-dé Jèsús ì<sup>n</sup> xio, te ní ngüíta-dé ténáá ñáhá-dë xii-gá, te xãha<sup>n</sup>-dë:

—¡Sá vã càchí Ndiöxí sá dúcá<sup>n</sup> ndòho-n chi ñã túú tàú-n sã dúcá<sup>n</sup> ndòho-n! —cachí-dé xãha<sup>n</sup>-dë xii-gá.

23 Te ndàa sátá Jèsús nútn<sup>ñ</sup> té Pèlú òré duca<sup>n</sup> xãha<sup>n</sup>-dë xii-gá nùu ní nchócuìhnu-gá, te xãha<sup>n</sup>-gã xii-dé:

—¡Xocuiñí yòhó yucu ñävãha núu-í-a chi dicó quidé tneñu-n! Chi ñá túú sàni iní-ò dàtná sání iní Yã Ndiõxí chi ì<sup>n</sup>-ni sàni iní-ò ndihi dava-gá cue ñáyiú ndècu ñuyíú-a —càchí-gá xãha<sup>n</sup>-gã xii-dé.

24 Te sátá dúcá<sup>n</sup> te ní xáha<sup>n</sup>-gã xii nchaa cue téé xìca cuu ndihi-gá:

—Nchaa ñáyiú cuìní chitnahá ñáhá xii-í, te xìni ñuhu-xi dañá-yu vá cáda-gã-yu sá sání iní méë-yu, te ío cada ndee iní-yu cundecu túha-yu ndohó-yu cuendá-í, te cuëi na ndòhó-yu dàtná ndoho-í.

25 Te nchaa ñáyiú cuìní sá ñà túú tnàhí ná yáha cundecu ñuyíú-a cuíta nihnú-yu, dico nchaa ñáyiú ñá túú tnàhí yùhú cuëi nándi sá ná yãha-yu cundecú-yu ñuyíú-a sá cuendá-í, te ñáyiú-á<sup>n</sup> naníhí tàhú-yu.

26 Te cuëi nchaandi túhú sá ío ñuyíú-a na nihí ñáyiú cundecu ndihí-yu, dico núu ñu nchaa xíã<sup>n</sup> ná càda cuíta nihnú-yu te ñá túú vèdana nàndíhi-xi sá dúcá<sup>n</sup> ndècu ndihí-yu nchaa xíã<sup>n</sup>. Te ni ì<sup>n</sup> sá ío ñuyíú-a vá chíndèe ñaha-xi xií-yu cuendá naníhí tàhú-yu.

27 Te ndáá quéé-xí tnùhu càhá<sup>n</sup>-í, chi na quìxi tucu yúhú Téé cùu ñaní tnáhã-yu nchaá-yu, te dàvá-á<sup>n</sup> quiní-yu sá ío càhnu cuu-í dàtná càhnu cuu Tàtá-í Dútú Ndiõxí, te quixi-í ndihi cue espíritú xínú cuèchi núú-gã, te dàvá-á<sup>n</sup> cuãha-í nchaa ñáyiú sá ndúú tàhù-yu nàcuáa ndùu sá ñí quidé-yu ì<sup>n</sup> ì<sup>n</sup>-yu.

28 Te na càchí tnúhu ndáá-í xii-ndo sã ío dava nchòhó ñáyiú ndècu iha vitna vá cùú-ni-ndo, chi cundecu-ni-ndo ndèé quiní-ndó quìxi tucu yúhú

Tée cùu ñaní tnàhá-ndó nchàa-ndo taxi tnuuní-í nchaa ñáyiú —càchí-gá xăha<sup>n</sup>-gă xii-güedé.

## 17

*Ní nadáma dóo Jèsús ndihí núú-gă  
(Mr. 9:2-13; Lc. 9:28-36)*

<sup>1</sup> Te núú ìñú nduu sá dúcá<sup>n</sup> nǐ cáhá<sup>n</sup> Jèsús, te ní xica-gá cuásaá-gá ì<sup>n</sup> yucu dùcú<sup>n</sup>, te ndèca-gá té Pèlú, ndihí té Jàcobó, ndihí té Juàá ñaní té Jàcobó-á<sup>n</sup> cuásaá. Te úní tnàhí-ni cue téé-á<sup>n</sup> ndécá-gă cuásaá.

<sup>2</sup> Te yucu-á<sup>n</sup> ndécú-gă ní nadáma núú-gă ndihí dóo-gă, te núú-gă súuní dàtása<sup>n</sup>-xi dàtná quidé-xí nǔú nchìcanchii, te dóo-gă súuní nǐ nduu cuìxí<sup>n</sup> dàtná cáá ñùhú cuìxí<sup>n</sup>.

<sup>3</sup> Te òré-ni-á<sup>n</sup> nǐ xiní-güedé ndí Moisés ndihí té Èliás nútnǐ-güedé ndihí-gá ndátnǔhu ndihí ñaha-güedě xii-gă.

<sup>4</sup> Te té Pèlú ní xáha<sup>n</sup>-dě xii Jèsús:

—Mèstrú, ¡váha ní cuu sá ndécú-ó ìha vitna! Te núú cuení-n, te na dàcaa-ndí úní tnàhá vehe tnuvixi<sup>n</sup>, te ì<sup>n</sup> cuu cuèndá-n, te ì<sup>n</sup> cuu cuèndá té Moisés, te ì<sup>n</sup> cuu cuèndá té Èliás —càchí-dé xăha<sup>n</sup>-dě xii-gă.

<sup>5</sup> Te nini dùca<sup>n</sup> cahá<sup>n</sup> té Pèlú ní quexìo ì<sup>n</sup> vícò nǔú ndécú-güedě ní dádăhu ñaha-xi xii-güedé te súuní chàhnhí. Te xití vícò-á<sup>n</sup> nǐ tecú ní cáhá<sup>n</sup> Yă Ndiöxí, te xăha<sup>n</sup>-gă xii-güedé:

—Tée-a cùu-dé Déhe-í téé ío cùu iní-í, te ío cùdíí iní-í-dé, te cundedóho-ndo nchàa tnúhu càhá<sup>n</sup>-dé —duha ní xáha<sup>n</sup>-gă xii-güedé.

<sup>6</sup> Te sá dúcá<sup>n</sup> nǐ cáhá<sup>n</sup> Yă Ndiöxí ní tecú dóho cue téé xica cuu ndihí Jesús te ío ní yùhú-güedé, te ní

ngüíñí xítí-güedě te ní nuu núú-güedě ndàa núú ñùhú.

<sup>7</sup> Te Jèsús cuáhá<sup>n</sup>-gá núú xĩndecu cue tée xìca cuu ndihí-gá, te ní tendaha ñàha-gá, te xàha<sup>n</sup>-gã xii-güedé:

—Chí ndácuíñí, vá yùhú-ndó —càchí-gá xàha<sup>n</sup>-gã xii-güedé.

<sup>8</sup> Te òré ní ndanehe núú-güedě, te ñá túú-gã ní xìní-güedé cue tée úú-á<sup>n</sup> chi mee-ñã Jèsús.

<sup>9</sup> Te òré cuánuu ndihí ñaha Jèsús xii-güedé tĩndúú-ã<sup>n</sup>, te ní xàha<sup>n</sup>-gã xii-güedé:

—Vá yõo cúñaha-ndo ñi ì<sup>n</sup> sá ñĩ xìní-ndó nũú ñi sáá-ó-á, te cuu cáhá<sup>n</sup>-ndó dico ndéé ná yàha ndoto yùhú Tée cùu ñaní tnáhá-ndó nchàa-ndo sá cùú-í —càchí-gá xàha<sup>n</sup>-gã xii-güedé.

<sup>10</sup> Te cue tée xìca cuu ndihí-gá ní xàha<sup>n</sup>-güedě xii-gá:

—Cuíní-ndí cachí tnúhu-n ñã cuendá cue tée dàcuaha ñaha xii ñáyiu nchaa tnúhu ní chídó tnùní ndíi Moisés càchí-güedé sá dĩhna-gá té Èliás quixi, te dātnùní quixi Yaá tendaha Yã Ndiõxí quixi ñuyíú-a —càchí-güedé xàha<sup>n</sup>-güedě xii-gá.

<sup>11</sup> Te Jèsús ní xàha<sup>n</sup>-gã xii-güedé:

—Ndáá sá códó ñu ì<sup>n</sup> tée quixi-dé te cada-dé dātná ní guide té Èliás te tée-á<sup>n</sup> cada ndáá-dé nchaa nàcuáa cùu.

<sup>12</sup> Te na càchí tnúhu-í xii-ndo vītna sá sà ní quixi tée ní guide dātná ní xóo cada té Èliás, te cue ñáyiu ñã túú ní cùtnuní iní-yu sá díú-dě, te ní guide ñáhá-yu xii-dé nchaa nàcuáa ní quixi iní mée-yu, te ñu-ni duca<sup>n</sup> càda ñaha tucú-yu xii yùhú Tée cùu

ñaní tnáhă-yu nchaá-yu, chi dandòho ñahá-yu xii-í —càchí-gá xăha<sup>n</sup>-gă xii-güedé.

13 Te cue tée xica cuu ndihi-gá ní cutnùní iní-güedé sá cuendá ndí Juáá tée ní xóo dacuàndute ñaha xii ñáyiú ní cáhá<sup>n</sup>-gá.

*Jèsús quidé tătna-gá #<sup>n</sup> tée cuechi tnàhá cuéhé xÿihí*

*(Mr. 9:14-29; Lc. 9:37-43)*

14 Te Jèsús ní nasáá-gá ndihi cue tée ní sáá ndihi-gá tindúú-ă<sup>n</sup> núú xĩndecu vâi ñáyiú, te ní quexìo #<sup>n</sup> tée núú-gă ní ngüíñí xítí-dě, te xăha<sup>n</sup>-dě xii-gá:

15 —Mèstrú, cundàhú iní déhe-í chi tnàhá-dé cuéhé xÿihí, te ío dândoho ñaha-xi xii-dé, te ní cuu vâi xito daquée ñaha-xi nŭú ñùhú xii-dé, te ní cuu vâi tucu xito dangauñnu ñaha-xi ndute xii-dé.

16 Te sa ndèca-í-dé ní quixi núú cuè tée xica cuu ndihi-n dico ñá túú ní ndàcu-güedé cada tătna ñaha-güedě xii-dé —càchí-dé xăha<sup>n</sup>-dě xii-gá.

17 Te Jèsús ní xáha<sup>n</sup>-gă xii nchaa ñáyiú xĩndecu-á<sup>n</sup>:  
—Nchaa nchòhó ñáyiú ndècu ñuyíú-a, ío sàá iní-ndó chi ñá túú cuíní-ndó quĩndáá iní-ndó Yă Ndiöxí, te ní cuu vâi nduu quide ndee iní-í nchaa sá quidé-ndó. ¿Te ná ndéé ama vá dúcá<sup>n</sup>-gă cada-ndo-i? Te chí cándèca tée cùhú-á<sup>n</sup> táquixi iha —cachí-gá xăha<sup>n</sup>-gă xií-yu.

18 Te Jèsús ní tenàá-gá espíritú cündihí yucu ñávăha yihí ñaha xii tée-á<sup>n</sup>, te ní quee ñaha-xi xii-dé, te òré-ni-á<sup>n</sup> nĩ ndúha-dé.

19 Te sátá dúcá<sup>n</sup> te òré ndécú mèe Jesús ndihi cue téé xìca cuu ndihi-gá, te ní xícá<sup>n</sup> tnúhú-güedě núú-gă, te xăha<sup>n</sup>-güedě xii-gá:

—Cachí tnúhu xii-ndí ná cuendá ñá túú ní ndàcu-ndí queñuhu-ndí espíritú cúndihi yucu ñávăha yîhi ñaha xii téé-ă<sup>n</sup> —càchí-güedě xăha<sup>n</sup>-güedě xii-gá.

20 Te Jèsús ní xăha<sup>n</sup>-gă xii-güedě:

—Te ñá túú ní ndàcu-ndo, chi ñá túú sàndáá ndisa iní-ndó Yă Ndiöxí. Te na càchí tnúhu ndáá-í xii-ndo să nŭu nchòhó quíndáá ndisa iní-ndó Yă Ndiöxí cuèdicó luha líí dàtná lîhli ndíquî<sup>n</sup> yutnu nàni mostázá, te duca<sup>n</sup> te cuu cúñaha-ndo xii ì<sup>n</sup> tîndúú xocuiñî-xi núú ndécú-xí te xocuiñî-xi. Te nchaa núú să văha ndacu-ndo càda-ndo te nŭu na quíndáá iní ndisa-ndo Yă Ndiöxí.

21 Te xîni ñuhu-xi sá ïo cáhá<sup>n</sup> ndihi-ndo-gă te ñá túú tnáhí ná caxi-ndo căhá<sup>n</sup> ndihi-ndo-gă, te duca<sup>n</sup> te ndacu-ndo queñuhu-ndo espíritú cúndihi yucu ñávăha yîhi ñaha xii ñáyi, dàtná cúú espíritú sá yîhí ñàha xii téé-ă<sup>n</sup> ní cùu —cachí-gá xăha<sup>n</sup>-gă xii-güedě.

*Jèsús cáhá<sup>n</sup> tucu-gá sá cáhni ñàha-güedě xii-gá*

*(Mr. 9:30-32; Lc. 9:43-45)*

22 Te nini xìca cuu Jesús ndihi cue téé xìca cuu ndihi-gá distrítú Galileá, te ní xăha<sup>n</sup>-gă xii-güedě:

—Yúhú Téé cùu ñaní tnáhá-ndó nchàa-ndo sáá ì<sup>n</sup> nduu te cuáha cuendá ñáhá-güedě xii-í núú cuè téé cùu úhú iní ñáhá,

23 te cahni ñaha-güedě xii-í dico nduu úní sá cùú-í te ndoto-í —càchí-gá xăha<sup>n</sup>-gă xii-güedě.

Te sá dúcá<sup>n</sup> ñí xăha<sup>n</sup>-gă xii-güedě, te ïo ní ndíhú iní-güedě.

*Díhú<sup>n</sup> cuèndá veñúhu*

24 Te òré ní quexìo Jesús ndihì cue tée xìca cuu ndihì-gá ñuú Capèrnaúm, te cue tée quìde cobrá díhú<sup>n</sup> cuèndá veñúhu ní sáhá<sup>n</sup>-güedé ní cáhá<sup>n</sup> ndihì-güedé té Pèlú, te xǎha<sup>n</sup>-güedé:

—¿Chǎhu mèstrú-ndó úú díhú<sup>n</sup> sǎ nání drǎcmá cuèndá veñúhu ǎ<sup>n</sup> ñǎhá? —càchí-güedé xǎha<sup>n</sup>-güedé xii-dé.

25 Te té Pèlú ní xáha<sup>n</sup>-dě:

—Chǎhu-dé —càchí-dé xǎha<sup>n</sup>-dě xii-güedé.

Te té Pèlú cuánguǐhu-dé xití vehe núú ndécú Jèsús, te díhna-gá ní cáhá<sup>n</sup>-gá, te xǎha<sup>n</sup>-gǎ xii-dé:

—Xímú, ¿nása sàni iní-n, ná cúú ñǎyiu quìde cobrá ñǎhá cuè tée yìndaha ñáyiu ndècu ñuyíú-a cuèndá nchaa sá ndúú yǎhu ñuú-güedé ndihì cuèndá nchaa díhú<sup>n</sup> sǎ ngàútnàha, cue ñáyiu ñuú-güedé ǎ<sup>n</sup> cuè ñáyiu véxi xica quìde cobrá-güedé? —càchí-gá xǎha<sup>n</sup>-gǎ xii-dé.

26 Te té Pèlú ní xáha<sup>n</sup>-dě xii-gá:

—Cue ñáyiu véxi xica quìde cobrá-güedé —càchí-dé xǎha<sup>n</sup>-dě xii-gá.

Te Jèsús ní xáha<sup>n</sup>-gǎ xii-dé:

—Te núu duca<sup>n</sup> te cue ñáyiu ñuú-güedé ñá túú nǎ chǎhu-yu te núu duca<sup>n</sup>.

27 Dico cuèndá sá vǎ yõ dasàtú-ó ìní-xi, te cuàhá<sup>n</sup> làgúná te dàquée-n sǎ tníí-n chǎcá xití ndute, te chácá díhnanuu na tàva-n te cundehe-n yùhu-di, chi yìhì ì<sup>n</sup> díhú<sup>n</sup> cuìxí<sup>n</sup>. Te díhú<sup>n</sup>-ǎ<sup>n</sup> canehe-n quíhí<sup>n</sup> chǎhu-n cuèndá-í ndihì cuèndá-n, chi díhú<sup>n</sup>-ǎ<sup>n</sup> sa tnahá quéyǎhu cuèndá-ó ndì ndúú-ó —càchí-gá xǎha<sup>n</sup>-gǎ xii-dé.

# 18

*Cue téé ndùcu tnúhu núú Jèsús yoo ío-gá cúnùu  
(Mr. 9:33-37; Lc. 9:46-48)*

<sup>1</sup> Te sátá dúcá<sup>n</sup> te cue téé xica cuu ndihi Jesús ní sáhá<sup>n</sup>-güedé núú-gǎ, te xǎha<sup>n</sup>-güedě xii-gá:

—Cachí tnúhu xii-ndí, yoo ío-gá cúnùu núú cuè ñáyiú yìndaha ñaha Yá Ndiöxí —càchí-güedé xǎha<sup>n</sup>-güedě xii-gá.

<sup>2</sup> Te Jèsús ní cana-gá ì<sup>n</sup> té lǐhli te ní sanutnǐ ñaha-gá xii-dé cuádava tnuú-güedé.

<sup>3</sup> Te xǎha<sup>n</sup>-gǎ xii-güedé:

—Na càchí tnúhu ndáá-í xii-ndo sǎ nǔú vá dáñá-ndó nchàa sá ñà túú vǎha quìde-ndo, te nduu ndàhú iní-ndó dàtná ndàhú iní té lǐhli-a, te vá ndúú tǎhú-ndó ndǐhu ndaha ñàha Yá Ndiöxí xii-ndo.

<sup>4</sup> Te ñáyiú quìde datná quidé tè lǐhli-a ndàhú iní-yu, te ñá túú quìde cahnú-yu mèe-yu, ñáyiú-á<sup>n</sup> ïo cunúú-yu núú ndécú Yá Ndiöxí táxí tnùní-gá.

<sup>5</sup> Te nchaa ñáyiú na quèhe<sup>n</sup> cuendá ì<sup>n</sup> landú dàtná té lǐhli-a cuendá sá cúú iní ñáhǎ-yu xii-í ñá, te cada iní-yu sá yǔhú ní quehe<sup>n</sup> cuendá-yu —càchí-gá xǎha<sup>n</sup>-gǎ xii-güedé.

*Quihi iní-ó vǎ cùndècu-o ichi cuehé ichi duha  
(Mr. 9:42-48; Lc. 17:1-2)*

<sup>6</sup> Te Jèsús xǎha<sup>n</sup> tùcu-gá xii-güedé:

—Te núú ì<sup>n</sup> téé na dàcahá<sup>n</sup>-dé cue ñáyiú sàndáá iní ñáhá xii-í cadá-yu nándi sá cuèhé sá dúhá, te váha-gá sá ná dàcutu ndeé-güedé ì<sup>n</sup> yúú yǒdó dǔcú<sup>n</sup>-dě, te dàquée ñaha-güedě xii-dé xití ndute làmár, te ñá díú sǎ cùndècu-dé duca<sup>n</sup> càda-dé.



<sup>7</sup> ;Te ndàhú ní cuu nchaa ñáyiú xĩndecu ñuyíú-a, chí coo cue téé dacàhá<sup>n</sup> ñáhá xíi-yu cadá-yu nándi sá cuèhé sá dúhá te dacuíí sã dúcá<sup>n</sup> càda-xi! ;Dico ndàhú ní cuu cue téé duca<sup>n</sup> na dàcahá<sup>n</sup> ñáhá xíi-yu cadá-yu nándi sá cuèhé sá dúhá!

<sup>8</sup> "Te núu ì<sup>n</sup> xio ndaḥa-ndo àdi ì<sup>n</sup> xio sáhá-ndó quide-xi quide-ndo nándi sá cuèhé sá dúhá, te quehdé-ndó ná cuíta, chí váha-gá sá nánihí tàhú-ndó cuèi na cuíta ì<sup>n</sup> xio ndaḥa-ndo àdi ì<sup>n</sup> xio sáhá-ndó, te ñá díú sã quíhí<sup>n</sup>-ndó ñìhí ní ndúú-ndó núú ñùhú núú càyú.

<sup>9</sup> Te núu ì<sup>n</sup> xio tinùu-ndo quide-xi quide-ndo nándi sá cuèhé sá dúhá, te tava-ndo na cuíta-xi, chí váha-gá sá nánihí tàhú-ndó cuèi na cuíta ì<sup>n</sup> xio tinùu-ndo, te ñá díú sã ndì ndúú xio núú-ndó quíhí<sup>n</sup>-ndó núú ñùhú núú càyú.

*Cuèndá ì<sup>n</sup> mběé quiti ní xíta  
(Lc. 15:3-7)*

<sup>10</sup> "Te vá dáquèè tihú-ndó cuè ñáyiú cùu cuendá-í cuèi cùú-yu ñáyiú ío ndàhú iní-xi. Te na càchí tnúhu-í xii-ndo sã cuè espíritú xínú cuèchi núú Yã Ndiõxí, cue espíritú néhé cuèndá ñáhá xíi-yu ñuyíú-a, nchaa-ni nduu nchaa-ni òré ndécú-xí núú Tàtà-í Dútú Ndiõxí Yaá ndécú àndiu.

<sup>11</sup> Te duca<sup>n</sup> chí yúhú Téé cùu ñaní tnáhá-ndó nchàa-ndo véxi-í ñuyíú-a dàcácu nihnu-í ñáyiú núú ùhú núú ndàhú, ñáyiú ta xíta nihnu cuáhá<sup>n</sup>.

<sup>12</sup> '¿Te nása sàni iní-ndó cuèndá ì<sup>n</sup> téé ndècu ì<sup>n</sup> ciendú mběé-xi?, chí núu na cuíta ì<sup>n</sup>-di te dàndóo-dé cùmídíco sáhú<sup>n</sup> cùmí-di cundecu-di ì<sup>n</sup> yucu te quíhí<sup>n</sup>-dé cúnúndúcú-dě quiti ní xíta-á<sup>n</sup>.

13 Te núu na nàníhí-dě-di, te nchòhó sa cùtnuní iní-ndó sǎ ïo-gá cudíí ìní-dé cuendá quiti ní xíta-án òré naníhí-dě-di dàcúúxí cùmídícó sǎhú<sup>n</sup> cúmí quiti ñá túú ní xíta-án<sup>n</sup>.

14 Te duca<sup>n</sup> sǎtnahá-xi quide Tátá-ó Dǔtú Ndiǒxí Yaá ndécú àndi, chi cuìní-gá sá vǎ cuíta ni ì<sup>n</sup> cue ñáyiú cùu cuendá-gá.

*Cada càhnu iní-ó sǎ quidé ñàha tnaha ñáyiú-o  
(Lc. 17:3)*

15 Te núu ì<sup>n</sup> ñáyiú ndècu ndìhi-ndo ní quidé-yu ì<sup>n</sup> sá ñà túú tàú-yu cadá-yu sá cúú-xí-ndó, te cáhá<sup>n</sup>-ndó dǒho-yu núú méé núú ì<sup>n</sup>-ndó ndìhí-yu cuendá sá ná ndìxi cuéchi iní-yu sá ñà túú quide váha-yu. Te núu ní tñí-yu tnúhu ní xáha<sup>n</sup>-ndo xí-yu, te ní ndacu-ndo ñí nacanú ichi-ndǒ-yu.

16 Te núu ñá túú ní cuìní-yu tñí-yu tnúhu xǎha<sup>n</sup>-ndo xí-yu, te nducu-ndo ì<sup>n</sup> àdi úú tnàhá cue téé canehe núú-güedě cuendá cundedóho-güedé nàcuáa ndùu tnúhu ndàtnúhu-ndo ndìhí-yu.

17 Te tnàhá cue téé-án cǎhá<sup>n</sup>-güedé dǒho-yu, dico núu ñí tnúhu càhá<sup>n</sup> cue téé-án ñà túú ní cuìní-yu tñí-yu, te dàtúu-ndo núú dàva-gá ñáyiú ndècu ndìhi-ndo ichi Xítóhó Jesucristú cuendá cutnùní iní-yu nàcuáa quide ñáyiú-án. Te núu ñáyiú ndècuéchi-án ñà túú ní cuìní-yu tñí-yu tnúhu sá ñí xáha<sup>n</sup> dàva-gá cue ñáyiú ndècu ichi-gá, te cada-ná iní-ndó sǎ cúú-yu ñáyiú ñá túú ndècu ichi Yá Ndiǒxí dàtná cue téé cuihna ìní-xi quide cobrá ñáhá xì ñáyiú cuendá impuèstú.

18 Te na càchí tnúhu ndáá-í xii-ndo sǎ núu nchòhó ná càchí-ndó sǎ ndécú cuéchi ñáyiú, te

d̥i-u-ni duca<sup>n</sup> cǎhá<sup>n</sup> Yǎ Ndiǒxí, àdi cachí-ndó sǎ ñà túú cuěchi-yu te d̥i-u-ni duca<sup>n</sup> cǎhá<sup>n</sup> tucu-gá, te duca<sup>n</sup> chi nchòhó quidé-ndó nàcuáa cǎhá<sup>n</sup>-gá.

19 'Te na cǎchí tnúhu-í xii-ndo sǎ n̄uú úú tnàhá-ndó cùu ì<sup>n</sup>nuu-ndo cahá<sup>n</sup> ndihí-ndo Tǎtà-í Dútú Ndiǒxí Yaá ndécú ànd̥i-u xicá<sup>n</sup>-ndó n̄úú-gǎ n̄uú ná cúú sǎ cuíní-ndó, te taxi-gá n̄uú ná cúú sǎ xicá<sup>n</sup>-ndó n̄úú-gǎ.

20 Te n̄uú úú tnàhá-ndó àdi úní tnàhá-ndó n̄í natacá-ndó ì<sup>n</sup> xichi cuendá sá ñúhú ínì ñáhá-ndó xì-í, te xiá<sup>n</sup> ndécú ndihí ñaha-í xii-ndo —cǎchí-gá xǎha<sup>n</sup>-gǎ xii-güedé.

21 Te té Pèlú ní sáhá<sup>n</sup> ndehe yatni-dé núú Jèsús, te xǎha<sup>n</sup>-dě xii-gá:

—Mèstrú, cachí tnúhu xii-í ná daha xito cada cǎhnu ínì-í tnàha ñáyiu-í te n̄uú ì<sup>n</sup> sá ná cǎda ñahá-yu xii-í. ¿Cuèdìcò úsá xito-ǎ<sup>n</sup>? —cǎchí-dé xǎha<sup>n</sup>-dě xii-gá.

22 Te Jèsús ní xǎha<sup>n</sup>-gǎ xii-dé:

—Yúhú cǎchí-í sá ñà díú-ní úsá xito cada cǎhnu ínì-n-yu, chí únídico úxí xito ndihí úsá ndihí úsá xito cada cǎhnu ínì-n-yu —cǎchí-gá xǎha<sup>n</sup>-gǎ xii-dé.

*Cuendá téé ñà túú quide cǎhnu ínì tnàha ñáyiu-xi*

23 Te xǎha<sup>n</sup> tucu-gá xii-güedé:

—Na cǎni-í ì<sup>n</sup> cuendú núú-ndó nàcuáa tecú tnùnì-ndó nàcuáa cada-xi òré ndíhu ndaha ñaha Yá Ndiǒxí xii ñáyiu. ì<sup>n</sup> téé yindaha ñaha xii ñáyiu ní sani ínì-dé sá cǎdá ndǎá-dé ndihí cue téé x̄inu cuechi núú-dě cuendá nchaa sá tàú-güedé núú-dě.

24 Te òré sa ní ngúndecu túha-dé te ní quexìo ì<sup>n</sup> téé x̄inu cuechi núú-dě. Te téé-á<sup>n</sup> tàú-dé cuéhé víhí díhú<sup>n</sup> n̄úú-dě, chí tàú-dé úxí m̄l díhú<sup>n</sup> sǎ nání tàlentú.

25 Te téé xìnu cuechi-á<sup>n</sup> ñà túú díhú<sup>n</sup> ndécú ndìhi-dé nacháhu-dé sá tàú-dé núú pàtróó<sup>n</sup>-dě-á<sup>n</sup>, núú xǎ<sup>n</sup> ní táúchíú<sup>n</sup> tée cùu patróó<sup>n</sup>-dě-á<sup>n</sup> dico ñàha-güedé xii-dé ndìhi ñadìhí-dé ndìhi cue déhe-dé ndìhi nchaa sá ndécú ndìhi-dé cuendá nchaá-yu cuú-yu ñáyiu ñá túú tnàhí dàñá quee núú chíú<sup>n</sup> pàtróó<sup>n</sup>-xi, te duca<sup>n</sup> te ndéyǎhu sá tàú-dé núú pàtróó<sup>n</sup>-dě.

26 Te téé xìnu cuechi-á<sup>n</sup> ñí ngüíñí xítí-dě núú pàtróó<sup>n</sup>-dě, te xǎha<sup>n</sup>-dě: “Pàtróó<sup>n</sup>, càhá<sup>n</sup> ndàhú-í núú-n sǎ ìo ndee ìo càhnu cada iní-n sǎ dúhá tàú-í núú-n, te ñá túú nǎ caní iní-n chí nacháhu-í nchaa sá tàú-í núú-n”, càchí-dé xǎha<sup>n</sup>-dě xii pàtróó<sup>n</sup>-dě.

27 Te téé cùu patróó<sup>n</sup>-dě-á<sup>n</sup> ñí cundàhú iní ñáhá-dě xii-dé, te ní quide càhnu iní ñáhá-dě, te ní dàñá ñàha-dé cuánuhú-dé.

28 Te téé xìnu cuechi-á<sup>n</sup> ñí naníhí-dě ì<sup>n</sup> téé xìnu cuechi ndìhi-dé ichi cuánuhú-dé, te téé ní naníhí-dě-á<sup>n</sup> tàú-dé sacú-ni díhú<sup>n</sup> núú-dě chí ì<sup>n</sup> ciendú-ni díhú<sup>n</sup> denàriú tàú-dé. Te ní tñi-dé téé tàú núú-dě-á<sup>n</sup> dácuèhné ñáhá-dě xii-dé, te xǎha<sup>n</sup>-dě: “Nacháhu sá tàú-n núú-í”, càchí-dé xǎha<sup>n</sup>-dě.

29 Te téé tàú-á<sup>n</sup> ñí ngüíñí xítí-dě núú tée dii núú-xi tàú-dé-á<sup>n</sup>, te xǎha<sup>n</sup>-dě: “Càhá<sup>n</sup> ndàhú-í núú-n sǎ cadá càhnu iní ñáhá-n xii-í sá tàú-í núú-n, te nacháhu cuèé-í nchaa sá tàú-í núú-n”, càchí-dé xǎha<sup>n</sup>-dě.

30 Dico téé dii núú-xi tàú-dé-á<sup>n</sup> ñà túú ní cuíní-dé cada ndee ìni-dé cundetú-dé nacháhu cuèé téé-á<sup>n</sup> sǎ tàú-dé, chí ní chíhi ñaha-dě vecaá cuendá yacá<sup>n</sup> quìhi-dé ndéé nacháhu-dé nchaa sá tàú-dé.

31 Te dava-gá cue téé xìnu cuechi ní xiní-güedé nàcuáa ní quide téé-á<sup>n</sup>, te ní cudéé<sup>n</sup>-güedě núú-dě, te ní sáhá<sup>n</sup>-güedé ní xítñùhu-güedé téé cùu pa-

tróon<sup>n</sup>-güedě sá dúcá<sup>n</sup> nĩ quide-dé.

<sup>32</sup> Te téé cùu patróon<sup>n</sup>-güedě-á<sup>n</sup> nĩ cana-dé téé duca<sup>n</sup> nĩ quide-á<sup>n</sup>, te ní xáha<sup>n</sup>-dě: “Yòhó cúú-n ìn<sup>n</sup> téé ío cuihna ìní-xi xìnu cuechi núú-í, chi yúhú ní quide càhnu iní ñáhà-í xii-n cuendá nchaa sá tàú-n nũù-í òré ní cáhá<sup>n</sup> ndàhú-n.

<sup>33</sup> Te tnahá yòhó tàú-n duca<sup>n</sup> cada-n cada cahnu iní-n tée xìnu cuechi ndìhi-n núú-í cuendá nchaa sá tàú-dé núú-n dàtná ní quide ñaha-í xii-n nĩ quide càhnu iní-í cuendá nchaa sá tàú-n”, cächí téé cùu patróon<sup>n</sup>-á<sup>n</sup> xáha<sup>n</sup>-dě xii téé duca<sup>n</sup> nĩ quide-á<sup>n</sup>.

<sup>34</sup> Te téé cùu patróon<sup>n</sup>-á<sup>n</sup> nĩ cudéé<sup>n</sup> víhí-dě sá dúcá<sup>n</sup> nĩ quide téé-á<sup>n</sup>, te ní táuchíú<sup>n</sup>-dě dandòho ñaha-güedé xii-dé ndéé nacháhu-dé nchaa sá tàú-dé —duha ní cani Jèsús cuendú núú-güedě.

<sup>35</sup> Te xáha<sup>n</sup> tùcu-gá xii-güedé:

—Dàtná ní quide téé cùu patróon<sup>n</sup>-á<sup>n</sup> nĩ dándóhó-dě téé tàú núú-dě-á<sup>n</sup> duca<sup>n</sup> càda ñaha Tàtá-í Dútú Ndiöxí Yaá ndécú àndiü xii-ndo, te núu vá ní yùhu nĩ iní-ndó càda cahnu iní-ndó sã quidé ñaha tnahá ñáyü-ndo xii-ndo —cachí-gá xáha<sup>n</sup>-gã xii-güedé.

## 19

*Jèsús càhá<sup>n</sup>-gá cuendá cue ñáyü dàña tnahá  
(Mr. 10:1-12; Lc. 16:18)*

<sup>1</sup> Te sáta nĩ yáha duca<sup>n</sup> nĩ cáhá<sup>n</sup> Jèsús, te ní ndee-gá distritú Galileá cuáhá<sup>n</sup>-gá ndàa ingá xio yúte Jòrdán yucu distritú Jùdeá.

<sup>2</sup> Te ío cuéhé ñáyü nchìcú<sup>n</sup> ñáhá xii-gá cuáhá<sup>n</sup>, te yácá<sup>n</sup> ní quide tátna-gá nchaa ñáyü cùhú.

<sup>3</sup> Te ní quexìo ìí<sup>n</sup> úú cue téé cùu fariséú núú ndécú Jèsús xító ndèé ñháá-güedě xii-gá nñu nása cunduu tnúhu cáhá<sup>n</sup>-gá, te xáha<sup>n</sup>-güedě xii-gá:

—Véxi-ndí xicá<sup>n</sup> tnúhú-ndí núú-n, ¿cuu dañá ìí<sup>n</sup> téé ñadihí-dé nñu ndèdani càa ìí<sup>n</sup> sá ñà túú cùndáá-yu-á<sup>n</sup>? —càchí-güedé xáha<sup>n</sup>-güedě xii-gá.

<sup>4</sup> Te Jèsús ní xáha<sup>n</sup>-gá xii-güedé:

—Te nchòhó, ¿náa ñá túú dàcuaha-ndo núú tùtú Yá Ndiòxí, te ñiu núú tùtú-gá càhá<sup>n</sup>-xi sá cùtnàhá ní cadúha-gá ñáyiu, te téé ñadihí ní cadúha-gá-á<sup>n</sup>?

<sup>5</sup> Te duha càchí tucu-xi núú tùtú Yá Ndiòxí nàcuáa ní cáhá<sup>n</sup>-gá: “Cue téé na ñihí ñadihí-xi te ñí<sup>n</sup>-ná cada-güedé tātá-güedě ndihí náná-güedě, chi ñadihí-ná-güedé cuu cuu ndihí-güedé, te cada iní-ndó sá ñí<sup>n</sup>-ná yiqui cùñú cuú-yu cundecú-yu”, duha càchí Yá Ndiòxí núú tùtú-gá.

<sup>6</sup> Te xíá<sup>n</sup> nñu cada iní-ndó sá cuè ñáyiu úú-á<sup>n</sup> ìí<sup>n</sup>-ná yiqui cùñú cúú-yu, te ñá túú-gá ndí ñí<sup>n</sup> ndí ñí<sup>n</sup> yiqui cùñú cúú-yu. Núu xíá<sup>n</sup> ñá túú ndùu váha-xi dañá cuè téé ñadihí-güedé, chi mee Yá Ndiòxí ní cachí-gá sá cúú úú-yu cundecú-yu —càchí Jèsús xáha<sup>n</sup>-gá xii-güedé.

<sup>7</sup> Te ní xáha<sup>n</sup>-güedě xii Jèsús:

—Te núu duca<sup>n</sup>, ¿te ná cuendá ndí Moisés ní cachí ndí sá nñu ìí<sup>n</sup> téé cuíní-dé dañá-dě ñadihí-dé, te cuu cadúha-dé ìí<sup>n</sup> tutú núú càhá<sup>n</sup>-xi sá ñí dañá-dě ñadihí-dé, te duca<sup>n</sup> te cuu dañá ñàha-dé ní cachí ndí vǎ<sup>n</sup>? —càchí-güedé xáha<sup>n</sup>-güedě xii-gá.

<sup>8</sup> Te Jèsús ní xáha<sup>n</sup>-gá xii-güedé:

—Te duca<sup>n</sup> ñí cachí ndí Moisés sá cúú dàña-ndo ñadihí-ndó, chi nchòhó ío sàá iní-ndó, dico ndéé

díhna chi ní tecú tnúhu nchaa cue téé sá vǎ dáñá-güedé ñadìhí-güedé.

<sup>9</sup> Dico yúhú càchí tnúhu-í xii-ndo sǎ nǔu ì<sup>n</sup> téé na dàña-dé ñadìhí-dé te naquehe<sup>n</sup>-dé ingá ñadìhí te ío nèhé quidé-dě, te núu ñá díú cuendá sá càhá<sup>n</sup> ndihí-a<sup>n</sup> ingá téé duca<sup>n</sup> na dàña ñaha-dé. Te sá dúcá<sup>n</sup> cuendá-ni na dàña ì<sup>n</sup> téé ñadìhí-dé, te ì<sup>n</sup>-ni cuěchi cùu-xi ndihí cuéchi quide téé ndèca ñadìhí te càhá<sup>n</sup> ndihí-dé ingá ñadìhí –càchí-gá xǎha<sup>n</sup>-gǎ xii-güedé.

<sup>10</sup> Te cue téé xìca cuu ndihí-gá ní xáha<sup>n</sup>-güedě xii-gá:

–Te núu duca<sup>n</sup> cùu cuendá cue téé ndihí ñadìhí-güedé, te váha-gá sá vǎ cándèca cue téé ñadìhí –càchí-güedé xǎha<sup>n</sup>-güedě xii-gá.

<sup>11</sup> Te Jèsús ní xáha<sup>n</sup>-gǎ xii-güedé:

–Ñá ncháá ñǎyiu duca<sup>n</sup> ndùu táhǔ-yu cundecú-yu, chi mee-ni ñǎyiu ní cachí Yǎ Ndiǒxí sá dúcá<sup>n</sup> tnàhí nduu táhú cundecu mee.

<sup>12</sup> Te ío cue téé duca<sup>n</sup> tnàhí ní nduu táhú-güedě ndéé òré ní cacu-güedé sá vǎ cándèca-güedé ñadìhí. Te ío cue téé ñá ndácú-güedě candeca-güedé ñadìhí cuendá sá ñǎ quide ñaha dàva-gá cue tnàha téé-güedé xii-güedé. Te dava-güedé ñá túú cándeca-güedé ñadìhí chi cuìní-güedé sá vǎ dáñá ndèé-güedé cunu cuechi-güedé núú Yǎ Ndiǒxí. Te nchaa cue téé duca<sup>n</sup> ñǎ nduu táhú nǔú Yǎ Ndiǒxí cundecu mee, te váha-ni te núu na cundecu mee-güedé –càchí-gá xǎha<sup>n</sup>-gǎ xii-güedé.

*Jèsús xìcá<sup>n</sup> táhú-gǎ núú Yǎ Ndiǒxí cuendá landú  
(Mr. 10:13-16; Lc. 18:15-17)*

13 Te ñ<sup>n</sup> ũú ñáyi ndècá-yu landú lĩhli cuáhá<sup>n</sup> núú Jèsús, chi cuíní-yu sá téndàha ñaha-gá xii-güexi, te cacá<sup>n</sup> táhú-gă núú Yă Ndiöxí cuëndá-güexi. Te cue tée xica cuu ndihi-gá ní ngüíta-güedé ténàá ñáhá-güedě xií-yu, te xăha<sup>n</sup>-güedě sá vă dúcá<sup>n</sup> càdá-yu.

14 Te Jèsús ní xáha<sup>n</sup>-gă xii-güedé:

—Chí dáñá ná quixi nahi cue landú lĩhli-á<sup>n</sup> nũù-í-a, te vá càdí-ndó ìchi-güexi, chi dàtná cúú văha iní cue landú lĩhli-á<sup>n</sup> duca<sup>n</sup> cùu váha iní cue ñáyi yindaha ñaha Yă Ndiöxí —càchí-gá xăha<sup>n</sup>-gă xii-güedé.

15 Te ní tendaha ñàha-gá xii-güexi, te ní xícá<sup>n</sup> táhú-gă núú Yă Ndiöxí cuëndá-güexi, te sátá dúcá<sup>n</sup> nĩ quide-gá te ní xica-gá cuáhá<sup>n</sup>-gá.

*Ñ<sup>n</sup> tée cuica càhá<sup>n</sup> ndihi-dé Jèsús*

*(Mr. 10:17-31; Lc. 18:18-30)*

16 Te ñ<sup>n</sup> tée cuechi nĩ quexìo-dé núú ndécú Jèsús, te xicá<sup>n</sup> tnúhú-dě núú-gă, te xăha<sup>n</sup>-dě xii-gá:

—Yòhó Mèstrú, cùu-n tée ío váha iní-xi, te cuíní-í nũu vá cündèe iní-n càchí tnúhu-n nă cúú să văha cada-í cuëndá nduü táhù-í cundecu-í ndihi Yă Ndiöxí nĩ caa nĩ quíhí<sup>n</sup> —càchí-dé xăha<sup>n</sup>-dě xii-gá.

17 Te Jèsús ní xáha<sup>n</sup>-gă xii-dé:

—¿Te cùtnuní iní-n nàcuáa ndùu tnúhu càhá<sup>n</sup>-n să yũhú váha iní-ă<sup>n</sup>?, chi ñ<sup>n</sup>dìi díi-ni Yă Ndiöxí ío váha iní-gá. Te núu cuíní-n nàníhí táhú-n te tnĩ-n nchàa tnúhu càhá<sup>n</sup> Yă Ndiöxí, tnúhu sá sánú ìchi ñaha xii ñáyi nàcuáa cadá-yu cundecú-yu —càchí-gá xăha<sup>n</sup>-gă xii-dé.

18 Te tée cuechi-ă<sup>n</sup> ní xáha<sup>n</sup>-dě xii-gá:



—¿Te nděndida càa tnúhu càhá<sup>n</sup> Yă Ndiõxí cada-í-i? —càchí-dé xăha<sup>n</sup>-dě xii-gá.

Te Jèsús ní xáha<sup>n</sup>-gă xii-dé:

—Te duha ní cachí Yă Ndiõxí cada ñáyiu: “Vá cáhní-ndó tnàha ñáyiu-ndo, vá càhá<sup>n</sup> ndìhi-ndo ñàdihí te núu ñá díú ñàdihí-ndó cùú-yu, te duca<sup>n</sup>-ni nchòhó cue ñáyiu dîhí tucu vá càhá<sup>n</sup> ndìhi-ndo tée te núu ñá díú yî-ndo cuu-güedé, te vá dúhú-ndó să ndécú ndìhi tnaha ñáyiu-ndo, vá dácàcu-ndo cuéchi neñùú sá cúú-xí tnàha ñáyiu-ndo.

<sup>19</sup> Te canehe-ndo să yíñùhu núú tătá-ndó ndìhi núú năná-ndó, te cundàhú iní-ndó tnàha ñáyiu-ndo dàtná cundàhú iní-ndó mèe-ndo”, duha ní cachí Yă Ndiõxí cada ñáyiu —càchí-gá xăha<sup>n</sup>-gă xii-dé.

<sup>20</sup> Te tée cuechi-ă<sup>n</sup> ní xáha<sup>n</sup>-dě xii-gá:

—Nchaa xǎ<sup>n</sup> ní ngüíta-í quídè-í ndéé cútnàhá cúú làndú-í, ¿te vitna nágá cúmăní cada-í-i? —càchí-dé xăha<sup>n</sup>-dě xii-gá.

<sup>21</sup> Te Jèsús ní xáha<sup>n</sup>-gă xii-dé:

—Te núu cuìní-n cùu-n ì<sup>n</sup> tée ío váha cada ndáá, te cuàhá<sup>n</sup> dico-n nchàa sá ndécú ndìhi-n, te díhú<sup>n</sup>-n cuăha táhú-n cuè ñáyiu ndàhú, te duca<sup>n</sup> te nduu táhú-n ngündecu váha-n nùú ndécú Yă Ndiõxí táxí tnùní-gá. Te sátá ná yăha duca<sup>n</sup> càda-n te quixi-n chìtnahá ñáhá-n xii-í —càchí-gá xăha<sup>n</sup>-gă xii-dé.

<sup>22</sup> Te sá dúcá<sup>n</sup> nǐ xáha<sup>n</sup> Jèsús xii-dé te ío ní cundiyí-dé, chi ío cuica-dě, te ní xica-dé cuáhá<sup>n</sup>-dé.

<sup>23</sup> Te Jèsús ní xáha<sup>n</sup>-gă xii cue tée xica cuu ndìhi-gá:

—Na càchí tnúhu ndáá-í xii-ndo sã ïo úhú quíndáá iní ñaha cuè ñáyiú cuica xii Yá Ndiöxí cuèndá ndíhu ndaha ñàha-gá xií-yu.

<sup>24</sup> Te na càchí tnúhu tucu-í xii-ndo sã yächí-gá yáha ì<sup>n</sup> caméyu yaú ì<sup>n</sup> yiqui ticú dàcúúxí sã quíndáá iní ì<sup>n</sup> ñáyiú cuica Yá Ndiöxí cuèndá ndíhu ndaha ñàha-gá xií-yu —càchí-gá xãha<sup>n</sup>-gã xii-güedé.

<sup>25</sup> Te sá dúcá<sup>n</sup> ñí cáhá<sup>n</sup> Jèsús, xíã<sup>n</sup> ío ní cuñúhu cue téé xica cuu ndíhi-gá, te ní ngüíta-güedé xĩtnàha-güedé:

—¿Yoo naníhí tãhú te núu duca<sup>n</sup> vài<sup>n</sup>? —  
càchí-güedé xĩtnàha-güedé.

<sup>26</sup> Te Jèsús ní ndacoto-gá núu-güedé, te xãha<sup>n</sup>-gã xii-güedé:

—Nchaa ñáyiú ñuyíú-a chi vá ndácũ-yu ná cadá-yu nàcuáa ndíhu ndaha ñàha Yá Ndiöxí xií-yu, dico mee-gã chi ndacu-gá ndíhu ndaha ñàha-gá xií-yu chi nchaandi túhú sá vãha ndàcu-gá quídé-gã —càchí-gá xãha<sup>n</sup>-gã xii-güedé.

<sup>27</sup> Te té Pèlú ní xáha<sup>n</sup>-dẽ xii-gá:

—Nchúhú ní dándõo-ndí nchaa sá ndécú ndíhi-ndí, te ní tuha ñaha-ndí xii-n, ¿te ná cúú sã ñíhí-ndí nduu táhú-ndí sá dúcá<sup>n</sup> ñí quide-ndí-i? —càchí-dé xãha<sup>n</sup>-dẽ xii-gá.

<sup>28</sup> Te Jèsús ní xáha<sup>n</sup>-gã xii-güedé:

—Na càchí tnúhu ndáá-í xii-ndo sã ná sàà nduu, ndùu saa nchaa sá ío andíu ndíhi ñuyíú-a, te dàvá-á<sup>n</sup> cunucóo yúhú Téé cùu ñaní tnàhá-ndó nchàa-ndo ì<sup>n</sup> núú xilé vãha, te nchaa ñáyiú quini-yu sã ïo càhnu cuu-í, te nchòhó cue téé ní tuha ñaha xii-í tnàhá-ndó cùnucóo-ndo núú ì<sup>n</sup> caa xilé vãha ndí ùxúú tnàhá-ndó, te xíã<sup>n</sup> cunucóo-ndo

càda ndáá-ndó cuěchi ndi ùxúú xichi cue ñáyiú isràél.

<sup>29</sup> Te nchaa ñáyiú na dándóo vehe-xi, àdi ñaní-xi, àdi cúha-xi, àdi tátá-xi, àdi náná-xi, àdi ñadihí-xi, àdi déhe-xi, àdi ñuhu-xi, te núu duca<sup>n</sup> na càdá-yu sá cuendá-í te ío-gá cuéhé sã cuãñaha Yă Ndióxi cundecu ndihí-yu, te ñá díú-ní xĩã<sup>n</sup> chi tnàhá nduu táhũ-yu cundecú-yu ndihi-gá ni caa ni quihí<sup>n</sup>.

<sup>30</sup> Te dava ñáyiú cùnuu ndecu ichi Yá Ndióxi vitna, ñáyiú-á<sup>n</sup> sãá nduu te vá ío-gá cunúú-yu dàtná cùnúú-yu vitna, te dava ñáyiú nchìcú<sup>n</sup> ñá túú cùnuu vitna, ñáyiú-á<sup>n</sup> sãá nduu te ío cunúú-yu — càchí-gá xãha<sup>n</sup>-gã xii-güedé.

## 20

### *Cuendá cue tée quide chiu<sup>n</sup>*

<sup>1</sup> Te xãha<sup>n</sup> tucu Jesús xii cue tée xica cuu ndihi-gá:

—Na càni-í ì<sup>n</sup> cuendú núú-ndó cuendá tecú tnùn-ndó nàcuáa cada-xi òré ndíhu ndaha ñàha Yá Ndióxi xii ñáyiú. Ì<sup>n</sup> tée ní xitu-dé yoho yàha stilé, te ì<sup>n</sup> nduu ní quee-dé nehé-ni cuándúcú-dě cue tée cada chiu<sup>n</sup> núú dúcá<sup>n</sup> ñi xitu-dé yoho yàha stilé-á<sup>n</sup>.

<sup>2</sup> Te òré ní níhí-dě cue tée cada chiu<sup>n</sup>-á<sup>n</sup>, te ní quide ndáá-dé ndihi-güedé sá chãhu ñaha-dě xii-güedé ì<sup>n</sup> díhú<sup>n</sup> denàriú ì<sup>n</sup> nduu. Te sátá dúcá<sup>n</sup> te ní tendaha ñàha-dé xii-güedé cuáhá<sup>n</sup>-güedé cada chiu<sup>n</sup>-güedé núú dúcá<sup>n</sup> ñi xitu-dé yoho yàha stilé-á<sup>n</sup>.

<sup>3</sup> Te dàtnùn-í ní xica tucu-dé cuáhá<sup>n</sup>-dé dàtná òré caá ì<sup>n</sup> dátneé cuándúcú-gã-dé cue tée cada chiu<sup>n</sup> núú ñi xitu-dé yoho yàha stilé-á<sup>n</sup>, te ní xiní-dé

xĩnutnĩĩ ì<sup>n</sup> ũú cue tée núú yǎhu te ñá túú nǎ chiú<sup>n</sup> xíquide-güedé.

<sup>4</sup> Te ní xáha<sup>n</sup>-dě xii-güedé: “Ñá túú cùdana cuyáchí-ndó càda-ndo chiu<sup>n</sup>-í te cháhu ñaha-ĩ xii-ndo nàcuáa tàú-xi cunduu-ǎ<sup>n</sup>”, cächí-dé xǎha<sup>n</sup>-dě xii-güedé. Te cue tée-á<sup>n</sup> ñĩ sáha-güedé tnúhu cada chiú<sup>n</sup>-güedé te ní xica-güedé cuáhá<sup>n</sup>-güedé.

<sup>5</sup> Te tée ní xitu yoho yàha stilé-á<sup>n</sup> ñĩ xica tucu-dé dàtná òré caúxúú nduu cuándúcú-gǎ-dé cue tée cada chiú<sup>n</sup>-dé, te ní ñihí tucu-dé cue tée cada chiú<sup>n</sup>. Te ní quee tucu-dé dàtná òré caá úní sacuaa, te ðiu-ni ðuca<sup>n</sup> ñĩ quide tucu-dé.

<sup>6</sup> Te ní quee tucu-dé dàtná òré caá úhú<sup>n</sup> sacuaa cuándúcú-gǎ-dé cue tée cada chiú<sup>n</sup>-dé, te ní xiní-dé xĩnutnĩĩ ì<sup>n</sup> ũú cue tée ðiu-ni núú yǎhu-á<sup>n</sup> te ñá túú nǎ chiú<sup>n</sup> quide-güedé, te ní xáha<sup>n</sup>-dě xii-güedé: “Sànuu sá nchòhó ní cuu nchàca vitna ñá túú ñihí-ndó chiú<sup>n</sup> cada-ndo”, cachí-dé xǎha<sup>n</sup>-dě xii-güedé.

<sup>7</sup> Te cue tée-á<sup>n</sup> ñĩ xáha<sup>n</sup>-güedé xii-dé: “Ñá túú ñihí-ndí chiú<sup>n</sup> cada-ndí chi vá yõo ndùcu ñaha xii-ndí”, cächí-güedé xǎha<sup>n</sup>-güedé xii-dé. Te ní xáha<sup>n</sup>-dě xii-güedé: “Yúhú taxi-í chiú<sup>n</sup> cada-ndo, te quíhí<sup>n</sup>-ndó nũú ñĩ xitu-í yoho yàha stilé yàcá<sup>n</sup> cada chiú<sup>n</sup>-ndo, te cháhu ñaha-ĩ xii-ndo nàcuáa tàú-xi cunduu”, cächí-dé xǎha<sup>n</sup>-dě xii-güedé.

<sup>8</sup> Te sátá ñĩ dáhu nchícanhii, te tée dii chiú<sup>n</sup>-xi-á<sup>n</sup> ñĩ xáha<sup>n</sup>-dě xii tée tàxi tnuní ñáhá xii cue tée quide chiú<sup>n</sup>-á<sup>n</sup>: “Cúñaha xii nchaa cue tée quide chiú<sup>n</sup>-á<sup>n</sup> ná quíxí-güedé te cháhu-n-güedé, te díhna-gá cue tée nchícú<sup>n</sup> cuíi-nǎ cuánguĩhu núú chíú<sup>n</sup> ngüĩta-n

chăhu-n, te ndéé núú nǐ ndihî-ná cháhu-n cuè téé cuánguîhu díhna nuu-gǎ núú chíú<sup>n</sup>”, cǎchî-dé xǎha<sup>n</sup>-dě xii téé tàxi tnunî ñáhá xìi cue téé quìde chiu<sup>n</sup>-á<sup>n</sup>.

<sup>9</sup> Te díhna-gá cue téé cuánguîhu caá úhú<sup>n</sup> sacuaa ní quexìo-güedé cuèndá cháhu ñaha-dě, te ní cháhu ñaha-dě ì<sup>n</sup> caa díhú<sup>n</sup> denàriú xii ì<sup>n</sup> ì<sup>n</sup>-güedé.

<sup>10</sup> Te sátá nǐ cháhu-dé dava-gá cue téé ní quide chîu<sup>n</sup>. Te ndéé núú nǐ ndihî-ná ní cháhu-dé cue téé cuánguîhu díhna nuu-gǎ núú chíú<sup>n</sup>. Te cue téé-á<sup>n</sup> nǐ sani iní-güedé sá vái-gǎ cháhu ñaha-dě xii-güedé, dico ñáhá chi ì<sup>n</sup> caa-ni díhú<sup>n</sup> denàriú ní cháhu ñaha-dě xii ì<sup>n</sup> ì<sup>n</sup>-güedé.

<sup>11</sup> Te cue téé-á<sup>n</sup> nǐ quehe<sup>n</sup> cuèndá-güedé díhú<sup>n</sup>-güedě dico ñá túú ní quide váha-xi iní-güedé.

<sup>12</sup> Te ní xáha<sup>n</sup>-güedě xii téé dii chîu<sup>n</sup>-xi ní quide-güedé: “¿Ná cuèndá cue téé nchîcú<sup>n</sup> cuì-nǎ cuánguîhu núú chíú<sup>n</sup> ì<sup>n</sup>-ni nǐ cháhu ñaha-n xìi-ndí ndihî-güedé, te ì<sup>n</sup>dîi oré duha ní quide chîu<sup>n</sup>-güedé? Te nchúhú nchàca nchaa ní sahani iní-ndí ní quide chîu<sup>n</sup>-ndí, te ní ndoho-ndí cahni, te ì<sup>n</sup>-ni nǐ cháhu ñaha-n xìi-ndí ndihî-güedé”, cǎchî-güedé xǎha<sup>n</sup>-güedě xii téé dii chîu<sup>n</sup>-xi ní quide-güedé.

<sup>13</sup> Te téé dii chîu<sup>n</sup>-xi ní quide-güedé-á<sup>n</sup> nǐ xáha<sup>n</sup>-dě xii ì<sup>n</sup> téé-á<sup>n</sup>: “Yòhó, ñá túú quide-í ì<sup>n</sup> sá ñà túú tàú-í cada-í sá cúú-xí-n, chi ní quide ndáá-ó sǎ díú-ní ì<sup>n</sup> díhú<sup>n</sup> denàriú cháhu ñaha-ï xii-n ì<sup>n</sup> nduu.

<sup>14</sup> Te vitna quehe<sup>n</sup> díhú<sup>n</sup> cuèndá nduu-n te núhú-n, chi yúhú cuìní-í sá ì<sup>n</sup>-ní chǎhu ñaha-ï xii-n ndihî cue téé nchîcú<sup>n</sup> cuì-nǎ cuánguîhu núú chíú<sup>n</sup>.

15 Chi yúhú cuu-ni cada-í nání cuení-í ndihi díhù<sup>n</sup>-í, ¿adi dico ñá túú quide váha-xi iní-n sã dúhá cùndahú iní-í cue téé-á<sup>n</sup> duca<sup>n</sup> chãhu-í-güedé?”, càchí téé cùu patróó<sup>n</sup>-á<sup>n</sup> xãha<sup>n</sup>-dẽ xii téé-á<sup>n</sup>. Duha ndùu cuendú cání-í núú-ndó.

16 Te duha càhá<sup>n</sup>-í chi dava ñáyiú cùnūu ndecu ichi Yá Ndiõxí vitna sáá nduu te vá cùnūu vihi-gá-yu dàtná cùnūú-yu vitna, te dava ñáyiú ñá túú cùnūu vitna sáá nduu ïo cùnūú-yu. Te ío cuéhé ñáyiú càhá<sup>n</sup> ñáhá Yã Ndiõxí xií-yu dico sacú-ni-yu nduu táhũ-yu cundecú-yu ndihi-gá —càchí-gá xãha<sup>n</sup>-gã xii-güedé.

*Jèsús càhá<sup>n</sup> tucu-gá sá cáhni ñàha-güedé xii-gá  
(Mr. 10:32-34; Lc. 18:31-34)*

17 Te ñùhu Jèsús ichi cuásaá-gá ñuú Jerusàlén ndihi cue téé xica cuu ndihi-gá, te ní cana ñaha-gã xii-güedé ní naníhí tnáhá-güedẽ ndihi-gá, te ta ndàtnúhu ndihi ñaha-gã xii-güedé cuáhá<sup>n</sup>, te xãha<sup>n</sup>-gã xii-güedé:

18 —Vitna ñùhu-o ichi cuásaá-ó ñuú Jerusàlén, te yacá<sup>n</sup> cuáha cuendá ñáhá-güedẽ xii yúhú Téé cùu ñaní tnáhá-ndó nchàa-ndo núú cuè téé cùu dútú cùnūu, ndihi núú cuè téé dàcuaha ñaha xii ñáyiú nchaa tnúhu ní chídó tnùní ndí Moisés. Te ñuú cue téé-á<sup>n</sup> cùñaha-güedẽ xii dava-gá cue téé sá cáhni ñàha-güedé xii-í.

19 Te cuáha cuendá ñáhá-güedẽ xii-í núú cuè téé ñá túú cùu cue téé isràél, te cue téé-á<sup>n</sup> cudíquí ndeé ñáhá-güedẽ xii-í, te caniha-güedẽ ndihi ñi, te dàtnùní cata caa ñaha-güedẽ xii-í núú cùrúxí te núú cùrúxí-á<sup>n</sup> cuú-í, dico nduu úní sá cùú-í te ndoto-í —càchí-gá xãha<sup>n</sup>-gã xii-güedé.

*Nǎná tǎ Jàcóbó ndihì té Juàá cuìní-a<sup>n</sup> sá  
cùnùu-güedé ndihì Jèsús  
(Mr. 10:35-45)*

20 Te cue déhe té Zebèdeú té Jàcóbó ndihì té Juàá ndécá ñàha náná-güedě xii-güedé cuáhá<sup>n</sup> núú ndécú Jèsús, te òré ní quexìo-a<sup>n</sup> ndihì-güedé núú ndécú-gǎ te ní ngüíñí xítí-á<sup>n</sup> nǔú-gǎ cuèndá cuìní-a<sup>n</sup> ndàtnúhu ndihì ñaha-a<sup>n</sup> xii-gá cuèndá sá cúú-xí cuè déhe-a<sup>n</sup>.

21 Te cùmání-gǎ cáhá<sup>n</sup>-a<sup>n</sup> te ní xícá<sup>n</sup> tnúhú Jèsús núú-a<sup>n</sup>, te xǎha<sup>n</sup>-gǎ:

—¿Ná cuìní-n? —càchí-gá xǎha<sup>n</sup>-gǎ xii-a<sup>n</sup>.

Te ní xáha<sup>n</sup>-a<sup>n</sup> xii-gá:

—Véxi-í càhá<sup>n</sup> ndàhú-í núú-n nǔu vá cündèe iní-n cùnucóo ñ<sup>n</sup> déhe-í-a xio cùha-n, te ìngá-dé cunucóo-dé xio dàtni-n ña saá nduu cùnucóo-n nǔú táxí tnúni-n —càchí-á<sup>n</sup> xǎha<sup>n</sup>-a<sup>n</sup> xii-gá.

22 Te Jèsús ní xáha<sup>n</sup>-gǎ xii úú cue téé-á<sup>n</sup>:

—Nchòhó, ñá túú cùnúní váha iní-ndó nàcuáa ndùu sá xìcá<sup>n</sup>-ndó nǔù-í. ¿Te náa cundee ìní-ndó dàndoho ñaha ñáyiu xii-ndo dàtná dandòho ñahá-yu xii-í, te cundee tùcu iní-ndó càhni ñahá-yu xii-ndo dàtná cahni ñahá-yu xii-í-á<sup>n</sup>? —càchí-gá xǎha<sup>n</sup>-gǎ xii-güedé.

Te ní xáha<sup>n</sup>-güedě xii-gá:

—Cundee ìní-ndí yáha-ndí nchaa nàcuáa càhá<sup>n</sup>-n-á<sup>n</sup> —càchí-güedé xǎha<sup>n</sup>-güedě xii-gá.

23 Te Jèsús ní xáha<sup>n</sup>-gǎ xii-güedé:

—Ndáá sá cündèe iní-ndó ndòho-ndo nchaa nacuáa ndoho-í, dico sá dúcá<sup>n</sup> cuìní-ndó sá ñ<sup>n</sup>-ndó cùnucóo-ndo xio cuha-í, te ñ<sup>n</sup>-ndo cùnucóo-ndo xio datni-í, te xǎ<sup>n</sup> chi ñá díú yǔhú tàú-í cachí-í nǔu sá cúú cùnucóo-ndo àdi sá vǎ cúú cùnucóo-ndo, chi

mee Tătà-í Dútú Ndiöxí cachí-gá te núu ná cúu ñáyiú nduu táhú cunucóo ñiñi-í ðává-á<sup>n</sup> —càchí-gá xǎha<sup>n</sup>-gǎ xii-güedé.

<sup>24</sup> Te òré ní níhí ũxí-gá cue téé xìca cuu ndihi-gá tnúhu nàcuáa ndùu sá cuìní cue téé úú-á<sup>n</sup>, te ní cudéé<sup>n</sup>-güedé núu cuè téé úú-á<sup>n</sup>.

<sup>25</sup> Te Jèsús ní cana-gá nchaa cue téé xìca cuu ndihi-gá, te ní xáha<sup>n</sup>-gǎ xii-güedé:

—Nchòhó xìní-ndó sǎ cuè téé yìndaha nació<sup>n</sup> quidé-güedé sá ïo cùnuu-güedé, te nchaa ðava-gá cue téé cùnuu ndihi-güedé quidé-güedé tnàhá-güedé sá ïo cùnuu-güedé.

<sup>26</sup> Dico nchòhó chi vá dúcá<sup>n</sup> càda-ndo, chi núu ðava-ndo cuìní-ndó cùnuu-ndo, te xini ñuhu-xi cunu cuechi núu tnàhá-ndó te vá cáda-ndó sǎ cúnùu-ndo.

<sup>27</sup> Te núu ðava-ndo cuìní-ndó quène cáva-ndo, te cuu-ndo ðàtná cue ñáyiú ñá túú tnàhí ðàñá quee núu chíú<sup>n</sup> pàtróo<sup>n</sup>-xi cunu cuechi núu tnàhá-ndó.

<sup>28</sup> Te cada-ndo ðàtná quidé yǔhú Téé cùu ñaní tnàhá-ndó nchàa-ndo, chí yúhú véxi-í ñuyíú-a dico ñá díú sǎ cúnú cuèchi ñáyiú núu-í chí véxi-í sá cúnú cuèchi-í núu-yu. Te cuú-í ñuyíú-a cuèndá vài-yu cácu nihnú-yu núu ùhú núu ndàhú —càchí-gá xǎha<sup>n</sup>-gǎ xii-güedé.

*Jèsús quidé tǎtna-gá núu ũú tnàhá cue téé cuàá  
(Mr. 10:46-52; Lc. 18:35-43)*

<sup>29</sup> Te òré ní quee Jèsús ñuú Jericó ndihi cue téé xìca cuu ndihi-gá, te cuéhé víhí ñáyiú nchicú<sup>n</sup> ñáhá xì-gá cuáhá<sup>n</sup>.

<sup>30</sup> Te yuhu ìchi cuáhá<sup>n</sup>-gá xìnucóo úú tnàhá cue téé cuàá, te cue téé-á<sup>n</sup> ñi cutnùní iní-güedé



sá Jèsús ñúhú-gă ichi-án te ní ngüíta-güedé níhi cãhá<sup>n</sup>-güedé, te xăhá<sup>n</sup>-güedě xii-gá:

—¡Yòhó Mèstrú, ñaní tnáhá ndïi Dàvií, cundàhú iní ñáhá xii-ndí! —càchí-güedé xăhá<sup>n</sup>-güedě xii-gá.

<sup>31</sup> Te cue ñáyiú tènaá ñáhă-yu xii-güedé, te xăhă<sup>n</sup>-yu sá ná càdí-güedé yuhu-güedé, dico uu<sup>n</sup>-gá níhi ní cãhá<sup>n</sup>-güedé, te xăhá<sup>n</sup>-güedě xii-gá:

—¡Yòhó Mèstrú, ñaní tnáhá ndïi Dàvií, cundàhú iní ñáhá xii-ndí! —càchí-güedé xăhá<sup>n</sup>-güedě xii-gá.

<sup>32</sup> Te ní ngüíñí Jèsús te ní cana ñaha-gă xii-güedé, te ní xícá<sup>n</sup> tnúhú-gă núú-güedě, te xăhá<sup>n</sup>-gă:

—¿Ná cuíní-ndó càda ñaha-í xii-ndo-i? —càchí-gá xăhá<sup>n</sup>-gă xii-güedé.

<sup>33</sup> Te ní xáhá<sup>n</sup>-güedě xii-gá:

—Mèstrú, cuíní-ndí sá cádá tătna-n núú-ndí cuendá cundehe-ndí —càchí-güedé xăhá<sup>n</sup>-güedě xii-gá.

<sup>34</sup> Te Jèsús ní cundàhú iní ñáhá-gă xii-güedé, te ní tendaha-gă núú-güedě. Te òré-ni ní ndúha núú-güedě, te nchìcú<sup>n</sup> ñáhá-güedě xii-gá cuáhá<sup>n</sup>.

## 21

*Jèsús cuánguïhu-gá ñuú Jerusàlén*

*(Mr. 11:1-11; Lc. 19:28-40; Jn. 12:12-19)*

<sup>1</sup> Te òré sa ta cùyatni Jesús ndihi cue téé xìca cuu ndihi-gá ñuú Jerusàlén, te ní quexìo-gá ndihi-güedé yatni víi-nă ñuú Bètfaqé, te xía<sup>n</sup> cáá yùcu nani Olívú. Te ní ndatnúhu-gá ndihi úú cue téé xìca cuu ndihi-gá,

<sup>2</sup> te ní xáhá<sup>n</sup>-gă xii-güedé:

—Chí cuáhá<sup>n</sup> ñuú cáá yàtni yacá<sup>n</sup>, te òré quexìo-ndo yacá<sup>n</sup> te nanihí-ndó ñ<sup>n</sup> búrru dìhí ndètníi-di ndihí déhe-di, te nandaxi-ndo-güèdi te candeca-ndo-güèdi quixi.

<sup>3</sup> Te núu ió ñáyiú dàdaha<sup>n</sup> ñaha xii-güedi, te cúñaha-ndo xií-yu sá yǔhú Yaá xícá cùu ndihí-ndo xini ñuhu-í-güedi, te ndíhi-ni natendaha-í-güedi núhú-güedi cúñaha-ndo —càchí-gá xǎha<sup>n</sup>-gǎ xii-güedé.

<sup>4</sup> Te duca<sup>n</sup> ñí cuu chi ní quee ndáá-xi nàcuáa ní chídó tnùnì ñ<sup>n</sup> téé ní xóo cáhá<sup>n</sup> tnúhu Yá Ndióxi ndéé sanaha núú tütú-gá núú càchí-xi:

<sup>5</sup> Chí cǔñaha cuè ñáyiú ñuú Sìón ná cádá cuèndá-yu, chi véxi téé yìndaha ñaha xií-yu yòdo-dé ñ<sup>n</sup> búrru líhli déhe ñ<sup>n</sup> búrru quiti sa xido, te cùu-dé ñ<sup>n</sup> téé ío ndàhú iní-xi.

Duha ní chídó tnùnì ñ<sup>n</sup> téé ní xóo cáhá<sup>n</sup> tnúhu Yá Ndióxi ndéé sanaha núú tütú-gá.

<sup>6</sup> Te cue téé xica cuu ndihí-gá ní xica-güedé cuáhá<sup>n</sup>-güedé, te ní quide-güedé nàcuáa ní xáha<sup>n</sup>-gǎ xii-güedé cada-güedé.

<sup>7</sup> Te ní ndexìo-güedé ndécá-güedé ñ<sup>n</sup> búrru dìhí ndihí déhe-di, te ní sacá<sup>n</sup> ndodo-güedé dóo-güedé sátá-güedi, te dàtnùnì cuásaá Jèsús sátá ñ<sup>n</sup>-di ní ngódó ñaha-gá xii-di.

<sup>8</sup> Te ío cuéhé ñáyiú ta sàcá<sup>n</sup>-yu dóo-yu ichi cuáhá<sup>n</sup>-gá cuèndá núú dǔo-yu-á<sup>n</sup> yǎha-gá ndihí quiti yòdo-gá. Te davá-yu xèhndé-yu ndaha yùtnu ñúú tá sàcá<sup>n</sup>-yu cuáhá<sup>n</sup>.

<sup>9</sup> Te nchaa ñáyiú yòdonuu núú-gǎ ndihí nchaa ñáyiú nchìcú<sup>n</sup> ndàa sátá-gǎ ní ngüíta-yu níhi càhá<sup>n</sup>-yu, te càchí-yu:

—¡Ío càhnu cuu Yaá cúu ñàní tnáhá ndïi Dàvií!  
 ¡Te Yá Ndiöxí ío na chìndee ñaha-gá chi cùu-gá Yaá  
 ní tendaha Yă Ndiöxí véxi quìde núu-gă! ¡Te ndéé  
 nchaa sá ío andïu na càchí-xi sá ío càhnu cuu-gă! —  
 duha càchí-yu.

<sup>10</sup> Te òré cuànguihu Jèsús ñuú Jerusàlén, te nchaa  
 ñáyïu ñuú-án nï ngüíta-yu xïcuáá-yu, te davá-yu ní  
 ngüíta-yu xïtnáhá-yu:

—¿Yoo cùu téé-ă<sup>n</sup>? —càchí-yu xïtnáhá-yu.

<sup>11</sup> Te davá-yu xïtnáhá-yu:

—Téé-ă<sup>n</sup> cúu-dě Jèsús téé càhá<sup>n</sup> tnúhu Yá Ndiöxí,  
 te cùu-dé téé ñuú Nazàrét ñuú yíndèhu distritú  
 Galiléa —càchí-yu xïtnáhá-yu.

*Jèsús ñá túú tnàhá iní-gá nàcuáa xïquide ñáyïu xítí  
 veñúhu*

*(Mr. 11:15-19; Lc. 19:45-48; Jn. 2:13-22)*

<sup>12</sup> Te Jèsús cuànguihu-gá xítí veñúhu càhnu sá  
 ío cùnuu, te xítí veñúhu-án xïndecu ñáyïu quìde  
 ndáhú nádícó-yu, ndïhi ñáyïu xïsaa<sup>n</sup>, te nchaá-yu ní  
 queñuhu ñaha Jèsús xií-yu quehé, te ní dándúá-gá  
 mèsá nchaa ñáyïu dàma díhú<sup>n</sup>, ndïhi nchaa xilé  
 sácõo nchihi ñáyïu dìco lómá xïndecu xítí veñúhu-án.

<sup>13</sup> Te ní xáha<sup>n</sup>-gă xií-yu:

—Núú tütú Yă Ndiöxí càhá<sup>n</sup>-xi nàcuáa ní  
 càhá<sup>n</sup>-gá, te ní cachí-gá: “Vehe-í cúu-xi núú càhá<sup>n</sup>  
 ndïhi ñaha ñáyïu xii-í”, duha ní càhá<sup>n</sup>-gá càchí-xi  
 núú tütú-gá. Dico nchòhó quidé-ndó vèhe-gá vehe  
 ñadúhú —càchí-gá xăha<sup>n</sup>-gă xií-yu.

<sup>14</sup> Te xía<sup>n</sup> ndécú Jèsús ní quexìo cue téé cuáá ndïhi  
 cue téé yacua, te ní quide tátna ñaha-gă xii-güedé te  
 ní ndúha-güedé.

15 Te cue dútú cúnùu ndihì cue tée dàcuaha ñaha xii ñáyiú nchaa tnúhu ní chídó tnùnì ndíi Moisés ní xiní-güedé ní quide Jèsús sá vǎ yǒo tnàhí ndàcu cada, te ndèdóho tucu-güedé níhi xicáhá<sup>n</sup> cue landú xití veñúhu càhnu sá ïo cùnùu-á<sup>n</sup>, te cǎchí-güexi: “Ío càhnu cuu Yaá cúú ñàní tnáhá ndíi Dàvíí”, cǎchí-güexi. Te ní cudéé<sup>n</sup>-güedé,

16 te ní xáha<sup>n</sup>-güedé xii Jèsús:

—¿Ndèdóho-n nàcuáa cǎhá<sup>n</sup> cue landú-ǎ<sup>n</sup> ñǎ? — cǎchí-güedé xǎha<sup>n</sup>-güedé xii-gǎ.

Te Jèsús ní xáha<sup>n</sup>-gǎ xii-güedé:

—Ndèdóho-í, te nchòhó náa ñǎ túú dàcuaha-ndo núú tütú Yǎ Ndiǒxí núú cǎhá<sup>n</sup>-xi cuendá cue landú-ǎ<sup>n</sup>, te duha cǎchí-xi:

Yòhó ní quide-n sǎ cuè landú vitna sàdi, ndihì cue dava-gǎ landú, chiñuhu ñaha-güexi xii-n nàcuáa tàú-xi cunduu. Duha cǎchí-xi núú tütú-gǎ —cǎchí-gǎ xǎha<sup>n</sup>-gǎ xii-güedé.

17 Te xiá<sup>n</sup> ñí dándóo ñaha Jèsús xii-güedé, te ní xica-gǎ cuáhá<sup>n</sup>-gǎ ñuú Bètaniá, yàcá<sup>n</sup> ní xíndecu-gǎ niú-á<sup>n</sup>.

*Jèsús xǎha<sup>n</sup>-gǎ xii yutnu ngǔxí sá vǎ cúú<sup>n</sup>-gǎ sávidí-xi*

*(Mr. 11:12-14, 20-26)*

18 Te nduu tnéé-á<sup>n</sup> nehé-ni cuáhá<sup>n</sup> tucu Jèsús ñuú Jerusálén, te ichi ñùhu-gǎ ní xíhí-gǎ docó.

19 Te ní xiní-gǎ ï<sup>n</sup> yutnu ngǔxí nútnǎ ï<sup>n</sup> xio yuhu ìchi, te ní xica-gǎ cuáhá<sup>n</sup> ndéhé-gǎ nǔu ndéé sávidí-xi, dico ñǎ túú ñǎ ndéé chi mee-ni ndàha-xi ndéé. Te ní xáha<sup>n</sup>-gǎ xii yutnu ngǔxí-á<sup>n</sup>:

—¡Vitna te vǎ ï<sup>n</sup> ndùu-gǎ cuu<sup>n</sup> sávidí-n! —cǎchí-gǎ xǎha<sup>n</sup>-gǎ xii-xi.

Te òré-ni-á<sup>n</sup> nǐ yíchí yutnu ngǔxí-á<sup>n</sup>.

<sup>20</sup> Te sá dúcá<sup>n</sup> nǐ cuu ní xiní cue téé xìca cuu ndìhì Jesús, te ío ní cuñúhu-güedé, te ní xícá<sup>n</sup> tnúhú-güedě núú-gǎ, te xǎha<sup>n</sup>-güedě:

—¿Ná cuendá ndéé dàcá<sup>n</sup> ío ndìhì ní yíchí yutnu ngǔxí-á<sup>n</sup>-í? —càchí-güedé xǎha<sup>n</sup>-güedě xii-gá.

<sup>21</sup> Te Jèsús ní xáha<sup>n</sup>-gǎ xii-güedé:

—Na càchí tnúhu ndáá-í xii-ndo sǎ nǔu nchòhó quíndáá ndisa iní-ndó Yǎ Ndiǒxí, te vá cání ì<sup>n</sup> cani úú iní-ndó, te ñá díú-ní sǎ nǐ quide-í-a ní xiní-ndó ndàcu-ndo cada-ndo, chi ndéé tǐndúú-a xocuìñí-xi núú ndécú-xí te núu cúñaha-ndo sǎ xocuìñí-xi te quíhì<sup>n</sup>-xi quée-xi xití làmár. Te diu duca<sup>n</sup> càda-xi te núu na quíndáá iní-ndó.

<sup>22</sup> Te nchaa sá ná càcá<sup>n</sup>-ndó nǔú Yǎ Ndiǒxí òré càhá<sup>n</sup> ndìhì-ndo-gǎ te taxi-gǎ te nǔu sàndáá ndisa iní-ndó sǎ táxí-gǎ sá xícá<sup>n</sup>-ndó nǔú-gǎ —càchí-gǎ xǎha<sup>n</sup>-gǎ xii-güedé.

*Jèsús ndécú ndìhì-gǎ tnúhu ndee ìní  
(Mr. 11:27-33; Lc. 20:1-8)*

<sup>23</sup> Te Jèsús cuánguihu-gǎ xití veñúhu càhnu sá ío cùnūu danehé-gǎ ñáyiu, te xía<sup>n</sup> ndécú-gǎ ní quexìo cue dútú cúnūu ndìhì cue téé cùu sacuéhé nǔú ñáyiu isràél, te xǎha<sup>n</sup>-güedě xii-gá:

—Cuíní-ndí cachí tnúhu-n xii-ndí nása ndūu tnúhu ndee ìní ndécú ndìhì-n núu quide-n nándi sá quidé-n, ¿te yoo duca<sup>n</sup> nǐ taxi tnúhu ndee ìní-á<sup>n</sup> xii-n-í? —càchí-güedé xǎha<sup>n</sup>-güedě xii-gá.

<sup>24</sup> Te Jèsús ní xáha<sup>n</sup>-gǎ xii-güedé:

—Yúhú tnàhá-í cuíní-í càcá<sup>n</sup> tnúhu-í ì<sup>n</sup> sá càcá<sup>n</sup> tnúhu-í núú-ndó, te núu na càchí tnúhu-ndo te

cachí tnúhu-í xii-ndo yòo ní taxi tnúhu ndee ìní duha quìde-í.

<sup>25</sup> Te chí càchí tnúhu xii-í yoo ní táuchíú<sup>n</sup> nǐ dácúándùte ndí Juàá ñáyi, ¿Yá Ndiõxí à<sup>n</sup> cuè téé ñuyíú-a ní táuchíú<sup>n</sup> dùca<sup>n</sup> ní quide ndí?, te chí càchí tnúhu —càchí-gá xǎha<sup>n</sup>-gǎ xii-güedé.

Te ní ngüíta-güedé xǐtnàha-güedé:

—¿Nása cǔñaha-o? Chi núu na cǔñaha-o sǎ Yǎ Ndiõxí ní táuchíú<sup>n</sup> dùca<sup>n</sup> ní quide ndí Juàá ñá, te quesaha-dé: “¿Ná cuèndá ñá túú ní sàndáá iní-ndó tnúhu ní cáhá<sup>n</sup> ndí vǎí<sup>n</sup>?”, quesaha-dé.

<sup>26</sup> Te núu na cǔñaha-o sǎ cuè ñáyi ñuyíú-a ní táuchíú<sup>n</sup> dùca<sup>n</sup> ní quide ndí ña, te cudéé<sup>n</sup> ñǎyi núú-ó, chi nchaá-yu càchí-yu sá Yǎ Ndiõxí ní xáha<sup>n</sup>-gǎ xii ndí sá càhá<sup>n</sup> ndí tnúhu-gá núú ñǎyi —càchí-güedé xǐtnàha-güedé.

<sup>27</sup> Te ní xáha<sup>n</sup>-güedé xii Jèsús:

—Ñá túú xíní-ndí yoo ní táuchíú<sup>n</sup> dùca<sup>n</sup> ní dácúándùte ndí Juàá ñáyi —càchí-güedé xǎha<sup>n</sup>-güedé xii-gá.

Te ní xáha<sup>n</sup>-gǎ xii-güedé:

—Te núu duca<sup>n</sup> te ni yǎhú vá càchí tnúhu-í xii-ndo yòo ní taxi tnúhu ndee ìní duha quìde-í —càchí-gá xǎha<sup>n</sup>-gǎ xii-güedé.

### *Cuèndá ì<sup>n</sup> téé ndíhi úú déhe-dé*

<sup>28</sup> Te Jèsús ní xáha<sup>n</sup> tùcu-gá xii-güedé:

—Na càni-í ì<sup>n</sup> cuèndú núú-ndó nàcuáa tecú tnúní-ndó tnúhu càhá<sup>n</sup>-í. Ì<sup>n</sup> téé ndècu úú déhe-dé, te ní xáha<sup>n</sup>-dè xii déhe-dé téé sacuéhé-gǎ: “Yòhó déhe-í, véxi-í càhá<sup>n</sup> ndàhú-í núú-n núu vá cǔndèè iní-n cuǎnùndaha ñaha-n xii-í cada chiu<sup>n</sup>-o núú nǐ xitu-í yoho yàha stilé”, càchí-dé xǎha<sup>n</sup>-dè.

29 Te ní xáha<sup>n</sup> dēhe-dé xii-dé: “Vá quìhí<sup>n</sup>-í cada chiu<sup>n</sup>-í núú chíú<sup>n</sup>-n”, càchí-dé xáha<sup>n</sup>-dē xii tătă-dē. Dico cuèé ní nacani iní-dé te ní sáhá<sup>n</sup>-dé ní quide chiu<sup>n</sup>-dé núú chíú<sup>n</sup> tătă-dē.

30 Te téé-á<sup>n</sup> nǐ sáhá<sup>n</sup> tucu-dé ní xáha<sup>n</sup>-dē xii déhe-dé té lǐhli-gá nǔu vá cúndèè iní-dé cuánùndaha ñaha-dé, te ní xáha<sup>n</sup> dēhe-dé-á<sup>n</sup> xii-dé: “Cuu cuánùndaha ñaha-í xii-n”, càchí-dé xáha<sup>n</sup>-dē. Dico ñá túú ní sáhá<sup>n</sup>-dé cada chiu<sup>n</sup>-dé.

31 Te vitna chí càhá<sup>n</sup> nǔu ndēdacàa cue téé úú-á<sup>n</sup> nǐ quide-güedé sá cuiní tătă-güedē —càchí-gá xáha<sup>n</sup>-gǎ xii-güedé.

Te ní xáha<sup>n</sup>-güedē xii-gá:

—Tée cùu sacuéhé-gǎ, téé ní cáhá<sup>n</sup> ndìhì-dé dǐhna —càchí-güedé xáha<sup>n</sup>-güedē xii-gá.

Te Jèsús ní xáha<sup>n</sup>-gǎ xii-güedé:

—Na càchí tnúhu ndáá-í xii-ndo sǎ ncháá cuè téé cuihna ìní-xi quide cobrá ñáhá xii ñáyiú cuendá impuèstú, ndìhì cue ñáyiú dǐhí xǐndecu ichi dǐí ìní yáchí-gá ndíhu ndaha ñàha Yá Ndiöxí xii cue téé-á<sup>n</sup> ndìhì cue ñáyiú dǐhí-á<sup>n</sup> dàcúúxí nchòhó.

32 Chi ndí Juàá téé ní xóo dacuàndute ñaha xii ñáyiú ní cáhá<sup>n</sup> ndí nàcuáa cadá-yu cundecú-yu, dico nchòhó chi ñá túú cuiní-ndó quìndáá iní-ndó nàcuáa ní cáhá<sup>n</sup> ndí, dico cue téé cuihna ìní-xi quide cobrá ñáhá xii ñáyiú cuendá impuèstú, ndìhì cue ñáyiú dǐhí xǐndecu ichi dǐí ìní, chi sàndáá iní-güedé ndìhì-yu tnúhu ní cáhá<sup>n</sup> ndí. Te nchòhó cuèi ndèhe-ndo sá sàndáá iní cue ñáyiú-á<sup>n</sup> nchaa tnúhu ní cáhá<sup>n</sup> ndí, dico ñá túú cuiní-ndó ndìxi cuèchi iní-ndó cuendá nchaa sá cuèhé sá dúhá quide-ndo cuendá tnì-ndo tnúhu ní cáhá<sup>n</sup> ndí —càchí-gá xáha<sup>n</sup>-gǎ xii-güedé.

*Cuèndá cue tée cuihna ìní-xi  
(Mr. 12:1-12; Lc. 20:9-19)*

<sup>33</sup> Te xăha<sup>n</sup> tucu Jesús xii-güedé:

—Cundedóho-ndo na cāni tucu-í ingá cuèndú núú-ndó cuèndá tecú tnùní-ndó tnũhu càhá<sup>n</sup>-í. ĩ<sup>n</sup> tée ní nacúxi-dé mee-ni yoho yaha stilé núú ñúhú-dě, te ní chidoco-dě cuèndá sá vă cúú dàñú, te ní cadúha-dé núú quíhni-dě ndéhé yoho yàha stilé-á<sup>n</sup> òré ná cùu, te ní cadúha-dé ĩ<sup>n</sup> xító dùcú<sup>n</sup> núú cáúndòdo cue tée coto nchaa yoho yàha stilé-á<sup>n</sup>.

'Te ní sáá ĩ<sup>n</sup> nduu quèe-dé quíngaca cuu xica-dě te ní dándõo ndaha-dě sá ñi xitu-dé-á<sup>n</sup> xii ĩ<sup>n</sup> ũú cue tée xìní tnáhá ndìhi-dé cuèndá cada chiũ<sup>n</sup>-güedé, te ní ndatnúhu-güedé sá òré ná cúú te cuu cuèndá dava-güedé, te duca<sup>n</sup> te ní quee-dé cuáhá<sup>n</sup>-dé.

<sup>34</sup> Te sátá ñi sáá nduu ñi cuu ndéhé nchaa yoho yàha stilé sá ñi xitu-dé-á<sup>n</sup>, te ní xáha<sup>n</sup>-dě xii ĩ<sup>n</sup> ũú cue tée xínu cuechi núú-dě: “Chí cuáhá<sup>n</sup> cácá<sup>n</sup>-ndó sã cúú cuèndá-í núú cuè tée ní dándõo ndàha-í nchaa yoho yàha stilé sá ñi xitu-í”, cāchí-dé xăha<sup>n</sup>-dě xii-güedé.

<sup>35</sup> Te cue tée ní dándõo ndaha-dě nchaa yoho yàha stilé sá ñi xitu-dé-á<sup>n</sup> ñi tñi-güedé cue tée xínu cuechi núú-dě-á<sup>n</sup>, te ĩ<sup>n</sup>-dé ní cani-güedé, te ĩ<sup>n</sup>-dé ní sahani ñaha-güedě, te ingá-dé ní sãñaha-güedě yúú.

<sup>36</sup> Te tée ní xitu yoho yàha stilé-á<sup>n</sup> ñi tendaha-dě titní-gá tucu cue tée xínu cuechi núú-dě cuáhá<sup>n</sup>-güedé cuángácá<sup>n</sup>-güedé sá cúú cuèndá-dé núú cuè tée ní dándõo ndaha-dě sá ñi xitu-dé-á<sup>n</sup>, dico diu-ni duca<sup>n</sup> ñi quide ñaha cuè tée-á<sup>n</sup> xii cue tée xínu cuechi núú-dě-á<sup>n</sup>.

<sup>37</sup> 'Te tée cùu xítóhó nchaa yoho yàha stilé-á<sup>n</sup> ñi sani ìní-dé: “Vàha-gá nõu tendaha-ĩ déhe-í-a



núhú-dé, chi òré quiní ñáhá-güedě xii-dé te canehe-güedé sá yíñùhu núú-dě”, duha ní sani iní-dé. Te ní tendaha-dě déhe-dé cuánuhú-dé.

<sup>38</sup> Dico òré ní xiní cue téé guède chiu<sup>n</sup>-á<sup>n</sup> dēhe téé cùu xítohó nchaa yoho yàha stilé-á<sup>n</sup>, te ní xítñàha-güedé: “Tée-ǎ<sup>n</sup> téé véxi nduu táhú ñuhu-a ndihí nchaa sá cáá nǔú-xi, dico cahni-o-dě te mee-o ndùu táhú-ó sǎ ndúú táhú-dě”, càchí-güedé xítñàha-güedé.

<sup>39</sup> Te ní tñi-güedé téé-á<sup>n</sup> te ndèca ñaha-güedé cuáhá<sup>n</sup> ñ<sup>n</sup> xio yuhu ñuhu-á<sup>n</sup>, te ní sahani ñaha-güedě xii-dé —duha cuáhá<sup>n</sup> cuèndú ní cani Jèsús núú-güedě.

<sup>40</sup> Te ní xáha<sup>n</sup> tùcu Jèsús xii-güedé:

—¿Te nchòhó sa cùtnuní iní-ndó nǎsa cada ñaha xítohó ñuhu-á<sup>n</sup> xii cue téé-á<sup>n</sup> ñǎ? —càchí-gá xǎha<sup>n</sup>-gǎ xii-güedé.

<sup>41</sup> Te cue téé-á<sup>n</sup> nǐ xáha<sup>n</sup>-güedě xii-gá:

—Tée cùu xítohó ñuhu-á<sup>n</sup> nǔhú-dé, te vá cúndàhú iní-dé cue téé cuihna ìní-xi-á<sup>n</sup> chi cahni ñaha-dě xii-güedé, te dándóo ndaha-dě ñuhu-dé xii cue téé cùtnuní iní-dé cada ndáá cuèndá ndi tnahá cúú<sup>n</sup> nděhé nchaa yoho yàha stilé sá nǐ xitu-dé-á<sup>n</sup> te cuáñaha-güedě xii-dé sá cúú cuèndá-dé —càchí-güedé xǎha<sup>n</sup>-güedě xii-gá.

<sup>42</sup> Te Jèsús ní xáha<sup>n</sup>-gǎ xii-güedé:

—Te nchòhó, náa ñá túú dàcuaha-ndo núú tùtú Yǎ Ndiòxí núú càchí-xi:

Yúú sǎ nǐ dáquéé tǐhú cue téé dàcaa vehe, ní cuu-xi yúú cúnùu vitna.

Chi mee Dǔtú Ndiòxí duca<sup>n</sup> nǐ cachí-gá cunduu, te

cùu-xi ñ<sup>n</sup> sá ìo cùñúhu-o vitna.

Duha càchí-xi núú tùtú-gá.

43 Te duha càhá<sup>n</sup>-í chi Yá Ndiöxí cada-gá te vá nihí-ndó tn̄hu ndee ìní cundecu ndihí-ndo cuendá ndíhu ndaha ñàha-gá xii-ndo, chi tnúhu ndee ìní-á<sup>n</sup> cundecu ndihí cue ñáyiú cada ndáá cuendá ndíhu ndaha ñàha Yá Ndiöxí xii-yu.

44 Te yúú sã cúnùu-á<sup>n</sup> cúú-xí yǔhú, te nchaa ñáyiú ñá túú tn̄i tnúhu-í cùú-yu dàtná ì<sup>n</sup> ñáyiú ndúá núú yǔú-á<sup>n</sup> te tnàhnú duú<sup>n</sup>-yu, àdi núú na tàù ñáhá-xí xii-yu, te dacàchi duu<sup>n</sup> ñaha-xi –cachí-gá xǎha<sup>n</sup>-gǎ xii-güedé.

45 Te sá dúcá<sup>n</sup> ndùu cuendú ní caní Jèsús te cue téé cùu dútú cúnùu-á<sup>n</sup>, ndihí cue téé cùu fariséú ní cutnùní ìní-güedé sá cuendá-güedé ní càhá<sup>n</sup>-gá.

46 Te ní cuíní-güedé tn̄i ñaha-güedé xii-gá òré-á<sup>n</sup> dico ñá túú ní cùyì-güedé, chi ní yùhú-güedé cue ñáyiú, chi ní cutnùní ìní-yu sá cúú-gǎ ì<sup>n</sup> téé càhá<sup>n</sup> tnúhu Yá Ndiöxí.

## 22

### *Cuèndá ì<sup>n</sup> vico tnǎndaha*

1 Te Jèsús ní ngüíta tucu-gá cání-gǎ ingá cuendú núú-güedé, te xǎha<sup>n</sup>-gǎ:

2 –Na càni tucu-í ingá cuendú núú-ndó cuendá tecú tnùní-ndó nàcuáa cada-xi òré ndíhu ndaha ñàha Yá Ndiöxí xii ñáyiú. ì<sup>n</sup> téé yìndaha ñaha xii ñáyiú ní quide-dé ì<sup>n</sup> vico ní dátñandaha-dé déhe ducu<sup>n</sup>-dé.

3 Te ní tendaha-dé cue téé xìnu cuechi núú-dé cuáhá<sup>n</sup>-güedé cuángana-güedé cue ñáyiú sa ní càhá<sup>n</sup>-dé cuhu<sup>n</sup> vico, dico ñáyiú-á<sup>n</sup> ñà túú ní cuíní-yu quíhí<sup>n</sup>-yu.

4 Te ní xáha<sup>n</sup> tùcu-dé xii dava-gá cue téé xìnu cuechi núú-dě: “Quíhí<sup>n</sup>-ndó cǔñaha-ndo xìi cue ñáyiu sa ní cáhá<sup>n</sup>-í cuhu<sup>n</sup> vico sá sà ní quide túha-í sá cáxǐ-yu, te sa ní sahní-í ndicutu ndíhi nchaa dava-gá quití ní dánúcuǐhnu-í, te nchaa sa ní quide túha-í, te na quìxí-yu cuhú<sup>n</sup>-yu vico càchí-í cǔñaha-ndo”, càchí-dé xǎha<sup>n</sup>-dě xii cue téé xìnu cuechi núú-dě-á<sup>n</sup>.

5 Dico ní ñ<sup>n</sup> ñáyiu ní cáhá<sup>n</sup>-dé-á<sup>n</sup> ñà túú ní cuení-yu quíhí<sup>n</sup>-yu cuhú<sup>n</sup>-yu vico. Chi í<sup>n</sup>-yu ní sáhá<sup>n</sup>-yu ní quide chìú<sup>n</sup>-yu núú ñúhǔ-yu, te íngá-yu ní sáhá<sup>n</sup>-yu ní nadìcò-yu núú nándí cùu ndáhú quidě-yu.

6 Te dava-gá-yu ní tñí-yu dava cue téé xìnu cuechi núú tēe quide vico-á<sup>n</sup>, te ní caníhá-yu ndéé ní sahní ñàhá-yu xii-güedé.

7 Te téé yìndaha ñaha xii ñáyiu quide vico-á<sup>n</sup> ñí cudéé<sup>n</sup> víhí-dě sá dúcá<sup>n</sup> ñí quidé-yu, te ní tendaha-dě cue sandàdú-dé ní sáhá<sup>n</sup>-güedé ní sahní-güedé cue ñáyiu duca<sup>n</sup> ñí quide-á<sup>n</sup>, te ní sahmí-güedé nchaa vehe càa ñuú-yu.

8 Te sátá dúcá<sup>n</sup> te ní xáha<sup>n</sup>-dě xii dava-gá cue téé xìnu cuechi núú-dě: “Nchaa sa ndècu túha, te cue ñáyiu ní cáhá<sup>n</sup>-í cuhu<sup>n</sup> vico-a ní cùu ñá túú-gǎ tàú-yu sá cùhǔ<sup>n</sup>-yu.

9 Te chí cuáhá<sup>n</sup> nděni ní cuu te cáhá<sup>n</sup>-ndó nchàa ñáyiu na nàníhí-ndó ìchi na quixí-yu cuhú<sup>n</sup>-yu vico-a”, càchí-dé xǎha<sup>n</sup>-dě xii-güedé.

10 Te cue téé xìnu cuechi-á<sup>n</sup> ñí quee-güedé cuáhá<sup>n</sup>-güedé, te ní cáhá<sup>n</sup>-güedé nchaa ñáyiu ní naníhí-güedé ìchi, te cuèi ñáyiu váha iní-xi, te cuèi ñáyiu cuihna iní-xi, te ní chítǔ-yu núú cúú vico-á<sup>n</sup>.

11 Te sátá dúcá<sup>n</sup> te tée yìndaha ñáyiú quìde vico-á<sup>n</sup> ñí quíhu-dé xití vehe ní xíndéhé-dě cue ñáyiú ñùhu vico-á<sup>n</sup>, te ní xiní-dé ì<sup>n</sup> tée ñùtnahá tnuú-yu te ñá túú càa dóó-dě òtá ná cáá dǒó níhnú cuè ñáyiú ñùhu vico-á<sup>n</sup>.

12 Te ní xáha<sup>n</sup>-dě xii téé-á<sup>n</sup>: “¿Táta, nása ní cuu cuánguìhu-ò iha, te ñá túú càa dóó-n òtá ná cáá dǒó níhnú cuè ñáyiú ñùhu vico tñándaha-i?”, càchí-dé xáha<sup>n</sup>-dě xii téé-á<sup>n</sup>. Dico téé-á<sup>n</sup> ñà túú ní ñíhí-dě tñúhu cáhá<sup>n</sup>-dé.

13 Te tée yìndaha ñáyiú quìde vico-á<sup>n</sup> ñí xáha<sup>n</sup>-dě xii cue ñáyiú xìnu cuechi núú mèsá: “Chí tñí tēé-á<sup>n</sup> te dacùtu-ndo-dé, te queñuhu-ndo-dě ná quíhí<sup>n</sup>-dé cundecu-dé ì<sup>n</sup> xichi núú néé nǔú ìo ndoho-dé, te yàcá<sup>n</sup> ío ndáhyú-dé te òtá rúhñú-ñá cuu núhu-dé sá sàtú iní-dé sá ndóhó-dě”, càchí-dé xáha<sup>n</sup>-dě xii cue ñáyiú xìnu cuechi núú mèsá-á<sup>n</sup>.

14 Te duha ndùu cuendú càhá<sup>n</sup>-í chi ío cuéhé ñáyiú càhá<sup>n</sup> ñáhá Yá Ndiòxí xií-yu, dico sacú-ni-yu nduu táhǔ-yu cundecú-yu ndihí-gá –càchí-gá xáha<sup>n</sup>-gǎ xii-güedé.

### *Cuèndá impuèstú*

*(Mr. 12:13-17; Lc. 20:20-26)*

15 Te cue téé cùu fariséú ní sáhá<sup>n</sup>-güedé ì<sup>n</sup> xichi ní ndatnúhu-güedé nàcuáa cada-güedé datícánuu-güedé Jèsús núú tñúhu càhá<sup>n</sup>-gá cuèndá duca<sup>n</sup> ñíhí-güedé nàcuáa cada-güedé cacá<sup>n</sup> cuéchi-güedé cuèndá-gá.

16 Te ní tendaha-güedé ì<sup>n</sup> úú cue téé cùndihí-güedé, ndihí cue téé cùndihí té Hèrodés cuáhá<sup>n</sup>-güedé núú ndécú Jèsús. Te òré ní

quexìo-güedé núú ndécú-gă, te ní xáha<sup>n</sup>-güedě xii-gá:

—Mèstrú, ñihí-ndí tnúhu sá ïo ndáá càhá<sup>n</sup>-n, te càhá<sup>n</sup> ndáá-n ñacuáa càhá<sup>n</sup> Yă Ndiöxí cundecu-o ñùyíú-a, te cuëi ndëda-ni càa ñáyiu ï<sup>n</sup>-ni càhá<sup>n</sup>-n ndìhí-yu chi ñá túú quide cuendá-n cuëi ná ñáyiu cùú-yu.

17 Te cachí tnúhu xii-ndí, núu váha-ni quide-ndí sá chăhu-ndí té Cèsár téé ïo cùnuu cuendá impuèstú á<sup>n</sup> ñáhá —càchí-güedé xăha<sup>n</sup>-güedě xii-gá.

18 Dico Jèsús ní cutnùní iní-gá sá xító ndèé ñáhá-güedě xii-gá, núu ní xáha<sup>n</sup>-gă xii-güedé:

—Nchòhó cue téé dândahú méé-xí să quidé ndăá te ñá ndăá sá quidé ndăá-ndó, ¿ná cuendá xító ndèé ñáhá-ndó xì-í?

19 Chí dánèhé ñáhá xì-í ï<sup>n</sup> dîhú<sup>n</sup> să chăhu-ndo cuendá impuèstú núu nása càa —cachí-gá xăha<sup>n</sup>-gă xii-güedé.

Te ní dánèhé ñáhá-güedě xii-gá ï<sup>n</sup> dîhú<sup>n</sup> să nání dènariú.

20 Te òré ní xiní-gá dîhú<sup>n</sup>-ă<sup>n</sup> te ní xícá<sup>n</sup> tnúhú-gă núú-güedě, te xăha<sup>n</sup>-gă:

—Chí càchí tnúhu yoo núú-xi ndèé ndìhi yoo dîu-xi ndeé —càchí-gá xăha<sup>n</sup>-gă xii-güedé.

21 Te ní xáha<sup>n</sup>-güedě xii-gá:

—Núú tē Cèsár ndèé ndìhi dîu-dé —càchí-güedé xăha<sup>n</sup>-güedě xii-gá.

Te Jèsús ní xáha<sup>n</sup>-gă xii-güedé:

—Te núu duca<sup>n</sup> te chí nácuăha té Cèsár sá cúú cuendá-dé, te sá cúú cuendá méé Yă Ndiöxí te xiă<sup>n</sup> nacuăha-ndo-gă —càchí-gá xăha<sup>n</sup>-gă xii-güedé.

22 Te cue téé-á<sup>n</sup> ïo ní cuñúhu-güedé sá dúcá<sup>n</sup> ñí cáhá<sup>n</sup>-gá, te ní natnî-güedé ichi cuánuhú-güedé.

*Cuèndá cue ñáyiu ndoto*  
(Mr. 12:18-27; Lc. 20:27-40)

23 Te ñiu-ni nduu-ã<sup>n</sup> ñi quexìo ñi<sup>n</sup> úú cue tée cùu saducéú núú ndécú Jèsús. Te cue tée-á<sup>n</sup> ñà túú sàndáá iní-güedé sá ndótó cue ñáyiu ní xíhí, te ní xáha<sup>n</sup>-güedé xii-gá:

24 —Mèstrú, ndí Moisés ní cachí ndí sá ñuu ñi<sup>n</sup> tée ndècu ñadìhí-xi cuú-dé te quendóo ñadìhí-dé, te núu ñà túú ñehe-dé ní xõ ndìhi-a<sup>n</sup> te tée cùu ñaní-dé naquehe<sup>n</sup>-dé ñaha ní quendóo quèé-á<sup>n</sup> cuèndá coo ñehe-dé ndìhi-a<sup>n</sup> cuèndá ñaní-dé tée ní xíhí-á<sup>n</sup>.

25 Te ñuú-ndí-a ní xíndecu úsá tñàhá cue tée mee-ni ndí ñaní-güedé. Te tée díhna ní níhí ñadìhí-dé te ñà túú ní cùdí-dé cundecu-dé chi ní xíhí-dé, te ni ñi<sup>n</sup> ñehe-dé ñà túú ní xõ ndìhi ñadìhí-dé-á<sup>n</sup>. Te tée cùu uú ní nàquehe<sup>n</sup>-dé ñaha ní quendóo quèé-á<sup>n</sup>.

26 Dico ní xíhí tucu-dé, te ni ñi<sup>n</sup> tucu ñehe-dé ñà túú ní xõ ndìhi ñaha-á<sup>n</sup>, te ñiu-ni duca<sup>n</sup> ñi yáha tée cùu uní, te ní xínu ndí ùsá-güedé ní cándeca ñaha-güedé xii ñaha-á<sup>n</sup> dico ñiu-ni duca<sup>n</sup> ñi xíhí-güedé.

27 Te ndéé núú ñi ndìhi-ná te ní xíhí tñàhá ñadìhí-á<sup>n</sup>.

28 Te na sáá nduu ndòto-güedé ndìhi ñaha-á<sup>n</sup>, ¿te ndèdacàa-güedé ñadìhí-güedé cuu-a<sup>n</sup>-i? Chi ndí ùsá-güedé ní cándeca ñaha-güedé xii-a<sup>n</sup> — càchí-güedé xáha<sup>n</sup>-güedé xii-gá.

29 Te Jèsús ní xáha<sup>n</sup>-gã xii-güedé:

—Ní xíta nchòhó tñúhu càhá<sup>n</sup>-ndó, chi ñà túú xìní-ndó nàcuáa càhá<sup>n</sup> Yã Ndiõxí núú tütú-gá, te ni

ñà túú cùtnuní iní-ndó sã díú-gã ndácú-gã quidé-gã nchaandi túhú sá vãha.

<sup>30</sup> Te na cãchí tnúhu-í xii-ndo sã òré ná sàá nduu ndòto nchaa ñáyiú ní xíhí, te dàvá-án vã yõo-gá dasa<sup>n</sup> dẽhe yoco-xi chi vá yõo-gá candeca tnàha, chi cuu-ná-yu dàtná cue espíritú xínú cuèchi núú Yã Ndiõxí.

<sup>31</sup> ¿Te náa ñá túú quide cuendá-ndó nàcuáa càhá<sup>n</sup> Yã Ndiõxí núú tütú-gá núú càhá<sup>n</sup>-gá cuendá cue ñáyiú ní xíhí-ã<sup>n</sup>? Te duha cãchí-gá:

<sup>32</sup> “Yúhú cùu-í Ndiõxí tẽ Àbrahám, ndihí té Isàác, ndihí té Jácób”, duha cãchí-gá núú tütú-gá. Te cue tée-á<sup>n</sup> chi cuèi ní xíhí-güedé núú ñüyíú-a, dico sá cúú-xí Yã Ndiõxí chi ndècu vívú-ni-güedẽ. Chi ñu-gá cúú-gã Ndiõxí mee-ni cuè ñáyiú xĩndecu vívú, te ñá túú cùu-gá Ndiõxí cue ñáyiú ñá túú ndècu vívú —cãchí-gá xãha<sup>n</sup>-gã xii-güedẽ.

<sup>33</sup> Te sá dúcá<sup>n</sup> ñí cáhá<sup>n</sup>-gá ní xíi-gá cue tée-á<sup>n</sup>, te ío ní cuñúhu nchaa ñáyiú cuendá sá ïo váha ndùu tnúhu ní cáhá<sup>n</sup>-gá.

### *Tnúhu sá ïo-gá cúnùu*

*(Mr. 12:28-34)*

<sup>34</sup> Te cue tée cùu fariséú ní xiní-güedé ní sadí Jèsús yuhu cue tée cùu saducéú, chi ñá túú ní ñíhí-gã-güedé tnúhu cúñaha-güedẽ xii-gá, te cue tée cùu fariséú-á<sup>n</sup> ñí natacá-güedé te cuáhá<sup>n</sup>-güedé núú ndécú Jèsús.

<sup>35</sup> Te ï<sup>n</sup> tée cùu fariséú-á<sup>n</sup> ïo váha cùtnuní iní-dé nàcuáa ndùu nchaa tnúhu ní chídó tnùní ndíi Moisés te xito ndeé-dé Jèsús, te xãha<sup>n</sup>-dẽ xii-gá:

<sup>36</sup> —Mèstrú, cachí tnúhu ndèdacàa tnúhu sá ñí chídó tnùní ndíi Moisés ío-gá cúnùu cada-o —cachí-dé xãha<sup>n</sup>-dẽ xii-gá.

37 Te Jèsús ní xáha<sup>n</sup>-gǎ xii-dé:

—Duha càhá<sup>n</sup> tnúhu sá ïo-gá cúnùu: “Cuu iní-ndó Dǔtú Ndiǒxí Yaá cúú Ndiǒxí-ndó nì yuhu nì iní-ndó, te cani iní-ndó càda-ndo datná cuèní mée-gǎ, te mee-ni tnúhu váha cani iní-ndó nàcuáa cuu vii cuu váha-ndo nǔú-gǎ”,

38 duha càhá<sup>n</sup> tnúhu sá ïo-gá cúnùu.

39 Te duha càhá<sup>n</sup> tucu ìngá tnúhu cùu uú sá ïo cùnùu, te sa yatni ì<sup>n</sup>-ni cùu-xi ndìhi tnúhu díhna nuu, te càchí-xi: “Cuu iní-ndó tnàha ñáyíu-ndo dàtná cúú ìní-ndó mèe-ndo”, duha càhá<sup>n</sup> tnúhu cùu uú-á<sup>n</sup>.

40 Te cuèndá úú tnúhu-a ní cáá nchaa tnúhu ní cáhá<sup>n</sup> ndíi Moisés nàcuáa cada ñáyíu, te ñíu-ni cuèndá úú tnúhu-a ní cáá tnúhu ní cáhá<sup>n</sup> nchaa cue téé ní xóo cáhá<sup>n</sup> tnúhu Yá Ndiǒxí ndéé sanaha —càchí-gá xǎha<sup>n</sup>-gǎ xii-güedé.

*Yoo cùu Xítohó Jesucrístú*

*(Mr. 12:35-37; Lc. 20:41-44)*

41 Te ndècu duca<sup>n</sup>-ni cue téé cùu fariséú núú ndécú Jèsús.

42 Te ní xícá<sup>n</sup> tnúhú-gǎ núú-güedě, te xǎha<sup>n</sup>-gǎ:

—Cuèní-í cachí tnúhu-ndo yòo déhe-xi cùu Crístú Yaá tendaha Yǎ Ndiǒxí quixi ñuyíú-a —càchí-gá xǎha<sup>n</sup>-gǎ xii-güedé.

Te ní xáha<sup>n</sup>-güedě xii-gá:

—Déhe ndíi Dàvíí cúú Yàá-á<sup>n</sup> —càchí-güedé xǎha<sup>n</sup>-güedě xii-gá.

43 Te Jèsús ní xáha<sup>n</sup>-gǎ xii-güedé:

—¿Te nása càchí-tu-ndo sǎ dēhe ndíi Dàvíí cúú Crístú Yaá tendaha Yǎ Ndiǒxí quixi ñuyíú-a, te mee ndíi Dàvíí-á<sup>n</sup> nǐ dácáhú ìní ñáhá Espíritú Yǎ Ndiǒxí xii ndíi, te ní cachí ndíi sá Crístú Yaá tendaha Yǎ



Ndiöxí quixi ñuyíú-a cùu-gá Xítóhó ndíi? Te duha ní cachí ndíi:

<sup>44</sup> Dútú Ndiöxí ní xáha<sup>n</sup>-gã xii Yaá cúu Xítóhó-í:

“Ngóo xio cùha-í, te yúhú cada-í te nchaa sá cúu ũhú iní ñáhá xii-n canehe-xi sá yíññuhu núú-n.”

Duha ní xáha<sup>n</sup> Dútú Ndiöxí xii Yaá cúu Xítóhó-í, càchí ndíi.

<sup>45</sup> ¿Te nása cùu Cristú déhe ndíi Dàví, te mee ndíi ní cachí ndíi sá cúu-gã Xítóhó ndíi? —càchí Jèsús xáha<sup>n</sup>-gã xii-güedé.

<sup>46</sup> Te ni ñ<sup>n</sup>-güedé ñá túú-gã ní ñhí-güedě tnúhu cúñaha-güedě xii-gá. Te ndéé nduu-ã<sup>n</sup> ñà túú-gã ní cùyi-güedé ná tnúhu cáca<sup>n</sup> tnúhú-güedě núú-gã.

## 23

*Jèsús càhá<sup>n</sup>-gá cuendá cue téé cùu fariséú ndíi cuendá cue téé dàcuaha ñaha xii ñáyiu*

*(Mr. 12:38-40; Lc. 11:37-54; 20:45-47)*

<sup>1</sup> Te Jèsús ní cáhá<sup>n</sup> ndodo-gá núú nchàa ñáyiu, ndíi núú cué téé xica cuu ndíi-gá, te xáha<sup>n</sup>-gã:

<sup>2</sup> —Cue téé dàcuaha ñaha xii ñáyiu nchaa tnúhu ní chídó tnùní ndíi Moisés, ndíi cue téé cùu fariséú ndécú ndíi-güedé tnúhu ndee iní cáhá<sup>n</sup>-güedé nchaa tnúhu sá ñ chídó tnùní ndíi Moisés-á<sup>n</sup>.

<sup>3</sup> Te cada-ndo nàcuáa dànehé ñáhá-güedě xii-ndo, dico vá cáda-ndó dàtná xíquide-güedé, chi tucu ndùu tnúhu càhá<sup>n</sup>-güedé, te tucu quide-güedé.

<sup>4</sup> Te quide-güedé dàtná quidé ñáyiu dàcuido ñ<sup>n</sup> tnaha ñáyiu-xi ñ<sup>n</sup> sá ño véé, te mée-yu ni lùha ñá túú cuiní-yu cuidó-yu. Te duca<sup>n</sup> sàtnahá-xi cùu-güedé chi dànehé ñáhá-güedě xii-ndo nàcuáa cada-ndo,

dico mee-güedě chi ni lùha ñá túú cuíní-güedé cada-güedé nàcuáa dānehé ñáhá-güedě xii-ndo.

<sup>5</sup> Te mee-ni ndùcu-güedé nàcuáa quide-güedé cuendá quiní ñáyiú sá ïo cùu cahnu-güedé. Te ndèé xìndá sá ndèé ì<sup>n</sup> ũú tnúhu Yá Ndiöxí tneé-güedé ndihì ndaha-güedé, te tnàhá iní-güedé sá ïo-gá cunduu quèhé<sup>n</sup> xìndá-á<sup>n</sup> dàcúxí xìndá dava-gá ñáyiú. Te tnàhá tucu iní-güedé sá ïo-gá cunduu nàni núú dōó sácuĩhnu-güedé dàcúxí dōó sácuĩhnu dava-gá-yu.

<sup>6</sup> Te ndi tnahá òré sácōo vico, òré quihu-güedé mèsá caxi-güedé te ïo-gá cúdǐ iní-güedé cunucōo-güedé núú xilé núú sácōo cue tée cūnuu-gá, te diu-ni duca<sup>n</sup> quide tucu-güedé cuēi xití veñúhu.

<sup>7</sup> Te nchaa núú xícá cùu-güedé cuíní-güedé sá ndihì tnúhu yinñùhu cáhá<sup>n</sup> ndihì ñaha ñáyiú xii-güedé, te cuíní tucu-güedé sá cūñáhá-yu xii-güedé mèstrú.

<sup>8</sup> 'Dico nchòhó vá cūñaha-ndo xii ñáyiú sá cūñáhá-yu mèstrú xii-ndo, chi nchòhó ì<sup>n</sup>-ni cùu-ndo ndecu-ndo, chi duca<sup>n</sup> ì<sup>n</sup>dii-ni yúhú Yaá ní tendaha Yá Ndiöxí véxi ñuyíú-a cùu-í Mèstrú ndécú ndihì ñaha-í xii-ndo.

<sup>9</sup> Te ì<sup>n</sup>dii-ni Dútú Ndiöxí Yaá ndécú àndiu cuu-gá Tātá-ndó, núú xíá<sup>n</sup> vá càhá<sup>n</sup>-ndó sǎ dāva cue tée ñuyíú-a cùu-güedé tātá-ndó.

<sup>10</sup> Te ni vǎ cání iní-ndó càda-ndo nacuáa cáhá<sup>n</sup> ñáyiú sá cúnùu-ndo, chi ì<sup>n</sup>dii-ni yúhú Cristú Yaá ní tendaha Yá Ndiöxí véxi ñuyíú-a cūnuu-í.

<sup>11</sup> Te ñáyiú ïo-gá cúnùu ndecu ndihì-ndo, ñáyiú-á<sup>n</sup> cúy-yu ñáyiú xinu cuechi núú-ndó.

12 Te nchaa ñáyiú quíde cahnu mee-xi ñáyiú-án vǎ cúu-yu ñáyiú cùnunu, te nchaa ñáyiú ñá túú quíde cahnu mee-xi ñáyiú-án cunúú-yu.

13 "Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíi nchòhó cue tée cùu fariséú, cùu-ndo cue tée ío dándahú méé-xi sǎ quíde ndǎá te ñá ndǎá sǎ quíde ndǎá-ndó, te ndàhú ní cuu-ndo chi sàdí-ndó ìchi ñáyiú ñá dáñá-ndó ndíhu ndaha ñaha Yá Ndiöxí xii-yu, te ni mée-ndo ñá túú quíde-ndo nacúaa ndíhu ndaha ñaha-gá xii-ndo, te ni dàva-gá cue ñáyiú cuíní sǎ ndíhu ndaha ñaha-gá xii-yu ñá dáñá-ndó.

14 "Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíi nchòhó cue tée cùu fariséú, cúu-ndó cuè tée ío dándahú méé-xi sǎ quíde ndǎá te ñá ndǎá sǎ quíde ndǎá-ndó, te ndàhú ní cuu-ndo chi quèndeé-ndó vèhe cue ñáyiú quèé, te ío naha càhá<sup>n</sup> ndíi-ndo Yá Ndiöxí cuèndá cuíní-ndó sǎ vǎ yǒ cutnùní iní-xi nàcuáa quíde-ndo. Te sǎ dúcá<sup>n</sup> quíde-ndo te ío-gá ndoho-ndo núú ùhú núú ndàhú dàcúxí dàva-gá ñáyiú.

15 "Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíi nchòhó cue tée cùu fariséú, cúu-ndó cuè tée ío dándahú méé-xi sǎ quíde ndǎá te ñá ndǎá sǎ quíde ndǎá-ndó, te ndàhú ní cuu-ndo chi sàhni iní-ndó cuáhá<sup>n</sup>-ndó nděni ní cuu dàcahá<sup>n</sup>-ndó ñáyiú cuèndá cuíní-ndó tní-yu ichi ndècu-ndo. Te òré ná xínu iní-yu tní-yu ichi ndècu-ndo-án te uu<sup>n</sup>-gá cuíta ni-hnú-yu dàcúxí mée-ndo.

16 'Te nchòhó cúú-ndó dàtná cue ñáyiú cuàá, chi ñá cútnùní iní-ndó nàcuáa canu ichi-ndo ñáyiú, te ndàhú ní cuu-ndo chi càchí-ndó: “H̄n ñáyiú na càcunehe veñúhu càhnu sá ïo cùnūu oré cuíní-yu cutnùní iní tnàha ñáyiú-yu sá ndàá cadá-yu #n sá sání iní-yu cadá-yu, te vá cúú cuèchi xií-yu cuèi vá cadã-yu. Dico núu na càcu nehé-yu díhún cuàán yíhí xítí veñúhu-án te cuu cuèchi xií-yu te núu vá cadã-yu sá nĩ cachí-yu cadá-yu”, duha càchí-ndó.

17 'Nchòhó cúú-ndó cuè téé ío n̄i d̄iquí-xi, te cùu-ndo datná cue ñáyiú cuàá chi ñá tècú tnùní-ndó! Te vá càchí-ndó sã ïo-gá cùnūu díhún cuàán dàcúúxí veñúhu, chi d̄iu cuendá veñúhu-án nĩ cuu íí d̄ihún cuàán-án.

18 Te càchí tucu-ndo: “H̄n ñáyiú na càcunehe xító núú sácódó sã ndúú tãhú Yã Ndiõxí òré cuíní-yu cutnùní iní tnàha ñáyiú-yu sá ndàá cadá-yu #n sá sání iní-yu cadá-yu, te vá cúú cuèchi xií-yu cuèi vá cadã-yu, dico núu na càcu nehé-yu sá ndúú tãhú Yã Ndiõxí yódó n̄úú x̄ito-án te cuu cuèchi xií-yu te núu vá cadã-yu sá nĩ sani iní-yu cadá-yu”, duha càchí-ndó.

19 'Te cùu-ndo cue téé ío n̄i d̄iquí-xi, te cùu-ndo datná cue ñáyiú cuàá chi ñá tècú tnùní-ndó! Te vá cání iní-ndó sã ïo-gá nánd̄ih̄i sá ndúú tãhú Yã Ndiõxí sácódó n̄úú x̄ito núú sácódó tnàhí sá ndúú tãhú-gã-án dàcúúxí mèe x̄ito-án.

20 Chi nchaa ñáyiú duca<sup>n</sup> càcunehe xító-án, te tnàhá-ni sá yódó n̄úú-xi càcu nehé-yu òré duca<sup>n</sup> càhá<sup>n</sup>-yu.

21 Te nchaa ñáyiú duca<sup>n</sup> càcunehe veñúhu càhnu sá ïo cùnūu te ñá díú mèe-ni veñúhu càcu nehé-yu

òré duca<sup>n</sup> càhá<sup>n</sup>-yu, chi tnàhá-ni Yá Ndiöxí Yaá cúú cuendá veñúhu-á<sup>n</sup> cácu nèhé-yu òré duca<sup>n</sup> càhá<sup>n</sup>-yu.

22 Te nchaa ñáyiú cãcunehe andiú cuendá cutnùnì iní tnàha ñáyiú-yu sá ndàá cadá-yu ì<sup>n</sup> sá sání iní-yu cadá-yu, te ñá díú mèe-ni andiú cacu nehé-yu chi tnàhá-ni núú núcõo Yá Ndiöxí táxí tnùnì-gá cácu nèhé-yu òré duca<sup>n</sup> càhá<sup>n</sup>-yu, te tnàhá méé-gã cácu nèhé-yu òré duca<sup>n</sup> càhá<sup>n</sup>-yu.

23 Te nchòhó cue téé dàcuaha ñaha xii ñáyiú nchaa tnúhu ní chídó tnùnì ndíi Moisés, ndihi nchòhó cue téé cùu fariséú, cúú-ndó cuè téé ío dándahú méé-xí sã quidé ndãá te ñá ndàá sá quidé ndãá-ndó. Te cuèi núú ùxí xichi yúcu mèntá nihí-ndó, te sãñaha-ndo ì<sup>n</sup> xichi xii Yá Ndiöxí, te ñiú-ni duca<sup>n</sup> quide-ndo yúcu nání àní, ndihi yúcu nání còminú, dico ndàhú ní cuu-ndo chí ñá túú quide cuendá-ndó nàcuáa càhá<sup>n</sup> nchaa tnúhu sá ïo-gá cúnùu sanu ichi ñaha xii-ndo, te tnúhu-á<sup>n</sup> cãchí-xi sá ïo xini ñuhu-xi cada ndáá-ndó cùndecu-ndo, te cundàhú iní-ndó cuè tnaha ñáyiú-ndo, te quindáá iní-ndó Yá Ndiöxí, te cada-ndo nchàa nacuáa ndùu tnúhu càhá<sup>n</sup>-ndó, te nchaa tnúhu-á<sup>n</sup> cúú-xí tnúhu sá ïo cùnùu xini ñuhu-xi cada-ndo nacuáa càhá<sup>n</sup>-xi, dico vã dãnã ndèé-ndó càda-ndo nchaa ñava-gã nàcuáa càhá<sup>n</sup> tnúhu sá sánú ìchi ñaha xii-ndo.

24 Te nchòhó cúú-ndó dàtná cue ñáyiú cuáá, chí ñá túú cùnùnì iní-ndó nàcuáa canu ichi-ndo ñáyiú, chí quide cuendá-ndó mèe-ni nchaa tnúhu sá ñà túú ïo cùnùu, dico nchaa tnúhu sá ïo-gá cúnùu xini ñuhu-xi cada cuendá-ndó ñà túú quide cuendá-ndó!

25 'Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi nchòhó cue tée cùu fariséú, cùu-ndo cue tée ío dándahú méé-xí sã quidé ndǎá te ñá ndǎá sá quidé ndǎá-ndó. Te ndàhú ní cuu-ndo chi cùu-ndo datná cue ñáyiú nàquete sátá-ni tàsá<sup>n</sup> ndíhi sátá-ni còhó te xití-xi càndehe caduha-ni. Te duca<sup>n</sup> sǎtnahá-xi cùu-ndo chi mee-ni sã ndécú ndíhi tnahá ñáyiú-ndo ñùhu iní-ndó, te nándi dándahú-ndõ-yu te quèhe<sup>n</sup>-ndo sá ndécú ndíhi-yu.

26 Te nchòhó cue tée cùu fariséú, cúú-ndó dàtná cue ñáyiú cuáá, chi ñá túú cùtnuní iní-ndó nàcuáa ndùu sá quidé-ndó. Te ío xìni ñuhu-xi sá cáda-ndó nàcuáa nduu ndoo nduu nine iní-ndó cuendá ndacu-ndo càda-ndo sá vǎha, te xíǎ<sup>n</sup> nùu chí cáda dàtná xíquide ñáyiú nàquete ndaa xití tàsá<sup>n</sup> ndíhi ndàa xití cóhó.

27 'Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi nchòhó cue tée cùu fariséú, cùu-ndo cue tée ío dándahú méé-xí sã quidé ndǎá te ñá ndǎá sá quidé ndǎá-ndó. Te ndàhú ní cuu-ndo chi cùu-ndo datná núú yíndǔxi ndíyi núú nì cuáha vii te ní nacáhyú sã cuixí<sup>n</sup>, dico xití yaú-á<sup>n</sup> chi càndehe caduha chi mee-ni yiqui ndíyi ñùhu.

28 Te duca<sup>n</sup> sǎtnahá-xi cùu-ndo chi sànuu sá cúú-ndó cuè tée váha dico iní-ndó chi mee-ni sã cuèhé sá dúhá ñùhu, te ío dándahú-ndó mèe-ndo sá quidé ndǎá-ndó te ñá ndǎá sá quidé ndǎá-ndó.

29 'Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi nchòhó cue tée cùu fariséú, cúú-ndó cuè tée ío dándahú méé-xí sã quidé ndǎá te ñá ndǎá sá quidé

ndää-ndó. Te ndàhú ní cuu-ndo chi càdúha-ndo nchàa núú nǐ nguíndǔxi cue téé ní xóo cáhá<sup>n</sup> tnúhu Yá Ndiǒxí ndéé sanaha, te ío vii quide-ndo nchaa núú sǎ nǐ cuáha núú yíndǔxi cue ñáyiu ní quide váha ní xíndecu ñuyíú-a.

<sup>30</sup> Te càchí-ndó: “Te núu dìcò nchoo ni xíndecu-o cǔtnàhá ní xíndecu cue ñaní tnáhá-ó ndéé sanaha, te vá chítnàhá-ó-güedě cahni-o cuè téé ní xóo cáhá<sup>n</sup> tnúhu Yá Ndiǒxí dàvǎ-á<sup>n</sup> ní cùu”, duha càchí-ndó.

<sup>31</sup> Te sá dúcá<sup>n</sup> càhá<sup>n</sup>-ndó, te xiǎ<sup>n</sup> cǔtnùnǐ sá ñ<sup>n</sup>-ní cùu-ndo ndihǐ cue ñaní tnáhá-ndó cuè téé ní xíndecu ndéé sanaha, cue téé ní sahnǐ ñaha xii cue téé ní cáhá<sup>n</sup> tnúhu Yá Ndiǒxí dàvǎ-á<sup>n</sup>.

<sup>32</sup> Te núu duca<sup>n</sup> te chí dǎxínu cava chiu<sup>n</sup> ní tausaha-güedě.

<sup>33</sup> Te nchòhó cúú-ndó cuè téé ío cuihna ìní-xi, chi cùu-ndo datná cóo děé<sup>n</sup>! Te nchòhó vá nìhí-ndó nàcuáa cada-ndo càcu nihnu-ndo núú ùhú núú ndàhú.

<sup>34</sup> Te cuèndá xiǎ<sup>n</sup> nǔu tendaha-ǐ cue téé càhá<sup>n</sup> tnúhu Yá Ndiǒxí quixi núú-ndó, ndihǐ cue téé cùu mestrú danèhé ñáhá xii-ndo tnúhu-gá, ndihǐ cue téé ío váha cǔtnunǐ ìní-xi cuèndá cáhá<sup>n</sup>-güedě tnúhu-gá núú-ndó. Dico nchòhó chi da cùu úhú ìní-ndó-güedě, chi dava-güedě cahni-ndo-güedě, te dava-güedě cata caa-ndo-güedě núú cùrúxí, te dava-güedě cani-ndo-güedě xití veñúhu, te ndi tnahá ñuú ndi tnahá ñuú quíh<sup>n</sup>-ndó nànducu-ndo-güedě cuèndá cada úhú ìní-ndó-güedě.

<sup>35</sup> Te sá dúcá<sup>n</sup> ná càda-ndo, te ndadíquí-ndó cuè téé ní quide ndáá ní xíndecu ní xihí ní sahnǐ ñaha cuè ñaní tnáhá-ndó. Te ndéé ndíi Abél téé ío váha ní quide ndáá ní xíndecu ní

sahni-güedé ndadíquí-ndó, ndihi nchaa dava-gá cue téé ní sahani-güedé, ndihi ndéé ndíi Zacàriá déhe ndíi Berèquiás téé ní sahani-güedé ndéé núú nǐ ndihi-ná ndadíquí-ndó, te ndíi-á<sup>n</sup> nǐ sahani-güedé mei tnùú veñúhu càhnu sá ìo cùnuu ndihi xító núú sácódó sǎ ndúú tǎhú Yǎ Ndiǒxí, te nchaa cue téé-á<sup>n</sup> ndadíquí-ndó chi dàtná tnúhu mee-ndo nǐ sahani-ndo cuè téé-á<sup>n</sup>, chi ñiu-ni ñaní tnáhá mèe-ndo duca<sup>n</sup> ní sahani ñaha xì-güedé.

<sup>36</sup> Te na càchí tnúhu ndáá-í xii-ndo sǎ nchàa cue téé ní quide ndáá ní xíndecu ní sahani-güedé, nchaa cue téé-á<sup>n</sup> ndadíquí nchaa ñáyi ndècu vitna — cachí-gá xǎha<sup>n</sup>-gǎ xii-güedé.

*Jèsús càhá<sup>n</sup>-gá cuèndá ñáyi ñuú Jerusàlén  
(Lc. 13:34-35)*

<sup>37</sup> Te xǎha<sup>n</sup> Jèsús xii ñáyi ñuú Jerusàlén:

—Nchòhó ñáyi ñuú Jerusàlén sàhni-ndo cue téé ní tendaha Yǎ Ndiǒxí véxi càhá<sup>n</sup> tnúhu-gá núú-ndó, te mee-ni ndihi yúú sáhní-ndó dàva-güedé. ¡Te yúhú titní xito ní cuiní-í coto ñaha-ǐ xii-ndo dàtná quidé nchùxi xito-güedi déhe-güedi sàquíhi-güedi xití ndíxí<sup>n</sup>-güedi, dico nchòhó ñá túú ní cuiní-ndó, te ñiu-ni duca<sup>n</sup> sàni iní-í ndéé vitna!

<sup>38</sup> Te na càchí tnúhu ndáá-í xii-ndo sǎ sàá nduu te ío ndàhú yáha ñuú-ndó, te vǎ cùndècu-gá-ndó.

<sup>39</sup> Te na càchí tnúhu tucu-í xii-ndo sǎ vǎ quini ñáhá-gǎ-ndó xì-í, dico sáá nduu quini ñáhá tùcu-ndo, te dàvá-á<sup>n</sup> cachí-ndó: “Ío càhnu cuu Yaá ní tendaha Dütú Ndiǒxí véxi”, duha cachí-ndó —càchí-gá xǎha<sup>n</sup>-gǎ xii-yu.



## 24

*Jèsús càchí-gá sá ngóyó veñúhu*

*(Mr. 13:1-2; Lc. 21:5-6)*

<sup>1</sup> Te Jèsús ní quee-gá veñúhu càhnu sá ïo cùnunu, te mei òré ní quehe<sup>n</sup>-gá ichi quíhí<sup>n</sup>-gá ì<sup>n</sup> xichi, te ní sándehe yatni cue téé xìca cuu ndihí-gá dìñi-gá, te xáha<sup>n</sup>-güedě xii-gá:

—Cundehe veñúhu-a nă ïo váha ní sáá — càchí-güedě xáha<sup>n</sup>-güedě xii-gá.

<sup>2</sup> Te Jèsús ní xáha<sup>n</sup>-gă xii-güedé:

—Na càchí tnúhu ndáá-í xii-ndo să ncháá să ndéhé-ndó-á vitna saá nduu te vá cündüu-gá-xi dàtná cáá-xí vitna, chi ní ì<sup>n</sup>-gá yúú vă códó nchìhi tnaha-xi chi ndihí ngoyo —càchí-gá xáha<sup>n</sup>-gă xii-güedé.

*Nàcuáa cada-xi nduu ta cùyatni naa ñuyúú-a*

*(Mr. 13:3-23; Lc. 21:7-24; 17:22-24)*

<sup>3</sup> Te Jèsús ní sáá-gá ndihí cue téé xìca cuu ndihí-gá yucu Ólívú, te xía<sup>n</sup> nǐ ngóo-gá te núú núcõo-gá-á<sup>n</sup> nǐ sáhá<sup>n</sup> cue téé xìca cuu ndihí-gá, te dayuhu nǐ xáha<sup>n</sup>-güedě xii-gá:

—Cuìní-ndí cachí tnúhu-n nă nduu dùca<sup>n</sup> cada-xi ngoyo veñúhu càhnu sá ïo cùnunu, ndihí nándí cùu sá cádá-xí òré sa ta cùyatni nduu quixi tucu-n ñuyúú-a, ndihí òré sa ta cùyatni naa-xi —cachí-güedě xáha<sup>n</sup>-güedě xii-gá.

<sup>4</sup> Te Jèsús ní xáha<sup>n</sup>-gă xii-güedé:

—Ío quíhí iní-ndó cùndecu-ndo cuendá sá vă yõo dandàhú ñáhá xii-ndo.

<sup>5</sup> Chi ïo cuéhé cue téé coo ñuyúú, te danàni-güedé méé-güedě dàtná nánì-í, te cachí-güedé: “Yúhú cùù-í Crìstú Yaá ní tendaha Yă Ndiõxí véxi

ñuyíú-a”, duha cachí-güedé. Te sá dúcá<sup>n</sup> cǎhá<sup>n</sup>-güedé te ío vai ñáyiú dandàhú-güedé.

<sup>6</sup> Te níhí-ndó tñuhu nàá-güedé ndëni ní cuu, dico vá yùhú-ndó chi dacuitíí sǎ dúcá<sup>n</sup> càda-xi, dico vátá sàá-gá nduu nàa ñuyíú òré duca<sup>n</sup> càda-xi.

<sup>7</sup> Chi cue téé ì<sup>n</sup> nàció<sup>n</sup> nàá-güedé ndíhi cue téé ingá nàció<sup>n</sup>, te titní ñuú ngüíta-güedé nàá-güedé, te titní xichi ñuyíú coo tnamá, te titní tucu xichi ñuyíú quixi cuéhé, te titní tucu xichi ñuyíú ïo níhi tnáa.

<sup>8</sup> Te nchaa xǎ<sup>n</sup> cuu-xi tnúndòho sá vítná vǎha vǎha quèsaha sá cúú-xí cuè ñáyiú xǎndecu ñuyíú.

<sup>9</sup> Te cue ñáyiú na cùu úhú iní ñáhá xii-ndo cuáha cuendá ñáhǎ-yu núú cuè téé cùchiu<sup>n</sup> cuendá caniha-güedě xii-ndo, te dava-ndo càhni ñaha-güedé, te nchaa ñáyiú cuu úhú iní ñáhǎ-yu xii-ndo sǎ cuendá-í.

<sup>10</sup> Te dàvá-á<sup>n</sup> ïo vai ñáyiú dàñá-yu sá sàndáá iní-yu Yá Ndiǒxí, te ngóo-yu cuu úhú iní tnáhǎ-yu, te cuáha cuendá tnáhǎ-yu núú cuè téé cùchiu<sup>n</sup>.

<sup>11</sup> Te ío vai cue téé cachí-güedé sá cǎhá<sup>n</sup>-güedé tnúhu Yá Ndiǒxí te ñá ndáa sá cǎhá<sup>n</sup>-güedé tnúhu-gá, te duca<sup>n</sup> ïo vai ñáyiú dandàhú-güedé.

<sup>12</sup> Te dàvá-á<sup>n</sup> cunuu mèe-ni nchaa sá cuéhé sá dúhá càdá-yu, te vai-yu vá cúú iní-gá-yu tnàha ñáyiú-yu.

<sup>13</sup> Dico nchaa ñáyiú na càda ndee-ni iní canchicú<sup>n</sup> nihnu ñaha-ni xì-í, ñáyiú-á<sup>n</sup> naníhí tǎhú-yu.

<sup>14</sup> Te nihí ñuyíú quǎ<sup>n</sup> ñáyiú cǎhá<sup>n</sup>-yu tnúhu vǎha, tnúhu sá cǎhá<sup>n</sup> nàcuáa ndíhu ndaha ñaha Yá Ndiǒxí xii ñáyiú, te sátá ná nihí nchaa ñáyiú tnúhu-á<sup>n</sup> te naa ñuyíú.

<sup>15</sup> Te ndí Dàniél téé ní xóo cǎhá<sup>n</sup> tnúhu Yá Ndiǒxí

ndéé sanaha nǐ chídó tnùnǐ ndíi cuendá ì<sup>n</sup> sá dáquèè tihú Yă Ndiǒxí cundecu ì<sup>n</sup> xichi núú nǐ cuu íí, te xiǎ<sup>n</sup> cada-xi sá vǎ cúndècu-gá ni ì<sup>n</sup> ñáyiú xiǎ<sup>n</sup>. Te cada cuendá váha-ndo nàcuáa ní cáhá<sup>n</sup> ndíi, chi nduu na quíní-ndó xiǎ<sup>n</sup> cundecu-xi núú dúcá<sup>n</sup> nǐ cuu íí,

16 te dàvá-á<sup>n</sup> nchaa ñáyiú xǐndecu distritú Jùdeá xíní ñùhu-xi cunú-yu quíhí<sup>n</sup>-yu xití yucu.

17 Te nchaa ñáyiú ndáa ndódó dǐquí véhé-xí vǎ ndǐhu-gá-yu vehé-yu quehé<sup>n</sup>-yu ì<sup>n</sup> ndachíú<sup>n</sup>-yu canehé-yu quíhí<sup>n</sup>.

18 Te nchaa ñáyiú cuáhá<sup>n</sup> yucu vá nùhú-gá-yu vehé-yu cúnúquehé<sup>n</sup>-yu dóǒ-yu.

19 ;Te ndàhú ní cuu nchaa ñáyiú dǐhí ñùhú dǐhe-xi, ndǐhi cue ñáyiú dǐhí xǐndeca déhe vitna sàdi na saá nduu dùca<sup>n</sup> cada-xi!

20 Te nchòhó, chí càcá<sup>n</sup> táhú nǔú Yă Ndiǒxí cuendá sá vǎ dúcá<sup>n</sup> ndòho-ndo yóó quidé vǐxi<sup>n</sup>-xi, te ni vǎ dúcá<sup>n</sup> ndòho-ndo nduu cuu-xi nduu nde-tatú-ndó.

21 Chi dàvá-á<sup>n</sup> coo tnúndòho cahnu vihi ñuyíú, te vátá ì<sup>n</sup> ndùu-gá coo tnúndòho cahnu vihi-á<sup>n</sup> ndèé cútnàhá ní ngáva ñuyíú, chi dǐu-ni dàvá-á<sup>n</sup> coo tnúndòho cahnu vihi-á<sup>n</sup>, te ni nǔú cuáhá<sup>n</sup> núú vǐxi vǎ cóo-gǎ tnúndòho-á<sup>n</sup>.

22 Te Yá Ndiǒxí càchí-gá sá vǎ ìo vài nduu coo tnúndòho cahnu vihi-á<sup>n</sup> sǎ cuendá nchaa ñáyiú ní cáhá<sup>n</sup>-gá cundecu ndǐhi-gá. Chi núú vài nduu na coo tnúndòho-á<sup>n</sup> te vǎ yǒo cácu nihnu.

23 Te núú lò ñáyiú càchí-yu xii-ndo: “Chí cúndèhe iha, chi iha ní quexìo Cristú Yaá ní tendaha Yă Ndiǒxí véxi ñuyíú-a”, àdi cachí-yu: “Chí cúndèhe

yacá<sup>n</sup> chi yàcá<sup>n</sup> ndécú-gǎ”, càchí-yu ña. Te vá quìndáá iní-ndó tnũhu càhá<sup>n</sup>-yu.

<sup>24</sup> Chi coo cue tée cachí-güedé sá cúú-güedě Yaá ní tendaha Yǎ Ndiõxí véxi ñuyíú-a, te dava-güedé cachí-güedé sá cúú-güedě cue tée càhá<sup>n</sup> tnúhu Yá Ndiõxí dico ñá ndàá sá cúú-güedě cue tée càhá<sup>n</sup> tnúhu-gá, te cada-güedé titní núú sǎ vǎ yõo tnàhí ndàcu cada cuendá dandàhú-güedé ñáyiu. Te cani iní-güedé dandàhú-güedé ndéé cue ñáyiu ní cáhá<sup>n</sup> Yǎ Ndiõxí cundecu ndihí-gá.

<sup>25</sup> Te duha ndùu tnúhu càhá<sup>n</sup>-í dátũha ñaha-ĩ xii-ndo.

<sup>26</sup> Te núu càchí-yu xii-ndo: “Xití yucu-ǎ<sup>n</sup> ní quexio Yaá ní tendaha Yǎ Ndiõxí véxi ñuyíú-a”, càchí-yu. Te vá quìndáá iní-ndó quĩhí<sup>n</sup>-ndó, àdi cachí-yu: “Vehe-ǎ<sup>n</sup> ndécú Yáá ní tendaha Yǎ Ndiõxí véxi ñuyíú-a”, càchí-yu. Te vá quìndáá iní-ndó tnũhu càhá<sup>n</sup>-yu.

<sup>27</sup> Chi dàtná xíní nchaa ñáyiu quide-xi oré sàá ndúté dáyehé-xi ní càa xico ñuyíú ñuca<sup>n</sup> càda-xi oré quixi tucu yúhú Tée cùu ñaní tnáhá-ndó nchaa-ndo chi nchaá-yu quiní ñáhǎ-yu xii-í.

<sup>28</sup> Te nchòhó xíní-ndó sǎ ncháá nũú yúcu yìqui cuñú ní xihí te yàcá<sup>n</sup> tàcá nchaa ndixíí xéxí-güedi.

*Nàcuáa cada-xi òré quixi tucu Tée cùu ñaní tnáhá cuè ñáyiu*

*(Mr. 13:24-37; Lc. 21:25-33; 17:26-30, 34-36)*

<sup>29</sup> Te na yǎha-ni coo tnúndòho cahnu vihi-á<sup>n</sup>, te vá dáyehé-gá nchíanchii, te ni vǎ dáyehé-gá yóó, te ngoyo nchaa chódíní ndéé andiü, te quidi-xi andiü

<sup>30</sup> nàcuáa cutnùní iní ñáyiu sá sà véxi yúhú Tée cùu ñaní tnáhǎ-yu nchaá-yu. Te cue ñáyiu

nihíi ñuyíú ndăhyú-yu sá ndihú iní-yu òré duca<sup>n</sup> càda-xi, te nchaá-yu quiní ñáhă-yu xii-í quee-í andiũ quixi-í ichi xití vícô, te quiní-yu sá ïo càhnu cuu-í, te quide-í nchaá sá văha.

<sup>31</sup> Te tauchiu<sup>n</sup>-í cue espíritú xínú cuèchi núu-í níhi tiú-xi cútú nadatácá-xi nchaá ñáyiu ní cáhá<sup>n</sup>-í chitnahá ñáhá xii-í xĩndecu ni càa xico ñuyíú.

<sup>32</sup> Te nchòhó sa xini-ndó năcuáa quide yutnu ngúxí, chi yutnu-á<sup>n</sup> ndúú yùte núú dìté-xi te nátáhú ndaha-xi. Te òré duca<sup>n</sup> quide-xi te càchí-ndó să sà ní cuyatni nuu cahni.

<sup>33</sup> Te diu-ni duca<sup>n</sup> sătnahá-xi cada-xi ñuyíú-a òré ná quini-ndó càda-xi nchaá nacuáa ní cáhá<sup>n</sup>-í, te cutnùní iní-ndó să sà ní cuyatni vii-nă nduu năa ñuyíú.

<sup>34</sup> Te na càchí tnúhu ndáá-í xii-ndo să òré vátá cùú-gá nchaá ñáyiu xĩndecu ñuyíú-a vitna, te cada-xi nchaá năcuáa ní cáhá<sup>n</sup>-í.

<sup>35</sup> Te andiũ ndihí ñuyíú-a chi ndihí nihnu-xi, dico tnúhu-í chi vá ndíhí nihnu-xi chi cùu-xi tnúhu ndáá cui<sup>ti</sup>.

<sup>36</sup> Dico ñá túú cùtnuní ná nduu quixi tucu-í, te ni ñà túú cùtnuní ná òré chi vá yôo xini, te ni cuè espíritú xínú cuèchi núú Yă Ndiöxí ñá túú xini-xi ná nduu quixi-í, te ni mēe yúhú Tēe cùu Déhe Dútú Ndiöxí ñá túú xini-í ná nduu quixi tucu-í, chi ñdii díi-ni mee-gă xini-gă nŭu ná nduu quixi-í.

<sup>37</sup> Te nduu na quixi tucu yúhú Tēe cùu ñanı tnáhá-ndó nchăa-ndo ñuyíú-a te cada-xi dàtná ní quide-xi cútnahá ní xĩndecu ndíi Nöé.

<sup>38</sup> Chi nchaá ñáyiu ní xĩndecu dàvá-á<sup>n</sup> òré vátá ndáá-gă ndute ñuyíú, te xèxí-yu xihí-yu quidé-yu, te davá-yu ió-yu vico tnăndaha, te

davá-yu dàsá<sup>n</sup>-yu déhe yòcò-yu candeca ñaha tée, te duca<sup>n</sup>-ni xíquidé-yu ndée ní sáá nduu cuãguee té Nöé xití bàrcú.

<sup>39</sup> Te ñá túú ní cùtnuní iní-yu nàcuáa cada-xi ñuyíú ndée ní sáá nduu ñi ngüita-xi ní cuu<sup>n</sup> dáú ñi ndaa ndute ñuyíú ñi dánáá ñàha-xi xíí-yu. Te ñu-ni duca<sup>n</sup> sãtnahá tucu-xi cada-xi nduu na quixi tucu yúhú Tée cùu ñaní tnáhã-yu nchaá-yu ñuyíú-a, chi nduu ñà túú ña yíhí ìní-yu te quixi tucu-í.

<sup>40</sup> Te dàvá-á<sup>n</sup> ñuu úú tnáhá cue tée yíhi-güedé xití yucu, te ñ<sup>n</sup>-dé ndanchita te ñ<sup>n</sup>-dé quendóo.

<sup>41</sup> Àdi úú ñáyiu ñíhí nchícõ-yu ñ<sup>n</sup>-ni vèhe, te ñ<sup>n</sup>-yu ndanchita te ñ<sup>n</sup>-yu quendóo.

<sup>42</sup> Te duha ndùu tnúhu càhá<sup>n</sup>-í cuendá nchòhó cundecu túha-ndo, chi ñá túú xìní-ndó ña òré quixi tucu yúhú Yaá cúú Xítóhó-ndó.

<sup>43</sup> Te nchòhó xìní-ndó sã ñuu ñ<sup>n</sup> tée cùu xítóhó vehe xìní-dé ña òré cúú-xí ñiú quíhu ñadúhú vehe-dé duhu-güedě, te quíhi iní-dé cundecu-dé cuendá sã vã dáñá-dě quíhu ñadúhú-ã<sup>n</sup> vehe-dé duhu-güedě, dico ñá túú xìní-dé.

<sup>44</sup> Te duha càhá<sup>n</sup>-í chi nchòhó xìní ñùhu-xi cundecu túha-ndo, chi na cuáhá<sup>n</sup> òré ñá túú ña yíhí ìní-ndó quèxio yúhú Tée cùu ñaní tnáhá-ndó nchàa-ndo.

*Cuendá ñ<sup>n</sup> tée xínu cuechi  
(Lc. 12:41-48)*

<sup>45</sup> Te na càni-í ñ<sup>n</sup> cuendú núú-ndó. ñ<sup>n</sup> tée xínu cuechi núú ñ<sup>n</sup> patróó<sup>n</sup> cúú-dě ñ<sup>n</sup> tée ío váha tècú tnùní, te quide ndáá-dé ndécú-dě. Te ñ<sup>n</sup> xito ní dándõ ndaha ñàha patróó<sup>n</sup>-dě xii-dé nchaa cue ñáyiu ndècu vehe-dé cuendá coto ñaha-dě xíí-yu

cuãñaha-dě sá caxĩ-yu òré tàú-xi caxí-yu, te tée cùu patróó<sup>n</sup>-á<sup>n</sup> nĩ quee-dé cuáhá<sup>n</sup>-dé.

<sup>46</sup> Te váha táhú tẽe xìnu cuechi-á<sup>n</sup> te núu nděcuu-dé quidé-dě nchaa nàcuáa ní xáha<sup>n</sup> pàtróó<sup>n</sup>-dě cada-dé mei òré ní nasáá pàtróó<sup>n</sup>-dě-á<sup>n</sup>.

<sup>47</sup> Te na cächí tnúhu ndáá-í xii-ndo sã tẽe cùu patróó<sup>n</sup>-dě-á<sup>n</sup> cũñaha-dě xii-dé sá quíndàha-dé nchaa sá ndécú ndĩhi-dé.

<sup>48</sup> Dico núu tée xìnu cuechi-á<sup>n</sup> ní cùu-dé ì<sup>n</sup> tée cuihna ìní-xi, te ngóo-dé canì iní-dé sá cùyaa patróó<sup>n</sup>-dě vá násáa ndĩhi-dé.

<sup>49</sup> Te ngúíta-dé canì-dé nchaa dava-gá cue ñáyiu xìnu cuechi ndihi-dé, te ngóo-dé caxi-dé coho-dé cada-dé ndihi nchaa cue tée quihu.

<sup>50</sup> Te ì<sup>n</sup> nduu òré ñá túú yìhi iní-dé nasáá pàtróó<sup>n</sup>-dě,

<sup>51</sup> te ío dandòho ñaha patróó<sup>n</sup>-dě xii-dé, chi daquìhí<sup>n</sup> ñáhá-dě xii-dé núú xĩndecu cue ñáyiu ní cachí sá nĩ quide ndáá te ñá ndáá sá nĩ quide ndáá-yu. Te duca<sup>n</sup> sãtnahá-xi dandòho ñaha Yá Ndiõxí xii ñáyiu, chi daquìhí<sup>n</sup> ñáhá-gã xií-yu ì<sup>n</sup> xichi núú ío ndohó-yu te yàcá<sup>n</sup> ío ndáhyú-yu, te dícó rúhñú-nã cuu núhu-yu sá sàtú iní-yu sá ndóhõ-yu —cächí-gá xáha<sup>n</sup>-gã xii-güedé.

## 25

### *Cuëndá úxí ñáyiu dñí*

<sup>1</sup> Te xáha<sup>n</sup> tucu Jesús xii-güedé:

—Na cànì-í ì<sup>n</sup> cuëndú núú-ndó nàcuáa tecú tnùnì-ndó nàcuáa cada-xi òré ndíhu ndaħa ñaha Yá Ndiõxí xii ñáyiu. Te úxí tnàhá ñáyiu dñí ñáyiu cuechi nĩ quehé<sup>n</sup>-yu lintérnã-yu, te cuáhá<sup>n</sup>-yu ì<sup>n</sup>

xichi núú cóó vico tnándaha cuendá cundetú-yu quexìo téé tnándaha.

<sup>2</sup> Te úhú<sup>n</sup> ñáiyu cuechi-ǎ<sup>n</sup> ïo váha cùtnuní iní-yu, te úhú<sup>n</sup>-yu ñáhá.

<sup>3</sup> Te ndi ùhú<sup>n</sup> ñáiyu cuechi dùca<sup>n</sup> ñá túú cùtnuní iní-xi-á<sup>n</sup> ñà túú ní cǎnehé-yu sá nděe lintéernǎ-yu.

<sup>4</sup> Dico ndi ùhú<sup>n</sup> ñáiyu cuechi cùtnuní iní-xi-á<sup>n</sup> néhě-yu sá nděe lintéernǎ-yu.

<sup>5</sup> Te téé tnándaha-á<sup>n</sup> cùyàa-dé quexìo-dé núú ndétú ñàhá-yu-á<sup>n</sup>, te ñini dùca<sup>n</sup> cuyaa-dé ní tñii ñaha sàní xii-yu ní xidí-yu.

<sup>6</sup> Te cùu-xi datná dava niú níhi ní cáhá<sup>n</sup> dava-gá ñáiyu, te càchí-yu: “Sa véxi téé tnándaha, chí táquèe quehé quehe<sup>n</sup> cuendá-ndó-dě”, càchí-yu.

<sup>7</sup> Te ndi ùxi ñáiyu cuechi-ǎ<sup>n</sup> ñi ndacóo-yu quide túha-yu lintéernǎ-yu.

<sup>8</sup> Te ndi ùhú<sup>n</sup> ñáiyu cuechi ñà túú cùtnuní iní-xi-á<sup>n</sup> ñi xáhǎ<sup>n</sup>-yu xii cue ndi ùhú<sup>n</sup> ñáiyu cùtnuní iní-xi-á<sup>n</sup>: “Chí táxi nùu luha sá nděe lintéerná-ndó ná nděe lintéerná-ndí chi ñá cuini-xi cáyú mee-ni ndàhvá”, càchí-yu xáhǎ<sup>n</sup>-yu.

<sup>9</sup> Te cue ñáiyu cuechi cùtnuní iní-xi-á<sup>n</sup> ñi xáhǎ<sup>n</sup>-yu: “Vá táxi nùu-ndí chi vá tnàhá canehe chiu<sup>n</sup> mee-ndí, te váha-gá chí cuàhá<sup>n</sup> cuaa<sup>n</sup>-ndo nùú cuè ñáiyu xidícó cuendá sá vǎ cúmǎni xii-ndo, te vá cúmǎni xii nchúhú tucu”, càchí-yu xáhǎ<sup>n</sup>-yu.

<sup>10</sup> Te ñini cuáhá<sup>n</sup> ndi ùhú<sup>n</sup> ñáiyu duca<sup>n</sup> ñà túú cùtnuní iní-xi-á<sup>n</sup> cuǎguaá<sup>n</sup>-yu sá nděe lintéernǎ-yu ní quexìo téé tnándaha. Te ndi ùhú<sup>n</sup> ñáiyu cuechi cùtnuní iní-xi-á<sup>n</sup> ñi quehe<sup>n</sup> cuendá ñáhǎ<sup>n</sup>-yu xii-dé, te cuánguihu ndíhi ñàhá-yu xii-dé núú cóó vico tnándaha, te sátá dúcá<sup>n</sup> te ní nandedí yuyèhe.



11 Te òré ní nasáá cue ñáyiú cuechi ñáyiú ní sánguáa<sup>n</sup> sá nděe lǐntérná-xi-á<sup>n</sup>, te ní ngúíta-yu càhá<sup>n</sup>-yu xǐnutnǐi-yu ndàa sátá yuyèhe ndaa quehé, te xǎhǎ<sup>n</sup>-yu xii tée tnǎndaha-á<sup>n</sup>: “¡Tǎta, nacaá<sup>n</sup> yuyèhe na quǐhu-ndí!” , càchí-yu xǎhǎ<sup>n</sup>-yu xii-dé.

12 Te tée tnǎndaha-á<sup>n</sup> nǐ xáha<sup>n</sup>-dě xií-yu: “Na càchí tnúhu ndáá-í xii-ndo sǎ nchòhó ñá túú tàú-ndó quǐhu-ndo vìco-a, chi ñá túú tnàhá tnúhu ndihì ñaha-ndo xì-í”, càchí-dé xǎha<sup>n</sup>-dě xií-yu —càchí Jèsús xǎha<sup>n</sup>-gǎ xii-güedé.

13 Te xǎha<sup>n</sup> tùcu Jèsús xii-güedé:

—Ío quǐhi iní-ndó cùndecu-ndo, chi ñá túú xìní-ndó nǎ nduu, te ni ñà túú xìní-ndó nǎ òré quixi tucu yúhú Téé cùu ñaní tnàhá-ndó nchàa-ndo —cachí-gá xǎha<sup>n</sup>-gǎ xii-güedé.

*Cuèndá cue téé ní ndóo ndaha díhú<sup>n</sup>  
(Lc. 19:11-27)*

14 Te xǎha<sup>n</sup> tùcu Jèsús xii-güedé:

—Na càni tucu-í ìngá cuèndú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndiǒxí xii ñáyiú. ì<sup>n</sup> téé sa ñùhu ichi-ná-dé sá cáca-dě quíngaca cuu xica-dě, te ní cana-dé cue téé xìnu cuechi núú-dě cuèndá dándóo ndaha ñàha-dé díhú<sup>n</sup>-dě xii-güedé.

15 Te nàcuáa ndùu chiu<sup>n</sup> quide ì<sup>n</sup> ì<sup>n</sup>-güedé te duca<sup>n</sup> díhú<sup>n</sup> nǐ sǎñaha-dě xii-güedé, te ì<sup>n</sup>-dé ní sǎñaha-dě úhú<sup>n</sup> tnàhá díhú<sup>n</sup> sǎ ìo yahu nàni tal-entú, te ìngá-dé ní sǎñaha-dě úú tnàhá díhú<sup>n</sup>-ǎ<sup>n</sup>, te ìngá-dé ní sǎñaha-dě ì<sup>n</sup> díhú<sup>n</sup>-ǎ<sup>n</sup>, te dàtnùní ní quee-dé cuáhá<sup>n</sup>-dé.

16 Te téé ní quehe<sup>n</sup> cuèndá úhú<sup>n</sup> tnàhá díhú<sup>n</sup> sǎ nání tàlentú ní quide-dé ndáhú ndihì-xi te ní níhí tucu-dé úhú<sup>n</sup>-gá tucu tnàhá díhú<sup>n</sup>-ǎ<sup>n</sup>.

17 Te òu-ni duca<sup>n</sup> nǐ quide tucu téé ní níhí úú díhú<sup>n</sup> sǎ nání tàlentú-á<sup>n</sup>, chi ní quide-dé ndáhú te ní níhí tucu-dé úú-gá tucu tnàhá.

18 Dico téé ní níhí ì<sup>n</sup>-ni díhú<sup>n</sup>-ǎ<sup>n</sup> chi da ní chiváha-dé díhú<sup>n</sup> pàtróó<sup>n</sup>-dě, chi ní xete-dé ì<sup>n</sup> yaú te ní chindúxi-dé.

19 Te ní cuu cuéhé nduu sá nǐ quee pàtróó<sup>n</sup>-güedě-á<sup>n</sup> ní sǎngaca cuu-dé, te ní nasáá-dé te ní ngúita-dé quidé ndǎá-dé ndihì-güedé cuèndá díhú<sup>n</sup> sǎ nǐ dándõo ndaha ñaha-dé xii-güedé.

20 Te téé ní quendóo ndaha úhú<sup>n</sup> tnàhá díhú<sup>n</sup>-ǎ<sup>n</sup> nǐ xáha<sup>n</sup>-dě xii pàtróó<sup>n</sup>-dě: “Pàtróó<sup>n</sup>, náú úhú<sup>n</sup> tnàhá díhú<sup>n</sup> sǎ nǐ dándõo ndaha ñaha-n xii-í-a, te ní sáhá<sup>n</sup>-í ní quide-í ndihì-xi ndáhú te ní chídó-xí úhú<sup>n</sup>-gá tucu tnàhá, te náú-a naquehe<sup>n</sup> cuèndá-n”, cǎchí-dé xǎha<sup>n</sup>-dě xii pàtróó<sup>n</sup>-dě.

21 Te téé cùu patróó<sup>n</sup>-dě-á<sup>n</sup> nǐ xáha<sup>n</sup>-dě xii-dé: “Ío váha ní quide-n, te vitna quide ñaha-í xii-n ì<sup>n</sup> téé váha téé quide ndáá, te sá sàcú díhú<sup>n</sup> nǐ dándõo ndaha ñaha-í xii-n te ní quide ndáá-n, te sá dúcá<sup>n</sup> nǐ quide-n te vǎi-gá taxí cuèndá ñàhà-í xii-n. Te vitna cuu cundecu-n nǔú ndécù-í, te ío cudíí ìní-ó cùndecu ndihì tnaha-o”, cǎchí téé cùu patróó<sup>n</sup>-dě-á<sup>n</sup> xǎha<sup>n</sup>-dě xii-dé.

22 Te sátá dúcá<sup>n</sup> te téé ní quendóo ndaha úú tnàhá díhú<sup>n</sup> sǎ nání tàlentú-á<sup>n</sup> nǐ xáha<sup>n</sup>-dě xii pàtróó<sup>n</sup>-güedé: “Pàtróó<sup>n</sup>, náú úú tnàhá díhú<sup>n</sup> sǎ nǐ dándõo ndaha ñaha-n-a, te ní sáhá<sup>n</sup>-í ní quide-í ndihì-xi ndáhú, te ní chídó-xí úú-gá tucu tnàhá, te náú-a naquehe<sup>n</sup> cuèndá-n”, cǎchí-dé xǎha<sup>n</sup>-dě xii

pàtróó<sup>n</sup>-güedě.

23 Te ní xáha<sup>n</sup> tée cùu patróó<sup>n</sup>-á<sup>n</sup> xii-dé: “Ío váha ní quide-n, te vitna quide ñaha-í xii-n ì<sup>n</sup> tée váha tée quide ndáá, te sá sàcú díhú<sup>n</sup> ñí dándõo ndaha ñaha-í xii-n te ní quide ndáá-n, te sá dúcá<sup>n</sup> ñí quide-n te vài-gá taxi cuendá-í. Te vitna cuu cundecu-n núú ndécù-í, te ío cudí<sup>í</sup> ìní-ó cùndecu ndíhi tñaha-o”, cachí tée cùu patróó<sup>n</sup>-á<sup>n</sup> xáha<sup>n</sup>-dě xii-dé.

24 Te tée ní ndóo ndaha ì<sup>n</sup>-ni díhú<sup>n</sup>-á<sup>n</sup> ñí xáha<sup>n</sup>-dě xii tée cùu patróó<sup>n</sup>-dě-á<sup>n</sup>: “Pàtróó<sup>n</sup>, yúhú sa ñaha-í sá yòhó cúú-n ì<sup>n</sup> tée ndùcu mee-ni sá cúú-xí mèe-xi te tàhu-n chiu<sup>n</sup> cuáhá<sup>n</sup> nchúhú cue tée xínu cuechi núú-n sàcá<sup>n</sup>-ndí triú, te òré ná nàtaxi tñaha-ndí, te yòhó dícó-nă náquèhe<sup>n</sup> cuendá-n tàxúha-n.

25 Te núu xíă<sup>n</sup> ní yùhú-í cada-í ndáhú ndíhi díhú<sup>n</sup>-n, te ní sáhá<sup>n</sup>-í ní xete-í ì<sup>n</sup> yaú te ní chindúxi-í, te náu díhú<sup>n</sup>-n-á<sup>n</sup> naquehe<sup>n</sup> cuendá-n”, cächí-dé xáha<sup>n</sup>-dě xii tée cùu patróó<sup>n</sup>-á<sup>n</sup>.

26 Te tée cùu patróó<sup>n</sup>-á<sup>n</sup> ñí xáha<sup>n</sup>-dě: “Yòhó cúú-n ì<sup>n</sup> tée cuihna ìní-xi xínu cuechi núù-í te cuhndu-n, te núu yòhó sání ìní-n sã cúù-í ì<sup>n</sup> tée tàchiu<sup>n</sup> cuáhá<sup>n</sup>-ndó sàcá<sup>n</sup>-ndó triú te òré nátàxi tñaha-ndo, te yúhú dícó-nă náquèhe<sup>n</sup> cuendá-í nátàxúha-í.

27 Te núu sàni iní-n sã dúcá<sup>n</sup> quide-í, te dasa<sup>n</sup> nùu-n díhú<sup>n</sup>-í te cúñaha-n chãhu-yu díquí-xi ni cùu, te òré ndexìo-í te sa ngódó lùha-gá díquí-xi naquehe<sup>n</sup>-í ní cùu”, cachí-dé xáha<sup>n</sup>-dě xii tée xínu cuechi-á<sup>n</sup>.

28 Te tée cùu patróó<sup>n</sup>-á<sup>n</sup> ñí xáha<sup>n</sup>-dě xii dava-gá cue tée ndècu ndíhi-dé: “Chí quéndèé ì<sup>n</sup> díhú<sup>n</sup> sã nání tàlentú néhé tée-á<sup>n</sup>, te cuáha-ndo tée nèhe úxí tñahá dñu-ni díhú<sup>n</sup>-á<sup>n</sup>.

29 Chi cue tée sa ndècu ndihi te níhí-gă-güedé cundecu ndihi-güedé, te ni vă nihí-gă-güedé ndèé cundecu nchaa sá cündècu ndihi-güedé. Te cue tée ñá túú nă ndécú ndihi vai, te nchaa sá ndécú ndihi-güedé vá cündècu ndihi-gă-güedé.

30 Te tée xínu cuechi ñá túú vèdana nàndíhi-án, chí tníí-dě te daquihí<sup>n</sup>-ndó-dě ì<sup>n</sup> xichi núú néé núú ïo ndoho-dé, te yàcá<sup>n</sup> ndáhyú-dé, te dìcò rúhñú-nă cuu núhu-dé sá sàtú iní-dé sá ndóhó-dě”, cächí tée cùu patróó<sup>n</sup>-á<sup>n</sup> xăha<sup>n</sup>-dë xii-güedé. Duha sâtnahá-xi ndoho nchaa ñáyiú ñá túú quide váha –cächí-gă xăha<sup>n</sup>-gă xii-güedé.

*Cuendá cue ñáyiú ní quide váha ndihi cuendá cue ñáyiú ñá túú ní quide váha*

31 Te xăha<sup>n</sup> tùcu Jesús xii-güedé:

—Te nduu na quixi tucu yúhú Tée cùu ñaní tnáhá-ndó nchaa-ndo, te quixi-í ndihi nchaa cue espíritú xínú cuèchi núù-í, te nchaa ñáyiú quiní-yu sá ïo cànnu cuu-í, te dává-á<sup>n</sup> cunucóo-í núú táxí tnùn-í, te ïo cuñúhu ñáyiú sá ïo cànnu cuu-í.

32 Te dává-á<sup>n</sup> natacá nchaa ñáyiú xĩndecu ni càa xico ñuyú cundecú-yu núù-í, te cada-í-yu dàtná quidé ì<sup>n</sup> toli oré táú dè<sup>n</sup>-dé nchaa mbéé ndihi nchaa chivá chi dè<sup>n</sup> taxi ndecu-dé nchaa mbéé, te dè<sup>n</sup> taxi ndecu-dé nchaa chivá.

33 Te duca<sup>n</sup> sâtnahá-xi cada-í chi nchaa ñáyiú ní quide ndáá núù-í ñáyiú-á<sup>n</sup> taxi ndecu-í-yu xio cùha-í, te nchaa ñáyiú cuihna ìní-xi ñá túú ní cuìní cada ndáá núù-í ñáyiú-á<sup>n</sup> taxi ndecu-í-yu xio dàtni-í.

34 Te duca<sup>n</sup> te yúhú tée ïo cùnnu cúñaha-í xii ñáyiú na cündecu xio cuha-í: “Nchaa nchòhó ñáyiú

ní quide váha ñaha Tătà-í Dútú Ndiöxí, chí nèhé chi vitna ní sáá nduu cùndecu-ndo núú ndécú-gă táxí tnùní-gá, chi ndéé cútnàhá ní ngáva ñuyíú sa ndècu túha tnàhí núú ndécú-gă-án sã nchòhó nduu táhú-ndó cùndecu-ndo.

<sup>35</sup> Te duca<sup>n</sup> chí òré xihí-í docó te ní taxi-ndo sã ñí xexi-í, te òré yìchí-í ndute te ní taxi-ndo ndùte ní xihí-í, te òré ñùhù-í ichi te ní taxi-ndo vèhe ní ndetatú-í.

<sup>36</sup> Te òré xíní ñùhu-í dóó cuhnu-í te ní taxi-ndo, te òré ní kuhú-í te ní quixi coto ñaha-ndo xii-í, te òré ní xihí-í vècaá te ní quixi tucu-ndo ñí quixi coto ñaha-ndo xii-í”, duha cúñaha-í xii nchaa ñáyíu-án.

<sup>37</sup> Te nchaa ñáyíu duca<sup>n</sup> ñí quide ndáá-án cùñàhá-yu xii-í: “Yòhó Yáá cúú Xìtohó-ndí, ni ì<sup>n</sup> xito ñá túú ní tàxi-ndí sá cáxí-n òré xihí-n dòcò, te ni ì<sup>n</sup> xito ñá túú ní tàxi-ndí ndute coho-n òré yìchí-n.

<sup>38</sup> Te ni ñà túú ní tàxi-ndí vehe ndetatú-n òré ñùhù-n ichi, te ni ñà túú ní tàxi-ndí dóó cuhnu-n òré xíní ñùhu-n.

<sup>39</sup> Te ni ñà túú ní quixi coto ñaha-ndí xii-n òré ní kuhú-n, te ni ñà túú ní quixi coto ñaha-ndí xii-n òré ní xihí-n vècaá”, duha quesàhá-yu cúñàhá-yu xii-í.

<sup>40</sup> Te yúhú téé cùnuu cúñaha-í xii-yu: “Na càchí tnùhu ndáá-í xii-ndo sã ncháá sã vãha ní quide-ndo sã cúú-xí nchàa ñáyíu xíndecu ichi-í cuèí ío ndàhú xíndáa-yu, te sá dúcá<sup>n</sup> ñí quide-ndo sã vãha sá cúú-xí-yu, te cada iní-ndó sã mèe-í duca<sup>n</sup> ñí quide-ndo ñí xito ñaha-ndo xii-í”, duha cúñaha-í xii-yu.

<sup>41</sup> Te dătnùní cúñaha-í xii ñáyíu na cùndecu xio datni-í: “Nchaa nchòhó ñáyíu ní xíta nihnu

chí xócuñí núú ndécù-í-a, chi nchòhó ní nduu táhú-ndó cùndecu-ndo núú ñùhú núú càyú, ñu-ni núú ñí quide túha-í cundecu sácuíhna ndíhi nchaa espíritú cúndíhi-xi, te yàcá<sup>n</sup> cundecu-ndo ñí caa ñí quíhí<sup>n</sup>.

<sup>42</sup> Chi yúhú òré xíhí-í docó te ñá túú ní tàxi-ndo sá cáxi-í, te ñí òré yìchí-í ndute te ñá túú ní tàxi-ndo ndute coho-í.

<sup>43</sup> Te ñí òré ní xúhu<sup>n</sup>-í ichi ñá túú ní tàxi-ndo vehe ndetatú-í, te ñí òré xíní ñùhu-í dóó cuihnu-í te ñá túú ní tàxi-ndo, te ñí òré ní cuhú-í te ñá túú ní quèxi-ndo quixi coto ñaha-ndo xii-í, te ñí òré ní xíhi-í vecaá te ñu-ni duca<sup>n</sup> ñí quide-ndo ñá túú ní quèxi-ndo quixi coto ñaha-ndo xii-í”, duha cúñaha-í xii-yu.

<sup>44</sup> Te ñáyiu-á<sup>n</sup> cùñàhá-yu xii-í: “Yòhó Yaá cúú Xìtohó-ndí ñí ñí<sup>n</sup> xito ñá túú ní xìní-ndí òré xíhí-n dòcò cuendá taxi-ndí sá cáxi-n, te ñí ñí<sup>n</sup> xito ñá túú ní xìní-ndí òré yìchí-n ndùte cuendá taxi-ndí ndute coho-n, te ñí ñí<sup>n</sup> xito ñá túú ní xìní-ndí cuhu<sup>n</sup>-n ichi cuendá taxi-ndí vehe ndetatú-n, te ñí ñí<sup>n</sup> xito ñá túú ní xìní-ndí òré xíní ñùhu-n dóó cuendá taxi-ndí dóó cuihnu-n, te ñí ñí<sup>n</sup> xito ñá túú ní xìní-ndí òré cùhú-n cuendá quixi coto ñaha-ndí xii-n, te ñí ñí<sup>n</sup> xito ñá túú ní xìní-ndí quíhi-n vècaá cuendá quixi coto ñaha-ndí xii-n”, duha quesàhá-yu cúñàhá-yu xii-í.

<sup>45</sup> Te yúhú cúñaha-í xii-yu: “Na càchí tnúhu ndáá-í xii-ndo sá sá cuendá sá ñá túú ní quide-ndo ñí<sup>n</sup> sá vǎha sá cúú-xí cuè ñáyiu ndècu ichí-í cuèi ío ndàhú xíndáa-yu, te sá dúcá<sup>n</sup> ñí quide-ndo ñá túú ní quide-ndo sá vǎha sá cúú-xí-yu, te cada iní-ndó

să mềe-í duca<sup>n</sup> ñi quide-ndo ñà túú ní quide-ndo sá vâha sá cúú-xì-í”, duha cúñaha-ĩ xii-yu.

<sup>46</sup> Te nchaa ñáyu-á<sup>n</sup> quĩhí<sup>n</sup>-yu núú ùhú núú ndàhú ñi caa ñi quĩhí<sup>n</sup>. Te nchaa ñáyu ní quide ndáá núú-í ní xíndecu ñuyú-a, ñáyu-á<sup>n</sup> nduu táhũ-yu ío váha cundecú-yu ñi caa ñi quĩhí<sup>n</sup> — càchí-gá xâha<sup>n</sup>-gã xii-güedé.

## 26

*Cue tée cùu úhú iní ñáhá xii Jesús ndúcú-güedé nàcuáa cada-güedé tñi ñaha-güedé xii-gá*  
(Mr. 14:1-2; Lc. 22:1-2; Jn. 11:45-53)

<sup>1</sup> Te sátá ñi yáha duca<sup>n</sup> ñi cáhá<sup>n</sup> Jèsús, te ní xáha<sup>n</sup>-gã xii cue tée xica cuu ndihi-gá:

<sup>2</sup> —Nchòhó sa xíní-ndó sã cùmání ùú-gá nduu te coo vico pàscuá, te càchí tnúhu-í xii-ndo sã yũhú Tée cùu ñaní tnáhá-ndó nchàa-ndo tñi ñaha-güedé xii-í, te cuáha cuèndá ñáhá-güedé núú cuè tée cùu úhú iní ñáhá xii-í, te cata caa ñaha-güedé núú cùrúxí te núú cùrúxí-á<sup>n</sup> cuú-í —càchí-gá xâha<sup>n</sup>-gã xii-güedé.

<sup>3</sup> Te ñu-ni òré càhá<sup>n</sup> ndihi Jèsús cue tée xica cuu ndihi-gá ní natacá cue tée cùu dútú cùnùu, ndihi cue tée dàcuaha ñaha xii ñáyu nchaa tnúhu ní chídó tnùní ndí Moisés, ndihi cue tée cùu sacuéhé nũ ñáyu isràél. Te mei quèhé vehe núú cúú vèchiu<sup>n</sup> té Caifás tée cùu dútú ïo-gá cùnùu ní natacá-güedé.

<sup>4</sup> Te xía<sup>n</sup> ñi ndatnúhu-güedé nàcuáa cada-güedé dandàhú-güedé Jèsús cuèndá tñi ñaha-güedé xii-gá, te cahni ñaha-güedé.

<sup>5</sup> Te ní xítnàha-güedé:

—Váha-gá sá vǎ tníí-ó Jèsús mei ndùu vico, chi núu duca<sup>n</sup> na càda-o te ío dusa<sup>n</sup> càda ñáyiú — cǎchí-güedé xǐtnàha-güedé.

*Ï<sup>n</sup> ñadìhí chǐhí-á<sup>n</sup> àcití díquí Jèsús*

*(Mr. 14:3-9; Jn. 12:1-8)*

<sup>6</sup> Te ndècu Jesús ñuú Bètaniá vehe ï<sup>n</sup> téé nàni Xímú, téé ní tnahá cuéhé sǎ dátèhyú nihnu-xi yíqui cùñú-ó.

<sup>7</sup> Te xía<sup>n</sup> ndécú-gǎ ní quexìo ï<sup>n</sup> ñadìhí néhé-á<sup>n</sup> ï<sup>n</sup> sá ñí cuáha yúú vǎha nàni alabastrú, te xítí xǎ<sup>n</sup> ñúhú àcití sàhá<sup>n</sup> tnámí sǎ ïo ndèyáhu. Te yìhi Jesús mèsá xéxí-gǎ, te ñaha-á<sup>n</sup> ñí sáhá<sup>n</sup>-a<sup>n</sup> ní sódó-a<sup>n</sup> àcití ñúhú xítí xǎ<sup>n</sup> díquí-gǎ.

<sup>8</sup> Te òré ní xiní cue téé xìca cuu ndìhi Jesús sá dúcá<sup>n</sup> ñí quide ñaha-á<sup>n</sup> te ní cudéé<sup>n</sup>-güedé, te ní nguíta-güedé xǐtnàha-güedé:

—Ñá túú quide váha ñaha-ǎ<sup>n</sup> dàcá<sup>n</sup> quidé-á<sup>n</sup> dacuíta-a<sup>n</sup> acítí-ǎ<sup>n</sup>.

<sup>9</sup> Chì váha-gá núu cuyáhu acítí-ǎ<sup>n</sup> ní cùu chi ío ndèyáhu, te díhú<sup>n</sup> cuyáhu acítí-ǎ<sup>n</sup> cuu cuendá cue ñáyiú ndàhú ní cùu —cachí-güedé xǐtnàha-güedé.

<sup>10</sup> Te Jesús ní cutnùnì iní-gǎ nàcuáa ndùu tnúhu xǐtnàha-güedé, núu ní xáha<sup>n</sup>-gǎ xii-güedé:

—Vá dásàtú-ndó ìní ñadìhí-a, chi sá ñí quide ñaha-a<sup>n</sup> xì-í cúú-xí ï<sup>n</sup> sá vǎha.

<sup>11</sup> Chì cue ñáyiú ndàhú duca<sup>n</sup>-ni cùtnahá ñáyiú-á<sup>n</sup> tnuú-ndó, dico yúhú chì vá ncháá ndùu cundecu ndìhi ñaha-í xii-ndo ñùyúú-a.

<sup>12</sup> Te sá dúhá ñí quide ñaha ñadìhí-a xii-í ní sódó-a<sup>n</sup> àcití díquí-í, te xǎ<sup>n</sup> cada iní-ndó sǎ sà quide túha-a<sup>n</sup> yíqui cùñú-í cuendá nguíndǔxi-xi.



13 Te na càchí tnúhu ndáá-í xii-ndo sã nděni ní cuu ñihí ñuyú ná càhá<sup>n</sup> ñáyu tnúhu-í, te cáhá<sup>n</sup>-yu tnàhá cuendá ñadihí-a cuendá quiní nchaa ñáyu nàcuáa ní quide-a<sup>n</sup> te duca<sup>n</sup> vã nàcuànaá-yu — càchí-gá xãha<sup>n</sup>-gã xii-güedé.

*Té Jùdás ndúcú-dě nàcuáa cada-dé cuáha cuendá-dé Jèsús núú cuè tée cùu úhú iní ñáhá xii-gá (Mr. 14:10-11; Lc. 22:3-6)*

14 Te sátá dúcá<sup>n</sup> te té Jùdás Iscarioté ní sáhá<sup>n</sup>-dé ní ndatnúhu-dé ndihí cue tée cùu dútú cúnùu. Te núú tnàhá té Jùdás-á<sup>n</sup> cúú ùxúú cue tée xica cuu ndihí Jèsús.

15 Te ní xáha<sup>n</sup>-dě xii cue tée cùu dútú cúnùu-á<sup>n</sup>: —¿Ndédau cháhu ñaha-ndo xii-í te taxi cuendá-í Jèsús xii-ndo-i? —càchí-dé xãha<sup>n</sup>-dě xii-güedé.

Te cue dútú-ã<sup>n</sup> ñí xáha<sup>n</sup>-güedě xii-dé sá cuãñaha-güedě ócó úxí díhú<sup>n</sup> cuixí<sup>n</sup>, te ñu-ni duca<sup>n</sup> ñí sãñaha-güedě xii-dé.

16 Te ndéé òré ní quehe<sup>n</sup> cuendá té Jùdás-á<sup>n</sup> díhú<sup>n</sup>, te ní ngüíta-dé ndúcú-dě nàcuáa cada-dé cuáha cuendá-dé Jèsús núú-güedě.

*Cùdini Jèsús ndihí cue tée xica cuu ndihí-gá (Mr. 14:12-25; Lc. 22:7-23; Jn. 13:21-30; 1 Co. 11:23-26)*

17 Te ní sáá nduu ñí quesaha vico xexi ñáyu pàá sá ñà túú yìhi levadurá ñu-ni vico pàscuá, te cue tée xica cuu ndihí Jèsús ní sãdehe yatni-güedé ñíhí-gá, te xãha<sup>n</sup>-güedě xii-gá:

—Mèstrú, véxi-ndí xicá<sup>n</sup> tnúhú-ndí núú-n ñu ndèe cuini-n càda túha-ndí cuendá cudini-o sacuaa nduu vico pascuá —càchí-güedé xãha<sup>n</sup>-güedě xii-gá.

18 Te Jèsús ní xáha<sup>n</sup>-gã xii-güedé:

—Chí cuáhá<sup>n</sup> xítí ñuú-ǎ<sup>n</sup>, te yàcá<sup>n</sup> naníhí-ndó ñ<sup>n</sup> téé cùtnuní iní-ndó sǎ sà xíní ñáhá-dě xii-o, te cúñaha-ndo xii-dé: “Yaá cúú Mèstrú càchí-gá sá sà ní cuyatni nduu vǎ cúndècu-gá ñuyíú-a, te vehe-n cuíní-gá cada-gá vico pàscuá ndihí cue téé xica cuu ndihí-gá”, duha cúñaha-ndo xii téé-á<sup>n</sup> —càchí-gá xǎha<sup>n</sup>-gǎ xii-güedé.

19 Te cue téé xica cuu ndihí-gá-á<sup>n</sup> ñí xica-güedé cuáhá<sup>n</sup>-güedé, te ní quide-güedé nàcuáa ní xáha<sup>n</sup>-gǎ xii-güedé, te ní quide túha-güedé sá cúdini-güedé ndihí-gá sacuaa nduu vico pascuá-á<sup>n</sup>.

20 Te òré sa ní cundiqui<sup>n</sup> te cuánguihu Jèsús ndihí ndí ùxúú cue téé xica cuu ndihí-gá mèsá cuendá cudini-gá ndihí-güedé.

21 Te nini xèxi-gá ndihí-güedé ní xáha<sup>n</sup>-gǎ xii-güedé:

—Na càchí tnúhu ndáá-í xii-ndo sǎ díú ñ<sup>n</sup> nchohó cue téé xica cuu ndihí-í cuáha cuendá ñáhá-ndó xii-í núú cuè téé cùu úhú iní ñáhá —càchí-gá xǎha<sup>n</sup>-gǎ xii-güedé.

22 Te sá dúcá<sup>n</sup> ñí xáha<sup>n</sup>-gǎ xii-güedé te nchaa-güedé ní ngüíta-güedé cúndiyí-güedé, te da ñ<sup>n</sup> da ñ<sup>n</sup>-güedé ní ngüíta-güedé xǎha<sup>n</sup>-güedé xii-gá:

—Mèstrú, ¿ñá díú yǎhú duca<sup>n</sup> sàni iní-n càda-í-u? —càchí-güedé xǎha<sup>n</sup>-güedé xii-gá.

23 Te ní xáha<sup>n</sup>-gǎ xii-güedé:

—Téé nacaxi ndihí-í ñ<sup>n</sup>-ni cóhó caxi-ndí, téé-á<sup>n</sup> cuáha cuendá ñáhá-dě xii-í núú cuè téé cùu úhú iní ñáhá.

24 Te yúhú Téé cùu ñaní tnáhá-ndó nchàa-ndo ñuhu ichi-í cuáhá<sup>n</sup>-í yáha-í nàcuáa càhá<sup>n</sup>-xi núú tütú Yǎ Ndiöxí, dico ndàhú ní cuu téé duca<sup>n</sup> na cuáha

cuendá ñáhá xii-í núú cuè téé cùu úhú iní ñáhá, chi váha-gá sá vǎ cǎcú tǎe-á<sup>n</sup> cundecu-dé ní cùu, te ñá díú sǎ ní cacu-dé te duca<sup>n</sup> càda-dé —càchí-gá xǎha<sup>n</sup>-gǎ xii-güedé.

<sup>25</sup> Te sátá dúcá<sup>n</sup> te ní cǎhá<sup>n</sup> té Jùdás téé cuáha cuendá ñáhá xii-gá, te xǎha<sup>n</sup>-dǎ:

—Mèstrú, ¿te náa sàni iní-n sǎ yǎhú cuáha cuendá ñáhá-í xii-n núú cuè téé cùu úhú iní ñáhá xii-n-á<sup>n</sup>? —càchí-dé xǎha<sup>n</sup>-dǎ xii-gá.

Te Jèsús ní xǎha<sup>n</sup>-gǎ xii-dé:

—Díu-n —càchí-gá xǎha<sup>n</sup>-gǎ xii-dé.

<sup>26</sup> Te nini cùdini cue téé xìca cuu ndihi Jesús ní quehe<sup>n</sup>-gá pàá, te ní ndacá<sup>n</sup> táhú-gǎ núú Yǎ Ndiǒxí, te dǎtnùní ní táhú cuèchi-gá te ní ngüíta-gá dǎcǎhñu-gá cue téé xìca cuu ndihi-gá-á<sup>n</sup>, te xǎha<sup>n</sup>-gǎ xii-güedé:

—Chí quéhé<sup>n</sup> pàá-a caxi-ndo, te cada iní-ndó sǎ yìqui cuñú-í cúú-xí —càchí-gá xǎha<sup>n</sup>-gǎ xii-güedé.

<sup>27</sup> Te ní quehe<sup>n</sup>-gá vàsú ñúhú ndùdí ndéhé yoho yàha stilé, te ní ndacá<sup>n</sup> táhú-gǎ núú Yǎ Ndiǒxí, te dǎtnùní ní ngüíta-gá sǎñaha-gǎ xii-güedé cuendá coho-güedé luha luha sá ñúhú xìtí-xi, te xǎha<sup>n</sup>-gǎ xii-güedé:

—Chí cóhó nchàa nchohó ndudí ndéhé yoho yàha stilé ñúhú xìtí vàsú-a.

<sup>28</sup> Te cada iní-ndó sǎ cúú-xí dǎtná níñi-í sá cǎtí òré cahni ñaha-güedé xii-í, te sá dúcá<sup>n</sup> cǎtí níñi-í xǎ<sup>n</sup> cutnùní ndáá sá Yǎ Ndiǒxí cada-gá ingá núú sǎ vǎha sá cúú-xí vǎi ñáyiu dǎtná ní cachí-gá cada-gá, te ío vǎi ñáyiu cada cǎhnu iní-gá cuèchi-yu.

<sup>29</sup> Te na càchí tnúhu-í xii-ndo sǎ vítná-nǎ duha xìhi ndihi ñaha-í xii-ndo ndùdí ndéhé yoho yàha

stilé-a, te vá cóhó ndìhi ñaha-gá-í xii-ndo, dico na sàá nduu nànihí tnáhá-ó nũú ndécú Tătà-í Dútú Ndiõxí táxí tnùnì-gá te dàvá-á<sup>n</sup> cada iní-ndó sã dàtná sá cóhó ndìhi ñaha tucu-í xii-ndo chi ío cudíí iní-ó —càchì-gá xãha<sup>n</sup>-gã xii-güedé.

*Té Pèlú cúñaha-dě xii ñáyiú sá ñà túú xìnì-dé Jèsús (Mr. 14:26-31; Lc. 22:31-34; Jn. 13:36-38)*

<sup>30</sup> Te Jèsús ní xita-gá ì<sup>n</sup> ndudú ndìhi cue téé xìca cuu ndìhi-gá, te dătnùnì ní xica-gá cuáhá<sup>n</sup>-gá ndìhi-güedé yucu Òlívú.

<sup>31</sup> Te yàcá<sup>n</sup> ní xãha<sup>n</sup>-gã xii-güedé:

—Na càchì tnúhu-í xii-ndo sã ncháá-ndó dândóo ñaha-ndo xii-í niú vitna, chi quee ndáá-xi nàcuáa càhá<sup>n</sup>-xi núú tütú Yă Ndiõxí núú càchì-xi: “Yúhú cuáha-í tnúhu cahni-güedé téé cùu toli, te nchaa mběé-dě ndìhi-güedé cuténuu”, duha càchì-xi núú tütú-gá.

<sup>32</sup> Dico na ndòto-í te codonùu-í núú-ndó quíhí<sup>n</sup> distritú Galiléa —càchì-gá xãha<sup>n</sup>-gã xii-güedé.

<sup>33</sup> Te té Pèlú ní xãha<sup>n</sup>-dě xii-gá:

—Te cuèi nchaa-güedé ná dândóo ñaha-güedé xii-n, dico yúhú chi vá dândóo ñaha-í xii-n —càchì-dé xãha<sup>n</sup>-dě xii-gá.

<sup>34</sup> Te Jèsús ní xãha<sup>n</sup>-gã xii-dé:

—Na càchì tnúhu ndáá-í xii-n sã niú vitna cùmání-gã cana ì<sup>n</sup> líhi, te únì xito cáhá<sup>n</sup>-n núú ñáyiú sá ñà túú xìnì ñáhá-n xii-í —càchì-gá xãha<sup>n</sup>-gã xii-dé.

<sup>35</sup> Te té Pèlú ní xãha<sup>n</sup>-dě xii-gá:

—Cuèi na cùú ndìhi ñaha-í xii-n dico vá càhá<sup>n</sup>-í núú ñáyiú sá ñà túú xìnì ñáhà-í xii-n —càchì-dé xãha<sup>n</sup>-dě xii-gá.

Te nchaa dava-gá cue téé xica cuu ndihi-gá diu-ni duca<sup>n</sup> ñí xáha<sup>n</sup>-güedě xii-gá.

*Jèsús càhá<sup>n</sup> ndihi-gá Yă Ndiöxí ñ<sup>n</sup> xichi núú nání Gětsemaní*

*(Mr. 14:32-42; Lc. 22:39-46)*

<sup>36</sup> Te Jèsús ní quexìo-gá ndihi cue téé xica cuu ndihi-gá ñ<sup>n</sup> xichi núú nání Gětsemaní, te xiá<sup>n</sup> ñí xáha<sup>n</sup>-gă xii-güedé:

—Chí cúnúçòo iha cundetu-ndo na quihí<sup>n</sup>-í yacá<sup>n</sup> cáhá<sup>n</sup> ndihi-í Yă Ndiöxí —càchí-gá xăha<sup>n</sup>-gă xii-güedé.

<sup>37</sup> Te ndèca-gá té Pèlú, ndihi ndi nduú déhe té Zebèdeú cuáhá<sup>n</sup>, te ní ngüíta-xi súúní ndihú iní-gá.

<sup>38</sup> Te ní xáha<sup>n</sup>-gă xii cue téé úní-á<sup>n</sup>:

—Súúní ndihú iní-í dàtná sá cùú-í, te chí quéndòo nchòhó iha te vá cùdú-ndó chi yúhú vá cùdú-í —càchí-gá xăha<sup>n</sup>-gă xii-güedé.

<sup>39</sup> Te sa ñùnchií luha ní xica ndehe Jèsús núú ndécú-güedě, te ní ngüíñí xítí-gă te ní nuu núú-gă ndàa núú ñúhú, te ní ngüíta-gá càhá<sup>n</sup> ndihi-gá Tătá-gă Dútú Ndiöxí, te xăha<sup>n</sup>-gă:

—Yòhó Tătá mée-í, càhá<sup>n</sup> ndàhú-í núú-n nŭu vá cùndèe iní-n tàunihnu ñaha-n xii-í cuendá sá vă ndóhò-í ná sàá òré, dico vá cádá-n nàcuáa càchí iní mée-í, chi cada-n nàcuáa càchí iní mée-n —càchí-gá xăha<sup>n</sup>-gă xii Tătá-gă Dútú Ndiöxí.

<sup>40</sup> Te sátá ñí yáha ní cáhá<sup>n</sup> ndihi-gá Tătá-gă Dútú Ndiöxí, te cuánuhú-gá núú ñí dándòo-gá cue téé úní-á<sup>n</sup> te xixídí-güedé òré ní nasáá-gá, te ní xáha<sup>n</sup>-gă xii té Pèlú:

—¿Náa ñá cùndèe iní-ndó vá cùdú-ni-ndo cuèdicó ñ<sup>n</sup> òré nini càhá<sup>n</sup> ndihi-í Yă Ndiöxí-ă<sup>n</sup>?

41 Te chí quéndõo tucu te cuhu<sup>n</sup> iní-ndó vǎ cùdú-ndó, te cáhá<sup>n</sup> ndihí-ndo Yǎ Ndiõxí cuendá sá vǎ dácáhá<sup>n</sup> ñáhá yùcu ñávǎha xii-ndo càda-ndo sá ñà túú tàú-ndó càda-ndo. Te xìní ndáá-í sá nchòhó cuìní-ndó càda-ndo nchaa nacuáa càhá<sup>n</sup>-í dìcò-ni sá ñà túú nihí ndéé-ndó —càchí-gá xǎha<sup>n</sup>-gǎ xii-güedé.

42 Te xito cùu uú cuáhá<sup>n</sup> tucu Jèsús cáhá<sup>n</sup> ndihí-gá Tǎtá-gǎ Dútú Ndiõxí, te xǎha<sup>n</sup>-gǎ:

—Yòhó Tǎtá mée-í, te núu vá cùndèe iní-n tàunihnu ñaha-n xii-í cuendá sá vǎ ndóhò-í, te cada nàcuáa càchí iní mée-n —càchí-gá xǎha<sup>n</sup>-gǎ xii Tǎtá-gǎ Dútú Ndiõxí.

43 Te òré ní yáha ní cáhá<sup>n</sup> ndihí-gá Tǎtá-gǎ Dútú Ndiõxí, te cuánuhú tucu-gá núu xǐndecu cue tée úní xícá cùu ndihí-gá-á<sup>n</sup>, te xìdí-ni tucu-güedé òré ní nasáá-gá, te duca<sup>n</sup> ñǎ quide-güedé chí súúní ñùhu saní núu-güedě.

44 Te ní dándõo ñaha tucu Jesús xii-güedé xía<sup>n</sup>, te cuáhá<sup>n</sup> tucu-gá xito cùu úní cáhá<sup>n</sup> ndihí tucu-gá Tǎtá-gǎ Dútú Ndiõxí, te diu-ni tnúhu sá sà ní xáha<sup>n</sup>-gǎ xii Tǎtá-gǎ Dútú Ndiõxí, diu-ni tnúhu-á<sup>n</sup> ñǎ xáha<sup>n</sup> tucu-gá.

45 Te sátá ñǎ yáha ní cáhá<sup>n</sup> ndihí-gá Tǎtá-gǎ Dútú Ndiõxí, te cuánuhú tucu-gá núu ndécú cue tée xìca cuu ndihí-gá-á<sup>n</sup>, te òré ní nasáá-gá, te ní xáha<sup>n</sup>-gǎ xii-güedé:

—¿Te náa xìdí-ni tucu-ndo? Te sa ní sáá òré cuáha cuendá ñáhá-güedě xii-í núu cue tée ndècu ichi cuehé ichi duha.

46 Dico vitna chí ndácõo na quìhí<sup>n</sup>-ó, chí sa véxi tée cuáha cuendá ñáhá xii-í núu cue tée cùu úhú iní ñáhá —càchí-gá xǎha<sup>n</sup>-gǎ xii-güedé.

*Ní tñi-güedé Jèsús ndéca ñàha-güedé xii-gá cuáhán  
(Mr. 14:43-50; Lc. 22:47-53; Jn. 18:2-11)*

47 Te càhán dúcán-ní Jèsús ní quexìo té Jùdás. Te núú tnàhá tée-án cúú ùxúú tnàhá cue tée xìca cuu ndihì-gá ní cùu te duca<sup>n</sup> ñí quide-dé. Te ndihì-dé vài cue tée ní quexìo te dava-güedé xñehe-güedé machití, te dava-güedé xñehe-güedé carrutí. Te cue tée-án ñí tendaha ñàha cue dútú cúnùu, ndihì cue tée cùu sacuéhé núú ñàyiù isràél.

48 Te té Jùdás tée cuáha cuendá ñáhá xii-gá-án sa ní xítñùhu-dé cue tée-án nàcuáa cada-dé cuáha cuendá-dé Jèsús núú-güedé, te duha ní xáha<sup>n</sup>-dè xii-güedé:

—Cundehe-ndo tõe na tèyuhu-í te tée-án tñi-ndo-dě chi tée-án cúú-dě tée ndèé iní-ndó —duha ní xáha<sup>n</sup>-dè xii-güedé.

49 Te sátá dúcán ñí xáha<sup>n</sup>-dè xii-güedé, te ní sándehe yatni-dé núú Jèsús, te ní xáha<sup>n</sup>-dè xii-gá:

—¡Ràció<sup>n</sup> Mèstrú! —càchí-dé xáha<sup>n</sup>-dè xii-gá.

Te ní teyuhu ñàha-dé xii-gá.

50 Te Jèsús ní xáha<sup>n</sup>-gă xii-dé:

—Yòhó tée ní chitnahá ñáhá xii-í, ¿ná cuíní-n núu véxi-n núù-í? —càchí-gá xáha<sup>n</sup>-gă xii-dé.

Te òré-ni-án ñí tñi ñàha cuè tée ndihì té Jùdás-án xii Jèsús, te ndèca ñàha-güedé xii-gá cuáhán.

51 Te ñí cue tée ndihì Jèsús ní tava-dé machití-dé, te ní xehndé-ni-dé ñí xio lóho ñí tée xìnù cuechi núú dútú cúnùu te ní quendeé duu<sup>n</sup> lóho-dé.

52 Te Jèsús ní xáha<sup>n</sup>-gă xii tée duca<sup>n</sup> ñí xehndé lóho tée-án:

—Nachihì machití-n ñí-xi, chi nchaa cue tée na nàá ndihì machití cahni-güedé tnàha ñáyüü-güedé te ñi-ni ndihì machití cuú méé-güedé tucu.

53 Te na càchí tnúhu-í xii-ndo sã nõu yúhú cuìn-í cácu-í te cáhá<sup>n</sup> ndìhi-í Tătà-í Dútú Ndiõxí, te tendaha-gã cuéhé víhí espíritú xínú cuèchi núú-gã quixi-xi dàcácu ñaha-xi xì-í.

54 Dico núu duca<sup>n</sup> na càda-í te vá quée ndáá-xi nàcuáa càhá<sup>n</sup>-xi núú tütú Tătà-í Dútú Ndiõxí núú ndée tnuní sá dàcuítí xìni ñuhu-xi nándi ndoho-í — càchí-gã xãhá<sup>n</sup>-gã xii-dé.

55 Te Jèsús ní xáhá<sup>n</sup>-gã xii cue téé duca<sup>n</sup> ñi tñi ñaha xì-gá-á<sup>n</sup>:

—Nchaa-ni nduu ní xiní-ndó ñi xóo cunucóo-í xití veñúhu càhnu sá ïo cùnnu ní xóo danèhé-í ñáyiu, te ñá túú ní tñi ñaha-ndo xii-í, ¿te ná cuèndá vitna quide ñaha-ná-ndó xì-í dàtná quidé-ndó ñi ñadúhú, nèhe-ná-ndó màchití nèhe-ná-ndó càrrutí ní quexìo ní tñi ñaha-ndo xì-í-i?

56 Dico dacuítí sã dúhá càda-xi nacuáa quee ndáá-xi nàcuáa ní cáhá<sup>n</sup> cue téé ní xóo cáhá<sup>n</sup> tnúhu Yá Ndiõxí ndée sanaha ñi ngódó tnuní núú tütú-gã — càchí-gã xãhá<sup>n</sup>-gã xii-güedé.

Te nchaa cue téé xìca cuu ndìhi-gã ní xinu-güedé ní dándõ ñaha-güedé xii-gã.

*Jèsús ndécú-gã jùndá*

*(Mr. 14:53-65; Lc. 22:54-55, 63-71; Jn. 18:12-14, 19-24)*

57 Te cue téé ní tñi ñaha xì Jesús ndécá ñaha-güedé xii-gã cuáhá<sup>n</sup> núú tẽ Caifás téé cùu dútú cùnùu-gã. Te núú ndécú dütú cùnùu-gá-á<sup>n</sup> sa ní tacá cue téé dàcuaha ñaha xii ñáyiu nchaa tnúhu ní chídó tnuní ndíi Moisés, ndìhi cue téé cùu sacuéhé nõu ñáyiu isràèl cuèndá cada-güedé jùndá.

58 Te té Pèlú xica xìca-ni nchicú<sup>n</sup> ñáhá-dé xii-gã cuáhá<sup>n</sup> ní sáá-dé ndée quehé vehe núú ndécú tẽ



cùu dútú cúnùu-gá-án, te xía<sup>n</sup> nǐ ngóo-dé ndihí cue tée cùu poleciá cuèndá cuìní-dé quìní-dé nása cada ñaha-güedě xii Jèsús.

<sup>59</sup> Te cue tée cùu dútú cúnùu, ndihí cue tée cùu sacuéhé nǔú ñǎyiu israél, ndihí nchaa dava-gá cue tée xǐndecu jùndá ndúcú-güedě nàcuáa cada-güedé dacàa-güedé ì<sup>n</sup> cuéchi díquí Jèsús cuèi cùu-xi ì<sup>n</sup> sá ñǎ ndáa cuèndá níhí-güedě nàcuáa cada-güedé cahni ñaha-güedě xii-gá.

<sup>60</sup> Te vài cue tée ní ngüíta-güedé dácàa-güedé cuéchi díquí-gǎ, dico ñá túú ní cùndee tnúhu-güedé chi mee-ni tnúhu ndehnde cùu-xi. Te sátá dúcá<sup>n</sup> te ní quexìo tucu úú tnàhá cue tée dàcuandehnde-güedé,

<sup>61</sup> te xǎha<sup>n</sup>-güedě xii nchaa cue tée xǐndecu jùndá:

—Véxi-ndí cǎchí tnúhu-ndí xii-ndo sǎ tǎe-a cǎchí-dé sá dǎngòyo-dé veñúhu cǎhnu sá ìo cùnuu núú chíñúhu-o Yá Ndiöxí, te dandàa-dé ingá veñúhu saa, ñiu-ni núú cáá tnàhí veñúhu-ǎ<sup>n</sup>, te xití úní-ni nduu sa nadaxǐnu-dé, duha cǎchí-dé —cǎchí-güedé xǎha<sup>n</sup>-güedě.

<sup>62</sup> Te tée cùu dútú cúnùu-gá-án nǐ ndacuíñí-dé, te xǎha<sup>n</sup>-dě xii Jèsús:

—¿Ná cuèndá duha ndùu tnúhu cǎhá<sup>n</sup> cue tée-a cuèndá-n? Te cǎhá<sup>n</sup> nǔu nása cunduu tnúhu cǎhá<sup>n</sup>-n —cǎchí-dé xǎha<sup>n</sup>-dě xii-gá.

<sup>63</sup> Dico Jèsús ñá túú tnàhí ni cǎhá<sup>n</sup>-gá. Te tée cùu dútú cúnùu-gá-án nǐ xáha<sup>n</sup> tucu-dé xii-gá:

—Yúhú, cǎcú nèhe-í Yǎ Ndiöxí chi cuìní-í sá cǎchí tnúhu ndáa-n xì-ndí nǔu sá díú Crìstú Déhe Yá Ndiöxí Yaá ní tendaha-gǎ véxi ñuyíú-a cùu-n —cachí-dé xǎha<sup>n</sup>-dě xii-gá.

<sup>64</sup> Te Jèsús ní xáha<sup>n</sup>-gǎ xii-dé:

—Diu Yaá-á<sup>n</sup> cúu-í dàtná càchí-n-ǎ<sup>n</sup>, te na càchí tnúhu-í xii-ndo sǎ sàá nduu te quini-ndó yǎhú Tée cúu ñaní tnáhá-ndó nchaa-ndo cunucóo-í xio cùha Dútú Ndiǒxí Yaá ndácú quide nchaandi túhú sá vǎha. Te dàvá-á<sup>n</sup> quini ñáhá-ndó xii-í quee-í andiu quixi-í ichi xití vícò —càchí-gá xǎha<sup>n</sup>-gǎ xii-dé.

<sup>65</sup> Te dútú cùnù-gá-á<sup>n</sup> ñí ndátá-dě dóó níhnú-dě cuendá sá ñà túú ní tnáhá iní-dé nàcuáa ní cáhá<sup>n</sup> Jèsús, te ní xáha<sup>n</sup>-dě xii nchaa cue tée xǐndecu jùndá:

—Tée-a cáhá<sup>n</sup> úhú-dé cuendá Yǎ Ndiǒxí, te vitna ñà túú-gǎ xíní ñùhu-xi cue tée cáhá<sup>n</sup> ndáá nùu ndáá sá ndècuéchi-dé àdi ñà túú ndècuéchi-dé, chi sa ní tecú dóho-o nàcuáa ndùu tnúhu ní cáhá<sup>n</sup>-dé ní cáhá<sup>n</sup> úhú-dé cuendá Yǎ Ndiǒxí.

<sup>66</sup> Te nchaa-ndo chí cáhá<sup>n</sup> vitna núu nása sàni iní-ndó cùnùu cuendá tée-a —càchí-dé xǎha<sup>n</sup>-dě xii nchaa cue tée-á<sup>n</sup>.

Te cue tée-á<sup>n</sup> ñí xáha<sup>n</sup>-güedě:

—Nchúhú càchí-ndí sá tàú-xi cuú-dé chi ndècuéchi-dé —càchí-güedé xǎha<sup>n</sup>-güedé.

<sup>67</sup> Te ní ngüita-güedé ní tiú dí ñáhá-güedě xii-gá te ní caniha-güedé, te tnáhá núú-gǎ ní cani-güedé.

<sup>68</sup> Te ní cudíquí ndeé ñáhá-güedě xii-gá, te xǎha<sup>n</sup>-güedě:

—Yòhó Tée càchí sá cúú Crístú Yaá ní tendaha Yǎ Ndiǒxí véxi ñuyíú-a, cáhá<sup>n</sup> ná còto yoo ní caniha xii-n —cachí-güedé xǎha<sup>n</sup>-güedě xii-gá.

*Té Pèlú xǎha<sup>n</sup>-dě xii ñáyíu sá ñà túú xíní-dé Jèsús  
(Mr. 14:66-72; Lc. 22:56-62; Jn. 18:15-18, 25-27)*

<sup>69</sup> Te ñini nùcòo té Pèlú quehé, te ní sáhá<sup>n</sup> ñí xíchí xínú cuèchi vehe-á<sup>n</sup> nùú-dě, te xǎha<sup>n</sup>-xi xii-dé:

—Yòhó tnáhá-n cùu-n tée xica cuu ndíhi Jesús tée distritú Galileá —càchí-xi xǎha<sup>n</sup>-xi xii-dé.

70 Te té Pèlú ñá túú ní nǔnuu-dé, te ndèdóho nchaa ñáyiu xǐndecu-á<sup>n</sup> nǐ xáha<sup>n</sup>-dě xii xíchí-ǎ<sup>n</sup>:

—Yúhú, ñá túú cùtnuní iní-í nása ndùu tnúhu càhá<sup>n</sup>-n —càchí-dé xǎha<sup>n</sup>-dě xii-xi.

71 Te ní xica té Pèlú cuáhá<sup>n</sup>-dé ndàa nacuáa nchìi yuyèhe vehe-á<sup>n</sup>, te ní xiní ñáhá tùcu ingá xíchí xínú cuèchi vehe-á<sup>n</sup>, te xǎha<sup>n</sup>-xi xii nchaa ñáyiu xǐndecu-á<sup>n</sup>:

—Tée-a tnahá-dé xicá cùu-dé ndìhi Jèsús téé ñúú Nazàrét —càchí-xi xǎha<sup>n</sup>-xi xií-yu.

72 Te té Pèlú ní xáha<sup>n</sup>-dě:

—Nchàcui<sup>t</sup>i Yá Ndiǒxí sá ñà túú xìní-í téé càcunehe-ndo-á<sup>n</sup> —càchí-dé xǎha<sup>n</sup>-dě xií-yu.

73 Te tna tnaa-ni ní cuu, te dava ñáyiu xǐndecu xía<sup>n</sup> nǐ xáha<sup>n</sup> tùcú-yu xii té Pèlú:

—Ndáá sá tnahá-n xica cuu-n ndìhi téé ndèca-güedé cuánguihu-ǎ<sup>n</sup>, chi ñáyúhú càhá<sup>n</sup>-n —càchí-yu xǎhǎ<sup>n</sup>-yu xii-dé.

74 Te té Pèlú ní xáha<sup>n</sup>-dě xií-yu:

—Nchàcui<sup>t</sup>i Yá Ndiǒxí sá yǔhú càhá<sup>n</sup> ndáá-í sá ñà túú xìní-í téé càcunehe-ndo-á<sup>n</sup> —càchí-dé xǎha<sup>n</sup>-dě xií-yu.

Te òré-ni-á<sup>n</sup> nǐ cana ì<sup>n</sup> lǐhi.

75 Te ní ndacu iní té Pèlú nàcuáa ní xáha<sup>n</sup> Jèsús xii-dé sá cùmání-gǎ cana ì<sup>n</sup> lǐhi te úní xito cáhá<sup>n</sup>-dé sá ñà túú xìní ñáhá-dě xii-gá. Te ní quee-dé tnuú ñáyiu-á<sup>n</sup> cuáhá<sup>n</sup>-dé ì<sup>n</sup> xio ní ndáhyú víhí-dě ní ndixi cuèchi iní-dé.

## 27

*Ndèca-güedé Jèsús cuáhá<sup>n</sup> núú tǎ Pìlatú  
(Mr. 15:1; Lc. 23:1-2; Jn. 18:28-32)*

<sup>1</sup> Te sátá nǐ túndaá te nchaa cue téé cùu dútú cúnùu, ndìhi cue téé cùu sacuéhé nǔú ñáyiu isràél ní

ndatnúhu-güedé nàcuáa cada-güedé cahni-güedé Jèsús.

<sup>2</sup> Te ní dácútú ñàha-güedé xii-gá, te ndèca ñàha-güedé cuáhá<sup>n</sup> núú tẽ Pilatú tée cùu gobiernú.

### *Ní xíhí té Jùdás*

<sup>3</sup> Te té Jùdás tée ní sáha cuendá ñáhá xii Jesús ní cutnùní iní-dé sá cáhni ñàha-güedé xii-gá, te ní ndixi cuéchi iní-dé sá ñà túú ní quide váha-dé sá dúcá<sup>n</sup> ñi quide-dé ní sáha cuendá ñáhá-dě xii-gá núú cuè tée cùu úhú iní ñáhá, te ní xica-dé cuáhá<sup>n</sup>-dé danhòcáva-dé ócó úxí díhú<sup>n</sup> cuixí<sup>n</sup> núú cuè dútú cùnù-á<sup>n</sup>, ndihí núú cuè tée cùu sacuéhé núú ñàyiú israhél, chí diu cue tée-á<sup>n</sup> ñi sáñaha-güedé díhú<sup>n</sup> xii-dé.

<sup>4</sup> Te òré ní quexìo té Jùdás-á<sup>n</sup> núú ndécú-güedě, te xáha<sup>n</sup>-dě xii-güedé:

—Yúhú, ñá túú ní quide váha-í sá dúcá<sup>n</sup> ñi quide-í ní taxi cuendá-í ñ<sup>n</sup> tée ñá túú tñahí cuéchi-xi cahni-ndo-dé —càchí-dé xáha<sup>n</sup>-dě xii-güedé.

Te cue tée-á<sup>n</sup> ñi xáha<sup>n</sup>-güedě xii-dé:

—Nchúhú, ñá túú nǎgá cuendú cuiní-ndí cáhán ndihí ñàha-ndí xii-n, te mee-n nàha núu nása sàni iní-n càda-n —cachí-güedé xáha<sup>n</sup>-güedě xii-dé.

<sup>5</sup> Te té Jùdás ní dǎngoyo-dé díhú<sup>n</sup>-ǎ<sup>n</sup> xití veñúhu càhnu sá ìo cùnùu, te ní xica-dé cuáhá<sup>n</sup>-dé ní dácuèhné-dé méé-dé.

<sup>6</sup> Te cue dútú cùnùu ní naquehe<sup>n</sup>-güedé díhú<sup>n</sup>-ǎ<sup>n</sup>, te ní xitnàha-güedé:

—Díhú<sup>n</sup>-a ní quéyǎhu cuendá sá cùú ñ<sup>n</sup> ñáyíu, núu xíǎ<sup>n</sup> vá cùú nàchihi-o xití càjá núú ñúhú sǎ cùú cuendá Yǎ Ndiǒxí —càchí-güedé xitnàha-güedé.

7 Te ní ndatnúhu-güedé te ní cuu ñ<sup>n</sup>nuu-güedé cuendá nacuaa<sup>n</sup>-güedé ñ<sup>n</sup> xichi núú cáá ñ<sup>n</sup>uhu danani-güedé Núú Cuãha Nchaa Sá Cuãha Ñuhu, te xía<sup>n</sup> ñ<sup>n</sup> saa<sup>n</sup>-güedé cuendá xía<sup>n</sup> nguñdüxi nchaa ñáyu véxi xica.

8 Te ní nadáma ñ<sup>n</sup>uhu-á<sup>n</sup>, te vitna dànani-güedé Ñuhu Yáhu Níñí, duha dànani-güedé.

9 Te duca<sup>n</sup> ñ<sup>n</sup> cuu chi ní quee ndáá-xi nàcuáa ní cáhá<sup>n</sup> ndí Jeremiás téé ní xóo cáhá<sup>n</sup> tnúhu Yá Ndiõxí ndéé sanaha, te duha ní cachí ndí: “Cue téé isràél ní cachí-güedé sá òcò úxí díhú<sup>n</sup> cuixí<sup>n</sup> cháhu-güedé cuendá ñ<sup>n</sup> téé quehe<sup>n</sup> cuendá-güedé. Te díhú<sup>n</sup>-ã<sup>n</sup> nàquehe<sup>n</sup>-güedé,

10 te cuaa<sup>n</sup>-güedé ñ<sup>n</sup> xichi núú nání Nñú Cuãha Nchaa Sá Cuãha Ñuhu, te duca<sup>n</sup> càda-xi chi duca<sup>n</sup> ñ<sup>n</sup> cachí Yá Ndiõxí cunduu”, duha ní cachí ndí Jeremiás-á<sup>n</sup>.

### *Jèsús ndécú-gã núú tẽ Pilatú*

*(Mr. 15:2-5; Lc. 23:3-5; Jn. 18:33-38)*

11 Te Jèsús ndécú-gã núú tẽ Pilatú téé cùu go-biernú, te téé-á<sup>n</sup> ñ<sup>n</sup> xicá<sup>n</sup> tnúhú-dě núú-gã, te xãha<sup>n</sup>-dě xii-gá:

—¿Ndáá sá díú-n cùu-n téé yìndaha ñaha xii ñáyu isràél-ã<sup>n</sup>? —càchí-dé xãha<sup>n</sup>-dě xii-gá.

Te Jèsús ní xãha<sup>n</sup>-gã xii-dé:

—Diu-í yìndàha-í yu —càchí-gã xãha<sup>n</sup>-gã xii-dé.

12 Te cue dútú cúnùu ndihí cue téé cùu sacuéhé núú ñáyu isràél sàcá<sup>n</sup> cuéchi-güedé núú tẽ Pilatú cuendá Jèsús, dico mee-gã ni ñ<sup>n</sup> tnúhu ñá túú ní cáhá<sup>n</sup>-gá.

13 Te té Pilatú ní xãha<sup>n</sup>-dě xii-gá:

—Cáhá<sup>n</sup>, ná cuendá ñá túú cáhá<sup>n</sup>-n, te cundehe ñá ndéé duha titní cuéchi dàcaa cue téa-díquí-n —càchí-dé xáha<sup>n</sup>-dě xii-gá.

<sup>14</sup> Dico Jèsús ñá túú tnàhí ni cáhá<sup>n</sup>-gá, te té Pìlatú téa cùu gobiernú-á<sup>n</sup> ïo ní cuñúhu-dé sá dúcá<sup>n</sup> ñá túú tnàhí ni cáhá<sup>n</sup>-gá.

*Ní quide ndáá-güedé sá cáhni-güedé Jèsús  
(Mr. 15:6-20; Lc. 23:13-25; Jn. 18:38-19:16)*

<sup>15</sup> Te ndi tnahá nduu vico pascuá dácăcu té Pìlatú téa cùu gobiernú-á<sup>n</sup> ì<sup>n</sup> téa yìhi vecaá chi duca<sup>n</sup> tnàhí quide-dé, te mee ñăyiu cáhá<sup>n</sup>-yu te núu ndědacăa téa yìhi vecaá-á<sup>n</sup> căcu-dé te téa-á<sup>n</sup> dácăcu-dé.

<sup>16</sup> Te dává-á<sup>n</sup> yíhí ì<sup>n</sup> téa nàni Barrabás vecaá, te téa-á<sup>n</sup> ío cuendú-dé sá ïo nèhé ní quide-dé.

<sup>17</sup> Te ní natacá nchaa ñăyiu, te té Pìlatú ní xícá<sup>n</sup> tnúhú-dě núú-yu, te xáha<sup>n</sup>-dě:

—¿Ndědacăa núú ùú cue téa-a cuení-ndó dácăcu-í-güedé-í? ¿Té Barrabás ă<sup>n</sup> Jèsús téa nàni Cristú? —càchí-dé xáha<sup>n</sup>-dě xii-yu.

<sup>18</sup> Te duca<sup>n</sup> ñí cáhá<sup>n</sup> té Pìlatú, chi ní cutnùní iní-dé sá dicó sá cuedú iní-güedé duca<sup>n</sup> ñí quide-güedé ní sáha cuendá ñáhá-güedé xii Jèsús núú-dě.

<sup>19</sup> Te ñini núcóo té Pìlatú núú xèhndé-dé cuéchi ní tendaha ñàdihí-dé tnúhu cuáhá<sup>n</sup> núú-dě, te duha ndùu tnúhu ní tendaha-a<sup>n</sup>: “Vá cání ìní-n ñá cada-n tée ní taxi cuendá ñáhá-güedé xii-n, téa ñá túú tnàhí cuéchi-xi, chi icuini ío nèhé ní dácótó ñàha saní-í cuendá-dé”, duha ndùu tnúhu ní xáha<sup>n</sup>-a<sup>n</sup> xii té Pìlatú.

<sup>20</sup> Dico cue téa cùu dútú cúnùu, ndihi cue téa cùu sacuéhé núú ñăyiu isràél ní xáha<sup>n</sup>-güedé xii ñăyiu sá ná cùñáhá-yu xii té Pìlatú dácăcu-dé té

Barràbás te cahni-dé Jèsús, te ní quidé-yu nàcuáa ní xáha<sup>n</sup>-güedě.

<sup>21</sup> Te té Pìlatú-á<sup>n</sup> nǐ xáha<sup>n</sup> tùcu-dé xií-yu:

—¿Ndědacàa núú ùú cue téa-a cuìní-ndó dàcácu-í?  
—càchí-dé xǎha<sup>n</sup>-dě xií-yu.

Te ní xáhǎ<sup>n</sup>-yu xii-dé:

—Té Barràbás dàcácu-n —càchí-yu xǎhǎ<sup>n</sup>-yu xii-dé.

<sup>22</sup> Te té Pìlatú ní xícá<sup>n</sup> tnúhú-dě núú-yu, te xǎha<sup>n</sup>-dě:

—¿Te ná cuìní-ndó càda-í Jèsús téa nàni Cristú téa càchí sá Yǎ Ndiǒxí ní tendaha ñàha xii-dé véxi-dé ñuyíú-a-í? —càchí-dé xǎha<sup>n</sup>-dě xií-yu.

Te nchaá-yu ní cáhá<sup>n</sup>-yu, te xǎhǎ<sup>n</sup>-yu:

—Cata caa-dé núú cùrúxí —càchí-yu xǎhǎ<sup>n</sup>-yu xii-dé.

<sup>23</sup> Te té Pìlatú ní xáha<sup>n</sup> tùcu-dé xií-yu:

—¿Te ná cúú cuěchi ní quide-dé nǔu duca<sup>n</sup> cuìní-ndó càda-í-dé-í? —càchí-dé xǎha<sup>n</sup>-dě xií-yu.

Dico nchaá-yu uu<sup>n</sup>-gá níhi ní cáhá<sup>n</sup>-yu, te xǎhǎ<sup>n</sup>-yu xii-dé:

—¿Cata caa-dé núú cùrúxí! —càchí-yu xǎhǎ<sup>n</sup>-yu xii-dé.

<sup>24</sup> Te té Pìlatú ní cutnùní iní-dé sá vǎ nihí-dé nàcuáa cada-dé, chí uu<sup>n</sup>-gá ní nguíta ñáyíu xícuáá-yu, te xǎhǎ<sup>n</sup> ní xícá<sup>n</sup>-dé ndute ní ndáhá-dě núú nchàa ñáyíu, te ní xáha<sup>n</sup>-dě xií-yu:

—Téa-a cùu-dé ì<sup>n</sup> téa ñá túú tnàhí cuéchi-xi, te nchòhó cuìní-ndó sǎ cùú-dé, dico ñíu-ni mee-ndo cuído yáhu-ndo-dě chí yúhú vá cuídó yǎhu-í-dé —càchí-dé xǎha<sup>n</sup>-dě xií-yu.

<sup>25</sup> Te nchaá-yu ní xáhǎ<sup>n</sup>-yu xii-dé:

—jDiu nchúhú ndihi cue déhe-ndí cuido yǎhu-ndí-dé! —càchí-yu xǎhǎ<sup>n</sup>-yu.

26 Te sátá dúcá<sup>n</sup> te té Pìlatú ní dácăcu-dé té Barrábás, te ní táuchíú<sup>n</sup>-dē ní cani-güedé Jèsús. Te sátá dúcá<sup>n</sup> nǐ quide ñaha-güedē xii-gá, te ní táuchíú<sup>n</sup>-dē candeca ñaha-güedē xii-gá quíhí<sup>n</sup> cata caa ñaha-güedē xii-gá núú cùrúxí.

27 Te cue tée cùu sandadú té Pìlatú ndécá-güedē Jèsús cuánguihu xítí vehe cǎhnu cuu cuendá-dé, te cue tée cùu sandadú-á<sup>n</sup> nǐ cana-güedé dava-gá cue sandadú núú dúcá<sup>n</sup> ndēca-güedé Jèsús cuánguihu-á<sup>n</sup>.

28 Te xía<sup>n</sup> nǐ taunuu-güedé dóo-gǎ, te ní dácuíhnú ñaha-güedé xii-gá ì<sup>n</sup> dóo tícuèhé víhí.

29 Te ní cadúha-güedé ì<sup>n</sup> coróná iñu ní chihi-güedé díquí-gǎ, te ní chitnǐ-güedé ì<sup>n</sup> carrutí ndaha cùha-gá, te ní ngüíñí xítí-güedé núú-gǎ cúdíquí ndeé ñáhá-güedé xii-gá, te xǎha<sup>n</sup>-güedē:

—jÍo cǎhnu cuu yohó tée yìndaha ñaha xii ñáyiu isràél! —càchí-güedé xǎha<sup>n</sup>-güedē xii-gá.

30 Te ní tíú dí ñáhá-güedé xii-gá, te ní quehe<sup>n</sup>-güedé carrutí sá nǐ sáñaha-güedé xii-gá te ní ducun-güedé díquí-gǎ.

31 Te sátá nǐ yáha ní cudíquí ndeé ñáhá-güedé xii-gá, te ní nataunuu ñaha-güedé xii-gá dóo tícuèhé víhí sǎ nǐ dácuíhnú ñaha-güedé xii-gá, te ní dándǐúnuu ñaha-güedé xii-gá dóo méé-gǎ, te dǎtnùní ndécá ñaha-güedé cuáhá<sup>n</sup> núú cátá cǎa ñaha-güedé xii-gá núú cùrúxí.



*Sàta caa-güedé Jèsús núú cùrúxí  
(Mr. 15:21-32; Lc. 23:26-43; Jn. 19:17-27)*

<sup>32</sup> Te ñùhu-güedé ndihì-gá ichi, te ní naníhí-güedě ñ<sup>n</sup> téé ñúú Cìrené nání-dě Xǐmú, te téé-án ñǐ quide yica-güedě ní xido-dé cùrúxí sá nchídó Jèsús.

<sup>33</sup> Te ní sáá-güedé ndihì-gá ñ<sup>n</sup> xichi núú nání Gǒlgotá, te tnúhu-án<sup>n</sup> quée-xí: Núú nání yìquì díquì ndǐyì, duha quèe-xi tnúhu-án<sup>n</sup>.

<sup>34</sup> Te xíán sǎñaha-güedě ndudí úá coho-gá ní cùu, te ñá túú ní xìhi-gá chi dico-ni ní xito ndée-gá.

<sup>35</sup> Te ní sata caa ñaha-güedě xii-gá núú cùrúxí, te sátá dúcá<sup>n</sup> te cue téé cùu sandadú-án<sup>n</sup> ñǐ xito ndée-güedé ñúu ndědacàa-güedé cuu cuendá-güedé dóó-gá. Te duca<sup>n</sup> ñǐ cuu chi ní quee ndáá-xi nàcuáa ní cáhá<sup>n</sup> ñ<sup>n</sup> téé ní xóo cáhá<sup>n</sup> tnúhu Yá Ndiǒxí ndée sanaha yòdo tnuní núú tütú-gá, te duha càchí-xi: “Ní xito ndée-güedé ñúu ndědacàa-güedé cuu cuendá-güedé dóó-gǎ”, duha ní cachí téé-án<sup>n</sup> te duca<sup>n</sup> ñǐ ngódó tnuní núú tütú-gá.

<sup>36</sup> Te sátá dúcá<sup>n</sup> ñǐ quide-güedé, te ní ngóo-güedé ndèè ñáhá-güedě xii-gá.

<sup>37</sup> Te ní taxi ndecu-güedé ñ<sup>n</sup> sá ndèè lètrá ndàa díquí-gǎ. Te lètrá-án<sup>n</sup> càhá<sup>n</sup>-xi ná cuendá duca<sup>n</sup> ñǐ quide ñaha-güedě xii-gá, te duha càhá<sup>n</sup> lètrá-án<sup>n</sup>: “Tée-a cùu-dé téé yìndaha ñaha xii ñáyìu isràél”, duha càchí-xi.

<sup>38</sup> Te tnàhá úú cue téé cùu ñadúhú ñǐ sata caa-güedé díu-ni núú cùrúxí tucu, te ñ<sup>n</sup>-dé ní sata caa-güedé xio cùha-gá, te ìngá-dé ní sata caa-güedé xio dàtni-gá.

<sup>39</sup> Te nchaa ñáyìu yǎha yatni núú tácaà-gá-án<sup>n</sup>, te dàcuicó-yu díquǐ-yu ndèhe ñáhá-yu xii-gá, te

xĩcuèhé ñáhă-yu.

<sup>40</sup> Te xăhă<sup>n</sup>-yu xii-gá:

—Yòhó cächí-n să dàngoyo-n veñúhu cahnú sá ïo cùnūu, te dandàa-n ingá veñúhu saa, te xití úní-ni nduu sa nadaxĩnu-n, te vitna tanūu núú cùrúxí-á<sup>n</sup> dàcácu-n mēe-n te núu ndisa sá Dēhe Yá Ndiōxí cúú-n —cächí-yu xăhă<sup>n</sup>-yu xii-gá.

<sup>41</sup> Te diu-ni duca<sup>n</sup> cùdiquí ndeé ñáhá cuè tée cùu dútú cùnūu xii-gá, ndihí cue tée dàcuaha ñaha xii ñáyiu nchaa tnúhu ní chídó tnùní ndí Moisés, ndihí cue tée cùu fariséú, ndihí cue tée cùu sacuéhé núú ñáyiu isrâél, te xĩtnàha-güedé:

<sup>42</sup> —Tée-a ní ndacu-dé ní dácăcu-dé dava ñáyiu, te mee-dě ñá ndácú-dě dàcácu nihnu-dé mēe-dě. Te núu ndisa sá cúú-dě tée yĩndaha ñaha xii ñáyiu isrâél, te na cundehe-o nuu-dé núú cùrúxí-a cuendá quĩndáá iní-ó-dě.

<sup>43</sup> Te cächí-dé sá sàndáá iní-dé Yă Ndiōxí, te mee-gă ná dàcácu ñaha-gă xii-dé te núu cùndahú iní ñáhá-gă, chi mee-dě cächí-dé sá Dēhe-gá cúú-dě —cächí-güedé xĩtnàha-güedé.

<sup>44</sup> Te ndeé tnàhá cue tée cùu ñadúhú táca xio xio diñi-gá xĩcuèhé ñáhá-güedé xii-gá.

*Ní xĩhí Jèsús*

*(Mr. 15:33-41; Lc. 23:44-49; Jn. 19:28-30)*

<sup>45</sup> Te òré ní cuu cuádava nduu te ní cunee nihí ñuyíú, te duca<sup>n</sup>-ni cãa ní cuu caá úní sacuaa.

<sup>46</sup> Te òré sa ta cùyatni cuu caá úní sacuaa-á<sup>n</sup>, te níhi ní cáhá<sup>n</sup> Jèsús, te cächí-gá:

—Èlí, Èlí, ¿láma sabàctaní? —cächí-gá.

Te tnúhu-án quée-xí: Ndiöxí méè-í, Ndiöxí méè-í, ¿ná cuendá ní dáñá ñàha-n xii-í?, duha quée-xi tnúhu-án.

47 Te dava cue téé xĩndecu yatni núú táca-gá-án ñĩ tecú dóho-güedé nàcuáa ní cáhá<sup>n</sup>-gá, te ní xítñàha-güedé:

—Tée-a càna-dé té Èliás —càchí-güedé xítñàha-güedé.

48 Te òré-ni-án ñĩ quene cunu ì<sup>n</sup> cue téé xĩndecu-án ñĩ quehe<sup>n</sup>-dé luha cáchí, te ní chindóyo-dé xití ndudí íá, te ní chinenu-dé díquí ì<sup>n</sup> yutnu càni te ní ndocani-dé ní chihi-dé yuhu-gá.

49 Te dava-güedé ní xáha<sup>n</sup>-güedě xii téé-án:

—Cundetü tnaa na cundehe-o nacoto núú quixi té Èliás dàcácu ñaha-dě xii-dé —càchí-güedé xáha<sup>n</sup>-güedě xii téé-án.

50 Te Jèsús níhi ní cana saa-gá, te ní xihí-ni-gá.

51 Te sátá dúcá<sup>n</sup> te ní ndátá dđó cúú còrtiná xití veñúhu càhnu sá ìo cùnuu ní quée dava ndáá, te ndàa núú ñĩnu ní ngüíta-xi ní ndátá, te ní tnáa, te dava cava nàhnu ní táhú.

52 Te dava yaú núú yĩndüxi ñáyiú ní xihí ní sándáá iní ñáhá xii Yá Ndiöxí ní nacaá<sup>n</sup> te ní ndotó-yu.

53 Te sátá ñĩ yáha ní ndoto Jèsús, te cue ñáyiú ní ndoto-án cuãngüihú-yu xití ñúú Jerusálén, te cue ñáyiú ñúú-án ìo vài-yu ní xiní-yu cue ñáyiú duca<sup>n</sup> ñĩ ndoto-án.

54 Te sá dúcá<sup>n</sup> nãndi ní quide-xi, ndihí sá dúcá<sup>n</sup> ñĩ tnáa xíã<sup>n</sup> ío ní yùhú téé cùu capitá<sup>n</sup> ndihí nchaa dava-gá cue téé ndècu ndihí-dé ndèè-güedé yiqui cùñú Jèsús, te ní xítñàha-güedé:

—Sá ndàá ndisa sá díú tǝe-a cùu-dé Déhe Yá Ndiòxí ní cùu —cachí-güedé xǝtnàha-güedé.

<sup>55</sup> Te xica xǝnutníi vài ñáyiú dìhí ndéhǝ-yu nchaa nàcuáa ní quide ñaha-güedǝ xii Jèsús, te ñáyiú-án cùǝ-yu ñáyiú ní chindéé-yu Jèsús, te ndéé distritú Galiléa ní chinchícú<sup>n</sup> ñáhǝ-yu xii-gá.

<sup>56</sup> Te tnuú ñáyiú-án tnàhá tá Màriá Magdalèná, ndihí tá Màriá nǎná tǝ Jàcobó ndihí té Chéé, ndihí nǎná cue déhe té Zebèdeú.

### *Chìndúxi-güedé Jèsús*

*(Mr. 15:42-47; Lc. 23:50-56; Jn. 19:38-42)*

<sup>57</sup> Te ndècu ì<sup>n</sup> tée cuica nàni-dé Chéé te cùu-dé tée ñúú Arimateá, te tnàhá-dé ní tnahá tnúhu-dé ndihí Jèsús. Te òré sa ní cuaa,

<sup>58</sup> te ní sáhá<sup>n</sup>-dé núú tǝ Pìlatú, te xǝhah<sup>n</sup>-dǝ ñúu vá cùndèe iní-dé dañ-a-dǝ chindúxi-dé yìquì cùñú Jèsús. Te té Pìlatú-án ñí sáha-dé tnúhu, te ní táúchíú<sup>n</sup>-dǝ sá cuǝha cuèndá-güedé té Chéé-án yìquì cùñú-gá.

<sup>59</sup> Te té Chéé-án ñí quehe<sup>n</sup> cuèndá-dé yìquì cùñú-gá, te ní chidúcú<sup>n</sup>nuu-dé ì<sup>n</sup> dóó cuèxí<sup>n</sup> dóó cándò.

<sup>60</sup> Te sa nchìí ì<sup>n</sup> yaú sáá ñí caá<sup>n</sup> té Chéé-án ì<sup>n</sup> yìquì naha càva te xíá<sup>n</sup> cúú cuèndá-dé, te yaú-án ñí chihi-dé yìquì cùñú Jèsús, te dǎtnùní ní sadí-dé ì<sup>n</sup> yúú cáhnú yǝ quèhé<sup>n</sup> yuhu yaú-án, te ní xica-dé cuánuhú-dé.

<sup>61</sup> Te tnàhá tá Màriá Magdalèná, ndihí ìngá xíchí nání Màriá ní quexió-yu ní ngóo-yu yatni núú nchìí yaú-án.

*Cue tée ndéé yaú núú yíhí yìquì cùñú Jèsús*

62 Te sáta nĩ yáha ní quide túha ñáyi nchaa sá nándĩhi-yu nduu tněe nduu ndètatú-yu-á<sup>n</sup>, te dıu-ni nduu ndètatú-yu-á<sup>n</sup> nĩ sáhá<sup>n</sup> cue dútú cúnùu, ndihi cue tée cùu fariséu ní cáhá<sup>n</sup> ndihi-güedé té Pìlatú.

63 Te xăha<sup>n</sup>-güedě xii-dé:

—Yòhó tée cùnuu, véxi-ndí cächí tnúhu-ndí sá nĩ ndacu iní-ndí sá tēe ndehnde nĩ xihí-ă<sup>n</sup> cächí-dé òré ndécú-gă-dé sá ndùu únı sá cùú-dé, te ndoto-dé.

64 Te tendaha-n cue tée na quihí<sup>n</sup>-güedé cundeé-güedé yuhu yaú núú nĩ chihi-güedé yiqui cùñú-dé, chi na cuáhá<sup>n</sup> quihí<sup>n</sup> cue tée ní xica cuu ndihi-dé duhu-güedě yiqui cùñú-dé, te cùñaha-güedě xii ñáyi sá nĩ ndoto-dé. Chi núu duca<sup>n</sup> na càda-güedé te ío-gá dandàhú-güedé cue ñáyi dàcúxı dàtná ní quide mee tēe ní xihí-ă<sup>n</sup> —cächí-güedé xăha<sup>n</sup>-güedě.

65 Te té Pìlatú ní xăha<sup>n</sup>-dě xii-güedé:

—Náu cue sandádú-a candeca-ndo-güedě quihí<sup>n</sup>, te cadı váha-ndo ndihi-güedé yuhu yaú-á<sup>n</sup> nàcuáa tàú-xi cunduu, te na cundeé-güedé nàcuáa sàni inı-ndó cunduu —cachí-dé xăha<sup>n</sup>-dě xii-güedé.

66 Te cue tée-á<sup>n</sup> nĩ xica-güedé cuáhá<sup>n</sup>-güedé, te ní tee-güedé ìñ sèñá yúú ndèdí yèhe yaú-á<sup>n</sup>, te ní dándõ-güedé cue sandádú-á<sup>n</sup> ndèè-güedé yaú-á<sup>n</sup>, te duca<sup>n</sup> nĩ quide-güedé cuendá sá vă yõ quihí<sup>n</sup> nacaá<sup>n</sup> yaú-á<sup>n</sup>.

## 28

*Nı ndoto Jèsús*

*(Mr. 16:1-8; Lc. 24:1-12; Jn. 20:1-10)*

1 Te sátá nǐ yáha nduu ndètátú ñáyiu, te ndumìngú nehé víhí-ní nǐ xica tá Màriá Magdalèná ndihí ingá xíchí nání Màriá cuángotó-yu yaú núú nǐ chihi-güedé yìqui cùñú Jèsús.

2 Te uu<sup>n</sup>ni níhi víhi ní tnáa, te òré duca<sup>n</sup> nǐ quide-xi chi ñ<sup>n</sup> espíritú xínú cuèchi núú Yă Ndiǒxí ní quexìo-xi núú dúcá<sup>n</sup> nchìi yaú núú nǐ chihi-güedé yìqui cùñú Jèsús, te ní xócání espíritú-á<sup>n</sup> yúú ndèdí yèhe yaú-á<sup>n</sup> te ní ngóo-xi núú yúú-á<sup>n</sup>.

3 Te dàtná dátăsa<sup>n</sup>-xi òré sàá ndúté dùca<sup>n</sup> datăsa<sup>n</sup>-xi núú espíritú-á<sup>n</sup>, te dóó níhnú-xí cuixí<sup>n</sup> quiyí.

4 Te òré duca<sup>n</sup> nǐ quide-xi te cue sandàdú ndèé yaú-á<sup>n</sup> nǐ quidi ñaha-xi xii-güedé sá nǐ yùhú-güedé, te ní nduá-güedé, te ní xíta sá xini tnùnì-güedé.

5 Te espíritú-á<sup>n</sup> nǐ xáha<sup>n</sup>-xi xii cue ñáyiu dìhí cuángoto yaú-á<sup>n</sup>:

—Nchòhó ñáyiu dìhí véxi coto yaú-a, vá yùhú-ndó chi yùhú cútnùnì iní-í sá nchòhó véxi-ndo nànducu-ndo yìqui cùñú Jèsús Yaá ní xihí núú cùrúxí.

6 Dico Yaá-á<sup>n</sup> chi ñá túú-gă ndécú yìqui cùñú-gá iha, chi sa ní ndoto-gá, te diu duca<sup>n</sup> nǐ cachí-gá sá ndótó-gă cútnàhá vátá cùú-gá, te chí táquixi cundehe-ndo núú nǐ sacá<sup>n</sup>-güedé yìqui cùñú-gá ní cùu te quini-ndó nă ñá túú-gă.

7 Te vitna ío ndihí chí cuahá<sup>n</sup> núú xĩndecu cue téé ní xica cuu ndihí-gá, te duha cúñaha-ndo xii-güedé: “Ní ndoto Jèsús Yaá ní xihí ní cùu, te codonùu-gá núú-ndó quihí<sup>n</sup> distritú Galiléa te yácá<sup>n</sup> quini-ndó-gă”, duha cúñaha-ndo xii-güedé.

Duha ndùu tnúhu ní cachí tnúhu-í xii-ndo —càchí espíritú-án xáha<sup>n</sup>-xi xii cue ñáyiú ðíhí-án.

<sup>8</sup> Te cue ñáyiú ðíhí-án ñí natnii-yu ichi, te súúní ndíhi cuánuhú-yu núú xíndecu cue téé ní xica cuu ndíhi Jèsús cuéndá nacani tnúhu-yu núú-güedě nàcuáa ní xáha<sup>n</sup> espíritú-án xii-yu, te cuéi ní yùhú-yu dico súúní cùdíí ìní-yu.

<sup>9</sup> Te ichi ñùhú-yu cuánuhú-yu, te na iní-yu ní quexio Jesús núú-yu ní dándácóo váha ñaha-gã xii-yu. Te ñáyiú-án ñí ngüíñí xii-yu núú-gã, te ní numi ñàhá-yu xii-gá, te ní chiñuhu ñàhá-yu.

<sup>10</sup> Te ní xáha<sup>n</sup>-gã xii-yu:

—Vá yùhú-ndó, chí cuàhá<sup>n</sup> cúñaha-ndo xii cue téé ní xica cuu ndíhi-í sá ná quíhí<sup>n</sup>-güedé distritú Galiléa, te yàcá<sup>n</sup> quiní ñàhá-güedě xii-í —càchí-gá xáha<sup>n</sup>-gã xii-yu.

*Nàcuáa ndùu tnúhu ní nacani cue sandàdú*

<sup>11</sup> Te ñini ñùhu cue ñáyiú ðíhí-án ichi cuánuhú-yu, te dava cue sandàdú cue téé ndèé yaú-án ní cùu ní xica-güedé cuánuhú-güedé ñuú cuéndá nacani tnúhu-güedé núú cuè téé cùu dútú cúnùu nàcuáa ní cuu.

<sup>12</sup> Te cue téé cùu dútú cúnùu-án ñí quide-güedé jùndá ndíhi cue téé cùu sacuéhé núú ñáyiú isràél, te ní ndatnúhu-güedé nàcuáa cada-güedé, te ní quide ndáá-güedé ndíhi cue sandàdú-án sã cuñaha-güedě vài díhú<sup>n</sup> cuéndá dacuàndehnde-güedé.

<sup>13</sup> Te ní xáha<sup>n</sup>-güedě xii cue sandàdú-án:

—Cuíni-ndí sá vã càhá<sup>n</sup> ndáá-ndó núú ñáyiú nàcuáa ní cuu, chí cúñaha-ndo xii-yu sá óré xidí-ndó ñí quixi cue téé ní xica cuu ndíhi-dé

ní dúhú-güedě yiqui cùñú-dé néhé-güedě cuáhán, duha cùñaha-ndo xii-yu.

14 Te núu na nihí té Pilatú téé cùu gobiernú tnúhu nàcuáa cùñaha-ndo xii ñáyiú, te nchúhú cada ndáá-ndí ndihí-dé cuendá sá ñà túú nă cada ñaha-dě xii-ndo —càchí-güedé xăha<sup>n</sup>-güedě xii cue sandàdú-án.

15 Te cue sandàdú-án nă quehe<sup>n</sup> cuendá-güedé dîhú<sup>n</sup>, te ní xica-güedé cuáhán-güedé te ní cáhán-güedé nàcuáa ní xáha<sup>n</sup> cuè téé-án căhá<sup>n</sup>-güedé. Te nchaa ñáyiú isrâél ní níhî-yu tnúhu ní cáhán-güedé-án, te dîu-ni tnúhu-án cáhán-yu ndéé vitna.

*Jèsús xăha<sup>n</sup>-gă xii cue téé ní xica cuu ndihí-gă nàcuáa ndiú chiu<sup>n</sup> cada-güedé*

*(Mr. 16:14-18; Lc. 24:36-49; Jn. 20:19-23)*

16 Te ndi úxí ñ<sup>n</sup> cue téé ní xica cuu ndihí Jèsús ní xica-güedé cuáhán-güedé ñ<sup>n</sup> yucu càa dis-tritú Galileá núú nă xáha<sup>n</sup>-gă naníhî tnáhá-güedě ndihí-gă.

17 Te òré ní xiní-güedé Jèsús te ní chiñuhu ñaha-güedě xii-gă, dico dava-güedé sàni ñ<sup>n</sup> sani úú iní-güedé nŭu dîu-gă àdi ñă díú-gă.

18 Te Jèsús ní sándehe yatni-gă ndéé núú-güedě, te ní xáha<sup>n</sup>-gă xii-güedé:

—Yúhú ndécú ndihí-í tnúhu ndee ìní táxí tnùn-í cuèi andiú te cuèi ñuyú-a.

19 Te vitna tàuchiú<sup>n</sup>-í sá quihí<sup>n</sup>-ndó nihíí ñuyíú căhá<sup>n</sup>-ndó tnŭhu-í núú ñáyiú cuendá tuha ñàhá-yu xii-í, te dacuàndute-ndó-yu. Te òré duca<sup>n</sup> càda-ndo, te cacunehe-ndo tătá-ó Dŭtú Ndiöxí ndihí yúhú Yaá cúú Dêhe-gă ndihí Espiritú-gă.



20 Te cúñaha-ndo xii-yu sá ná càdá-yu nchaa nàcuáa sa ní dánèhé ñáhà-í xii-ndo càda-ndo. Te na cächí tnúhu-í sá cùndècu ndihi ñaha-ni-í xii-ndo ñùyíú-a ndéé ná sàá nduu nàa-xi —cachí-gá xǎha<sup>n</sup>-gǎ xii-güedé. Te duca<sup>n</sup> na cùnduu.

**Tnúhu ní cáhá<sup>n</sup> yǎ ndiǒxí xito cùu uú**  
**New Testament in Mixtec, Peñoles (MX:mil:Mixtec,**  
**Peñoles)**

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

**Copyright Information**

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Peñoles

**© 2002, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

872f7754-0986-5ecd-a059-925a708a6939